

Namo tassa bhagavato arahato sammāsambuddhassa

Khuddakanikāye

Nettipakaraṇapāḷi

1. Saṅgahavāro

Yaṃ loko pūjayate, salokapālo sadā namassati ca;
Tassetta sāsanaṃ, vidūhi ñeyyaṃ naravarassa.

Dvādasa padāni suttam, taṃ sabbaṃ byañjanaṃ attho ca;
Taṃ viññeyyaṃ ubhayaṃ, ko attho byañjanaṃ katamaṃ.

Soḷasahārā netti [nettī (ka.)], pañcanayā sāsanaṃ pariyetthi;
Aṭṭhārasamūlapadā, mahakaccānena [mahākaccānena (sī.)] niddiṭṭhā.

Hārā byañjanavicayo, suttassa nayā tayo ca suttattho;
Ubhayaṃ pariggahītaṃ, vuccati suttam yathāsuttam.

Yā ceva desanā yaṃca, desitaṃ ubhayaṃ viññeyyaṃ;
Tatrāyamānupubbī, navavidhasuttantapariyēṭṭhīti.

Saṅgahavāro.

2. Uddesavāro

1. Tattha katame soḷasa hārā? Desanā vicayo yutti padaṭṭhāno lakkhaṇo catubyūho āvaṭṭo vibhatti parivattano vevacano paññatti otaraṇo sodhana adhiṭṭhāno parikkhāro samāropano iti.

Tassānugīti

Desanā vicayo yutti, padaṭṭhāno ca lakkhaṇo;
Catubyūho ca āvaṭṭo, vibhatti parivattano.

Vevacano ca paññatti, otaraṇo ca sodhana;
Adhiṭṭhāno parikkhāro, samāropano soḷaso [soḷasa (sī.)].

Ete soḷasa hārā, pakittitā atthato asaṃkiṇṇā;
Etesañceva bhavati, vitthāratayā nayavibhattīti.

2. Tattha katame pañca nayā? Nandiyāvaṭṭo tipukkhalo sīhavikkīḷito disālocano aṅkuso iti.

Tassānugīti

Paṭhamo nandiyāvaṭṭo, dutiyo ca tipukkhalo;
Sīhavikkīḷito nāma, tatiyo nayalañjako [nayaḷaṅjako (sī.)].

Disālocanamāhaṃsu, catutthaṃ nayamuttamaṃ;
Pañcama aṅkuso nāma, sabbe pañca nayā gatāti.

3. Tattha katamāni aṭṭhārasa mūlapadāni? Nava padāni kusalāni nava padāni akusalāni. Tattha katamāni nava padāni akusalāni, taṇhā avijjā lobho doso moho subhasaññā sukhasaññā nīccasaññā attasaññāti, imāni nava padāni akusalāni, yattha sabbo akusalapakkho saṅghaṃ samosaraṇaṃ gacchati.

Tattha katamāni nava padāni kusalāni? Samatho vipassanā alobho adoso amoho asubhasaññā dukkhasaññā anīccasaññā anattasaññāti, imāni nava padāni kusalāni, yattha sabbo kusalapakkho saṅghaṃ samosaraṇaṃ gacchati.

Tatridaṃ uddānaṃ

Taṇhā ca avijjāpi ca, lobho doso tatheva moho ca;
Caturo ca vipallāsā, kilesabhūmī nava padāni.

Samatho ca vipassanā ca, kusalāni ca yāni tīṇi mūlāni;
Caturo satipaṭṭhānā, indriyabhūmī nava padāni.

Navahi ca padehi kusalā, navahi ca yujjanti akusalapakkhā;
Ete kho mūlapadā, bhavanti aṭṭhārasa padānīti.

Uddesavāro.

3. Niddesavāro

4. Tattha saṅkhepato netti kittitā.

Hārasaṅkhepo

1. Assādādīnavatā, nissaraṇampi ca phalaṃ upāyo ca;
Āṇattī ca bhagavato, yogīnaṃ **desanāhāro**.
2. Yaṃ pucchitaṅca vissajjitaṅca, suttassa yā ca anugīti;
Suttassa yo pavicayo, hāro **vicayoti** niddiṭṭho.
3. Sabbesaṃ hārānaṃ, yā bhūmī yo ca gocaro tesam;
Yuttāyuttaparikkhā, hāro **yuttīti** niddiṭṭho.
4. Dhammaṃ deseti jino, tassa ca dhammassa yaṃ padaṭṭhānaṃ;
Iti yāva sabbadhammā, eso hāro **padaṭṭhāno**.
5. Vuttamhi ekadhamme, ye dhammā ekalakkaṇā keci;
Vuttā bhavanti sabbe, so hāro **lakkhaṇo** nāma.
6. Neruttamadhippāyo, byañjanamatha desanānidānaṅca;
Pubbāparānusandhī, eso hāro **catubyūho**.
7. Ekamhi padaṭṭhāne, pariyesati sesakaṃ padaṭṭhānaṃ;
Āvaṭṭati paṭipakkhe, **āvattō** nāma so hāro.

8. Dhammañca padaṭṭhānaṃ, bhūmiñca vibhajjate ayaṃ hāro;
Sādhāraṇe asādhāraṇe ca neyyo **vibhattī**.
9. Kusalākusale dhamme, niddiṭṭhe bhāvite pahīne ca;
Parivattati paṭipakkhe, hāro **parivattano** nāma.
10. Vevacanāni bahūni tu, sutte vuttāni ekadhammassa;
Yo jānāti suttavidū, **vevacano** nāma so hāro.
11. Ekaṃ bhagavā dhammaṃ, paññattīhi vividhāhi deseti;
So ākāro ñeyyo, **paññattī** nāma hāroti.
12. Yo ca paṭiccuppādo, indriyakhandhā ca dhātu āyatanā;
Etehi otarati yo, **otaraṇo** nāma so hāro.
13. Vissajjitamhi pañhe, gāthāyaṃ pucchitāyamārabbha;
Suddhāsuddhaparikkhā, hāro so **sodhano** nāma.
14. Ekattatāya dhammā, yepi ca vemattatāya niddiṭṭhā;
Tena vikappayitabbā, eso hāro **adhiṭṭhāno**.
15. Ye dhammā yaṃ dhammaṃ, janayantippaccayā paramparato;
Hetumavakaḍḍhayitvā, eso hāro **parikkhāro**.
16. Ye dhammā yaṃ mūlā, ye cekatthā pakāsītā muninā;
Te samaropayitabbā, esa **samāropano** hāro.

Nayasankhepo

17. Taṇhañca avijjampi ca, samathena vipassanā yo neti;
Saccehi yojayitvā, ayaṃ nayo **nandiyāvaṭṭo**.
18. Yo akusale samūlehi, neti kusale ca kusalamūlehi;
Bhūtaṃ tathaṃ avitathaṃ, **tipukkhalam** taṃ nayaṃ āhu.
19. Yo neti vipallāsehi, kilese indriyehi saddhamme;
Etaṃ nayaṃ nayavidū, **sīhavikkīlitam** āhu.
20. Veyyākaraṇesu hi ye, kusalākusalā tahiṃ tahiṃ vuttā;
Manasā volokayate, taṃ khu **disālocanam** āhu.
21. Oloketvā disalocanena, ukkhipiya yaṃ samāneti;
Sabbe kusalākusale, ayaṃ nayo **aṅkuso** nāma.
22. Soḷasa hārā paṭhamam, disalocanato [\[disalocanena \(ka.\)\]](#) disā viloketvā;
Saṅkhipiya aṅkusena hi, nayehi tīhi niddise suttam.

Dvādasapada

23. Akkharam padaṃ byañjanam, nirutti tatheva niddeso;
Ākārachaṭṭhavacanam, ettāva byañjanam sabbam.

24. Saṅkāsanā pakāsanā, vivaraṇā vibhajanuttānīkammaapaññatti;
Etehi chahi padehi, attho kammañca niddiṭṭhaṃ.
25. Tīṇi ca nayā anūnā, atthassa ca chappadāni gaṇitāni;
Navahi padehi bhagavato, vacanassattho samāyutto.
26. Atthassa navappadāni, byañjanapariyeṭṭhiyā catubbīsa;
Ubhayaṃ saṅkalayitvā [saṅkhepayato (ka.)], tettiṃsā ettikā nettīti.

Niddesavāro.

4. Paṭiniddesavāro

1. Desanāhāravibhaṅgo

5. Tattha katamo desanāhāro? “Assādādīnavatā”ti gāthā ayaṃ desanāhāro. Kiṃ desayati? Assādaṃ ādīnavam nissaraṇam phalaṃ upāyaṃ āṇattim. Dhammaṃ vo, bhikkhave, desessāmi ādikalyāṇam majjhakalyāṇam pariyoṣānakalyāṇam sāttham sabyañjanam kevalaparipuṇṇam parisuddham brahmacariyaṃ pakāsessāmīti.

Tattha katamo assādo?

“Kāmaṃ [kāmamādikā imā cha gāthā su. ni. 772 passitabbā] kāmayamānassa, tassa cetam samijjhati;
Addhā pītimano hoti, laddhā macco yadicchatī”ti.

Ayaṃ assādo.

Tattha katamo ādīnavo?

“Tassa ce kāmayānassa, chandajātassa jantuno;
Te kāmā parihāyanti, sallaviddhova ruppatī”ti.

Ayaṃ ādīnavo.

Tattha katamaṃ nissaraṇam?

“Yo kāme parivajjeti, sappasseva padā siro;
Somaṃ visattikaṃ loke, sato samativattatī”ti.

Idaṃ nissaraṇam.

Tattha katamo assādo?

“Khettaṃ vatthum hiraññaṃ vā, gavāssaṃ dāsaporisaṃ;
Thiyo bandhū puthū kāme, yo naro anugijjhatī”ti.

Ayaṃ assādo.

Tattha katamo ādīnavo?

“Abalā naṃ balīyanti, maddante naṃ parissayā;
Tato naṃ dukkhamanveti, nāvaṃ bhinnamivodaka”nti.

Ayaṃ ādīnavo.

Tattha katamaṃ nissaraṇaṃ?

“Tasmā jantu sadā sato, kāmāni parivajjaye;
Te pahāya tare oghaṃ, nāvaṃ sitvāva pāragū”ti.

Idaṃ nissaraṇaṃ.

Tattha katamaṃ phalaṃ?

“Dhammo have rakkhati dhammacāriṃ, chattaṃ mahantaṃ yatha vassakāle;
Esānisamso dhamme suciṇṇe, na duggatiṃ gacchati dhammacārī”ti.

Idaṃ phalaṃ.

Tattha katamo upāyo?

“Sabbe saṅkhārā aniccā”ti...pe...
“Sabbe saṅkhārā [passa dha. pa. 277] dukkhā”ti...pe...
“Sabbe dhammā anattā”ti, yadā paññāya passati;
Atha nibbindati dukkhe, esa maggo visuddhiyā”ti.

Ayaṃ upāyo.

Tattha katamā āṇatti?

“Cakkhumā [passa udā. 43] visamānīva, vijjamāne parakkame;
Paṇḍito jīvalokasmiṃ, pāpāni parivajjaye”ti.

Ayaṃ āṇatti.

““Suññato lokaṃ avekkhassu,
Mogharājā”ti āṇatti, ‘sadā sato’ti upāyo;
‘Attānudiṭṭhiṃ ūhacca [uhacca (ka.) passa su. ni. 1125], evaṃ maccutaro siyā””.

Idaṃ phalaṃ.

6. Tattha bhagavā ugghaṭṭitaññussa puggalassa nissaraṇaṃ desayati, vipañcitaññussa puggalassa ādīnavañca nissaraṇaṃ desayati, neyyassa puggalassa assādañca ādīnavañca nissaraṇaṃ desayati.

Tattha catasso paṭipadā, cattāro puggalā. Taṇhācarito mando satindriyena dukkhāya paṭipadāya dandhābhiññāya niyyāti satipaṭṭhānehi nissayehi. Taṇhācarito udatto [udattho (sī.) u + ā + dā + ta] samādhindriyena dukkhāya paṭipadāya khippābhiññāya niyyāti jhānehi nissayehi. Diṭṭhicarito mando vīriyindriyena sukhāya paṭipadāya dandhābhiññāya niyyāti sammappadhānehi nissayehi. Diṭṭhicarito udatto paññindriyena sukhāya paṭipadāya khippābhiññāya niyyāti saccehi nissayehi.

Ubho taṇhācaritā samathapubbaṅgamāya vipassanā niyyanti rāgavirāgāya cetovimuttiyā. Ubho diṭṭhīcaritā vipassanāpubbaṅgame samathena niyyanti avijjāvirāgāya paññāvimuttiyā.

Tattha ye samathapubbaṅgamāhi paṭipadāhi niyyanti, te nandiyāvaṭṭena nayena hātabbā, ye vipassanāpubbaṅgamāhi paṭipadāhi niyyanti, te sīhavikkīḷitena nayena hātabbā.

7. Svāyaṃ hāro kattha sambhavati, yassa satthā vā dhammaṃ desayati aññataro vā garuṭṭhānīyo sabrahmacārī, so taṃ dhammaṃ sutvā saddhaṃ paṭilabhati. Tattha yā vīmaṃsā ussāhanā tulanā upaparikkhā, ayaṃ sutamayī paññā. Tathā sutena nissayena yā vīmaṃsā tulanā upaparikkhā manasānupekkhā, ayaṃ cintāmayī paññā. Imāhi dvīhi paññāhi manasikārasampayuttassa yaṃ ñāṇaṃ uppajjati dassanabhūmiyaṃ vā bhāvanābhūmiyaṃ vā, ayaṃ bhāvanāmayī paññā.

8. Paratoghosā sutamayī paññā. Paccattasamuṭṭhitā yoniso manasikārā cintāmayī paññā. Yaṃ parato ca ghosena paccattasamuṭṭhitena ca yonisomanasikārena ñāṇaṃ uppajjati, ayaṃ bhāvanāmayī paññā. Yassa imā dve paññā atthi sutamayī cintāmayī ca, ayaṃ ugghaṭṭitaññū. Yassa sutamayī paññā atthi, cintāmayī natthi, ayaṃ vipaṇcitaññū [vipaccitaññū (sī.)]. Yassa neva sutamayī paññā atthi na cintāmayī, ayaṃ neyyo.

9. Sāyaṃ dhammadesanā kiṃ desayati? Cattāri saccāni dukkhaṃ samudayaṃ nirodhaṃ maggaṃ. Ādīnava ca phalaṇca dukkhaṃ, assādo samudayo, nissaraṇaṃ nirodho, upāyo aṇatti ca maggo. Imāni cattāri saccāni. Idaṃ dhammacakkaṃ.

Yathāha bhagavā – “idaṃ dukkha”nti me, bhikkhave, bārāṇasiyaṃ isipatane migadāye anuttaraṃ dhammacakkaṃ pavattitaṃ appaṭivattiyaṃ samaṇena vā brāhmaṇena vā devena vā mārena vā brahmunā vā kenaci vā lokasmiṃ, sabbaṃ dhammacakkaṃ.

Tattha aparimāṇā padā, aparimāṇā akkharā, aparimāṇā byañjanā, aparimāṇā ākārā neruttā niddesā. Etasseva atthassa saṅkāsanā pakāsanā vivaraṇā vibhajanā uttānīkammaṃ [uttānīkammaṃ (ka.)] paññatti, itipidaṃ dukkhaṃ ariyasaccaṃ.

“Ayaṃ dukkhasamudayo”nti me, bhikkhave, bārāṇasiyaṃ isipatane migadāye anuttaraṃ dhammacakkaṃ pavattitaṃ...pe... “ayaṃ dukkhanirodho”nti me, bhikkhave...pe... “ayaṃ dukkhanirodhagāminī paṭipadā”nti me, bhikkhave, bārāṇasiyaṃ isipatane migadāye anuttaraṃ dhammacakkaṃ pavattitaṃ appaṭivattiyaṃ samaṇena vā brāhmaṇena vā devena vā mārena vā brahmunā vā kenaci vā lokasmiṃ.

Tattha aparimāṇā padā, aparimāṇā akkharā, aparimāṇā byañjanā, aparimāṇā ākārā neruttā niddesā. Etasseva atthassa saṅkāsanā pakāsanā vivaraṇā vibhajanā uttānīkammaṃ paññatti itipidaṃ dukkhanirodhagāminī paṭipadā ariyasaccaṃ.

Tattha bhagavā akkharehi saṅkāseti, padehi pakāseti, byañjanehi vivarati, ākārehi vibhajati, niruttīhi uttānīkaroti [uttānīkaroti (ka.)], niddesehi paññāpeti. Tattha bhagavā akkharehi ca padehi ca ugghaṭṭeti [ugghaṭṭeti (sī.)], byañjanehi ca ākārehi ca vipaṇcayati, niruttīhi ca niddesehi ca vitthāreti. Tattha ugghaṭṭanā [ugghaṭṭanā (sī.)] ādi, vipaṇcanā majjhe, vitthāraṇā pariyosānaṃ. Soyaṃ dhammavinayo ugghaṭṭiyanto ugghaṭṭitaññūpuggalaṃ vineti, tena naṃ āhu “ādikalyāṇo”nti. Vipañcīyanto vipañcitaññūpuggalaṃ vineti, tena naṃ āhu “majjhekalyāṇo”nti. Vitthārīyanto neyyaṃ puggalaṃ vineti, tena naṃ āhu “pariyosānakalyāṇo”nti.

10. Tattha chappadāni attho saṅkāsanā pakāsanā vivaraṇā vibhajanā uttānīkammaṃ paññatti, imāni chappadāni attho. Chappadāni byañjanaṃ akkharaṃ padaṃ byañjanaṃ ākāro nirutti niddeso, imāni chappadāni byañjanaṃ. Tenāha bhagavā “dhammaṃ vo, bhikkhave, desessāmi ādikalyāṇaṃ

majjhekalyāṇaṃ pariyosānakalyāṇaṃ sātthaṃ sabyañjana’’nti.

Kevalanti lokuttaraṃ, na missaṃ lokiyehi dhammehi. **Paripuṇṇanti** paripūraṃ anūnaṃ anatiṛekaṃ. **Parisuddhanti** nimmalaṃ sabbamalāpagataṃ pariyodātaṃ upaṭṭhitaṃ sabbavisesānaṃ, idaṃ vuccati tathāgatapadamītipi tathāgatanisevitamītipi tathāgatārañjitaṃtipi, atocetaṃ brahmacariyaṃ paññāyati. Tenāha bhagavā ‘‘kevalaparipuṇṇaṃ parisuddhaṃ brahmacariyaṃ pakāsessāmi’’ti.

Kesaṃ ayaṃ dhammadesanā, yogīnaṃ. Tenāha āyasmā mahākaccāyano –

‘‘Assādādīnavatā, nissaraṇampi ca phalaṃ upāyo ca;
Āṇattī ca bhagavato, yogīnaṃ desanāhāro’’ti.

Niyutto desanāhāro.

2. Vicayahāravibhaṅgo

11. Tattha katamo vicayo hāro? ‘‘Yaṃ pucchitañca vissajjitañcā’’ti gāthā, ayaṃ vicayo hāro.

Kiṃ vicinati? Padaṃ vicinati, pañhaṃ vicinati, visajjanaṃ [vissajjanaṃ (sī. ka.)] vicinati, pubbāparaṃ vicinati, assādaṃ vicinati, ādīnavaṃ vicinati, nissaraṇaṃ vicinati, phalaṃ vicinati, upāyaṃ vicinati, āṇattim vicinati, anugītim vicinati, sabbe nava suttante vicinati. Yathā kiṃ bhava, yathā āyasmā ajito pārāyane bhagavantaṃ pañhaṃ pucchati –

‘‘Kenassu [passa su. ni. 1038] nivuto loko, [iccāyasmā ajito,]
Kenassu nappakāsati;
Kissābhilepanaṃ brūsi, kiṃ su tassa mahabbhaya’’nti.

Imāni cattāri padāni pucchitāni, so eko pañho. Kasmā? Ekavatthu pariggahā, evañhi āha ‘‘kenassu nivuto loko’’ti lokādhiṭṭhānaṃ pucchati, ‘‘kenassu nappakāsati’’ti lokassa appakāsanaṃ pucchati, ‘‘kissābhilepanaṃ brūsi’’ti lokassa abhilepanaṃ pucchati, ‘‘kiṃsu tassa mahabbhaya’’nti tasseva lokassa mahābhayaṃ pucchati. Loko tividho kilesaloko bhavaloko indriyaloko.

Tattha visajjanā –

‘‘Avijjāya nivuto loko, [ajitāti bhagavā,]
Vivicchā [vevicchā (su. ni. 1039)] pamādā nappakāsati;
Jappābhilepanaṃ brūmi, dukkhamassa mahabbhaya’’nti.

Imāni cattāri padāni imehi catūhi padehi visajjitāni paṭhamaṃ paṭhamena, dutiyaṃ dutiyena, tatiyaṃ tatiyena, catutthaṃ catutthena.

‘‘Kenassu nivuto loko’’ti pañhe ‘‘avijjāya nivuto loko’’ti visajjanā. Nīvaraṇehi nivuto loko, avijjānīvaraṇā hi sabbe sattā. Yathāha bhagavā ‘‘sabbasattānaṃ, bhikkhave, sabbapāṇānaṃ sabbabhūtānaṃ pariyāyato ekameva nīvaraṇaṃ vadāmi yadidaṃ avijjā, avijjānīvaraṇā hi sabbe sattā. Sabbasova, bhikkhave, avijjāya nirodhā cāgā paṭinissaggā natthi sattānaṃ nīvaraṇanti vadāmi’’ti. Tena ca paṭhamassa padassa visajjanā yuttā.

‘‘Kenassu nappakāsati’’ti pañhe ‘‘vivicchā pamādā nappakāsati’’ti visajjanā. Yo puggalo nīvaraṇehi nivuto, so vivicchatī. Vivicchā nāma vuccati vicikicchā. So vicikicchanto nābhissaddahati, na abhisaddahanto vīriyaṃ nārabhati akusalānaṃ dhammānaṃ pahānāya kusalānaṃ dhammānaṃ

sacchikiriyāya. So idhappamādamanuyutto viharati pamatto, sukke dhamme na uppādiyati, tassa te anuppādiyamānā nappakāsanti, yathāha bhagavā –

“Dūre santo pakāsanti [pakāsenti dha. pa. 304], himavantova pabbato;
Asantettha na dissanti, rattim khittā [ratti khittā (sī.), passa dha. pa. 304] yathā sarā;
Te guṇehi pakāsanti, kittiyā ca yasena cā”ti.

Tena ca dutiyassa padassa visajjanā yuttā.

“Kissābhilepanam brūsi”ti pañhe “jappābhilepanam brūmi”ti visajjanā. Jappā nāma vuccati taṇhā. Sā katham abhiliṃpati? Yathāha bhagavā –

“Ratto attham na jānāti, ratto dhammam na passati;
Andhantamam [andhatamam (ka.)] tadā hoti, yaṃ rāgo sahate nara”nti.

Sāyam taṇhā āsattibahulassa puggalassa “evaṃ abhijappā”ti karitvā tattha loko abhilitto nāma bhavati, tena ca tatiyassa padassa visajjanā yuttā.

“Kiṃ su tassa mahabbhaya”nti pañhe “dukkhamassa mahabbhaya”nti visajjanā. Duvidham dukkham – kāyikaṇca cetasikaṇca. Yaṃ kāyikaṃ idaṃ dukkham, yaṃ cetasikaṃ idaṃ domanassam. Sabbe sattā hi dukkhassa ubbijjanti, natthi bhayaṃ dukkhena samasamam, kuto vā pana tassa uttaritaram? Tisso dukkhatā – dukkhadukkhatā saṅkhāradukkhatā vipariṇāmadukkhatā. Tattha loko odhaso kadāci karahaci dukkhadukkhatāya muccati. Tathā vipariṇāmadukkhatāya. Tam kissa hetu? Honti loka appābādhipi dīghāyukāpi. Saṅkhāradukkhatāya pana loko anupādisesāya nibbānadhātuyā muccati, tasmā saṅkhāradukkhatā dukkham lokassāti katvā dukkhamassa mahabbhayanti. Tena ca catutthassa padassa visajjanā yuttā. Tenāha bhagavā “avijjāya nivuto loko”ti.

Savanti sabbadhi sotā, [iccāyasmā ajito,]
Sotānam kiṃ nivāraṇam;
Sotānam saṃvaram brūhi, kena sotā pidhiyare [pithiyare (sī.), pidhiyare (ka.), passa su. ni. 1040].

Imāni cattāri padāni pucchitāni. Te dve pañhā. Kasmā? Imehi batvādhivacanena pucchitā. Evaṃ samāpannessa lokassa evaṃ saṃkiliṭṭhassa kiṃ lokassa vodānam vuṭṭhānamiti, evaṃhi āha.

Savanti sabbadhi sotāti. Asamāhitassa savanti abhijjhābyāpādappamādabahulassa. Tattha yā abhijjhā ayaṃ lobho akusalamūlam, yo byāpādo ayaṃ doso akusalamūlam, yo pamādo ayaṃ moho akusalamūlam. Tassevaṃ asamāhitassa chasu āyatanesu taṇhā savanti rūpataṇhā saddataṇhā gandhataṇhā rasataṇhā phoṭṭhabbataṇhā dhammataṇhā, yathāha bhagavā –

“**Savati**”ti ca kho, bhikkhave, channetaṃ ajjhattikānaṃ āyatanānaṃ adhivacanam. Cakkhu savati manāpikesu rūpesu, amanāpikesu [amanāpiyesu (ka.)] paṭihaññatīti. Sotaṃ...pe... ghānam... jivhā... kāyo... mano savati manāpikesu dhammesu amanāpikesu paṭihaññatīti. Iti sabbā ca savati, sabbathā ca savati. Tenāha “savanti sabbadhi sotā”ti.

“Sotānam kiṃ nivāraṇa”nti pariyuṭṭhānavighātam pucchati, idaṃ vodānam. “Sotānam saṃvaram brūhi, kena sotā pidhiyare”ti anusayasamugghātam pucchati, idaṃ vuṭṭhānam.

Tattha visajjanā –

“Yāni sotāni lokasmim, [ajitāti bhagavā,]

Sati tesam nivāraṇaṃ;
Sotānaṃ saṃvamaṃ brūmi, paññāyete pidhīyare’’ti.

Kāyagatāya satiyā bhāvitāya bahulikatāya cakkhu nāvīñchati manāpikesu rūpesu, amanāpikesu na paṭihaññati, sotam...pe... ghānaṃ... jivhā... kāyo... mano nāvīñchati manāpikesu dhammesu, amanāpikesu na paṭihaññati. Kena kāraṇena? Saṃvutanivāritattā indriyānaṃ. Kena te saṃvutanivāritā? Satiārakkhena. Tenāha bhagavā – “sati tesam nivāraṇa’’nti.

Paññāya anusayā pahīyanti, anusayesu pahīnesu pariyuṭṭhānā pahīyanti. Kissa [tassa (sī.)], anusayassa pahīnattā? Taṃ yathā khandhavantassa rukkhassa anavasesamūluddharaṇe kate pupphaphalapallavaṅkurasantati samucchinnā bhavati. Evaṃ anusayesu pahīnesu pariyuṭṭhānasantati samucchinnā bhavati pidahitā paṭicchannā. Kena? Paññāya. Tenāha bhagavā “paññāyete pidhīyare’’ti.

“Paññā ceva sati ca, [iccāyasmā ajito,]
Nāmarūpañca mārisa;
Etaṃ me puṭṭho pabrūhi, katthetaṃ uparujjhatī’’ti.

“Yametaṃ pañhaṃ apucchi [maṃ pucchi (ka.), passa su. ni. 1043], ajita taṃ vadāmi te;
Yattha nāmañca rūpañca, asesam uparujjhati;
Viññāṇassa nirodhena, etthetaṃ uparujjhatī’’ti.

Ayaṃ pañhe [pañho (sī. ka.) nettivibhāvanī passitabbā] anusandhiṃ pucchati. Anusandhiṃ pucchanto kiṃ pucchati? Anupādisesaṃ nibbānadhātuṃ. Tīṇi ca saccāni saṅkhatāni nirodhadhammāni dukkhaṃ samudayo maggo, nirodho asaṅkhato. Tattha samudayo dvīsu bhūmīsu pahīyati dassanabhūmiyā ca bhāvanābhūmiyā ca. Dassanena tīṇi saṃyojanāni pahīyanti sakkāyadiṭṭhi vicikicchā sīlabbataparāmāso, bhāvanāya satta saṃyojanāni pahīyanti kāmacchando byāpādo rūparāgo arūparāgo māno uddhaccaṃ avijjāvasesā [avijjā ca niravasesā (sī. ka.)]. Tedhātuke imāni dasa saṃyojanāni pañcorambhāgiyāni pañcuddhambhāgiyāni.

12. Tattha tīṇi saṃyojanāni sakkāyadiṭṭhi vicikicchā sīlabbataparāmāso anaññātaññassāmītindriyaṃ adhiṭṭhāya nirujjhanti. Satta saṃyojanāni kāmacchando byāpādo rūparāgo arūparāgo māno uddhaccaṃ avijjāvasesā aññindriyaṃ adhiṭṭhāya nirujjhanti. Yaṃ pana evaṃ jānāti “khīṇā me jātī’’ti, idaṃ khaye ñāṇaṃ. “Nāparaṃ itthattāyā’’ti pajānāti, idaṃ anuppāde ñāṇaṃ. Imāni dve ñāṇāni aññātāvindriyaṃ. Tattha yañca anaññātaññassāmītindriyaṃ yañca aññindriyaṃ, imāni aggaphalaṃ arahattaṃ pāpuṇantassa nirujjhanti, tattha yañca khaye ñāṇaṃ yañca anuppāde ñāṇaṃ, imāni dve ñāṇāni ekapaññā.

Api ca ārammaṇasaṅketena dve nāmāni labbhanti, “khīṇā me jātī’’ti pajānantassa khaye ñāṇanti nāmaṃ labhati, “nāparaṃ itthattāyā’’ti pajānantassa anuppāde ñāṇanti nāmaṃ labhati. Sā pajānanaṭṭhena paññā, yathādiṭṭhaṃ apilāpanaṭṭhena sati.

13. Tattha ye pañcupādānakkhandhā, idaṃ nāmarūpaṃ. Tattha ye phassapañcamakā dhammā, idaṃ nāmaṃ. Yāni pañcindriyāni rūpāni, idaṃ rūpaṃ. Tadubhayaṃ nāmarūpaṃ viññāṇasampayuttaṃ tassa nirodhaṃ bhagavantaṃ pucchanto āyasmā ajito pārāyane evamāha –

“Paññā ceva sati ca, nāmarūpañca mārisa;
Etaṃ me puṭṭho pabrūhi, katthetaṃ uparujjhatī’’ti.

Tattha sati ca paññā ca cattāri indriyāni, sati dve indriyāni satindriyañca samādhindriyañca, paññā dve indriyāni paññindriyañca vīriyindriyañca. Yā imesu catūsu indriyesu saddahanā okappanā, idaṃ saddhindriyaṃ. Tattha yā saddhādhipateyyā cittaṅkaggatā, ayaṃ chandasamādhi. Samāhite citte kilesānaṃ vikkhambhanatāya paṭisaṅkhānabalena vā bhāvanābalena vā, idaṃ pahānaṃ. Tattha ye

assāsapassāsā vitakkavicārā saññāvedayitā sarasaṅkappā, ime saṅkhārā. Iti purimako ca chandasamādhi, kilesavikkhambhanatāya ca pahānaṃ ime ca saṅkhārā, tadubhayaṃ chandasamādhippadhānaṅkharasamannāgataṃ iddhipādaṃ bhāveti vivekanissitaṃ virāganissitaṃ nirodhanissitaṃ vossaggapariṇāmiṃ. Tattha yā vīriyādhipateyyā cittekkaggatā, ayaṃ vīriyasamādhi... pe... tattha yā cittādhipateyyā cittekkaggatā, ayaṃ cittasamādhi... pe... tattha yā vīmaṃsādhipateyyā cittekkaggatā, ayaṃ vīmaṃsāsamādhi. Samāhite citte kilesānaṃ vikkhambhanatāya paṭisaṅkhānabalena vā bhāvanābalena vā, idaṃ pahānaṃ. Tattha ye assāsapassāsā vitakkavicārā saññāvedayitā sarasaṅkappā, ime saṅkhārā. Iti purimako ca vīmaṃsāsamādhi, kilesavikkhambhanatāya ca pahānaṃ ime ca saṅkhārā, tadubhayaṃ vīmaṃsāsamādhippadhānaṅkharasamannāgataṃ iddhipādaṃ bhāveti vivekanissitaṃ virāganissitaṃ nirodhanissitaṃ vossaggapariṇāmiṃ.

14. Sabbo samādhi ñāṇamūlako ñāṇapubbaṅgamo ñāṇānuparivatti.

Yathā pure tathā pacchā, yathā pacchā tathā pure;
Yathā divā tathā rattiṃ [ratti (ka.) ayaṃ gāthā theragā. 397 dissati], yathā rattiṃ tathā divā.

Iti vivaṭena cetāsā aperiyaṇaddhena sappabhāsaṃ cittaṃ bhāveti. Pañcindriyāni kusalāni cittasahabhūni citte uppajjamāne uppajjanti, citte nirujjhamāne nirujjhanti. Nāmarūpañca viññāṇahetukaṃ viññāṇapaccayā nibbattaṃ, tassa maggena hetu upacchinno, viññāṇaṃ anāhāraṃ anabhinanditaṃ appaṭisandhikaṃ taṃ nirujjhati. Nāmarūpamapi ahetu appaccayaṃ punabbhavaṃ na nibbattayati [nibbattiyati (ka.)]. Evaṃ viññāṇassa nirodhā paññā ca sati ca nāmarūpañca nirujjhati. Tenāha bhagavā –

“Yametaṃ pañhaṃ apucchi, ajita taṃ vadāmi te;
Yattha nāmañca rūpañca, asesam uparujjhati;
Viññāṇassa nirodhena, etthetaṃ uparujjhati”ti.

“Ye ca [ayaṃ gāthā su. ni. 1044 aññathā dissati] saṅkhātadhammāse, [iccāyasmā ajito]
Ye ca sekkhā puthū idha;
Tesaṃ me nipako iriyaṃ, puṭṭho pabrūhi mārisā”ti.

15. Imāni tīṇi padāni pucchitāni, te tayo pañhā. Kissa?

Sekhāsekhavipassanāpubbaṅgamappahānāyogena, evañhi āha. “Ye ca saṅkhātadhammāse”ti arahattaṃ pucchati, “ye ca sekkhā puthū idhā”ti sekhaṃ pucchati, “tesaṃ me nipako iriyaṃ, puṭṭho pabrūhi mārisā”ti vipassanāpubbaṅgamaṃ pahānaṃ pucchati.

Tattha visajjanā –

“Kāmesu nābhigijjheyya, [ajitāti bhagavā]
Manasānāvilo siyā;
Kusalo sabbadhammānaṃ, sato bhikkhu paribbaje”ti.

Bhagavato sabbaṃ kāyakammaṃ ñāṇapubbaṅgamaṃ ñāṇānuparivatti, sabbaṃ vacīkammaṃ ñāṇapubbaṅgamaṃ ñāṇānuparivatti, sabbaṃ manokammaṃ ñāṇapubbaṅgamaṃ ñāṇānuparivatti. Atīte aṃse appaṭihataññādaṣṣanaṃ, anāgate aṃse appaṭihataññādaṣṣanaṃ, paccuppanne aṃse appaṭihataññādaṣṣanaṃ.

Ko ca ñāṇadassanassa paṭighāto? Yaṃ anicce dukkhe anattani ca aññāṇaṃ adassanaṃ, ayaṃ ñāṇadassanassa paṭighāto. Yathā idha puriso tārakarūpāni passeyya, no ca gaṇanasāṅketena jāneyya, ayaṃ ñāṇadassanassa paṭighāto.

Bhagavato pana appaṭihatañānadassanaṃ, anāvarenañānadassanā hi buddhā bhagavanto. Tattha sekkena dvīsu dhammesu cittaṃ rakkhitabbaṃ gedhā ca rajanīyesu dhammesu, dosā ca pariyuṭṭhānīyesu. Tattha yā icchā mucchā patthanā piyāyanā kīlanā, taṃ bhagavā nivārento evamāha “kāmesu nābhigijjheyā”’ti.

“Manasānāvilo siyā”’ti pariyuṭṭhānavighātaṃ āha. Tathā hi sekho abhigijjhanto asamuppannañca kilesaṃ uppādeti, uppannañca kilesaṃ phātiṃ karoti. Yo pana anāvilasaṅkappo anabhigijjhanto vāyamati, so anuppannānaṃ pāpakānaṃ akusalānaṃ dhammānaṃ anuppādāya chandaṃ janeti vāyamati vīriyaṃ ārabhati cittaṃ paggaṇhāti padahati. So uppannānaṃ pāpakānaṃ akusalānaṃ dhammānaṃ pahānāya chandaṃ janeti vāyamati vīriyaṃ ārabhati cittaṃ paggaṇhāti padahati. So anuppannānaṃ kusalanānaṃ dhammānaṃ uppādāya chandaṃ janeti vāyamati vīriyaṃ ārabhati cittaṃ paggaṇhāti padahati. So uppannānaṃ kusalanānaṃ dhammānaṃ ṭhitiyā asamosāya bhīyobhāvāya vepullāya bhāvanāya pāripūriyā chandaṃ janeti vāyamati vīriyaṃ ārabhati cittaṃ paggaṇhāti padahati.

16. Katame [katame ca (aṭṭha.)] anuppannā pāpakā akusalā dhammā? Kāmavitakko byāpādavitakko vihiṃsāvitakko, ime anuppannā pāpakā akusalā dhammā. Katame uppannā pāpakā akusalā dhammā? Anusayā akusalāmūlāni, ime uppannā pāpakā akusalā dhammā. Katame anuppannā kusala dhammā? Yāni sotāpannassa indriyāni, ime anuppannā kusala dhammā. Katame uppannā kusala dhammā? Yāni aṭṭhamakassa indriyāni, ime uppannā kusala dhammā.

Yena kāmavitakkaṃ vāreti, idaṃ satindriyaṃ. Yena byāpādavitakkaṃ vāreti, idaṃ samādhindriyaṃ. Yena vihiṃsāvitakkaṃ vāreti, idaṃ vīriyindriyaṃ.

Yena uppannuppanne pāpake akusale dhamme pajahati vinodeti byantīkaroti anabhāvaṃ gameti nādhivāseti, idaṃ paññindriyaṃ. Yā imesu catūsu indriyesu saddahanā okappanā, idaṃ saddhindriyaṃ.

Tattha saddhindriyaṃ kattha daṭṭhabbaṃ? Catūsu sotāpattiyaṅgesu. Vīriyindriyaṃ kattha daṭṭhabbaṃ? Catūsu sammappadhānesu. Satindriyaṃ kattha daṭṭhabbaṃ? Catūsu satipaṭṭhānesu. Samādhindriyaṃ kattha daṭṭhabbaṃ? Catūsu jhānesu. Paññindriyaṃ kattha daṭṭhabbaṃ? Catūsu ariyasaccesu. Evaṃ sekho sabbehi kusalehi dhammehi appamatto vutto bhagavatā anāvilatāya manasā. Tenāha bhagavā “manasānāvīlosiyā”’ti.

17. “Kusalo sabbadhammāna”’nti loko nāma tividho kilesaloko bhavaloko indriyaloko. Tattha kilesalokena bhavaloko samudāgacchati, so indriyāni nibbatteti, indriyesu bhāviyamānesu neyyassa pariññā bhavati. Sā duvidhena upaparikkhitabbā dassanapariññāya ca bhāvanāpariññāya ca. Yadā hi sekho ñeyyaṃ parijānāti, tadā nibbidāsahagatehi saññāmanasikārehi neyyaṃ pariññātaṃ bhavati. Tassa dve dhammā kosallaṃ gacchanti – dassanakosallañca bhāvanākosallañca.

Taṃ ñānaṃ pañcavidhena veditabbaṃ: abhiññā pariññā pahānaṃ bhāvanā sacchikiriyā. Tattha katamā abhiññā? Yaṃ dhammānaṃ salakkhaṇe ñānaṃ dhammapaṭisambhidā ca atthapaṭisambhidā ca, ayaṃ abhiññā.

Tattha katamā pariññā? Evaṃ abhijānitvā yā parijānanā “idaṃ kusalaṃ, idaṃ akusalaṃ, idaṃ sāvajjaṃ, idaṃ anavajjaṃ, idaṃ kaṇhaṃ, idaṃ sukkaṃ, idaṃ sevitaṃ, idaṃ na sevitaṃ, ime dhammā evaṃgahitā, idaṃ phalaṃ nibbattenti [nibbattāpentī (ka.)], tesāṃ evaṃgahitānaṃ ayaṃ attho”’ti, ayaṃ pariññā.

Evaṃ parijānitvā tayo dhammā avasiṭṭhā bhavanti pahātabbā bhāvetabbā sacchikātabbā ca. Tattha katame dhammā pahātabbā? Ye akusalā. Tattha katame dhammā bhāvetabbā? Ye kusala. Tattha katame dhammā sacchikātabbā? Yaṃ asaṅkhatā. Yo evaṃ jānāti ayaṃ vuccati atthakusalo dhammakusalo kalyāṇatākusalo phalatākusalo, āyakusalo apāyakusalo upāyakusalo mahatā kosallena samannāgatoti,

tenāha bhagavā “kusalo sabbadhammāna”nti.

“Sato bhikkhu paribbaje”ti tena diṭṭhadhammasukhavihāratthaṃ abhikkante paṭikkante ālokite vilokite samīñjite [sammiñjite (sī.)] pasārite saṅghāṭipattacīvaradhāraṇe asite pīte khāyite sāyite uccārapassāvakkamme gate ṭhite nisinne sutte jāgarite bhāsīte tuṅhibhāve satena sampajānena vihātabbaṃ. Imā dve cariyā anuññātā bhagavatā ekā visuddhānaṃ, ekā visujjhantānaṃ. Ke visuddhā? Arahanto. Ke visujjhantā? Sekkhā. Katakiccāni hi arahato indriyāni. Yaṃ bojjaṃ, taṃ catubbidhaṃ dukkhassa pariññābhisamayena samudayassa pahānābhisamayena maggassa bhāvanābhisamayena nirodhassa sacchikiriyābhisamayena, idaṃ catubbidhaṃ bojjaṃ yo evaṃ jānāti, ayaṃ vuccati sato abhikkamati sato paṭikkamati khayā rāgassa khayā dosassa khayā mohassa. Tenāha bhagavā “sato bhikkhu paribbaje”ti, tenāha –

“Kāmesu nābhigijjheyya, [ajitāti bhagavā]
Manasānāvilo siyā;
Kusalo sabbadhammānaṃ, sato bhikkhu paribbaje”ti.

Evaṃ pucchitabbaṃ, evaṃ visajjitabbaṃ. Suttassa ca anugīti atthato ca byañjanato ca samānetabbā [samānayitabbā (sī. ka.)]. Atthāpagataṃ hi byañjanaṃ samphappalāpaṃ bhavati. Dunnikkhittassa padabyañjanassa atthopi dunnayo bhavati, tasmā atthabyañjanūpetāṃ saṅgāyitabbaṃ. Suttañca pavicititabbaṃ. Kiṃ idaṃ suttaṃ āhacca vacanaṃ anusandhivacanaṃ nītatthaṃ neyyatthaṃ saṃkilesabhāgiyaṃ nibbedhabhāgiyaṃ asekkhabhāgiyaṃ? Kuhiṃ imassa suttassa sabbāni saccāni passitabbāni, ādimajjhapariyosāneti? Evaṃ suttaṃ pavicititabbaṃ. Tenāha āyasmā mahākaccāyano – “yaṃ pucchitañca vissajjitañca, suttassa yā ca anugīti”ti.

Niyutto vicayo hāro.

3. Yuttihāravibhaṅgo

18. Tattha katamo yuttihāro? “Sabbesaṃ hārāna”nti, ayaṃ yuttihāro. Kiṃ yojayati [yojeti (sī.)]? Cattāro mahāpadesā buddhāpadeso saṅghāpadeso sambahulattherāpadeso [sampahula... (ka.)] ekattherāpadeso. Ime cattāro mahāpadesā, tāni padabyañjanāni sutte otārayitabbāni, vinaye sandassayitabbāni, dhammatāyaṃ upanikkhipitabbāni.

Katasmimṃ sutte otārayitabbāni? Catūsu ariyasaccesu. Katasmimṃ vinaye sandassayitabbāni? Rāgavinaye dosavinaye mohavinaye. Katamissaṃ [katamiyaṃ (sī.)] dhammatāyaṃ upanikkhipitabbāni? Paṭiccasamuppāde. Yadi catūsu ariyasaccesu avatarati, kilesavinaye sandissati, dhammatañca na vilometi, evaṃ āsave na janeti. Catūhi mahāpadesehi yaṃ yaṃ yujjati, yena yena yujjati, yathā yathā yujjati, taṃ taṃ gahetabbaṃ.

19. Pañhaṃ pucchitena kati padāni pañheti padaso pariyogāhitabbaṃ vicetabbaṃ? Yadi sabbāni padāni ekaṃ atthaṃ abhivadanti, eko pañho. Atha cattāri padāni ekaṃ atthaṃ abhivadanti, eko pañho. Atha tīṇi padāni ekaṃ atthaṃ abhivadanti, eko pañho. Atha dve padāni ekaṃ atthaṃ abhivadanti, eko pañho. Atha ekaṃ padaṃ ekaṃ atthaṃ abhivadati, eko pañho. Taṃ upaparikkhamānena aññātānaṃ kiṃ ime dhammā nānatthā nānābyañjanā, udāhu imesaṃ dhammānaṃ eko attho byañjanameva nānanti. Yathā kiṃ bhavē? Yathā sā devatā bhagavantaṃ pañhaṃ pucchati.

“Kenassubbhāhato [passa sa. ni. 1.66] loko, kenassu parivārito;
Kena sallena otiṇṇo, kissa dhūpāyito sadā”ti.

Imāni cattāri padāni pucchitāni. Te tayo pañhā kathaṃ ñāyati? Bhagavā hi devatāya visajjeti.

“Maccunābbhāhato [maccunabbhāhato (ka.) theragā. 448; sam. ni. 1.66 passitabbaṃ] loko, jarāya parivārito; Taṇhāsallena otiṇṇo, icchādhūpāyito sadā”ti.

20. Tattha jarā ca maraṇaṇca imāni dve saṅkhatassa saṅkhatalakkhaṇāni. Jarāyaṃ t̥hitassa aññathattaṃ, maraṇaṃ vayo. Tattha jarāya ca maraṇassa ca atthato nānattaṃ. Kena kāraṇena, gabbhagatāpi hi mīyanti, na ca te jiṇṇā bhavanti. Atthi ca devānaṃ maraṇaṃ, na ca tesam sarīrāni jīranti. Sakkateva jarāya paṭikammaṃ kātuṃ, na pana sakkate maraṇassa paṭikammaṃ kātuṃ aññatreva iddhimantānaṃ iddhivisayā. Yaṃ panāha taṇhāsallena otiṇṇoti dissanti vītarāgā jīrantāpi mīyantāpi. Yadi ca yathā jarāmaraṇaṃ, evaṃ taṇhāpi siyā. Evaṃ sante sabbe yobbanat̥thāpi vigatataṇhā siyuṃ. Yathā ca taṇhā dukkhassa samudayo, evaṃ jarāmaraṇampi siyā dukkhassa samudayo, na ca siyā taṇhā dukkhassa samudayo, na hi jarāmaraṇaṃ dukkhassa samudayo, taṇhā dukkhassa samudayo. Yathā ca taṇhā maggavajjhā, evaṃ jarāmaraṇampi siyā maggavajjhaṃ. Imāya yuttiyā aññamaññehi kāraṇehi gavesitabbaṃ. Yadi ca sandissati yuttisamārūlhaṃ atthato ca aññattaṃ, byañjanatopi gavesitabbaṃ.

Salloti vā dhūpāyananti vā imesaṃ dhammānaṃ atthato ekattaṃ. Na hi yujjati icchāya ca taṇhāya ca atthato aññattaṃ. Taṇhāya adhippāye aparipūramāne navasu āghātavatthūsu kodho ca upanāho ca uppajjati. Imāya yuttiyā jarāya ca maraṇassa ca taṇhāya ca atthato aññattaṃ.

Yaṃ panidaṃ bhagavatā dvīhi nāmehi abhilapitaṃ icchātipi taṇhātipi, idaṃ bhagavatā bāhirānaṃ vatthūnaṃ ārammaṇavasena dvīhi nāmehi abhilapitaṃ icchātipi taṇhātipi, sabbā hi taṇhā ajjhosānalakkhaṇena ekalakkhaṇā. Yathā sabbo aggi uṇhatalakkhaṇena ekalakkhaṇo, api ca upādānavasena aññamaññāni nāmāni labhati, kaṭṭhaggītipi tiṇaggītipi sakalikaggītipi gomayaggītipi thusaggītipi saṅkāraggītipi, sabbo hi aggi uṇhatalakkhaṇova. Evaṃ sabbā taṇhā ajjhosānalakkhaṇena ekalakkhaṇā, api tu ārammaṇaupādānavasena aññamaññehi nāmehi abhilapitā icchātipi taṇhātipi salloitipi dhūpāyanāitipi saritāitipi visattikāitipi sinehoitipi kilamathoitipi latāitipi maññanāitipi bandhoitipi āsāitipi pipāsāitipi abhinandanāitipi, iti sabbā taṇhā ajjhosānalakkhaṇena ekalakkhaṇā. Yathā ca vevacane vuttā.

“Āsā ca pihā abhinandanā ca, anekadhātūsu sarā patit̥thitā; Aññāṇamūlappabhavā pajappitā, sabbā mayā byantikā samūlakā”ti [samūlikā (sī.)].

Taṇhāyetaṃ vevacanaṃ. Yathāha bhagavā – rūpe tissa avigatarāgassa avigatacchandassa avigatapemassa avigatapipāsassa avigatapariḷāhassa. Evaṃ vedanāya saññāya saṅkhāresu viññāne avigatarāgassa avigatacchandassa avigatapemassa avigatapipāsassa avigatapariḷāhassa sabbam suttaṃ vitthāretabbaṃ. Taṇhāyetaṃ vevacanaṃ. Evaṃ yujjati.

21. Sabbo dukkhūpacāro kāmataṇhāsāṅkhāramūlako, na pana yujjati sabbo nibbidūpacāro kāmataṇhāparikkhāramūlako. Imāya yuttiyā aññamaññehi kāraṇehi gavesitabbaṃ.

Yathā hi [yathāha (sī.)] bhagavā rāgacaritassa puggalassa asubhaṃ desayati, dosacaritassa bhagavā puggalassa mettaṃ desayati. Mohacaritassa bhagavā puggalassa paṭiccasamuppādaṃ desayati. Yadi hi bhagavā rāgacaritassa puggalassa mettaṃ cetovimuttiṃ deseyya. Sukhaṃ vā paṭipadaṃ dandhābhiññaṃ sukhaṃ vā paṭipadaṃ khippābhiññaṃ vipassanāpubbaṅgamaṃ vā pahānaṃ deseyya, na yujjati desanā. Evaṃ yaṃ kiñci rāgassa anulomappahānaṃ dosassa anulomappahānaṃ mohassa anulomappahānaṃ. Sabbam taṃ vicayena hārena vicinivā yuttihārena yojetabbaṃ. Yāvatikā ñāṇassa bhūmi.

Mettāvihāriṣsa sato byāpādo cittaṃ pariyādāya t̥hassatīti na yujjati desanā, byāpādo pahānaṃ abbatthaṃ gacchatīti yujjati desanā. Karuṇāvihāriṣsa sato vihesā cittaṃ pariyādāya t̥hassatīti na yujjati desanā, vihesā pahānaṃ abbatthaṃ gacchatīti yujjati desanā. Muditā vihāriṣsa sato arati cittaṃ pariyādāya t̥hassatīti na yujjati desanā, arati pahānaṃ abbatthaṃ gacchatīti yujjati desanā.

Upekkhāvihārissa sato rāgo cittaṃ pariyādāya ṭhassatīti na yujjati desanā, rāgo pahānaṃ abbattham gacchatīti yujjati desanā. Animittavīhārissa sato nimittānusārī tena teneva viññānaṃ pavattatīti na yujjati desanā, nimittam pahānaṃ abbattham gacchatīti yujjati desanā. Asmīti vigataṃ ayamahasmīti na samanupassāmi. Atha ca pana me kismīti kathasmīti vicikicchā kathamkathāsallam cittaṃ pariyādāya ṭhassatīti na yujjati desanā, vicikicchā kathamkathāsallam pahānaṃ abbattham gacchatīti yujjati desanā.

Yathā vā pana paṭhamam jhānaṃ samāpannassa sato kāmarāgabyāpādā visesāya saṃvattantīti na yujjati desanā, hānāya saṃvattantīti yujjati desanā. Vitakkasahagatā vā saññāmanasikārā hānāya saṃvattantīti na yujjati desanā, visesāya saṃvattantīti yujjati desanā. Dutiyam jhānaṃ samāpannassa sato vitakkavicārasahagatā saññāmanasikārā visesāya saṃvattantīti na yujjati desanā, hānāya saṃvattantīti yujjati desanā. Upekkhāsukhasahagatā vā saññāmanasikārā hānāya saṃvattantīti na yujjati desanā, visesāya saṃvattantīti yujjati desanā. Tatiyam jhānaṃ samāpannassa sato pītisukhasahagatā saññāmanasikārā visesāya saṃvattantīti na yujjati desanā, hānāya saṃvattantīti yujjati desanā, upekkhāsatiṭṭipārisuddhisahagatā vā saññāmanasikārā hānāya saṃvattantīti na yujjati desanā, visesāya saṃvattantīti yujjati desanā. Catuttham jhānaṃ samāpannassa sato upekkhāsahagatā saññāmanasikārā visesāya saṃvattantīti na yujjati desanā, hānāya saṃvattantīti yujjati desanā. Ākāsānañcāyatanasahagatā vā saññāmanasikārā hānāya saṃvattantīti na yujjati desanā, visesāya saṃvattantīti yujjati desanā.

Ākāsānañcāyatanaṃ samāpannassa sato rūpasahagatā saññāmanasikārā visesāya saṃvattantīti na yujjati desanā, hānāya saṃvattantīti yujjati desanā. Viññānañcāyatanasahagatā vā saññāmanasikārā hānāya saṃvattantīti na yujjati desanā, visesāya saṃvattantīti yujjati desanā. Viññānañcāyatanaṃ samāpannassa sato ākāsānañcāyatanasahagatā saññāmanasikārā visesāya saṃvattantīti na yujjati desanā, hānāya saṃvattantīti yujjati desanā. Ākiñcaññāyatanasahagatā vā saññāmanasikārā hānāya saṃvattantīti na yujjati desanā, visesāya saṃvattantīti yujjati desanā.

Ākiñcaññāyatanaṃ samāpannassa sato viññānañcāyatanasahagatā saññāmanasikārā visesāya saṃvattantīti na yujjati desanā, hānāya saṃvattantīti yujjati desanā. Nevasaññānāsaññāyatanasahagatā vā saññāmanasikārā hānāya saṃvattantīti na yujjati desanā, visesāya saṃvattantīti yujjati desanā. Nevasaññānāsaññāyatanaṃ samāpannassa sato saññūpacārā visesāya saṃvattantīti na yujjati desanā, hānāya saṃvattantīti yujjati desanā. Saññāvedayitanirodhasahagatā vā saññāmanasikārā hānāya saṃvattantīti na yujjati desanā, visesāya saṃvattantīti yujjati desanā. Kallatāparicitaṃ cittaṃ na ca abhinīhāraṃ khamatīti na yujjati desanā, kallatāparicitaṃ cittaṃ atha ca abhinīhāraṃ khamatīti yujjati desanā.

Evam sabbe navasuttantā yathādhammaṃ yathāvinayaṃ yathāsattusāsanaṃ sabbato vicayena hārena vicinitvā yuttihārena yojetabbāti. Tenāha āyasmā mahākaccāyano “sabbesaṃ hārānaṃ yā bhūmi yo ca gocharo tesa”nti.

Niyutto yutti hāro.

4. Padaṭṭhānahāravibhaṅgo

22. Tattha katamo padaṭṭhāno hāro? “Dhammaṃ deseti jino”ti, ayam padaṭṭhāno hāro. Kim deseti? Sabbadhammayāthāvaasampaṭivedhalakkhaṇā avijjā, tassā vipallāsā padaṭṭhānaṃ. Ajjhosānalakkhaṇā taṇhā, tassā piyarūpaṃ sātārūpaṃ padaṭṭhānaṃ. Patthanalakkhaṇo lobho, tassa adinnādānaṃ padaṭṭhānaṃ. Vaṇṇasaṅgāhānabyañjanaggahaṇalakkhaṇā subhasaññā, tassā indriyā saṃvaro padaṭṭhānaṃ. Sāsavaphassaupagamanalakkhaṇā sukhasaññā, tassā assādo padaṭṭhānaṃ. Saṅkhatalakkhaṇānaṃ dhammānaṃ asamanupassanalakkhaṇā niccasaññā, tassā viññānaṃ padaṭṭhānaṃ. Aniccaaññādukkhasaññāasamanupassanalakkhaṇā attasaññā, tassā nāmakāyo padaṭṭhānaṃ. Sabbadhammasampaṭivedhalakkhaṇā vijjā, tassā sabbam neyyam padaṭṭhānaṃ.

Cittavikkhepaṭiṣaṃharaṇalakkhaṇo samatho, tassa asubhā padaṭṭhānaṃ.
 Icchāvacaraṭiṣaṃharaṇalakkhaṇo alobho, tassa adinnādānā veramaṇī [veramaṇi (ka.)] padaṭṭhānaṃ.
 Abyāpajjalakkhaṇo adoso, tassa paṇātipātā veramaṇī padaṭṭhānaṃ. Vatthuavippaṭipattilakkhaṇo
 [vatthuavippaṭipādānalakkhaṇo (sī. ka.)] amoho, tassa sammāpaṭipatti padaṭṭhānaṃ.
 Vinīlakavipubbakagahaṇalakkhaṇā asubhasaññā, tassā nibbidā padaṭṭhānaṃ.
 Sāsavaphassaparijānaṇalakkhaṇā dukkhasaññā, tassā vedanā padaṭṭhānaṃ. Saṅkhatalakkhaṇānaṃ
 dhammānaṃ samanupassanaṇalakkhaṇā aniccasaññā, tassā uppādavayā padaṭṭhānaṃ.
 Sabbadhammaabhinivesalakkhaṇā anattasaññā, tassā dhammasaññā padaṭṭhānaṃ.

Pañca kāmagaṇā kāmārāgassa padaṭṭhānaṃ, pañcendriyāni rūpīni rūparāgassa padaṭṭhānaṃ,
 chaṭṭhāyatanānaṃ bhavarāgassa padaṭṭhānaṃ, nibbattabhavānupassitā pañcannaṃ upādānalakkhaṇānaṃ
 padaṭṭhānaṃ, pubbenivāsānussatiññānadassanassa padaṭṭhānaṃ. Okappanalakkhaṇā saddhā
 adhimuttipaccupaṭṭhānā ca, anāvilalakkhaṇo pasādo sampasīdanapaccupaṭṭhāno ca.
 Abhipatthiyanaṇalakkhaṇā saddhā, tassā aveccapasādo padaṭṭhānaṃ. Anāvilalakkhaṇo pasādo, tassa
 saddhā padaṭṭhānaṃ. Ārambhalakkhaṇānaṃ vīriyaṃ, tassa sammappadhānaṃ padaṭṭhānaṃ.
 Apilāpanalakkhaṇā sati, tassā satipaṭṭhānaṃ padaṭṭhānaṃ. Ekaggaṇalakkhaṇo samādhi, tassa jhānāni
 padaṭṭhānaṃ. Pajānaṇalakkhaṇā paññā, tassā saccāni padaṭṭhānaṃ.

Aparo nayo, assādamanasikāralakkhaṇo ayonisomanasikāro, tassa avijjā padaṭṭhānaṃ.
 Saccasammohanalakkhaṇā avijjā, sā saṅkhārānaṃ padaṭṭhānaṃ. Punabbhavavirohaṇalakkhaṇā saṅkhārā,
 te [taṃ (ka.)] viññāṇassa padaṭṭhānaṃ. Opapaccayikanibbattilakkhaṇānaṃ viññāṇānaṃ, taṃ nāmarūpassa
 padaṭṭhānaṃ. Nāmakāyarūpakāyasāṅghātalakkhaṇānaṃ nāmarūpaṃ, taṃ chaḷāyatanassa padaṭṭhānaṃ.
 Indriyavavattānalakkhaṇānaṃ chaḷāyatanānaṃ, taṃ phassassa padaṭṭhānaṃ.
 Cakkhurūpaviññāṇasannipātalakkhaṇo phasso, so vedanāya padaṭṭhānaṃ.
 Itthāniṭṭhaanubhavanaṇalakkhaṇā vedanā, sā taṇhāya padaṭṭhānaṃ. Ajjhosaṇalakkhaṇā taṇhā, sā
 upādānaṇaṃ padaṭṭhānaṃ. Opapaccayikaṃ upādānaṃ, taṃ bhavassa padaṭṭhānaṃ.
 Nāmakāyarūpakāyasambhavanaṇalakkhaṇo bhavo, so jātiyā padaṭṭhānaṃ. Khandhapātubhavanaṇalakkhaṇā
 jāti, sā jarāya padaṭṭhānaṃ. Upadhiparipākalakkhaṇā jarā, sā maraṇassa padaṭṭhānaṃ.
 Jivitindriyupacchedalakkhaṇānaṃ maraṇānaṃ, taṃ sokassa padaṭṭhānaṃ. Ussukkakārako soko, so
 paridevassa padaṭṭhānaṃ. Lālappakārako paridevo, so dukkhassa padaṭṭhānaṃ. Kāyasampīḷānaṃ
 dukkhaṃ, taṃ domanassassa padaṭṭhānaṃ. Cittasampīḷānaṃ domanassaṃ, taṃ upāyāsassa padaṭṭhānaṃ.
 Odahanakārako upāyāso, so bhavassa padaṭṭhānaṃ. Imāni bhavaṅgāni yadā samaggāni nibbattāni
 bhavanti so bhavo, taṃ saṃsārassa padaṭṭhānaṃ. Niyyānikalakkhaṇo maggo, so nirodhassa
 padaṭṭhānaṃ.

Titthaññutā pītaññutāya padaṭṭhānaṃ, pītaññutā pattaññutāya [mattaññutāya (sī. ka.)] padaṭṭhānaṃ,
 pattaññutā attaññutāya padaṭṭhānaṃ, attaññutā pubbekatapuññatāya padaṭṭhānaṃ, pubbekatapuññatā
 patirūpadesavāsassa padaṭṭhānaṃ, patirūpadesavāso sappurisūpanissayassa padaṭṭhānaṃ,
 sappurisūpanissayo attasammāpaṇidhānaṇaṃ padaṭṭhānaṃ, attasammāpaṇidhānaṃ silānaṃ padaṭṭhānaṃ,
 silāni avippaṭiṣārassa padaṭṭhānaṃ, avippaṭiṣāro pāmojjassa padaṭṭhānaṃ, pāmojjaṃ pītiyā padaṭṭhānaṃ,
 pīti passaddhiyā padaṭṭhānaṃ, passaddhi sukhaṇaṃ padaṭṭhānaṃ, sukhaṃ samādhissa padaṭṭhānaṃ,
 samādhī yathābhūtaññānadassanassa padaṭṭhānaṃ, yathābhūtaññānadassanaṃ nibbidāya padaṭṭhānaṃ,
 nibbidā virāgassa padaṭṭhānaṃ, virāgo vimuttiyā padaṭṭhānaṃ. Vimutti vimuttiññānadassanassa
 padaṭṭhānaṃ. Evaṃ yo koci upanissayo yo koci paccayo, sabbo so padaṭṭhānaṃ. Tenāha āyasmā
 mahākaccāyano “dhammaṃ deseti jino”ti.

Niyutto padaṭṭhāno hāro.

5. Lakkhaṇahāravibhaṅgo

23. Tattha katamo lakkhaṇo hāro? “Vuttamhi ekadhamme”ti, ayaṃ lakkhaṇo hāro. Kiṃ

lakkhayati? Ye dhammā ekalakkhaṇā, tesam dhammānaṃ ekasmiṃ dhamme vutte avasiṭṭhā dhammā vuttā bhavanti. Yathā kiṃ bhavē? Yathāha bhagavā –

“Cakkhum, bhikkhave, anavaṭṭhitam ittaram parittam pabhaṅgu parato dukkham byasanaṃ calanaṃ [calam (sī.)] kukkuḷam saṅkhāram [sasāṅkhāram (ka.)] vadhakaṃ amittamajjhe. Imasmiṃ cakkhusmiṃ vutte avasiṭṭhāni ajjhattikāni āyatanāni vuttāni bhavanti. Kena kāraṇena? Sabbāni hi cha ajjhattikāni āyatanāni vadhakaṭṭhena ekalakkhaṇāni. Yathā cāha bhagavā –

“Atīte, rādha, rūpe anapekkho hohi, anāgataṃ rūpaṃ mā abhinandi [abhinanda (ka.)], paccuppanassa rūpassa nibbidāya virāgāya nirodhāya cāgāya paṭinissaggāya paṭipajja. Imasmiṃ rūpakkhandhe vutte avasiṭṭhā khandhā vuttā bhavanti. Kena kāraṇena? Sabbe hi pañcakkhandhā yamakovādasutte [passa sam. ni. 3.84] vadhakaṭṭhena ekalakkhaṇā vuttā. Yathā cāha bhagavā –

“Yesaṅca [passa dha. pa. 293] susamāraddhā, niccam kāyagatāsati; Akiccam te na sevanti, kicce sātaccakārino”.

Iti kāyagatāya satiyā vuttāya vuttā bhavanti vedanāgatā sati cittagatā dhammagatā ca. Tathā yaṃ kiñci diṭṭham vā sutam vā mutam vāti vutte vuttam bhavati viññātam. Yathā cāha bhagavā –

Tasmātiha tvam bhikkhu kāye kāyānupassī viharāhi ātāpī sampajāno satimā vineyya loke abhijjhādomanassaṃ. “Ātāpī”ti vīriyindriyaṃ, “**sampajāno**”ti paññindriyaṃ, “**satimā**”ti satindriyaṃ, “**vineyya loke abhijjhādomanassa**”nti samādhindriyaṃ, evaṃ kāye kāyānupassino viharato cattāro satipaṭṭhānā bhāvanāpāripūriṃ gacchanti. Kena kāraṇena, ekalakkhaṇattā catunnam indriyānaṃ.

24. Catūsu satipaṭṭhānesu bhāviyamānesu cattāro sammappadhānā bhāvanāpāripūriṃ gacchanti, catūsu sammappadhānesu bhāviyamānesu cattāro iddhipādā bhāviyamānesu pañcindriyāni bhāvanāpāripūriṃ gacchanti, catūsu iddhipādesu bhāvanāpāripūriṃ gacchanti, pañcasu indriyesu bhāviyamānesu pañca balāni bhāvanāpāripūriṃ gacchanti, pañcasu balesu bhāviyamānesu satta bojjhaṅgā bhāvanāpāripūriṃ gacchanti, sattasu bojjhaṅgesu bhāviyamānesu ariyo aṭṭhaṅgiko maggo bhāvanāpāripūriṃ gacchati, sabbeva [sabbe ca (sī. ka.)] bodhaṅgamā dhammā bodhipakkiyā bhāvanāpāripūriṃ gacchanti. Kena kāraṇena, sabbe hi bodhaṅgamā bodhipakkiyā neyyānikalakkhaṇena ekalakkhaṇā, te ekalakkhaṇattā bhāvanāpāripūriṃ gacchanti.

Evaṃ akusalāpi dhammā ekalakkhaṇattā pahānaṃ abbattham gacchanti. Catūsu satipaṭṭhānesu bhāviyamānesu vipallāsā pahīyanti, āhārā cassa pariññaṃ gacchanti, upādānehi anupādāno bhavati, yogehi ca viṣamūyutto bhavati, ganthehi ca vippayutto bhavati, āsavehi ca anāsavo bhavati, oghehi ca nitthiṇṇo bhavati, sallehi ca visallo bhavati, viññāṇaṭṭhitiyo cassa pariññaṃ gacchanti, agatigamanehi na agatiṃ gacchati, evaṃ akusalāpi dhammā ekalakkhaṇattā pahānaṃ abbattham gacchanti.

Yattha vā pana rūpindriyaṃ desitaṃ, desitā tattheva rūpadhātu rūpakkhandho rūpañcāyatanam. Yattha vā pana sukhā vedanā desitā, desitaṃ tattha sukhindriyaṃ somanassindriyaṃ dukkhasamudayo ca ariyasaccam. Yattha vā pana dukkhā vedanā desitā, desitaṃ tattha dukkhindriyaṃ domanassindriyaṃ dukkhaṅca ariyasaccam. Yattha vā pana adukkhamasukhā vedanā desitā, desitaṃ tattha upekkhindriyaṃ sabbo ca paṭiccasamuppādo. Kena kāraṇena, adukkhamasukhāya hi vedanāya avijjā anuseti. Avijjāpaccayā saṅkhārā, saṅkhārapaccayā viññānaṃ, viññānapaccayā nāmarūpaṃ, nāmarūpapaccayā saḷāyatanam, saḷāyatanapaccayā phasso, phassapaccayā vedanā, vedanāpaccayā taṇhā, taṇhāpaccayā upādānam, upādānapaccayā bhavo, bhavapaccayā jāti, jātipaccayā jarāmarāṇam sokaparidevadukkhadomanassupāyāsā sambhavanti, evametassa kevalassa dukkhakkhandhassa samudayo hoti. So ca sarāgasadosasamohasamkilesapakkena hātabbo, vītarāgavītadosavītamohaariyadhammehi hātabbo.

Evam ye dhammā ekalakkhaṇā kiccato ca lakkhaṇato ca sāmāññato ca cutūpapātato ca, tesam dhammānaṃ ekasmiṃ dhamme vutte avasiṭṭhā dhammā vuttā bhavanti. Tenāha āyasmā mahākaccāyano “vuttamhi ekadhamme”ti.

Niyutto lakkhaṇo hāro.

6. Catubyūhahāravibhaṅgo

25. Tattha katamo catubyūho hāro? “Neruttamadhippāyo”ti ayam. Byañjanena suttassa neruttañca adhippāyo ca nidānañca pubbāparasandhi ca gavesitabbo. Tattha katamaṃ neruttaṃ, yā niruttipadasaṃhitā, yaṃ dhammānaṃ nāmaso ñāṇaṃ. Yadā hi bhikkhu atthassa ca nāmaṃ jānāti, dhammassa ca nāmaṃ jānāti, tathā tathā naṃ abhiniropeti. Ayañca vuccati atthakusalo dhammakusalo byañjanakusalo niruttikusalo pubbāparakusalo desanākusalo atītādhivacanakusalo anāgatādhivacanakusalo paccuppannādhivacanakusalo itthādhivacanakusalo purisādhivacanakusalo napuṃsakādhivacanakusalo ekādhivacanakusalo anekādhivacanakusalo, evaṃ sabbāni kātābbāni janapadaniruttāni sabbā ca janapadaniruttiyo. Ayam niruttipadasaṃhitā.

26. Tattha katamo adhippāyo?

“Dhammo have rakkhati dhammacāriṃ, chattaṃ mahantaṃ yatha vassakāle [[viya vassakāle jā. 1.10.103](#)];
Esānisamso dhamme suciṇṇe, na duggatiṃ gacchati dhammacārī”ti.

Idha bhagavato ko adhippāyo? Ye apāyehi parimuccitukāmā bhavissanti, te dhammacārino bhavissantīti ayam ettha bhagavato adhippāyo.

“Coro yathā sandhimukhe gahīto, sakammunā haññati [[haññate \(sī.\)](#)] bajjhate ca;
Evaṃ ayam pecca pajā parattha, sakammunā haññati [[haññate \(sī.\)](#)] bajjhate cā”ti.

Idha bhagavato ko adhippāyo? Sañcetanikānaṃ katānaṃ kammānaṃ upacitānaṃ dukkhavedanīyānaṃ aniṭṭhaṃ asātaṃ vipākaṃ paccanubhavissatīti ayam ettha bhagavato adhippāyo.

“Sukhakāmāni [[passa dha. pa. 131-132](#)] bhūtāni, yo daṇḍena vihiṃsati;
Attano sukhamesāno, pecca so na labhate sukha”nti.

Idha bhagavato ko adhippāyo? Ye sukhena atthikā bhavissanti, te pāpakammaṃ [[pāpakam kammaṃ \(ka.\)](#)] na karissantīti ayam ettha bhagavato adhippāyo.

“Middhī [[passa dha. pa. 325](#)] yadā hoti mahagghaso ca, niddāyitā samparivattasāyī;
Mahāvarāhova nivāpapuṭṭho, punappunaṃ gabbhamupeti mando”ti.

Idha bhagavato ko adhippāyo? Ye jarāmaraṇena aṭṭiyitukāmā bhavissanti, te bhavissanti bhojane mattaññuno indriyesu guttadvārā pubbarattāpararattaṃ jāgariyānuyogamanuyuttā vipassakā kusalesu dhammesu sagāravā ca sabrahmacārīsu thesu navesu majjhimesūti ayam ettha bhagavato adhippāyo.

“Appamādo amatapadaṃ [[amataṃ padaṃ \(ka.\) passa dha. pa. 21](#)], pamādo maccuno padaṃ;
Appamattā na mīyanti, ye pamattā yathā matā”ti.

Idha bhagavato ko adhippāyo? Ye amatapariyesanaṃ pariyesitukāmā bhavissanti, te appamattā viharissantīti ayam ettha bhagavato adhippāyo. Ayam adhippāyo.

27. Tattha katamaṃ nidānaṃ? Yathā so dhaniyo gopālako bhagavantaṃ āha –

“Nandati puttehi puttimā, gomā [gomiko (sī.), gopiko (ka.) su. ni. 33; saṃ. ni. 1.144 passitabbaṃ] gohi tattheva nandati;
Upadhī hi narassa nandanā, na hi so nandati yo nirūpadhī”ti.

Bhagavā āha –

“Socati puttehi puttimā, gopiko [gomiko (sī.)] gohi tattheva socati;
Upadhī hi narassa socanā, na hi so socati yo nirūpadhī”ti.

Iminā vatthunā iminā nidānena evaṃ ñāyati “idha bhagavā bāhiraṃ pariggahaṃ upadhi āhā”ti.
Yathā ca māro pāpimā gijjhakūṭā pabbatā puthusilaṃ pātesi, bhagavā āha –

“Sacepi kevalaṃ sabbhaṃ, gijjhakūṭaṃ calessasi [caleyyāsi (ka.) passa saṃ. ni. 1.147];
Neva sammāvimuttānaṃ, buddhānaṃ atthi iñjitaṃ.

Nabhaṃ phaleyappathavī caleyya, sabbeva pāṇā uda santaseyyuṃ;
Sallampī ce urasi kampaṃyeyyuṃ [pakampaṃyeyyuṃ (sī.), kampaṃyeyyuṃ (ka.)], upadhīsu tāṇaṃ
na karonti buddhā”ti.

Iminā vatthunā iminā nidānena evaṃ ñāyati “idha bhagavā kāyaṃ upadhiṃ āhā”ti. Yathā cāha –

“Na taṃ daḷhaṃ bandhanamāhu dhīrā, yadāyasaṃ dārujapabbajaṅca [dārujaṃ babbajaṅca (sī.)
passa dha. pa. 345];
Sārattarattā maṇikuṇḍalesu, puttesu dāresu ca yā apekkhā”ti.

Iminā vatthunā iminā nidānena evaṃ ñāyati “idha bhagavā bāhiresu vatthūsu taṇhaṃ āhā”ti. Yathā
cāha –

“Etaṃ daḷhaṃ bandhanamāhu dhīrā, ohāriṇaṃ sithilaṃ duppamuñcaṃ;
Etampī chetvāna paribbajanti, anapekkhino kāmasukhaṃ pahāyā”ti.

Iminā vatthunā iminā nidānena evaṃ ñāyati “idha bhagavā bāhiravatthukāya taṇhāya pahānaṃ
āhā”ti. Yathā cāha –

“Āturaṃ asuciṃ pūtiṃ, duggandhaṃ dehanissitaṃ;
Paggharantaṃ divā rattiṃ, bālānaṃ abhinandita”nti.

Iminā vatthunā iminā nidānena evaṃ ñāyati “idha bhagavā ajjhattikavatthukāya taṇhāya pahānaṃ
āhā”ti. Yathā cāha –

“Ucchinda [passa dha. pa. 285] sinehamattano, kumudaṃ sārādikaṃva pāṇinā;
Santimaggameva brūhaya, nibbānaṃ sugatena desita”nti.

Iminā vatthunā iminā nidānena evaṃ ñāyati “idha bhagavā ajjhattikavatthukāya taṇhāya pahānaṃ
āhā”ti. Idaṃ nidānaṃ.

Tattha katamo pubbāparasandhi. Yathāha –

“Kāmandhā jālasañchannā, taṇhāchadanachādītā;
Pamattabandhanā [pamattabandhunā udā. 64] baddhā [bandhā (ka.) passa udā. 64], macchāva
kumināmukhe;
Jarāmarañamanventi, vaccho khīrapakova mātara’’nti.

Ayaṃ kāmataṇhā vuttā. Sā katamena pubbāparena yujjati? Yathāha –

“Ratto atthaṃ na jānāti, ratto dhammaṃ na passati;
Andhantamaṃ tadā hoti, yaṃ rāgo sahate nara’’nti.

Iti andhatāya ca sañchannatāya ca sāyeva taṇhā abhilapitā. Yañcāha kāmandhā jālasañchannā, taṇhāchadanachādītā. Yañcāha ratto atthaṃ na jānāti, ratto dhammaṃ na passatīti, imehi padehi pariyuṭṭhānehi sāyeva taṇhā abhilapitā. Yaṃ andhakāraṃ, ayaṃ dukkhasamudayo, yā ca taṇhā ponobhavikā, yañcāha kāmāti ime kilesakāmā. Yañcāha jālasañchannāti tesam yeva kāmānaṃ payogena pariyuṭṭhānaṃ dasseti, tasmā kilesavasena ca pariyuṭṭhānavasena ca taṇhābandhanaṃ vuttaṃ. Ye edisikā, te jarāmarañamaṃ anventi, ayaṃ bhagavatā yathānikkhattagāthābalena dassitā jarāmarañamanventīti.

“Yassa papañcā ṭhītī ca natthi, sandānaṃ palighañca [paḷighañca (sī.) passa udā. 67] vītivatto;
Taṃ nittaṇhaṃ munīṃ carantaṃ, na vijānāti sadevakopi loko’’ti.

Papañcā nāma taṇhādīṭṭhimānā, tadabhisankhatā ca saṅkhārā. Ṭhīti nāma anusayā. Sandānaṃ nāma taṇhāya pariyuṭṭhānaṃ, yāni chattiṃsataṇhāya jāliniyā vicarītāni. Paligho nāma moho. Ye ca papañcā saṅkhārā yā ca ṭhīti yaṃ sandānañca yaṃ palighañca yo etaṃ sabbaṃ samatikkanto, ayaṃ vuccati nittaṇho iti.

28. Tattha pariyuṭṭhānasankhārā diṭṭhadhammavedanīyā vā upapajjedanīyā vā aparāpariyavedanīyā vā, evaṃ taṇhā tividhaṃ phalaṃ deti diṭṭhe vā dhamme upapajje vā apare vā pariyāye. Evaṃ bhagavā āha “yaṃ lobhapakataṃ kammaṃ karoti kāyena vā vācāya vā manasā vā, tassa vipākaṃ anubhoti diṭṭhe vā dhamme upapajje vā apare vā pariyāye’’ti. Idaṃ bhagavato pubbāparena yujjati. Tattha pariyuṭṭhānaṃ diṭṭhadhammavedanīyaṃ vā kammaṃ upapajjedanīyaṃ vā kammaṃ aparāpariyāvedanīyaṃ [aparāpariyavedanīyaṃ (sī.)] vā kammaṃ, evaṃ kammaṃ tidhā vipaccati diṭṭhe vā dhamme upapajje vā apare vā pariyāye. Yathāha –

“Yañce bālo idha pāṇātipātī hoti...pe... micchādīṭṭhi hoti, tassa diṭṭhe vā dhamme vipākaṃ paṭisaṃvedeti upapajje vā apare vā pariyāye’’ti. Idaṃ bhagavato pubbāparena yujjati. Tattha pariyuṭṭhānaṃ paṭisaṅkhānabalena pahātabbaṃ, saṅkhārā dassanabalena, chattiṃsa taṇhāvicarītāni bhāvanābalena pahātabbānīti evaṃ taṇhāpi tidhā pahīyati. Yā nittaṇhātā ayaṃ saupādisesā nibbānadhātu. Bheda kāyassa ayaṃ anupādisesā nibbānadhātu.

Papañco nāma vuccati anubandho. Yañcāha bhagavā “papañceti atītānāgatapaccuppannaṃ cakkhuvīññeyyaṃ rūpaṃ ārabbhā’’ti. Yañcāha bhagavā – “atīte, rādha, rūpe anapekkho hohi, anāgataṃ rūpaṃ mā abhinandi, paccuppannaṃ rūpaṃ nibbidāya virāgāya nirodhāya paṭinissaggāya paṭipajjā’’ti. Idaṃ bhagavato pubbāparena yujjati. Yo cāpi papañco ye ca saṅkhārā yā ca atītānāgatapaccuppannaṃ abhinandanā, idaṃ ekatthaṃ. Api ca aññamaññehi padehi aññamaññehi akkharehi aññamaññehi byañjanehi aparimāṇā dhammadesanā vuttā bhagavatā. Evaṃ suttena suttaṃ saṃsandayitvā pubbāparena saddhiṃ yojayitvā suttaṃ niddiṭṭhaṃ bhavati.

So cāyaṃ [sa cāyaṃ (sī.)] pubbāparo sandhi catubbidho atthasandhi byañjanasandhi desanāsandhi niddesasandhīti.

Tattha atthasandhi chappadāni saṅkāsanā pakāsanā vivaraṇā vibhajanā uttānikammatā paññattīti.

Byañjanasandhi chappadāni akkharaṃ padaṃ byañjanaṃ ākāro nirutti niddesoti.

Desanāsandhi na ca pathaviṃ nissāya jhāyati jhāyī jhāyati ca. Na ca āpaṃ nissāya jhāyati jhāyī jhāyati ca, na ca tejaṃ nissāya jhāyati jhāyī jhāyati ca, na ca vāyuṃ nissāya jhāyati jhāyī jhāyati ca. Na ca ākāsaṇāñcāyatanaṃ nissāya...pe... na ca viññāṇaṇcāyatanaṃ nissāya...pe... na ca ākiñcaññāyatanaṃ nissāya...pe... na ca nevaṣaṇñānāsaññāyatanaṃ nissāya...pe... na ca imaṃ lokaṃ nissāya...pe... na ca paralokaṃ nissāya jhāyati jhāyī jhāyati ca. Yamidaṃ ubhayamantarena diṭṭhaṃ suttaṃ mutaṃ viññātaṃ pattaṃ pariyesitaṃ vitakkitaṃ vicāritaṃ manasānucintitaṃ, tampi nissāya na jhāyati jhāyī jhāyati ca. Ayaṃ sadevake loke samāraṇe sabrahmake sassamaṇabrāhmaṇiyā pajāya sadevamanussāya anissitena cittaṃ na ñāyati jhāyanto.

Yathā māro pāpimā godhikassa kulaputtassa [passa saṃ. ni. 1.159] viññāṇaṃ samanvesanto na jānāti na passati. So hi papañcātīto taṇhāpahānena diṭṭhinissayopissa natthi. Yathā ca godhikassa, evaṃ vakkalissa sadevakena lokena samāraṇena sabrahmakena sassamaṇabrāhmaṇiyā pajāya sadevamanussāya anissitacittā na ñāyanti jhāyamānā. Ayaṃ desanāsandhi.

Tattha katamā niddesasandhi? Nissitacittā akusalapakkhena niddisitabbā, anissitacittā kusalapakkhena niddisitabbā. Nissitacittā kilesena niddisitabbā, anissitacittā vodānena niddisitabbā. Nissitacittā saṃsārappavattiyā niddisitabbā, anissitacittā saṃsāranivattiyā niddisitabbā. Nissitacittā taṇhāya ca avijjāya ca niddisitabbā, anissitacittā samathena ca vipassanāya ca niddisitabbā. Nissitacittā ahirikenā ca anottappena ca niddisitabbā, anissitacittā hiriyā ca ottappena ca niddisitabbā. Nissitacittā asatiyā ca asampajaññaṇa ca niddisitabbā, anissitacittā satiyā ca sampajaññaṇa ca niddisitabbā. Nissitacittā ayoniyā ca ayonisomanasikāreṇa ca niddisitabbā, anissitacittā yoniyā ca yonisomanasikāreṇa ca niddisitabbā. Nissitacittā kosajjena ca dovaccassena ca niddisitabbā, anissitacittā vīriyārambhena ca sovacassena ca niddisitabbā. Nissitacittā assaddhiyena ca pamādena ca niddisitabbā, anissitacittā saddhāya ca appamādena ca niddisitabbā. Nissitacittā asaddhammassavanena ca saṃvaraṇena ca niddisitabbā, anissitacittā saddhammassavanena ca saṃvarena ca niddisitabbā. Nissitacittā abhijjhāya ca byāpādena ca niddisitabbā, anissitacittā anabhijjhāya ca abyāpādena ca niddisitabbā. Nissitacittā nīvaraṇehi ca saṃyojanīyehi ca niddisitabbā, anissitacittā rāgavīriyā ca cetovimuttīyā avijjāvīriyā ca paññāvīriyā niddisitabbā. Nissitacittā ucchedadiṭṭhiyā ca sassatadiṭṭhiyā ca niddisitabbā, anissitacittā saupādisesāya ca anupādisesāya ca nibbānadhātuyā niddisitabbā. Ayaṃ niddesasandhi. Tenāha āyasmā mahākaccāyano “neruttamadhīpāyo”ti.

Niyutto catubyūho hāro.

7. Āvaṭṭahāravibhaṅgo

29. Tattha katamo āvaṭṭo hāro? “Ekamhi padaṭṭhāne”ti ayaṃ.

“Ārambhatha [ārabbhatha (sī.) saṃ. ni. 1.185; theragā. 256 passitabbaṃ] nikkamatha, yuñjatha buddhasāsane;
Dhunātha maccuno senaṃ, naḷāgāraṃva kuñjaro”ti.

“Ārambhatha nikkamathā”ti vīriyassa padaṭṭhānaṃ. “Yuñjatha buddhasāsane”ti samādhissa padaṭṭhānaṃ. “Dhunātha maccuno senaṃ, naḷāgāraṃva kuñjaro”ti paññāya padaṭṭhānaṃ. “Ārambhatha nikkamathā”ti vīriyindriyassa padaṭṭhānaṃ. “Yuñjatha buddhasāsane”ti samādhindriyassa padaṭṭhānaṃ. “Dhunātha maccuno senaṃ, naḷāgāraṃva kuñjaro”ti paññindriyassa padaṭṭhānaṃ. Imāni padaṭṭhānāni desanā.

Ayuñjantānaṃ vā sattānaṃ yoge, yuñjantānaṃ vā ārambho.

Tattha ye na yuñjanti, te pamādamūlakā na yuñjanti. So pamādo duvidho tañhāmūlako avijjāmūlako ca. Tattha avijjāmūlako yena aññāna nivuto ñeyyatthānaṃ nappajānāti pañcakkhandhā uppādavayadhammāti, ayaṃ avijjāmūlako. Yo tañhāmūlako, so tividho anuppanānaṃ bhogānaṃ uppādāya pariyesanto pamādaṃ āpajjati, uppanānaṃ bhogānaṃ ārakkhanimittam paribhoganimittaṃca pamādaṃ āpajjati ayaṃ loke catubbidho pamādo ekavidho avijjāya tividho tañhāya. Tattha avijjāya nāmakāyo padaṭṭhānaṃ. Tañhāya rūpakāyo padaṭṭhānaṃ. Taṃ kissa hetu, rūpīsu bhavesu ajjhosānaṃ, arūpīsu sammoho? Tattha rūpakāyo rūpakkhandho nāmakāyo cattāro arūpino khandhā. Ime pañcakkhandhā katamena upādānena saupādānā, tañhāya ca avijjāya ca? Tattha tañhā dve upādānāni kāmupādānaṃca sīlabbatupādānaṃca. Avijjā dve upādānāni diṭṭhupādānaṃca attavādupādānaṃca. Imehi catūhi upādānehi ye saupādānā khandhā, idaṃ dukkhaṃ. Cattāri upādānāni, ayaṃ samudayo. Pañcakkhandhā dukkhaṃ. Tesam bhagavā pariññāya pahānāya ca dhammaṃ deseti dukkhassa pariññāya samudayassa pahānāya.

30. Tattha yo tividho tañhāmūlako pamādo anuppanānaṃ bhogānaṃ uppādāya pariyesati, uppanānaṃ bhogānaṃ ārakkhaṇaṃca karoti paribhoganimittaṃca, tassa sampaṭivedhena rakkhaṇā paṭisaṃharaṇā, ayaṃ samatho.

So kathaṃ bhavati? Yadā jānāti kāmānaṃ assādaṃca assādato ādīnavaṃca ādīnavato nissaraṇaṃca nissaraṇato okāraṃca saṃkilesaṃca vodānaṃca nekkhamme ca ānisamsaṃ. Tattha yā vīmaṃsā upaparikkhā ayaṃ vipassanā. Ime dve dhammā bhāvanāpāripūriṃ gacchanti samatho ca vipassanā ca. Imesu dvīsu dhammesu bhāviyamānesu dve dhammā pahīyanti tañhā ca avijjā ca, imesu dvīsu dhammesu pahīnesu cattāri upādānāni nirujjhanti. Upādānanirodhā bhavanirodho, bhavanirodhā jātinirodho, jātinirodhā jarāmāraṇaṃ sokaparidevadukkhadomanassupāyāsā nirujjhanti. Evametassa kevalassa dukkhakkhandhassa nirodho hoti. Iti purimakāni ca dve saccāni dukkhaṃ samudayo ca, samatho ca vipassanā ca maggo. Bhavanirodho nibbānaṃ imāni cattāri saccāni. Tenāha bhagavā “ārambhatha nikkamathā”ti.

Yathāpi mūle anupaddave daḷhe, chinnopi rukkho punareva [punadeva (ka.) passa dha. pa. 338] rūhati;

Evampi tañhānusaye anūhate, nibbattatī dukkhamidaṃ punappunaṃ.

Ayaṃ tañhānusayo. Katamassā tañhāya? Bhavatañhāya. Yo etassa dhammassa paccayo ayaṃ avijjā. Avijjāpaccayā hi bhavatañhā. Ime dve kilesā tañhā ca avijjā ca. Tāni cattāri upādānāni tehi catūhi upādānehi ye saupādānā khandhā, idaṃ dukkhaṃ. Cattāri upādānāni ayaṃ samudayo. Pañcakkhandhā dukkhaṃ. Tesam bhagavā pariññāya ca pahānāya ca dhammaṃ deseti dukkhassa pariññāya samudayassa pahānāya.

Yena tañhānusayaṃ samūhanati [samūhanti (sī.)], ayaṃ samatho. Yena tañhānusayassa paccayaṃ avijjāṃ vārayati, ayaṃ vipassanā. Ime dve dhammā bhāvanāpāripūriṃ gacchanti samatho ca vipassanā ca. Tattha samathassa phalaṃ rāgavirāgā cetovimutti, vipassanāya phalaṃ avijjāvirāgā paññāvimutti. Iti purimakāni ca dve saccāni dukkhaṃ samudayo ca, samatho vipassanā ca maggo, dve ca vimuttiyo nirodho. Imāni cattāri saccāni. Tenāha bhagavā “yathāpi mūle”ti.

“Sabbapāpassa akaraṇaṃ, kusalassa upasampadā;

Sacittapariyodāpanaṃ [pariyodāpanaṃ (sī.) dha. pa. 183; dī. ni. 2.90 passitabbaṃ], etaṃ buddhāna sāsana”nti.

Sabbapāpaṃ nāma tīṇi duccharitāni kāyaduccharitaṃ vacīduccaritaṃ manoduccharitaṃ, te dasa akusalakammāpathā pañātipāto adinnādānaṃ kāmesumicchācāro musāvādo piṣuṇā vācā pharusā vācā

samphappalāpo abhijjhā byāpādo micchādīṭṭhi, tāni dve kammāni cetanā cetasikañca. Tattha yo ca pāṇātipāto yā ca pisuṇā vācā yā ca pharusā vācā, idaṃ dosasamuṭṭhānaṃ. Yañca adinnādānaṃ yo ca kāmesumicchācāro yo ca musāvādo, idaṃ lobhasamuṭṭhānaṃ, yo samhappalāpo, idaṃ mohasamuṭṭhānaṃ. Imāni satta kāraṇāni cetanākammaṃ. Yā abhijjhā, ayaṃ lobho akusalamūlaṃ. Yo byāpādo, ayaṃ doso akusalamūlaṃ. Yā micchādīṭṭhi, ayaṃ micchāmaggo. Imāni tīṇi kāraṇāni cetasikakammaṃ. Tenāha “cetanākammaṃ cetasikakamma”nti.

Akusalamūlaṃ payogaṃ gacchantaṃ catubbidhaṃ agatiṃ gacchati chandā dosā bhayā mohā. Tattha yaṃ chandā agatiṃ gacchati, idaṃ lobhasamuṭṭhānaṃ. Yaṃ dosā agatiṃ gacchati, idaṃ dosasamuṭṭhānaṃ. Yaṃ bhayā ca mohā ca agatiṃ gacchati, idaṃ mohasamuṭṭhānaṃ. Tattha lobho asubhāya pahīyati. Doso mettāya. Moho paññāya. Tathā lobho upekkhāya pahīyati. Doso mettāya ca karuṇāya ca. Moho muditāya pahānaṃ abbatthaṃ gacchati. Tenāha bhagavā “sabbapāpassa akaraṇa”nti.

31. Sabbapāpaṃ nāma aṭṭha micchattāni micchādīṭṭhi micchāsankappo micchāvācā micchākammanto micchājīvo micchāvāyāmo micchāsati micchāsamādhī, idaṃ vuccati sabbapāpaṃ. Imesaṃ aṭṭhannaṃ micchattānaṃ yā akiriya akaraṇaṃ anajjhācāro, idaṃ vuccati sabbapāpassa akaraṇaṃ.

Aṭṭhasu micchattesu pahīnesu aṭṭha sammattāni sampajjanti. Aṭṭhannaṃ sammattānaṃ yā kiriya karaṇaṃ sampādanaṃ, ayaṃ vuccati kusalassa upasampadā. Sacittapariyodāpananti atītassa maggassa bhāvanākiriyaṃ dassayati, citte pariyodāpīte [pariyodapīte (sī. ka.)] pañcakkhandhā pariyodāpītā bhavanti, evaṃhi bhagavā āha “cetovisuddhatthaṃ, bhikkhave, tathāgate brahmacariyaṃ vussatī”ti. Duvidhā hi pariyodāpanā nīvaraṇappahānañca anusayasamuggahāto ca. Dve pariyodāpanabhūmiyo dassanabhūmi ca, bhāvanābhūmi ca, tattha yaṃ paṭivedhena pariyodāpeti, idaṃ dukkhaṃ. Yato pariyodāpeti, ayaṃ samudayo. Yena pariyodāpeti, ayaṃ maggo. Yaṃ pariyodāpitaṃ, ayaṃ nirodho. Imāni cattāri saccāni. Tenāha bhagavā “sabbapāpassa akaraṇa”nti.

“Dhammo have rakkhati dhammacāriṃ, chattaṃ mahantaṃ yatha vassakāle;
Esānisamaṃso dhamme suciṇṇe, na duggatiṃ gacchati dhammacārī”ti.

Dhammo nāma duvidho indriyaṣaṃvaro maggo ca. Duggati nāma duvidhā devamanusse vā upanidhāya apāyā duggati, nibbānaṃ vā upanidhāya sabbā upapattiyo duggati. Tattha yā saṃvarasīle akhaṇḍakāritā, ayaṃ dhammo suciṇṇo apāyehi rakkhati. Evaṃ bhagavā āha – dvemā, bhikkhave, sīlavato gatiyo devā ca manussā ca. Evañca nāḷandāyaṃ nigame asibandhakaputto gāmaṇi bhagavantaṃ etadavoca –

“Brāhmaṇā, bhante, pacchābhūmakā kāmaṇḍalukā sevālamālikā udakorohakā aggiparicārakā, te mataṃ kālaṅkataṃ uyyāpentī nāma, saññāpentī nāma, saggāṃ nāma okkāmenti [uggamenti (sī.) passa saṃ. ni. 4.358]. Bhagavā pana, bhante, arahaṃ sammāsambuddho pahoti tathā kātuṃ, yathā sabbo loko kāyassa bhedaṃ paraṃ maraṇā sugatiṃ saggāṃ lokaṃ upapajjeyyā”ti.

“Tena hi, gāmaṇi, taññevettha paṭipucchissāmi, yathā te khameyya, tathā naṃ byākareyyāsīti.

“Taṃ kiṃ maññasi, gāmaṇi, idhassa puriso pāṇātipātī adinnādāyī kāmesumicchācārī musāvādī pisuṇavāco pharusavāco samhappalāpī abhijjhālu byāpannacitto micchādīṭṭhiko, tamenam mahājanakāyo saṅgama samāgama āyāceyya thomeyya pañjaliko anuparisakkeyya ‘ayaṃ puriso kāyassa bhedaṃ paraṃ maraṇā sugatiṃ saggāṃ lokaṃ upapajjatū’ti. Taṃ kiṃ maññasi, gāmaṇi, api nu so puriso mahato janakāyassa āyācanahetu vā thomanahetuvā pañjalikaṃ [pañjalikā saṃ. ni. 4.358] anuparisakkanahetu vā kāyassa bhedaṃ paraṃ maraṇā sugatiṃ saggāṃ lokaṃ upapajjeyyā”ti. “No hetam, bhante”.

“Seyyathāpi, gāmaṇi, puriso mahatiṃ puthusilaṃ gambhīre udakarahade [udakadahe (ka.)] pakkhipeyya, tamenam mahājanakāyo saṅgama samāgama āyāceyya thomeyya pañjaliko anuparisakkeyya ‘ummujja, bho, puthusile, uplava bho puthusile, thalamuplava, bho puthusile’ ti. Taṃ kiṃ maññasi gāmaṇi, api nu sā mahatī puthusilā mahato janakāyassa āyācanahetu vā thomanahetu vā pañjalikaṃ anuparisakkanahetu vā ummujeyya vā uplaveyya vā thalam vā uplaveyyā’ ti. “No hetam, bhante”. “Evameva kho, gāmaṇi, yo so puriso pāṇātipātī...pe... micchādiṭṭhiko, kiñcāpi nam mahājanakāyo saṅgama samāgama āyāceyya thomeyya pañjaliko anuparisakkeyya ‘ayam puriso kāyassa bheda param maraṇā sugatiṃ saggam lokaṃ upapajjatū’ ti. Atha kho so puriso kāyassa bheda param maraṇā apāyam duggatiṃ vinipātam nirayam upapajjeyya.

“Taṃ kiṃ maññasi, gāmaṇi, idhassa puriso pāṇātipātā paṭivirato adinnādānā paṭivirato kāmesumicchācārā paṭivirato musāvādā paṭivirato piṣuṇāya vācāya paṭivirato pharusāya vācāya paṭivirato samphappalāpā paṭivirato anabhijjhālu abyāpannacitto sammādiṭṭhiko, tamenam mahājanakāyo saṅgama samāgama āyāceyya thomeyya pañjaliko anuparisakkeyya ‘ayam puriso kāyassa bheda param maraṇā apāyam duggatiṃ vinipātam nirayam upapajjatū’ ti. Taṃ kiṃ maññasi, gāmaṇi, api nu so puriso mahato janakāyassa āyācanahetu vā thomanahetu vā pañjalikaṃ anuparisakkanahetu vā kāyassa bheda param maraṇā apāyam duggatiṃ vinipātam nirayam upapajjeyyā’ ti. “No hetam, bhante”.

“Seyyathāpi, gāmaṇi, puriso sappikumbham vā telakumbham vā gambhīre [gambhīram (sī. ka.) passa sam. ni. 4.358] udakarahade ogāhetvā bhindeyya. Tatra yāssa sakkharā vā kaṭhalā [kaṭhalā (ka.)], sā adhogāmī assa. Yañca khvassa tatra sappi vā telam vā, taṃ uddhamgāmi assa. Tamenam mahājanakāyo saṅgama samāgama āyāceyya thomeyya pañjaliko anuparisakkeyya ‘osīda, bho sappitela, saṃsīda, bho sappitela, adho gaccha [avamgaccha (sī. ka.)] ‘bho sappitelā’ ti. Taṃ kiṃ maññasi gāmaṇi, api nu taṃ sappitelam mahato janakāyassa āyācanahetu vā thomanahetu vā pañjalikaṃ anuparisakkanahetu vā ‘osīdeyya vā saṃsīdeyya vā adho vā gaccheyyā’ ti. “No hetam, bhante”.

“Evameva kho, gāmaṇi, yo so puriso pāṇātipātā paṭivirato...pe... sammādiṭṭhiko, kiñcāpi nam mahājanakāyo saṅgama samāgama āyāceyya thomeyya pañjaliko anuparisakkeyya ‘ayam puriso kāyassa bheda param maraṇā apāyam duggatiṃ vinipātam nirayam upapajjatū’ ti. Atha kho so puriso kāyassa bheda param maraṇā sugatiṃ saggam lokaṃ upapajjeyya. Iti dhammo suciṇṇo apāyehi rakkhati. Tattha yā maggassa tikkhatā adhimattatā, ayam dhammo suciṇṇo sabbāhi upapattīhi rakkhati. Evaṃ bhagavā āha –

“Tasmā rakkhitacittassa [passa udā. 32], sammāsaṅkappagocarō;
Sammādiṭṭhipurekkhāro, ñatvāna udayabbayam;
Thinamiddhābhībhū bhikkhu, sabbā duggatiyo jahe’ ti.

32. Tattha duggatīnam hetu taṇhā ca avijjā ca, tāni cattāri upādānāni, tehi catūhi upādānehi ye saupādānā khandhā, idaṃ dukkham. Cattāri upādānāni, ayam samudayo. Pañcakkhandhā dukkham, tesam bhagavā pariññāya ca pahānāya ca dhammam deseti dukkhassa pariññāya samudayassa pahānāya. Tattha taṇhāya pañcindriyāni rūpīni padaṭṭhānam. Avijjāya manindriyam padaṭṭhānam. Pañcindriyāni rūpīni rakkhanto samādhiṃ bhāvayati, taṇhāya niggāhāti. Manindriyam rakkhanto vipassanam bhāvayati, avijjāya niggāhāti. Taṇhāniggāhena dve upādānāni pahīyanti kāmupādānaṃca silabbatupādānaṃca. Avijjāniggāhena dve upādānāni pahīyanti diṭṭhupādānaṃca attavādupādānaṃca. Catūsu upādānesu pahīnesu dve dhammā bhāvanāpāripūriṃ gacchanti samatho ca vipassanā ca. Idaṃ vuccati brahmacariyanti.

Tattha brahmacariyassa phalam cattāri sāmāññaphalāni sotāpattiphalam sakadāgāmiphalam anāgāmiphalam arahattam [arahattaphalam (ka.)] aggaphalam. Imāni cattāri brahmacariyassa phalāni [brahmacariyaphalānti (sī.)]. Iti purimakāni ca dve saccāni dukkham samudayo ca. Samatho ca

vipassanā ca brahmacariyañca maggo, brahmacariyassa phalāni ca tadārammaṇā ca asaṅkhatādhātu nirodho. Imāni cattāri saccāni. Tenāha bhagavā “dhammo have rakkhatī”ti.

Tattha yaṃ paṭivedhena rakkhati, idaṃ dukkhaṃ. Yato rakkhati, ayaṃ samudayo. Yena rakkhati, ayaṃ maggo. Yaṃ rakkhati, ayaṃ nirodho. Imāni cattāri saccāni. Tenāha āyasmā mahākaccāyano “ekamhi padaṭṭhāne”ti.

Niyutto āvaṭṭo hāro.

8. Vibhattihāravibhaṅgo

33. Tattha katamo vibhattihāro? “Dhammañca padaṭṭhānaṃ bhūmiñcā”ti.

Dve suttāni vāsanābhāgiyañca nibbedhabhāgiyañca. Dve paṭipadā puññabhāgiyā ca phalabhāgiyā ca. Dve sīlāni saṃvarasīlañca pahānasīlañca, tattha bhagavā vāsanābhāgiyaṃ suttam paññabhāgiyāya paṭipadāya desayati, so saṃvarasīle ṭhito tena brahmacariyena brahmacārī bhavati, tattha bhagavā nibbedhabhāgiyaṃ suttam phalabhāgiyāya paṭipadāya desayati, so pahānasīle ṭhito tena brahmacariyena brahmacārī bhavati.

Tattha katamaṃ vāsanābhāgiyaṃ suttam? Vāsanābhāgiyaṃ nāma suttam dānakathā sīlakathā saggakathā kāmānaṃ ādīnava nekkhamme ānisaṃsoti.

Tattha katamaṃ nibbedhabhāgiyaṃ suttam? Nibbedhabhāgiyaṃ nāma suttam yā catusaccappakāsanā, vāsanābhāgiye sutte natthi pajānanā, natthi maggo, natthi phalaṃ. Nibbedhabhāgiye sutte atthi pajānanā, atthi maggo, atthi phalaṃ. Imāni cattāri suttāni. Imesaṃ catunnaṃ suttānaṃ desanāya phalena sīlena brahmacariyena sabbato vicayena hārena vicinitvā yuttihārena yojayitabbā yāvatikā ñāṇassa bhūmi.

34. Tattha katame dhammā sādharmaṇā? Dve dhammā sādharmaṇā nāmasādharmaṇā vatthusādharmaṇā ca. Yaṃ vā pana kiñci aññampi evaṃ jātiyaṃ, micchattaniyatānaṃ sattānaṃ aniyatānañca sattānaṃ dassanappahātābbā kilesā sādharmaṇā, puthujjanassa sotāpannassa ca kāmarāgabyāpādā sādharmaṇā, puthujjanassa anāgāmissa ca uddhambhāgiyā saṃyojanā sādharmaṇā, yaṃ kiñci ariyasāvako lokiyaṃ samāpattiṃ samāpajjati, sabbā sā avītarāgehi [avigatarāgehi (ka.)] sādharmaṇā, sādharmaṇā hi dhammā evaṃ aññamaññaṃ paraṃ paraṃ sakaṃ sakaṃ visayaṃ nātivattanti. Yopi imehi dhammehi samannāgato na so taṃ dhammaṃ upātivattati. Ime dhammā sādharmaṇā.

Tattha katame dhammā asādharmaṇā? Yāva desanaṃ upādāya gavesitabbā sekkhāsekkhā bhabbābhabbāti, aṭṭhamakassa sotāpannassa ca kāmarāgabyāpādā sādharmaṇā dhammatā asādharmaṇā, aṭṭhamakassa anāgāmissa ca uddhambhāgiyā saṃyojanā sādharmaṇā dhammatā asādharmaṇā. Sabbesaṃ sekkhānaṃ nāmaṃ sādharmaṇaṃ dhammatā asādharmaṇā. Sabbesaṃ paṭipannakānaṃ nāmaṃ sādharmaṇaṃ dhammatā asādharmaṇā. Sabbesaṃ sekkhānaṃ sekkhasīlaṃ sādharmaṇaṃ dhammatā asādharmaṇā. Evaṃ visesānupassinā hīnukkaṭṭhamajjhimaṃ upādāya gavesitabbam.

Dassanabhūmi niyāmāvakkantiyā padaṭṭhānaṃ, bhāvanābhūmi uttarikānaṃ phalānaṃ pattiyaṃ padaṭṭhānaṃ, dukkhā paṭipadā dandhābhiññā samathassa padaṭṭhānaṃ, sukhā paṭipadā khippābhiññā vipassanāya padaṭṭhānaṃ, dānamayaṃ puññakiriyavatthu parato ghosassa sādharmaṇaṃ padaṭṭhānaṃ, sīlamayaṃ puññakiriyavatthu cintāmayiyā paññāya sādharmaṇaṃ padaṭṭhānaṃ, bhāvanāmayam puññakiriyavatthu bhāvanāmayiyā paññāya sādharmaṇaṃ padaṭṭhānaṃ. Dānamayaṃ puññakiriyavatthu parato ca ghosassa sutamayiyā ca paññāya sādharmaṇaṃ padaṭṭhānaṃ sīlamayaṃ puññakiriyavatthu cintāmayiyā ca paññāya yoniso ca manasikārassa sādharmaṇaṃ padaṭṭhānaṃ, bhāvanāmayam puññakiriyavatthu bhāvanāmayiyā ca paññāya sammādiṭṭhiyā ca sādharmaṇaṃ padaṭṭhānaṃ.

Patirūpadesavāso vivekassa ca samādhissa ca sādharmaṇaṃ padaṭṭhānaṃ, sappurisūpanissayo tiṇṇaṅca aveccappasādānaṃ samathassa ca sādharmaṇaṃ padaṭṭhānaṃ, attasammāpanidhānaṃ hiriyā ca vipassanāya ca sādharmaṇaṃ padaṭṭhānaṃ, akusalapariccāgo kuslavīmaṃsāya ca samādhindriyassa ca sādharmaṇaṃ padaṭṭhānaṃ, dhammasvākkhātātā kusalamūlaropanāya ca phalasaṃpattiyā ca sādharmaṇaṃ padaṭṭhānaṃ, saṅghasuppaṭipannatā saṅghasuṭṭhūyā sādharmaṇaṃ padaṭṭhānaṃ, satthusampadā appasannānaṅca pasādāya pasannānaṅca bhīyyobhāvāya sādharmaṇaṃ padaṭṭhānaṃ, appaṭihatapātimokkhatā dummaṅkūnaṅca puggalānaṃ niggahāya pesalānaṅca puggalānaṃ phāsuvihārāya sādharmaṇaṃ padaṭṭhānaṃ. Tenāha āyasmā mahākaccāyano “dhammaṅca padaṭṭhāna”nti.

Niyutto vibhatti hāro.

9. Parivattanahāravibhaṅgo

35. Tattha katamo parivattano hāro? “Kusalākusale dhamme”ti. Sammādiṭṭhissa purisapuggalassa micchādiṭṭhi nijjiṇṇā bhavati. Ye cassa micchādiṭṭhipaccayā uppajjeyyūṃ aneke [anekā (ka.)] pāpakā akusalā dhammā, te cassa nijjiṇṇā honti. Sammādiṭṭhipaccayā cassa aneke kusalā dhammā sambhavanti, te cassa bhāvanāpāripūriṃ gacchanti. Sammāsaṅkappassa purisapuggalassa micchāsaṅkappo nijjiṇṇo bhavati. Ye cassa micchāsaṅkappapaccayā uppajjeyyūṃ aneke pāpakā akusalā dhammā, te cassa nijjiṇṇā honti. Sammāsaṅkappapaccayā cassa aneke kusalā dhammā sambhavanti. Te cassa bhāvanāpāripūriṃ gacchanti. Evaṃ sammāvācassa sammākammantassa sammāājīvassa sammāvāyāmassa sammāsatissa sammāsamādhissa sammāvimuttassa sammāvimuttiñāṇadassanassa purisapuggalassa micchāvimuttiñāṇadassanaṃ nijjiṇṇaṃ bhavati. Ye cassa micchāvimuttiñāṇadassanapaccayā uppajjeyyūṃ aneke pāpakā akusalā dhammā, te cassa nijjiṇṇā honti. Sammāvimuttiñāṇadassanapaccayā cassa aneke kusalā dhammā sambhavanti, te cassa bhāvanāpāripūriṃ gacchanti.

36. Yassa vā pāṇātipātā paṭiviratassa pāṇātipāto pahīno hoti. Adinnādānā paṭiviratassa adinnādānaṃ pahīnaṃ hoti. Brahmācārissa abrahmacariyaṃ pahīnaṃ hoti. Saccavādissa musāvādo pahīno hoti. Apisuṇavācassa pisuṇā vācā pahīnā hoti. Saṅhavācassa pharusā vācā pahīnā hoti. Kālavādissa samphappalāpo pahīno hoti. Anabhijjhālussa [anabhijjhāmanassa (ka.)] abhijjhā pahīnā hoti. Abyāpannacittassa byāpādo pahīno hoti. Sammādiṭṭhissa micchādiṭṭhi pahīnā hoti.

Ye ca kho keci ariyaṃ aṭṭhaṅgikaṃ maggaṃ garahanti, nesam sandiṭṭhikā sahadhammikā gārayhā vādānuvādā āgacchanti. Sammādiṭṭhiṅca te bhavanto dhammaṃ garahanti. Tena hi ye micchādiṭṭhikā, tesam bhavantānaṃ puṅgavā ca pāsāṃsā ca. Evaṃ sammāsaṅkappaṃ sammāvācaṃ sammākammantaṃ sammāājīvaṃ sammāvāyāmaṃ sammāsatim sammāsamādhim sammāvimuttiṃ sammāvimuttiñāṇadassanaṅca te bhavanto dhammaṃ garahanti. Tena hi ye micchāvimuttiñāṇadassanā, tesam bhavantānaṃ puṅgavā ca pāsāṃsā ca.

Ye ca kho keci evamāhaṃsu “bhuñjitabbā kāmā, paribhuñjitabbā kāmā, āsevitabbā kāmā, nisevitabbā kāmā, bhāvayitabbā kāmā, bahulikātabbā kāmā”ti. Kāmehi veramaṇī tesam adhammo.

Ye vā pana keci evamāhaṃsu “attakilamathānuyogo dhammo”ti. Niyyāniko tesam dhammo adhammo. Ye ca kho keci evamāhaṃsu “dukkho dhammo”ti. Sukho tesam dhammo adhammo. Yathā vā pana bhikkhuno sabbasaṅkhāresu asubhānupassino viharato subhasaṅgā pahīyanti. Dukkhānupassino viharato sukhasaṅgā pahīyanti. Aniccānupassino viharato niccasaṅgā pahīyanti. Anattānupassino viharato attasaṅgā pahīyanti. Yaṃ yaṃ vā pana dhammaṃ rocayati vā upagacchati vā, tassa tassa dhammassa yo paṭipakkho, svassa anīṭṭhato ajjhāpanno bhavati. Tenāha āyasmā mahākaccāyano “kusalākusaladhamme”ti.

Niyutto parivattano hāro.

10. Vevacanahāravibhaṅgo

37. Tattha katamo vevacano hāro? “Vevacanāni bahūnī”ti. Yathā ekaṃ bhagavā dhammaṃ aññamaññehi vevacanehi niddisati. Yathāha bhagavā –

“Āsā ca pihā abhinandanā ca, anekadhātūsu sarā patiṭṭhitā;
Aññānamūlappabhavā pajappitā, sabbā mayā byantikātā samūlikā”ti.

Āsā nāma vuccati yā bhavissassa atthassa āsīsanā [āsimsanā (sī.)] avassaṃ āgamissatīti āsāssa uppajjati. Pihā nāma yā vattamānassa [vattamānakassa (sī.)] atthassa patthanā, seyyataram vā disvā “ediso bhaveyya”nti pihāssa uppajjati. Atthanipphattipaṭipālanā abhinandanā nāma, piyaṃ vā ñātim abhinandati, piyaṃ vā dhammaṃ abhinandati, appaṭikūlato vā abhinandati.

Anekadhātūti cakkhuhātu rūpadhātu cakkhuviññādhātu, sotadhātu saddadhātu sotaviññādhātu, ghānadhātu gandhadhātu ghānaviññādhātu, jivhadhātu rasadhātu jivhāviññādhātu, kāyadhātu phoṭṭhabbhadhātu kāyaviññādhātu, manodhātu dhammadhātu manoviññādhātu.

Sarāti keci rūpādhimuttā keci saddādhimuttā keci gandhādhimuttā keci rasādhimuttā keci phoṭṭhabbādhimuttā keci dhammādhimuttā. Tattha yāni cha gehasitāni domanassāni yāni ca cha gehasitāni somanassāni yāni ca cha nekkhammasitāni domanassāni yāni ca cha nekkhammasitāni somanassāni, imāni catuvīsapadāni taṇhāpakko, taṇhāya etaṃ vevacanaṃ. Yā cha upekkhā gehasitā, ayaṃ diṭṭhipakko.

38. Sāyeva patthanākārena dhammanandī dhammapemaṃ dhammajhosānanti taṇhāya etaṃ vevacanaṃ. Cittaṃ mano viññānti cittassa etaṃ vevacanaṃ. Manindriyaṃ manodhātu manāyatanam vijānanāti manassetam vevacanaṃ. Paññindriyaṃ paññābalaṃ adhipaññā sikkhā paññā paññākkhandho dhammavicayasambojjhaṅgo ñānaṃ sammādiṭṭhi tīraṇā vipassanā dhamme ñānaṃ atthe ñānaṃ anvaye ñānaṃ khaye ñānaṃ anuppāde ñānaṃ anaññātāññassāmīndriyaṃ aññindriyaṃ aññātāvindriyaṃ cakkhu vijjā buddhi bhūri medhā āloko, yaṃ vā pana yaṃ kiñci aññāpi evaṃ jātiyaṃ, paññāya etaṃ vevacanaṃ. Pañcīndriyāni lokuttarāni, sabbā paññā. Api ca ādhipateyyaṭṭhena saddhā, ārambhaṭṭhena vīriyaṃ, apilāpanaṭṭhena sati, avikkhepaṭṭhena samādhi, pajānanaṭṭhena paññā.

Yathā ca buddhānussatiyaṃ vuttaṃ itipi so bhagavā arahaṃ sammāsambuddho vijjācaraṇasampanno sugato lokavidū anuttaro purisadammasārathi satthā devamanussānaṃ buddho bhagavā. Balanipphattigato vesārajappatto adhigatappaṭisambhido catuyogavippahīno agatigamanavītivatto uddhaṭasallo nirūlhavaṇo madditakaṇḍako nibbāpitapariyuṭṭhāno [nibbāhita ... (ka.)] bandhanātīto ganthaviniveṭhano ajjhāsayaṃvītivatto bhinnandhakāro cakkhumā lokadhammasamatikkanto anurodhavirodhavippayutto iṭṭhāniṭṭhesu dhammesu asaṅkhepagato bandhanātivatto ṭhapitasāṅgāmo abhikkantataro ukkādhāro ālokakaro pajjotakaro tamonudo raṇaṇjaho aparimāṇavaṇṇo appameyyavaṇṇo asaṅkheyyavaṇṇo ābhaṃkaro pabhaṃkaro dhammobhāsapajjotakaroti ca buddhā bhagavantoti ca buddhānussatiyā etaṃ vevacanaṃ.

Yathā ca dhammānussatiyaṃ vuttaṃ svākkhāto bhagavatā dhammo sandiṭṭhiko akāliko ehipassiko opaneyyiko [opānāyiko (sī.)] paccattaṃ veditabbo viññūhi. Yadiḍaṃ madanimmadano pipāsavinayo ālayasamugghāto vaṭṭūpacchedo suññato atidullabho taṇhakkhāyo virāgo nirodho nibbānaṃ.

“Asaṅkhataṃ anataṃ [asaṅkhataṃ nanta ... (sī.) passa saṃ. ni. 4.409] anāsavañca, saccañca pāraṃ nipuṇaṃ sududdasaṃ;
Ajajjaraṃ dhuvaṃ apalokitaṃ [apalokiyaṃ (sī. ka.)], anidassanaṃ nippapañca santaṃ.

“Amataṃ paṇītaṃ sivaṃ khemaṃ, taṇhākkhaya acchariyaṃ abbhutaṃ;
Anītikaṃ anītikadhammaṃ [nītikadhammeva vā (sī. ka.) passa saṃ. ni. 4.409],
nibbānametaṃ sugatena desitaṃ.

“Ajātaṃ abhūtaṃ anupaddavaṃ, akataṃ asokaṃ atho visokaṃ;
Anūpasaggaṃ nūpasaggadhammaṃ, nibbānametaṃ sugatena desitaṃ.

“Gambhīraṃ duppassaṃ, uttaraṃ anuttaraṃ;
Asamaṃ appaṭisaṃ, jeṭṭhaṃ seṭṭhanti vuccati.

“Leṇaṃ tāṇaṃ araṇaṃ anaṅgaṃ, akāca metaṃ vimalanti vuccati;
Dīpo sukhaṃ appamaṇaṃ paṭiṭṭhā, akiṇcanaṃ appapaṇcanti vutta’nti.

Dhammānussatiyā etaṃ vevacanaṃ.

Yathā ca saṅghānussatiyaṃ vuttaṃ suppaṭipanno ujuppaṭipanno ñāyappaṭipanno sāmīcippaṭipanno yadidaṃ cattāri purisaṃyugāni aṭṭha purisaṃpuggalā esa bhagavato sāvakasaṅgho āhuneyyo pāhuneyyo dakkhiṇeyyo añjalikaraṇīyo anuttaraṃ puññakkhettaṃ lokassa, sīlasampanno samādhisampanno paññāsampanno vimuttisampanno vimuttiñāṇadassanasampanno sattānaṃ sāro sattānaṃ maṇḍo sattānaṃ uddhāro sattānaṃ esikā [esiko (ka.)] sattānaṃ surabhipasūnaṃ puḍḍo devānaṃ manussānaṃ ca saṅghānussatiyā etaṃ vevacanaṃ.

Yathā ca sīlānussatiyaṃ vuttaṃ yāni tāni sīlāni akhaṇḍāni acchiddāni asabalāni akammāsāni ariyāni ariyakantāni bhujissāni viññūppasatthāni aparāmaṭṭhāni samādhisaṃvattanikāni, alaṅkāro ca sīlaṃ uttamaṅgopasobhaṇatāya, nidhānaṃ ca sīlaṃ sabbadobhaggasamatikkamanaṭṭhena, sippaṃ ca sīlaṃ akkhaṇavedhitāya, velā ca sīlaṃ anatikkamanaṭṭhena, dhaññaṃ ca sīlaṃ daliddopacchedanaṭṭhena [daliddo... (sī.)], ādāso ca sīlaṃ dhammavolokanāya, pāsādo ca sīlaṃ volokanaṭṭhena, sabbabhūmānuparivatti ca sīlaṃ amatapariyosānanti sīlānussatiyā etaṃ vevacanaṃ.

Yathā ca cāgānussatiyaṃ vuttaṃ yasmim samaye ariyasāvako agāraṃ ajjhāvasati muttacāgo payatapaṇi vossaggarato yācayogo dānaṃ vibhāgaratoti cāgānussatiyā etaṃ vevacanaṃ. Tenāha āyasmā mahākaccāyano “vevacanāni bahūni”ti.

Niyutto vevacano hāro.

11. Paññattihāravibhaṅgo

39. Tattha katamo paññattihāro? “Ekaṃ bhagavā dhammaṃ paññattīhi vividhāhi deseti”ti.

Yā pakatikathāya desanā. Ayaṃ nikkhepapaññatti. Kā ca pakatikathāya desanā, cattāri saccāni. Yathā bhagavā āha “idaṃ dukkha”nti ayaṃ paññatti pañcannaṃ khandhānaṃ channaṃ dhātūnaṃ aṭṭhārasannaṃ dhātūnaṃ dvādasannaṃ āyatanānaṃ dasannaṃ indriyānaṃ nikkhepapaññatti.

Kabalīkāre ce, bhikkhave, āhāre atthi rāgo atthi nandī [nandi (sī.) passa saṃ. ni. 2.64] atthi taṇhā, paṭiṭṭhitā tattha viññānaṃ virūḷhaṃ. Yattha paṭiṭṭhitā viññānaṃ virūḷhaṃ, atthi tattha nāmarūpassa avakkanti. Yattha atthi nāmarūpassa avakkanti, atthi tattha saṅkhārānaṃ vuddhi [buddhi (ka.)]. Yattha atthi saṅkhārānaṃ vuddhi, atthi tattha āyatim punabbhavābhiniḍḍanti. Yattha atthi āyatim punabbhavābhiniḍḍanti, atthi tattha āyatim jātijarāmaṇaṃ. Yattha atthi āyatim jātijarāmaṇaṃ, sasokaṃ taṃ, bhikkhave, sadaraṃ saupāyāsanti vadāmi.

Phasse ce...pe... manosañcetanāya ce, bhikkhave, āhāre. Viññāṇe ce, bhikkhave, āhāre atthi rāgo

atthi nandī atthi taṇhā, patiṭṭhitam tattha viññāṇam virūlham. Yattha patiṭṭhitam viññāṇam virūlham, atthi tattha nāmarūpassa avakkanti. Yattha atthi nāmarūpassa avakkanti, atthi tattha saṅkhārānaṃ vuddhi. Yattha atthi saṅkhārānaṃ vuddhi, atthi tattha āyatim punabbhavābhiniḃbatti. Yattha atthi āyatim punabbhavābhiniḃbatti, atthi tattha āyatim jātijarāmaṇaṃ. Yattha atthi āyatim jātijarāmaṇaṃ, sasokaṃ taṃ, bhikkhave, sadaraṃ saupāyāsanti vadāmi. Ayaṃ pabhavapaññatti dukkhassa ca samudayassa ca.

Kabaḷikāre ce, bhikkhave [passa saṃ. ni. 2.64], āhāre natthi rāgo natthi nandī natthi taṇhā, appatiṭṭhitam tattha viññāṇam avirūlham. Yattha appatiṭṭhitam viññāṇam avirūlham, natthi tattha nāmarūpassa avakkanti. Yattha natthi nāmarūpassa avakkanti, natthi tattha saṅkhārānaṃ vuddhi. Yattha natthi saṅkhārānaṃ vuddhi, natthi tattha āyatim punabbhavābhiniḃbatti. Yattha natthi āyatim punabbhavābhiniḃbatti, natthi tattha āyatim jātijarāmaṇaṃ. Yattha natthi āyatim jātijarāmaṇaṃ, asokaṃ taṃ, bhikkhave, adaraṃ anupāyāsanti vadāmi.

Phasse ce...pe... manosañcetanāya ce, bhikkhave, āhāre. Viññāṇe ce, bhikkhave, āhāre natthi rāgo natthi nandī natthi taṇhā, appatiṭṭhitam tattha viññāṇam avirūlham. Yattha appatiṭṭhitam viññāṇam avirūlham, natthi tattha nāmarūpassa avakkanti. Yattha natthi nāmarūpassa avakkanti, natthi tattha saṅkhārānaṃ vuddhi. Yattha natthi saṅkhārānaṃ vuddhi, natthi tattha āyatim punabbhavābhiniḃbatti. Yattha natthi āyatim punabbhavābhiniḃbatti, natthi tattha āyatim jātijarāmaṇaṃ. Yattha natthi āyatim jātijarāmaṇaṃ, asokaṃ taṃ, bhikkhave, adaraṃ anupāyāsanti vadāmi.

Ayaṃ pariññāpaññatti dukkhassa, pahānapaññatti samudayassa, bhāvanāpaññatti maggassa, sacchikiriyāpaññatti nirodhassa.

40. Samādhim, bhikkhave, bhāvettha. Appamatto nipako sato, samāhito, bhikkhave, bhikkhu yathābhūtaṃ pajānāti. Kiñca yathābhūtaṃ pajānāti? “Cakkhu [cakkhum (ka.) passa saṃ. ni. 4.99] anicca”nti yathābhūtaṃ pajānāti. “Rūpā aniccā”ti yathābhūtaṃ pajānāti “cakkhuvīññāṇam anicca”nti yathābhūtaṃ pajānāti. “Cakkhusamphasso anicco”ti yathābhūtaṃ pajānāti. Yampidaṃ [yamidaṃ (sī. ka.)] cakkhusamphassapaccayā uppajjati vedayitaṃ sukhaṃ vā dukkhaṃ vā adukkhamasukhaṃ vā, tampi aniccanti yathābhūtaṃ pajānāti.

Sotaṃ ...pe... ghānaṃ...pe... jivhā...pe... kāyo...pe... “mano anicco”ti [anicca’nti (saṃ. ni. 4.100)] yathābhūtaṃ pajānāti. “Dhammā aniccā”ti yathābhūtaṃ pajānāti. “Manoviññāṇam anicca”nti yathābhūtaṃ pajānāti. “Manosamphasso anicco”ti yathābhūtaṃ pajānāti. Yampidaṃ manosamphassapaccayā uppajjati vedayitaṃ sukhaṃ vā dukkhaṃ vā adukkhamasukhaṃ vā, tampi aniccanti yathābhūtaṃ pajānāti.

Ayaṃ bhāvanāpaññatti maggassa, pariññāpaññatti dukkhassa, pahānapaññatti samudayassa, sacchikiriyāpaññatti nirodhassa.

Rūpaṃ, rādha, vikiratha vidhamatha viddhamsetha vikīḷaniyaṃ [vikīḷanikaṃ (sī. ka.) passa saṃ. ni. 3.169] karotha, paññāya taṇhakkhayāya paṭipajjatha. Taṇhakkhayā dukkhakkhayo, dukkhakkhayā nibbānaṃ. Vedanaṃ...pe.... Saññaṃ...pe... saṅkhāre viññāṇam vikiratha vidhamatha viddhamsetha vikīḷaniyaṃ karotha, paññāya taṇhakkhayāya paṭipajjatha. Taṇhakkhayā dukkhakkhayo, dukkhakkhayā nibbānaṃ.

Ayaṃ nirodhapaññatti nirodhassa, nibbidāpaññatti assādassa, pariññāpaññatti dukkhassa, pahānapaññatti samudayassa, bhāvanāpaññatti maggassa, sacchikiriyāpaññatti nirodhassa.

“So idaṃ dukkha”nti yathābhūtaṃ pajānāti, “ayaṃ dukkhasamudayo”ti yathābhūtaṃ pajānāti, “ayaṃ dukkhanirodho”ti yathābhūtaṃ pajānāti “ayaṃ dukkhanirodhagāminī paṭipadā”ti yathābhūtaṃ

pajānāti.

Ayaṃ paṭivedhapaññatti saccānaṃ, nikkhepapaññatti dassanabhūmiyā, bhāvanāpaññatti maggassa, sacchikiriyāpaññatti sotāpattiṭṭhalassa. “So ime āsavā”ti yathābhūtaṃ pajānāti, “ayaṃ āsavasamudayo”ti yathābhūtaṃ pajānāti, “ayaṃ āsavanirodho”ti yathābhūtaṃ pajānāti. “Ayaṃ āsavanirodhagāminī paṭipadā”ti yathābhūtaṃ pajānāti. “Ime āsavā asesam nirujjhantī”ti yathābhūtaṃ pajānāti.

Ayaṃ uppādapaññatti khaye ñāṇassa, okāsapaññatti anuppāde ñāṇassa, bhāvanāpaññatti maggassa, pariññāpaññatti dukkhassa, pahānāpaññatti samudayassa, ārambhapaññatti vīriyindriyassa, āsātanāpaññatti āsāṭikānaṃ, nikkhepapaññatti bhāvanābhūmiyā, abhinighātapaññatti pāpakānaṃ akusalānaṃ dhammānaṃ.

41. Idam “dukkha”nti me, bhikkhave, pubbe ananussutesu dhammesu cakkhuṃ udapādi, ñāṇaṃ udapādi, paññā udapādi, vijjā udapādi, āloko udapādi. Ayaṃ “dukkhasamudayo”ti me, bhikkhave... pe... ayaṃ “dukkhanirodho”ti me, bhikkhave...pe... Ayaṃ “dukkhanirodhagāminī paṭipadā”ti me, bhikkhave, pubbe ananussutesu dhammesu cakkhuṃ udapādi, ñāṇaṃ udapādi, paññā udapādi, vijjā udapādi, āloko udapādi.

Ayaṃ desanāpaññatti saccānaṃ, nikkhepapaññatti sutamayiyā paññāya sacchikiriyāpaññatti anaññātāññassāmītindriyassa, pavattanāpaññatti dhammacakkassa.

“Taṃ kho panidaṃ dukkhaṃ pariññeyya”nti me, bhikkhave, pubbe ananussutesu dhammesu cakkhuṃ udapādi, ñāṇaṃ udapādi, paññā udapādi, vijjā udapādi, āloko udapādi. “So kho panāyaṃ dukkhasamudayo pahātabbo”ti me, bhikkhave...pe... “so kho panāyaṃ dukkhanirodho sacchikātabbo”ti me, bhikkhave...pe... “sā kho panāyaṃ dukkhanirodhagāminī paṭipadā bhāvetabbā”ti me, bhikkhave pubbe ananussutesu dhammesu cakkhuṃ udapādi, ñāṇaṃ udapādi, paññā udapādi, vijjā udapādi, āloko udapādi.

Ayaṃ bhāvanāpaññatti maggassa, nikkhepapaññatti cintāmayiyā paññāya, sacchikiriyāpaññatti aññindriyassa.

“Taṃ kho panidaṃ dukkhaṃ pariññāta”nti me, bhikkhave, pubbe ananussutesu dhammesu cakkhuṃ udapādi, ñāṇaṃ udapādi, paññā udapādi, vijjā udapādi, āloko udapādi. “So kho panāyaṃ dukkhasamudayo pahīno”ti me, bhikkhave...pe... “so kho panāyaṃ dukkhanirodho sacchikato”ti me, bhikkhave...pe... “sā kho panāyaṃ dukkhanirodhagāminī paṭipadā bhāvitā”ti me, bhikkhave pubbe ananussutesu dhammesu cakkhuṃ udapādi, ñāṇaṃ udapādi, paññā udapādi, vijjā udapādi, āloko udapādi. Ayaṃ bhāvanāpaññatti maggassa, nikkhepapaññatti bhāvanāmayiyā paññāya, sacchikiriyāpaññatti aññātāvino indriyassa, pavattanāpaññatti dhammacakkassa.

“Tulamatulañca sambhavaṃ, bhavasāṅkhāramavassajī muni;
Ajjhattarato samāhito, abhindi [abhidā (sī. ka.) passa dī. ni. 2.169]
kavacamivattasambhava”nti.

“Tula”nti saṅkhāradhātu. “Atula”nti nibbānadhātu, “tulamatulañca sambhava”nti abhiññāpaññatti sabbadhammānaṃ. Nikkhepapaññatti dhammapaṭisambhidāya. “Bhavasāṅkhāramavassajī muni”ti pariccāgapaññatti samudayassa. Pariññāpaññatti dukkhassa. “Ajjhattarato samāhito”ti bhāvanāpaññatti kāyagatāya satiyā. Ṭhitipaññatti cittekaggatāya. “Abhindi kavacamivattasambhava”nti abhinibbidāpaññatti cittassa, upādānāpaññatti sabbaññūtāya, padālanāpaññatti avijjaṇḍakosānaṃ. Tenāha bhagavā “tulamatulañca sambhava”nti.

Yo dukkhamaddakkhi yatonidānaṃ, kāmesu so jantu katham nameyya;
Kāmā hi loke saṅgoti ñatvā, tesam satimā vinayāya sikkheti.

“Yo dukkha”nti vevacanapaññatti ca dukkhassa pariññāpaññatti ca. “**Yatonidāna**”nti pabhavapaññatti ca samudayassa pahānapaññatti ca. “**Addakkhī**”ti vevacanapaññatti ca ñāṇacakkhussa paṭivedhapaññatti ca. “**Kāmesu so jantukatham nameyyā**”ti vevacanapaññatti ca kāmataṇhāya abhinivesapaññatti ca. “**Kāmā hi loke saṅgoti ñatvā**”ti paccatthikato dassanapaññatti kāmānaṃ. Kāmā hi aṅgārakāsūpamā maṃsapesūpamā pāvakaṅgā papātauragopamā ca. “**Tesam satimā**”ti apacayapaññatti pahānāya, nikkhepapaññatti kāyagatāya satiyā, bhāvanāpaññatti maggassa. “**Vinayāya sikkhe**”ti paṭivedhapaññatti rāgavinayassa dosavinayassa mohavinayassa. “**Jantū**”ti vevacanapaññatti yogissa. Yadā hi yogī kāmā saṅgoti pajānāti. So kāmānaṃ anuppādāya kusale dhamme uppādayati, so anuppannaṃ kusalaṇaṃ dhammānaṃ uppādāya vāyamati. Ayaṃ vāyāmapaññatti appattassa pattiyā. Nikkhepapaññatti oramattikāya asantuṭṭhiyā. Tattha so uppannaṃ kusalaṇaṃ dhammānaṃ ṭhitiyā vāyamatiṭi ayaṃ appamādapaññatti bhāvanāya, nikkhepapaññatti vīriyindriyassa, ārakkhapaññatti kusalaṇaṃ dhammānaṃ, ṭhitipaññatti adhicittasikkhāya. Tenāha bhagavā “yo dukkhamaddakkhi yatonidāna”nti.

“Mohasambandhano loko, bhabbarūpova dissati;
Upadhibandhano [upadhisambandhano (sī.) passa udā. 70] bālo, tasmā parivārito;
Assirī viya [sassatoriva (udā. 70)] khāyati, passato natthi kiñcana”nti.

“**Mohasambandhano loko**”ti desanāpaññatti vipallāsānaṃ. “**Bhabbarūpova dissati**”ti viparītapaññatti lokassa. “Upadhibandhano bālo”ti pabhavapaññatti pāpakānaṃ icchāvacarānaṃ, kiccapaññatti pariyoṭṭhānaṃ. Balavapaññatti kilesānaṃ. Virūhanāpaññatti saṅkhārānaṃ. “**Tasmā parivārito**”ti desanāpaññatti avijjandhakārassa vevacanapaññatti ca. “Assirī viya khāyati”ti dassanapaññatti dibbacakkhussa, nikkhepapaññatti paññācakkhussa. “**Passato natthi kiñcana**”nti paṭivedhapaññatti sattānaṃ, rāgo kiñcanaṃ doso kiñcanaṃ moho kiñcanaṃ. Tenāha bhagavā “mohasambandhano loko”ti.

“Atthi, bhikkhave, ajātaṃ abhūtaṃ akataṃ asaṅkhatam, no cetam, bhikkhave, abhavissa ajātaṃ abhūtaṃ akataṃ asaṅkhatam. Nayidha [na idha (sī. ka.) passa udā. 73] jātassa bhūtassa katassa saṅkhatassa nissaraṇaṃ paññāyetha. Yasmā ca kho, bhikkhave, atthi ajātaṃ abhūtaṃ akataṃ asaṅkhatam, tasmā jātassa bhūtassa katassa saṅkhatassa nissaraṇaṃ paññāyati”ti.

“No cetam, bhikkhave, abhavissa ajātaṃ abhūtaṃ akataṃ asaṅkhata”nti desanāpaññatti nibbānassa vevacanapaññatti ca. “Nayidha jātassa bhūtassa katassa saṅkhatassa nissaraṇaṃ paññāyethā”ti vevacanapaññatti saṅkhatassa upanayanapaññatti ca. “Yasmā ca kho, bhikkhave, atthi ajātaṃ abhūtaṃ akataṃ asaṅkhata”nti vevacanapaññatti nibbānassa jotānāpaññatti ca. “Tasmā jātassa bhūtassa katassa saṅkhatassa nissaraṇaṃ paññāyati”ti ayaṃ vevacanapaññatti nibbānassa, niyyānikapaññatti maggassa, nissaraṇapaññatti saṃsārato. Tenāha bhagavā “no cetam, bhikkhave, abhavissa”ti. Tenāha āyasmā mahākaccāyano “ekam bhagavā dhammaṃ, paññattīhi vividhāhi desetī”ti.

Niyutto paññatti hāro.

12. Otaṇaṇhāravibhaṅgo

42. Tattha katamo otaṇo hāro? “Yo ca paṭiccuppādo”ti.

“Uddham adho sabbadhi vippamutto, ayaṃ ahasmīti [ayamahamasmīti (sī.) passa udā. 61] anānupassī;

Evam vimutto udatāri oghaṃ, atinṇapubbaṃ apunabbhavāyā”ti.

“Uddha”nti rūpadhātu ca arūpadhātu ca. “Adho”ti kāmādhātu. “Sabbadhi vipamutto”ti tedhātuke ayaṃ asekkhāvimutti. Tāniyeva asekkhāni pañcindriyāni, ayaṃ indriyehi otaraṇā.

Tāniyeva asekkhāni pañcindriyāni vijjā, vijjuppādā avijjānirodho, avijjānirodhā saṅkhāranirodho, saṅkhāranirodhā viññāṇanirodho, viññāṇanirodhā nāmarūpanirodho, nāmarūpanirodhā saḷāyatanirodho, saḷāyatanirodhā phassanirodho, phassanirodhā vedanānirodho, vedanānirodhā taṇhānirodho, taṇhānirodhā upādānanirodho, upādānanirodhā bhavanirodho, bhavanirodhā jātinirodho, jātinirodhā jarāmaṇaṃ sokaparidevadukkhadomanassupāyāsā nirujjhanti. Evametassa kevalassa dukkhakkhandhassa nirodho hoti. Ayaṃ paṭiccasamuppādehi otaraṇā.

Tāniyeva asekkhāni pañcindriyāni tīhi khandhehi saṅgahitāni – sīlakkhandhena samādhikkhandhena paññākkhandhena, ayaṃ khandhehi otaraṇā.

Tāniyeva asekkhāni pañcindriyāni saṅkhārapariyāpannāni ye saṅkhārā anāsavā, no ca bhavaṅgā, te saṅkhārā dhammadhātusaṅgahitā. Ayaṃ dhātūhi otaraṇā.

Sā dhammadhātu dhammāyatanaṃ pariyaṇā, yaṃ āyatanaṃ anāsavaṃ, no ca bhavaṅgaṃ. Ayaṃ āyatanehi otaraṇā.

“Ayaṃ ahasmīti anānupassī”ti ayaṃ sakkāyaditṭhiyā samugghāto, sā sekkhāvimutti, tāniyeva sekkhāni pañcindriyāni. Ayaṃ indriyehi otaraṇā.

Tāniyeva sekkhāni pañcindriyāni vijjā, vijjuppādā avijjānirodho, avijjānirodhā saṅkhāranirodho, evaṃ sabbo paṭiccasamuppādo. Ayaṃ paṭiccasamuppādehi otaraṇā.

Sāyeva vijjā paññākkhandho. Ayaṃ khandhehi otaraṇā.

Sāyeva vijjā saṅkhārapariyāpannā, ye saṅkhārā anāsavā, no ca bhavaṅgā, te saṅkhārā dhammadhātusaṅgahitā, ayaṃ dhātūhi otaraṇā.

Sā dhammadhātu dhammāyatanaṃ pariyaṇā, yaṃ āyatanaṃ anāsavaṃ, no ca bhavaṅgaṃ, ayaṃ āyatanehi otaraṇā.

Sekkhāya ca vimuttiyā asekkhāya ca vimuttiyā vimutto udatāri oghaṃ atinṇapubbaṃ apunabbhavāya. Tenāha bhagavā “uddhaṃ adho”ti.

43. “Nissitassa [passa udā. 74] calitaṃ, anissitassa calitaṃ natthi, calite asati passaddhi, passaddhiyā sati nati na hoti, natiyā asati āgatigati na hoti, āgatigatiyā asati cutūpapāto na hoti, cutūpapāte asati nevidha na hurāṃ na ubhayamantarena esevento dukkhassā”ti.

“Nissitassa calita”nti nissayo nāma duvidho taṇhānissayo ca ditṭhinissayo ca. Tattha yā rattassa cetanā, ayaṃ taṇhānissayo; yā mūlhassa cetanā, ayaṃ ditṭhinissayo. Cetanā pana saṅkhārā, saṅkhārapaccayā viññāṇaṃ, viññāṇapaccayā nāmarūpaṃ, evaṃ sabbo paṭiccasamuppādo. Ayaṃ paṭiccasamuppādehi otaraṇā.

Tattha yā rattassa vedanā, ayaṃ sukhā vedanā. Yā sammūlhassa vedanā, ayaṃ adukkhamasukhā vedanā, imā dve vedanā vedanākkhandho. Ayaṃ khandhehi otaraṇā.

Tattha sukhā vedanā dve indriyāni sukhindriyaṃ somanassindriyañca, adukkhamasukhā vedanā upekkhindriyaṃ. Ayaṃ indriyehi otaraṇā.

Tānīyeva indriyāni saṅkhārapariyāpannāni, ye saṅkhārā sāsavā bhavaṅgā, te saṅkhārā dhammadhātusaṅgahitā. Ayaṃ dhātūhi otaraṇā.

Sā dhammadhātu dhammāyatanapariyāpannā, yaṃ āyatanaṃ sāsavaṃ bhavaṅgaṃ, ayaṃ āyatanehi otaraṇā.

“Anissitassa calitaṃ natthī”ti samathavasena vā taṇhāya anissito vipassanāvase vā diṭṭhiyā anissito. Yā vipassanā ayaṃ vijjā, vijjuppādā avijjānirodho, avijjānirodhā saṅkhāranirodho, saṅkhāranirodhā viññāṇanirodho, evaṃ sabbo paṭiccasamuppādo. Ayaṃ paṭiccasamuppādehi otaraṇā.

Sāyeva vipassanā paññākkhandho. Ayaṃ khandhehi otaraṇā.

Sāyeva vipassanā dve indriyāni – vīriyindriyañca paññindriyañca. Ayaṃ indriyehi otaraṇā.

Sāyeva vipassanā saṅkhārapariyāpannā, ye saṅkhārā anāsavā, no ca bhavaṅgā, te saṅkhārā dhammadhātusaṅgahitā. Ayaṃ dhātūhi otaraṇā.

Sā dhammadhātu dhammāyatanapariyāpannā, yaṃ āyatanaṃ anāsavaṃ, no ca bhavaṅgaṃ. Ayaṃ āyatanehi otaraṇā.

“Passaddhiyā satī”ti duvidhā passaddhi kāyikā ca cetasikā ca. Yaṃ kāyikaṃ sukhaṃ, ayaṃ kāyapassaddhi. Yaṃ cetasikaṃ sukhaṃ, ayaṃ cetasikā passaddhi. Passaddhakāyo sukhaṃ vediyati [vedayati (ka.)], sukhino cittaṃ samādhiyati, samāhito yathābhūtaṃ pajānāti, yathābhūtaṃ pajānanto nibbindati, nibbindanto virajjati, virāgā vimuccati, vimuttasmiṃ “vimutta”miti [vimuttamhīti (sī. ka.)] ñāṇaṃ hoti, “khīṇā jāti, vusitaṃ brahmacariyaṃ, kataṃ karaṇiyaṃ, nāparaṃ itthattāyā”ti pajānāti. So na namati rūpesu, na saddesu, na gandhesu, na rasesu, na phoṭṭhabbesu, na dhammesu khayā rāgassa khayā dosassa khayā mohassa yena rūpena tathāgataṃ tiṭṭhantaṃ carantaṃ paññāpayamāno paññāpeyya, tassa rūpassa khayā virāgā nirodhā cāgā paṭinissaggā rūpasāṅkhaye vimutto, tathāgato atthītipi na upeti, natthītipi na upeti, atthi natthītipi na upeti, nevatthi no natthītipi na upeti. Atha kho gambhīro appameyyo asaṅkheyyo nibbutotiyeva saṅkhaṃ gacchati khayā rāgassa, khayā dosassa, khayā mohassa.

Yāya vedanāya...pe... yāya saññāya. Yehi saṅkhārehi. Yena viññāṇena tathāgataṃ tiṭṭhantaṃ carantaṃ paññāpayamāno paññāpeyya, tassa viññāṇassa khayā virāgā nirodhā cāgā paṭinissaggā viññāṇasaṅkhaye vimutto, tathāgato atthītipi na upeti, natthītipi na upeti, atthi natthītipi na upeti, nevatthi no natthītipi na upeti. Atha kho gambhīro appameyyo asaṅkheyyo nibbutotiyeva saṅkhaṃ gacchati khayā rāgassa, khayā dosassa, khayā mohassa. “Āgati”ti idhāgati. “Gatī”ti peccabhavo. Āgatiḡatīpi na bhavanti, “nevidhā”ti chasu ajjhattikesu āyatanesu. “Na hura”nti chasu bāhiresu āyatanesu. “Na ubhayamantarenā”ti phassasamuditesu dhammesu attānaṃ na passati. “Esevanto dukkhassā”ti paṭiccasamuppādo. So duvidho lokiyo ca lokuttaro ca. Tattha lokiyo avijjāpaccayā saṅkhārā, yāva jarāmarañā. Lokuttaro sīlavato avippaṭisāro jāyati, yāva nāparaṃ itthattāyāti pajānāti. Tenāha bhagavā “nissitassa calitaṃ anissitassa calitaṃ natthī...pe... esevanto dukkhassā”ti.

44. “Ye keci sokā paridevitā vā, dukkhā [dukkhaṃ (sī. ka.) passa udā. 78] ca lokasmimanekarūpā; Piyāṃ paṭiccappabhavanti ete, piye asante na bhavanti ete.

Tasmā hi te sukhino vītasokā, yesaṃ piyaṃ natthi kuhiñci loke;
Tasmā asokaṃ virajaṃ patthayāno, piyaṃ na kayirātha kuhiñci loke”ti.

“Ye keci sokā paridevitā vā, dukkhā ca lokasmimane karūpā piyaṃ paṭiccappabhavanti ete”ti –
ayaṃ dukkhā vedanā. “Piye asante na bhavanti ete”ti – ayaṃ sukhā vedanā. Vedanā vedanākkhandho.
Ayaṃ khandhehi otaraṇā.

Vedanāpaccayā taṇhā, taṇhāpaccayā upādānaṃ, upādānapaccayā bhavo, bhavapaccayā jāti,
jātipaccayā jarāmaraṇaṃ, evaṃ sabbaṃ. Ayaṃ paṭiccasamuppādehi otaraṇā.

Tattha sukhā vedanā dve indriyāni – sukhindriyaṃ somanassindriyaṃ. Dukkha vedanā dve
indriyāni – dukkhindriyaṃ domanassindriyaṃ. Ayaṃ indriyehi otaraṇā.

Tānīeva indriyāni saṅkhārapariyāpannāni, ye saṅkhārā sāsavā bhavaṅgā, te saṅkhārā
dhammadhātusaṅgahitā. Ayaṃ dhātūhi otaraṇā.

Sā dhammadhātu dhammāyatanaṃ pariyaṇānaṃ, yaṃ āyatanaṃ sāsavaṃ bhavaṅgaṃ. Ayaṃ āyatanehi
otaraṇā.

Tasmā hi te sukhino vītasokā, yesaṃ piyaṃ natthi kuhiñci loke;
Tasmā asokaṃ virajaṃ patthayāno, piyaṃ na kayirātha kuhiñci loketi.

Idaṃ taṇhāpahānaṃ. Taṇhānirodhā upādānanirodho, upādānanirodhā bhavanirodho, evaṃ sabbaṃ.
Ayaṃ paṭiccasamuppādehi otaraṇā.

Taṃyeva taṇhāpahānaṃ samatho. So samatho dve indriyāni satindriyaṃ samādhindriyaṃ. Ayaṃ
indriyehi otaraṇā.

Soyeva samatho samādhikkhandho. Ayaṃ khandhehi otaraṇā.

Soyeva samatho saṅkhārapariyaṇānaṃ, ye saṅkhārā anāsavā, no ca bhavaṅgā, te saṅkhārā
dhammadhātusaṅgahitā. Ayaṃ dhātūhi otaraṇā.

Sā dhammadhātu dhammāyatanaṃ pariyaṇānaṃ, yaṃ āyatanaṃ anāsavaṃ, no ca bhavaṅgaṃ. Ayaṃ
āyatanehi otaraṇā. Tenāha bhagavā “ye keci sokā”ti.

Kāmaṃ kāmayamānassa, tassa ce taṃ samijjhati;
Addhā pītimano hoti, laddhā macco yadicchati.

Tassa ce kāmayamānassa, chandajātassa jantuno;
Te kāmā parihāyanti, sallavidhova ruppatti.

Yo kāme parivajjeti, sappasseva [sabbasseva (ka.) passa su. ni. 774] padā siro;
Somaṃ visattikaṃ loke, sato samativattatīti.

Tattha yā pītimanatā, ayaṃ anunayo. Yadāha sallavidhova ruppattīti, idaṃ paṭighaṃ. Anunayaṃ
paṭighaṃ pana taṇhāpakko, taṇhāya ca pana dasarūpīni āyatanaṃ padaṭṭhānaṃ. Ayaṃ āyatanehi
otaraṇā.

Tānīeva dasa rūpīni rūpakāyo nāmasampayutto, tadubhayaṃ nāmarūpaṃ, nāmarūpapaccayā
saḷāyatanaṃ, saḷāyatanaṃ phasso, phassapaccayā vedanā, vedanāpaccayā taṇhā, evaṃ sabbaṃ.
Ayaṃ paṭiccasamuppādehi otaraṇā.

Tadeva nāmarūpaṃ pañcakkhandho; Ayaṃ khandhehi otaraṇā;
Tadeva nāmarūpaṃ aṭṭhārassa dhātuyo; Ayaṃ dhātūhi otaraṇā;

Tattha yo rūpakāyo imāni pañca rūpīni indriyāni, yo nāmakāyo imāni pañca arūpīni indriyāni, imāni dasa indriyāni. Ayaṃ indriyehi otaraṇā.

Tattha yadāha –

“Yo kāme parivajjeti, sappasseva padā siro;
Somaṃ visattikaṃ loke, sato samativattati”ti.

Ayaṃ saupādisesā nibbānadhātu, ayaṃ dhātūhi otaraṇā.

Sāyeva saupādisesā nibbānadhātu vijjā, vijjuppādā avijjānirodho, avijjānirodhā saṅkhāranirodho, evaṃ sabbaṃ. Ayaṃ paṭiccasamuppādehi otaraṇā.

Sāyeva vijjā paññākkhandho. Ayaṃ khandhehi otaraṇā.

Sāyeva vijjā dve indriyāni – vīriyindriyaṃ paññindriyaṃ. Ayaṃ indriyehi otaraṇā.

Sāyeva vijjā saṅkhārapariyāpannā, ye saṅkhārā anāsavā, no ca bhavaṅgā, te saṅkhārā dhammadhātusaṅgahitā. Ayaṃ dhātūhi otaraṇā.

Sā dhammadhātu dhammāyatanapariyāpannā, yaṃ āyatanaṃ anāsavaṃ, no ca bhavaṅgaṃ. Ayaṃ āyatanehi otaraṇā. Tenāha bhagavā “kāmaṃ kāmayaṃānassā”ti.

Ettāvatā paṭicca indriyakhandhadhātuāyatanāni samosaraṇotaraṇāni bhavanti. Evaṃ paṭicca indriyakhandhadhātuāyatanāni otāretabbāni. Tenāha āyasmā mahākaccāyano “yo ca paṭiccuppādo”ti.

Niyutto otaraṇo hāro.

13. Sodhanahāravibhaṅgo

45. Tattha katamo sodhano hāro? “Vissajjitamhi pañhe”tigāthā. Yathā āyasmā ajito pārāyane bhagavantam pañham pucchati –

“Kenassu nivuto loko, kenassu nappakāsati;
Kissābhilepanam brūsi, kiṃsu tassa mahabbhaya”nti.

“Avijjāya nivuto loko, [ajitāti bhagavā]
Vivicchā pamādā nappakāsati;
Jappābhilepanam brūmi, dukkhamassa mahabbhaya”nti.

“Kenassu nivuto loko”ti pañhe “avijjāya nivuto loko”ti bhagavā padaṃ sodheti, no ca ārambham. “Kenassu nappakāsati”ti pañhe “vivicchā pamādā nappakāsati”ti bhagavā padaṃ sodheti, no ca ārambham. “Kissābhilepanam brūsi”ti pañhe “jappābhilepanam brūmi”ti bhagavā padaṃ sodheti, no ca ārambham. “Kiṃsu tassa mahabbhaya”nti pañhe “dukkhamassa mahabbhaya”nti suddho ārambho. Tenāha bhagavā “avijjāya nivuto loko”ti.

“Savanti sabbadhi sotā, [iccāyasmā ajito]

Sotānaṃ kiṃ nivāraṇaṃ;
Sotānaṃ saṃvaram brūhi, kena sotā pidhīyare’’ti.

‘‘Yāni sotāni lokasmiṃ, [ajitāti bhagavā]
Sati tesam nivāraṇaṃ;
Sotānaṃ saṃvaram brūmi, paññāyete pidhīyare’’ti.

‘‘Savanti sabbadhi sotā, sotānaṃ kiṃ nivāraṇa’’nti pañhe ‘‘yāni sotāni lokasmiṃ, sati tesam nivāraṇa’’nti bhagavā padaṃ sodheti, no ca ārambhaṃ. ‘‘Sotānaṃ saṃvaram brūhi, kena sotā pidhīyare’’ti pañhe ‘‘sotānaṃ saṃvaram brūmi, paññāyete pidhīyare’’ti suddho ārambho. Tenāha bhagavā ‘‘yāni sotāni lokasmi’’nti.

‘‘Paññā ceva sati ca, [iccāyasmā ajito]
Nāmarūpañca [nāmaṃ rūpañca (ka.) passa su. ni. 1042] mārisa;
Etaṃ me puṭṭho pabrūhi, katthetaṃ uparujjhatī’’ti.

Pañhe –

‘‘Yametaṃ pañhaṃ apucchi, ajita taṃ vadāmi te;
Yattha nāmañca rūpañca, asesam uparujjhati;
Viññāṇassa nirodhena, etthetaṃ uparujjhatī’’ti.

Suddho ārambho. Tenāha bhagavā ‘‘yametaṃ pañhaṃ apucchi’’ti. Yattha evaṃ suddho ārambho, so pañho visajjito bhavati. Yattha pana ārambho asuddho, na tāva so pañho visajjito bhavati. Tenāha āyasmā mahākaccāyano ‘‘vissajjitamhi pañhe’’ti.

Niyutto sodhano hāro.

14. Adhiṭṭhānahāravibhaṅgo

46. Tattha katamo adhiṭṭhāno hāro? ‘‘Ekattatāya dhammā, yepi ca vemattatāya niddiṭṭhā’’ti.

Ye tattha niddiṭṭhā, tathā te dhārayitabbā.

‘‘Dukkha’’nti ekattatā. Tattha katamaṃ dukkhaṃ? Jāti dukkhā, jarā dukkhā, byādhi dukkho, maraṇaṃ dukkhaṃ, appiyehi sampayogo dukkho, piyehi vippayogo dukkho, yampicchaṃ na labhati tampi dukkhaṃ, saṃkhittena pañcupādānakkhandhā dukkhā, rūpā dukkhā, vedanā dukkhā, saññā dukkhā, saṅkhārā dukkhā, viññāṇaṃ dukkhaṃ. Ayaṃ vemattatā.

‘‘Dukkhasamudayo’’ti ekattatā. Tattha katamo dukkhasamudayo? Yāyaṃ taṇhā ponobhavikā [ponobbhavikā (ka.)] nandīrāgasahagatā tatratarābhīnandinī. Seyyathidaṃ, kāmatāṇhā bhavataṇhā vibhavataṇhā. Ayaṃ vemattatā.

‘‘Dukkhanirodho’’ti ekattatā. Tattha katamo dukkhanirodho? Yo tassāyeva taṇhāya asesavīrāganīrodho cāgo paṇinissaggo mutti anālayo. Ayaṃ vemattatā.

‘‘Dukkhanirodhagāminī paṭipadā’’ti ekattatā. Tattha katamā dukkhanirodhagāminī paṭipadā? Ayameva ariyo aṭṭhaṅgiko maggo. Seyyathidaṃ, sammādiṭṭhi sammāsaṅkappo sammāvācā sammākammanto sammāajīvo sammāvāyāmo sammāsati sammāsamādhi. Ayaṃ vemattatā.

“Maggo”ti ekattatā. Tattha katamo maggo? Nirayagāmī maggo tiracchānayanigāmī maggo pēttivīsayagāmī maggo asurayoniyo [asurayonigāmiyo (sī.), asurayonigāmīniyo (ka.)] maggo saggagāmiyo maggo manussagāmī maggo nibbānagāmī maggo. Ayaṃ vemattatā.

“Nirodho”ti ekattatā. Tattha katamo nirodho? Paṭisaṅkhānirodho appaṭisaṅkhānirodho anunayanirodho paṭighānirodho mānanirodho makkhanirodho paḷāsanirodho issānirodho macchāriyanirodho sabbakilesanirodho. Ayaṃ vemattatā.

“Rūpa”nti ekattatā. Tattha katamaṃ rūpaṃ? Cātumahābhūtikaṃ [cātummahābhūtikaṃ (sī.)] rūpaṃ catunnaṃ mahābhūtānaṃ upādāya rūpassa paññatti. Tattha katamāni cattāri mahābhūtāni? Pathavīdhātu [paṭhavīdhātu (sī.)] āpodhātu tejjodhātu vāyodhātu.

47. Dvīhi ākārehi dhātuyo pariggaṇhāti saṅkhepena ca vitthārena ca. Kathaṃ vitthārena dhātuyo pariggaṇhāti? Vīsatīyā ākārehi pathavīdhātuṃ vitthārena pariggaṇhāti, dvādasahi ākārehi āpodhātuṃ vitthārena pariggaṇhāti, catūhi ākārehi tejjodhātuṃ vitthārena pariggaṇhāti, chahi ākārehi vāyodhātuṃ vitthārena pariggaṇhāti.

Katamehi vīsatīyā ākārehi pathavīdhātuṃ vitthārena pariggaṇhāti? Atthi imasmiṃ kāye kesā lomā nakhā dantā taco, maṃsaṃ nhāru aṭṭhi aṭṭhimiṅgaṃ [aṭṭhimiṅgā (sī.)] vakkhaṃ, hadayaṃ yakaṇaṃ kilomakaṃ pihakaṃ papphāsaṃ, antaṃ antaṅgaṃ udariyaṃ karīsaṃ matthake matthaluṅgānti imehi vīsatīyā ākārehi pathavīdhātuṃ vitthārena pariggaṇhāti.

Katamehi dvādasahi ākārehi āpodhātuṃ vitthārena pariggaṇhāti? Atthi imasmiṃ kāye pittaṃ semhaṃ pubbo lohitaṃ sedo medo assu vasā kheḷo siṅghāṇikā lasikā muttanti imehi dvādasahi ākārehi āpodhātuṃ vitthārena pariggaṇhāti.

Katamehi catūhi ākārehi tejjodhātuṃ vitthārena pariggaṇhāti? Yena ca santappati, yena ca jīrīyati [jīrati (sī.), jīrayati (ka.), passa ma. ni. 3.351], yena ca pariḍayhati, yena ca asitapīṭakhāyitasāyitaṃ sammā pariṇāmaṃ gacchati, imehi catūhi ākārehi tejjodhātuṃ vitthārena pariggaṇhāti.

Katamehi chahi ākārehi vāyodhātuṃ vitthārena pariggaṇhāti? Uddhaṅgamā vātā, adhogamā vātā, kucchisayā vātā, koṭṭhasayā [koṭṭhasayā (sī.)] vātā, aṅgamaṅgānusārino vātā, assāso passāso iti, imehi chahi ākārehi vāyodhātuṃ vitthārena pariggaṇhāti.

Evaṃ imehi dvācattālīsāya ākārehi vitthārena dhātuyo sabhāvato upalakkhayanto tulayanto parivīmaṃsanto pariyogāhanto paccavekkhanto na kiñci gayhūpagaṃ passati kāyaṃ vā kāyapadesaṃ vā, yathā candanikaṃ pavicinanto na kiñci gayhūpagaṃ passeyya, yathā saṅkāraṭṭhānaṃ pavicinanto na kiñci gayhūpagaṃ passeyya, yathā vaccaṅgaṃ pavicinanto na kiñci gayhūpagaṃ passeyya, yathā sivathikaṃ [sivathikaṃ (sī.)] pavicinanto na kiñci gayhūpagaṃ passeyya. Evameva imehi dvācattālīsāya ākārehi evaṃ vitthārena dhātuyo sabhāvato upalakkhayanto tulayanto parivīmaṃsanto pariyogāhanto paccavekkhanto na kiñci gayhūpagaṃ passati kāyaṃ vā kāyapadesaṃ vā. Tenāha bhagavā yā ceva kho pana ajjhātikā pathavīdhātu [nevesāhaṃ (sī. ka.) passa ma. ni. 3.349], yā ca bāhirā pathavīdhātu, pathavīdhātūvesā. Taṃ “netāṃ mama, nesohamasmi, na meso attā”ti evameṭaṃ yathābhūtaṃ sammappaññāya daṭṭhabbaṃ, evameṭaṃ yathābhūtaṃ sammappaññāya disvā pathavīdhātuyā nibbindati, pathavīdhātuyā cittaṃ virājeti. Yā ceva kho pana ajjhātikā āpodhātu, yā ca bāhirā āpodhātu...pe... yā ceva kho pana ajjhātikā tejjodhātu, yā ca bāhirā tejjodhātu...pe... yā ceva kho pana ajjhātikā vāyodhātu, yā ca bāhirā vāyodhātu, vāyodhātūvesā. Taṃ “netāṃ mama, nesohamasmi, na meso attā”ti evameṭaṃ yathābhūtaṃ sammappaññāya daṭṭhabbaṃ, evameṭaṃ yathābhūtaṃ sammappaññāya disvā vāyodhātuyā nibbindati, vāyodhātuyā cittaṃ virājeti. Ayaṃ vemattatā.

48. “Avijjā”ti ekattatā. Tattha katamā avijjā? Dukkhe aññānaṃ, dukkhasamudaye aññānaṃ,

dukkhanirodhe aññāṇaṃ, dukkhanirodhagāminiyā paṭipadāya aññāṇaṃ, pubbante aññāṇaṃ, aparante aññāṇaṃ, pubbantāparante aññāṇaṃ, idappaccayatāpaṭiccasamuppannesu dhammesu aññāṇaṃ, yaṃ evarūpaṃ aññāṇaṃ adassanaṃ anabhisamayo ananubodho asambodho appaṭivedho asallakkhaṇā anupalakkhaṇā apaccupalakkhaṇā asamavekkhaṇaṃ [asamavekkhaṇaṃ (ka.)] apaccakkhakammaṃ dummejjhaṃ bālyaṃ asampajaññaṃ moho pamoho sammoho avijjā avijjogho avijjāyogo avijjānusayo avijjāpariyuṭṭhānaṃ avijjālaṅgī moho akusalamūlaṃ. Ayaṃ vemattatā.

“Vijjā”ti ekattatā. Tattha katamā vijjā? Dukkhe ñāṇaṃ, dukkhasamudaye ñāṇaṃ, dukkhanirodhe ñāṇaṃ, dukkhanirodhagāminiyā paṭipadāya ñāṇaṃ, pubbante ñāṇaṃ, aparante ñāṇaṃ, pubbantāparante ñāṇaṃ, idappaccayatāpaṭiccasamuppannesu dhammesu ñāṇaṃ, yā evarūpā paññā pajānanā vicayo pavicayo dhammavicayo saṃlakkhaṇā upalakkhaṇā paccupalakkhaṇā paṇḍiccaṃ kosallaṃ nepuññaṃ vebhavyā [vebhavyā (sī.)] cintā upaparikkhā bhūrī medhā pariṇāyikā vipassanā sampajaññaṃ patodo paññā paññindriyaṃ paññābalaṃ paññāsattaṃ paññāpāsādo paññāloko paññāobhāso paññāpajjoto paññāratanāṃ amoho dhammavicayo sammādiṭṭhi dhammavicayasambojjhaṅgo maggaṅgaṃ maggapariyāpannaṃ. Ayaṃ vemattatā.

“Samāpatti”ti ekattatā. Tattha katamā samāpatti? Saññāsamāpatti asaññāsamāpatti, nevasaññāsaññāsamāpatti. Vibhūtasaññāsamāpatti nirodhasamāpatti. Ayaṃ vemattatā.

“Jhāyī”ti ekattatā. Tattha katamo jhāyī? Atthi sekkho jhāyī, atthi asekkho jhāyī, nevasekkhanāsekkho jhāyī, ājāniyo jhāyī, assakhaluṅko jhāyī, diṭṭhuttaro jhāyī, taṇhuttaro jhāyī, paññuttaro jhāyī. Ayaṃ vemattatā.

“Samādhi”ti ekattatā. Tattha katamo samādhi? Saraṇo samādhi, araṇo samādhi, savero samādhi, avero samādhi, sabyāpajjo [sabyāpajjo (sī.)] samādhi, abyāpajjo samādhi, sappītico samādhi, nippītico samādhi, sāmiso samādhi, nirāmiso samādhi, sasaṅkhāro samādhi, asaṅkhāro samādhi, ekaṃsabhāvito samādhi, ubhayaṃsabhāvito samādhi, ubhayato bhāvitabhāvano samādhi, savitakkasavicāro samādhi, avitakkavicāramatto samādhi, avitakkaavicāro samādhi, hānabhāgiyo samādhi, ṭhitibhāgiyo samādhi, visesabhāgiyo samādhi, nibbedhabhāgiyo samādhi, lokiyo samādhi, lokuttaro samādhi, micchāsamādhi, sammāsamādhi. Ayaṃ vemattatā.

“Paṭipadā”ti ekattatā. Tattha katamā paṭipadā? Āgālhapaṭipadā [āgālhā paṭipadā (sī.)] aṭṭhakathā oloketabbā], nijjhāmapaṭipadā, majjhīmapaṭipadā, akkhamā paṭipadā, khamā paṭipadā, samā paṭipadā, damā paṭipadā, dukkhā paṭipadā dandhābhiññā, dukkhā paṭipadā khippābhiññā, sukhā paṭipadā dandhābhiññā, sukhā paṭipadā khippābhiññāti. Ayaṃ vemattatā.

“Kāyo”ti ekattatā. Tattha katamo kāyo? Nāmakāyo rūpakāyo ca. Tattha katamo rūpakāyo? Kesā lomā nakhā dantā taco maṃsaṃ nhāru [nahāru (sī.)] aṭṭhi aṭṭhimiññaṃ vakkhaṃ hadayaṃ yakanāṃ kilomakaṃ pihakaṃ papphāsaṃ antaṃ antaguṇaṃ udariyaṃ karisaṃ pittaṃ semhaṃ pubbo lohitaṃ sedo medo assu vasā kheḷo siṅghāṇikā lasikā muttaṃ matthaluṅganti – ayaṃ rūpakāyo. Nāmakāyo nāma vedanā saññā cetanā cittaṃ phasso manasikāroti – ayaṃ nāmakāyoti. Ayaṃ vemattatā.

Evaṃ yo dhammo yassa dhammassa samānabhāvo, so dhammo tassa dhammassa ekattatāya ekī bhavati. Yena yena vā pana vilakkhaṇo, tena tena vemattaṃ gacchati. Evaṃ sutte vā veyyākaraṇe vā gāthāyaṃ vā pucchitena vīmaṃsayitabbaṃ, kiṃ ekattatāya pucchati, udāhu vemattatāyāti. Yadi ekattatāya pucchitaṃ, ekattatāya visajjayitabbaṃ. Yadi vemattatāya pucchitaṃ, vemattatāya visajjayitabbaṃ. Yadi sattādhiṭṭhānena pucchitaṃ, sattādhiṭṭhānena visajjayitabbaṃ. Yadi dhammādhiṭṭhānena pucchitaṃ, dhammādhiṭṭhānena visajjayitabbaṃ. Yathā yathā vā pana pucchitaṃ, tathā tathā visajjayitabbaṃ. Tenāha āyasmā mahākaccāyano “ekattatāya dhammā”ti.

Niyutto adhiṭṭhāno hāro.

15. Parikkhārahāravibhaṅgo

49. Tattha katamo parikkhāro hāro? “Ye dhammā yaṃ dhammaṃ janayanti”ti.

Yo dhammo yaṃ dhammaṃ janayati, tassa so parikkhāro. Kiṃlakkhaṇo parikkhāro? Janakalakkhaṇo parikkhāro. Dve dhammā janayanti hetu ca paccayo ca. Tattha kiṃlakkhaṇo hetu, kiṃlakkhaṇo paccayo? Asādhāraṇalakkhaṇo hetu, sādhāraṇalakkhaṇo paccayo. Yathā kiṃ bhavē? Yathā aṅkurassa nibbattiyā bījaṃ asādhāraṇaṃ, pathavī āpo ca sādhāraṇā. Aṅkurassa hi pathavī āpo ca paccayo sabhāvo hetu. Yathā vā pana ghaṭe duddhaṃ pakkhittaṃ dadhi bhavati, na catthi ekakālasamavadhānaṃ duddhassa ca dadhissa ca. Evamevaṃ natthi ekakālasamavadhānaṃ hetussa ca paccayassa ca.

Ayañhi saṃsāro sahetu sappaccayo nibbatto. Vuttaṃ hi avijjāpaccayā saṅkhārā, saṅkhārapaccayā viññānaṃ, evaṃ sabbo paṭiccasamuppādo. Iti avijjā avijjāya hetu ayoniso manasikāro paccayo. Purimikā avijjā pacchimikāya avijjāya hetu. Tattha purimikā avijjā avijjānusayo pacchimikā avijjā avijjāpariyuṭṭhānaṃ, purimiko avijjānusayo pacchimikassa avijjāpariyuṭṭhānassa hetubhūto paribrūhanāya, bījaṅkuro viya samanantarahetutāya. Yaṃ pana yathā phalaṃ nibbattati, idamassa paramparahetutāya hetubhūtaṃ. Duvidho hi hetu samanantarahetu paramparahetu ca, evaṃ avijjāyapi duvidho hetu samanantarahetu paramparahetu ca.

Yathā vā pana thālakaṅca vaṭṭi ca telaṅca padīpassa paccayabhūtaṃ na sabhāvahetu, na hi sakkā thālakaṅca vaṭṭiṅca telaṅca anaggikaṃ dīpetuṃ padīpassa paccayabhūtaṃ. Padīpo viya sabhāvo hetu hoti. Iti sabhāvo hetu, parabhāvo paccayo. Ajjhattiko hetu, bāhiro paccayo. Janako hetu, pariggāhako paccayo. Asādhāraṇo hetu, sādhāraṇo paccayo.

Avupacchedattho santati attho, nibbatti attho phalattho, paṭisandhi attho punabbhavattho, palibodhattho pariyuṭṭhānattho, asamugghātattho anusayattho, asampaṭivedhattho avijjattho, apariññātattho viññānaṃ bījattho. Yathā avupacchedo tattha santati, yathā santati tattha nibbatti, yathā nibbatti tattha phalaṃ, yathā phalaṃ tattha paṭisandhi, yathā paṭisandhi tattha punabbhavo, yathā punabbhavo tattha palibodho, yathā palibodho tattha pariyuṭṭhānaṃ, yathā pariyuṭṭhānaṃ tattha asamugghāto. Yathā asamugghāto tattha anusayo, yathā anusayo tattha asampaṭivedho, yathā asampaṭivedho tattha avijjā, yathā avijjā tattha sāsavaṃ viññānaṃ apariññātaṃ, yathā sāsavaṃ viññānaṃ apariññātaṃ tattha bījattho.

Sīlakkhandho samādhikkhandhassa paccayo, samādhikkhandho paññākkhandhassa paccayo, paññākkhandho vimuttikkhandhassa paccayo, vimuttikkhandho vimuttiññāḍassanakkhandhassa paccayo. Titthaññutā pītaññutāya paccayo, pītaññutā pattaññutāya paccayo, pattaññutā attaññutāya paccayo.

Yathā vā pana cakkhuṅca paṭicca rūpe ca uppajjati cakkhuvīññānaṃ. Tattha cakkhu ādhipateyyapaccayatāya paccayo, rūpā ārammaṇapaccayatāya paccayo. Āloko sannissayatāya paccayo, manasikāro sabhāvo hetu. Saṅkhārā viññānaṃ paccayo, sabhāvo hetu. Viññānaṃ nāmarūpassa paccayo, sabhāvo hetu. Nāmarūpaṃ saḷāyatanassa paccayo, sabhāvo hetu. Saḷāyatanam phassassa paccayo, sabhāvo hetu. Phasso vedanāya paccayo, sabhāvo hetu. Vedanā taṅhāya paccayo, sabhāvo hetu. Taṅhā upādānassa paccayo, sabhāvo hetu. Upādānaṃ bhavassa paccayo, sabhāvo hetu. Bhavo jātiyā paccayo, sabhāvo hetu. Jāti jarāmaṇassa paccayo, sabhāvo hetu. Jarāmaṇaṃ sokassa paccayo, sabhāvo hetu. Soko paridevassa paccayo, sabhāvo hetu. Paridevo dukkhassa paccayo, sabhāvo hetu. Dukkhaṃ domanassassa paccayo, sabhāvo hetu. Domanassaṃ upāyāsassa paccayo, sabhāvo hetu. Evaṃ yo koci upanissayo sabbo so parikkhāro. Tenāha āyasmā mahākaccāyano “ye dhammā yaṃ dhammaṃ janayanti”ti.

Niyutto parikkhāro hāro.

16. Samāropanahāravibhaṅgo

50. Tattha katamo samāropano hāro? “Ye dhammā yaṃmūlā, ye cekatthā pakāsītā muninā”ti.

Ekasmiṃ padaṭṭhāne yattakāni padaṭṭhānāni otaranti, sabbāni tāni samāropayitabbāni. Yathā āvaṭṭe hāre bahukāni padaṭṭhānāni otarantīti. Tattha samāropanā catubbidhā padaṭṭhānaṃ, vevacanaṃ, bhāvanā, pahānamiti.

Tattha katamā padaṭṭhānena samāropanā?

“Sabbapāpassa akaraṇaṃ, kusalassa upasampadā;
Sacittapariyodapanam, etaṃ buddhāna sāsana”nti.

Tassa kiṃ padaṭṭhānaṃ? Tīṇi sucaritāni – kāyasucaritaṃ vacīsucaritaṃ manosucaritaṃ – idaṃ padaṭṭhānaṃ; tattha yaṃ kāyikañca vācasikañca sucaritaṃ, ayaṃ sīlakkhandho. Manosucarite yā anabhijjhā abyāpādo ca, ayaṃ samādhikkhandho. Yā sammādiṭṭhi, ayaṃ paññākkhandho. Idaṃ padaṭṭhānaṃ, tattha sīlakkhandho ca samādhikkhandho ca samatho, paññākkhandho vipassanā. Idaṃ padaṭṭhānaṃ, tattha samathassa phalaṃ rāgavirāgā cetovimutti, vipassanā phalaṃ avijjāvirāgā paññāvimutti. Idaṃ padaṭṭhānaṃ.

Vanaṃ vanathassa padaṭṭhānaṃ. Kiñca vanaṃ? Ko ca vanatho? Vanaṃ nāma pañca kāmagaṇā, taṇhā vanatho. Idaṃ padaṭṭhānaṃ. Vanaṃ nāma nimittaggāho “itthī”ti vā “puriso”ti vā. Vanatho nāma tesam tesam aṅgapaccaṅgānaṃ anubyañjanaggāho “aho cakkhu, aho sotaṃ, aho ghānaṃ, aho jivhā, aho kāyo, iti. Idaṃ padaṭṭhānaṃ. Vanaṃ nāma cha ajjhātikabāhirāni āyatanāni aparīññātāni. Yaṃ tadubhayaṃ paṭicca uppajjati saṃyojanaṃ, ayaṃ vanatho. Idaṃ padaṭṭhānaṃ. Vanaṃ nāma anusayo. Vanatho nāma pariyuṭṭhānaṃ. Idaṃ padaṭṭhānaṃ. Tenāha bhagavā “chetvā vanañca vanathañcā”ti. Ayaṃ padaṭṭhānena samāropanā.

51. Tattha katamā vevacanaṃ samāropanā? Rāgavirāgā cetovimutti sekkhaphalaṃ; avijjāvirāgā paññāvimutti asekkhaphalaṃ. Idaṃ vevacanaṃ. Rāgavirāgā cetovimutti anāgāmi phalaṃ; avijjāvirāgā paññāvimutti aggaphalaṃ arahattaṃ. Idaṃ vevacanaṃ. Rāgavirāgā cetovimutti kāmādhātusamatikkamaṃ; avijjāvirāgā paññāvimutti tedhātusamatikkamaṃ. Idaṃ vevacanaṃ. Paññindriyaṃ, paññābalaṃ, adhipaññāsikkhā, paññākkhandho, dhammavicayasambojjhaṅgo, upekkhāsambojjhaṅgo, ñāṇaṃ, sammādiṭṭhi, tīraṇā, santīraṇā, hirī, vipassanā, dhamme ñāṇaṃ, sabbam, idaṃ vevacanaṃ. Ayaṃ vevacanaṃ samāropanā.

Tattha katamā bhāvanāya samāropanā? Yathāha bhagavā “tasmātiha tvaṃ bhikkhu kāye kāyānupassī viharāhi, ātāpī sampajāno satimā vineyya loke abhijjhādomanassaṃ”. Ātāpīti vīriyindriyaṃ. Sampajānoti paññindriyaṃ. Satimāti satindriyaṃ. Vineyya loke abhijjhādomanassanti samādhindriyaṃ. Evaṃ kāye kāyānupassino viharato cattāro satipaṭṭhānā bhāvanāpāripūriṃ gacchanti. Kena kāraṇena? Ekalakkhaṇattā catunnaṃ indriyānaṃ. Catūsu satipaṭṭhānesu bhāviyamānesu cattāro sammappadhānā bhāvanāpāripūriṃ gacchanti. Catūsu sammappadhānesu bhāviyamānesu cattāro iddhipādā bhāvanāpāripūriṃ gacchanti. Catūsu iddhipādesu bhāviyamānesu pañcindriyāni bhāvanāpāripūriṃ gacchanti. Evaṃ sabbe. Kena kāraṇena? Sabbe hi bodhaṅgamā dhammā bodhipakkiyā niyyānikalakkhaṇena ekalakkhaṇā, te ekalakkhaṇattā bhāvanāpāripūriṃ gacchanti. Ayaṃ bhāvanāya samāropanā.

Tattha katamā pahānena samāropanā? Kāye kāyānupassī viharanto “asubhe subha”nti vipallāsaṃ pajahati, kabalīkāro cassa āhāro pariññaṃ gacchati, kāmupādānena ca anupādāno bhavati, kāmāyogena

ca viṣaṃyutto bhavati, abhijjhākāyaganthena ca vippayujjati, kāmāsavena ca anāsavo bhavati, kāmoghañca uttiṇṇo bhavati, rāgasallena ca visallo bhavati, rūpūpikā [rūpupikā (ka.) evamuparipi] cassa viññāṇaṭṭhiti pariññaṃ gacchati, rūpadhātuyam cassa rāgo pahīno bhavati, na ca chandāgatim gacchati.

Vedanāsu vedanānupassī viharanto “dukkhe sukha”nti vipallāsaṃ pajahati, phasso cassa āhāro pariññaṃ gacchati, bhavūpādānena ca anupādāno bhavati, bhavayogena ca viṣaṃyutto bhavati, byāpādakāyaganthena ca vippayujjati, bhavāsavena ca anāsavo bhavati, bhavoghañca uttiṇṇo bhavati, dosasallena ca visallo bhavati, vedanūpikā cassa viññāṇaṭṭhiti pariññaṃ gacchati, vedanādhātuyam cassa rāgo pahīno bhavati, na ca dosāgatim gacchati.

Citte cittānupassī viharanto “anicce nicca”nti vipallāsaṃ pajahati, viññāṇam cassa āhāro pariññaṃ gacchati, diṭṭhupādānena ca anupādāno bhavati, diṭṭhiyogena ca viṣaṃyutto bhavati, sīlabbataparāmāsakāyaganthena ca vippayujjati, diṭṭhāsavena ca anāsavo bhavati, diṭṭhoghañca uttiṇṇo bhavati, mānasallena ca visallo bhavati, saññūpikā cassa viññāṇaṭṭhiti pariññaṃ gacchati, saññādhātuyam cassa rāgo pahīno bhavati, na ca bhayāgatim gacchati.

Dhammesu dhammānupassī viharanto “anattani [anattaniye (sī.) passa a. ni. 4.49] attā”ti vipallāsaṃ pajahati, manosañcetanā cassa āhāro pariññaṃ gacchati, attavādūpādānena ca anupādāno bhavati, avijjāyogena ca viṣaṃyutto bhavati, idaṃsaccābhinivesakāyaganthena ca vippayujjati, avijjāsavena ca anāsavo bhavati, avijjoghañca uttiṇṇo bhavati, mohasallena ca visallo bhavati, saṅkhārūpikā cassa viññāṇaṭṭhiti pariññaṃ gacchati, saṅkhāradhātuyam cassa rāgo pahīno bhavati, na ca mohāgatim gacchati. Ayaṃ pahānena samāropanā.

Tenāha āyasmā mahākaccāyano –

“Ye dhammā yaṃ mūlā, ye cekatthā pakāsītā muninā;
Te samāropayitabbā, esa samāropano hāro”ti.

Niyutto samāropano hāro.

Niṭṭhito ca hāravibhaṅgo.

1. Desanāhārasampāto

52. “Soḷasa hārā paṭhamam, disalocanato disā viloketvā;
Saṅkhipiya aṅkusena hi, nayehi tīhi niddise sutta”nti.

Vuttā, tassā niddeso kuhiṃ daṭṭhabbo? Hārasampāte. Tattha katamo desanāhārasampāto?

“Arakkhitena cittena [kāyena (udā. 32)], micchādiṭṭhihatena ca;
Thinamiddhābhībhūtena, vasaṃ mārasa gacchati”ti.

Arakkhitena cittenāti kiṃ desayati, pamādaṃ taṃ maccuno padaṃ. **Micchādiṭṭhihatena cāti** micchādiṭṭhihatam nāma vuccati yadā “anicce nicca”nti passati, so vipallāso. So pana vipallāso kiṃlakkaṇo? Viparītaggāhalakkaṇo vipallāso. So kiṃ vipallāsayati? Tayo dhamme saññaṃ cittaṃ diṭṭhimiti. So kuhiṃ vipallāsayati? Catūsu attabhāvavattḥūsu, rūpaṃ attato samanupassati, rūpavantam vā attānaṃ, attani vā rūpaṃ, rūpasmim vā attānaṃ. Evaṃ vedanaṃ...pe... saññaṃ...pe... saṅkhāre... pe... viññāṇam attato samanupassati, viññāṇavantam vā attānaṃ, attani vā viññāṇam, viññāṇasmim vā attānaṃ.

Tattha rūpaṃ paṭhamam vipallāsavatthu “asubhe subha”nti. Vedanā dutiyaṃ vipallāsavatthu

“dukkhe sukha”nti. Saññā saṅkhārā ca tatiyaṃ vipallāsavattu “anattani attā”ti. Viññāṇaṃ catutthaṃ vipallāsavattu “anicce nicca”nti. Dve dhammā cittassa saṅkilesā – taṇhā ca avijjā ca. Taṇhānivutaṃ cittaṃ dvīhi vipallāsehi vipallāsīyati “asubhe subha”nti “dukkhe sukha”nti. Diṭṭhinivutaṃ cittaṃ dvīhi vipallāsehi vipallāsīyati “anicce nicca”nti “anattani attā”ti.

Tattha yo diṭṭhivipallāso, so atītaṃ rūpaṃ attato samanupassati, atītaṃ vedanaṃ...pe... atītaṃ saññaṃ, atīte saṅkhāre...pe... atītaṃ viññāṇaṃ attato samanupassati. Tattha yo taṇhāvīpallāso, so anāgataṃ rūpaṃ abhinandati, anāgataṃ vedanaṃ...pe... anāgataṃ saññaṃ, anāgate saṅkhāre, anāgataṃ viññāṇaṃ abhinandati. Dve dhammā cittassa upakkilesā – taṇhā ca avijjā ca. Tāhi visujjhantaṃ cittaṃ visujjhati. Tesam avijjānīvaraṇānaṃ taṇhāsaṃyojanānaṃ pubbā koṭi na paññāyati sandhāvantaṃ saṃsaraṇānaṃ sakim nirayaṃ sakim tiracchānayaṇim sakim pettivisayaṃ sakim asurakāyaṃ sakim deve sakim manusse.

Thinamidhābhūtenāti. Thinaṃ [thīnaṃ (sī.)] nāma yā cittassa akallatā akammaniyatā; middhaṃ nāma yaṃ kāyassa līnattaṃ. **Vasaṃ mārasa gacchatīti** kilesamārasa ca sattaṃ mārasa ca vasaṃ gacchati, so hi nivuto saṃsārābhimukho hoti. Imāni bhagavatā dve saccāni desitāni dukkhaṃ samudayo ca. Tesam bhagavā pariññāya ca pahānāya ca dhammaṃ deseti dukkhassa pariññāya samudayassa pahānāya. Yena ca pariññāyati yena ca pajahati, ayaṃ maggo. Yaṃ taṇhāya avijjāya ca pahānaṃ, ayaṃ nirodho. Imāni cattāri saccāni. Tenāha bhagavā “arakkhitena cittenā”ti. Tenāhāyasmā mahākaccāyano “assādādinavatā”ti.

Niyutto desanā hārasampāto.

2. Vicayahārasampāto

53. Tattha katamo vicayo hārasampāto? Tattha taṇhā duvidhā kusalāpi akusalāpi. Akusalā saṃsāragāminī, kusalā apacayagāminī pahānataṇhā. Mānopi duvidho kusaloṃpi akusalopī. Yaṃ mānaṃ nissāya mānaṃ pajahati, ayaṃ māno kusalo. Yo pana māno dukkhaṃ nibbattayati, ayaṃ māno akusalo. Tattha yaṃ nekkhammasitaṃ domanassaṃ kudāssunāmāhaṃ taṃ āyatanaṃ sacchikatvā upasampajja viharissaṃ yaṃ ariyā santaṃ āyatanaṃ sacchikatvā upasampajja viharantīti tassa uppajjati pihā, pihāpaccayā domanassaṃ, ayaṃ taṇhā kusalā rāgavirāgā cetovimutti, tadārammaṇā kusalā avijjāvirāgā paññāvimutti.

Tassā ko pavicayo? Aṭṭha maggaṅgāni sammādiṭṭhi sammāsaṅkappo sammāvācā sammākammanto sammāājīvo sammāvāyāmo sammāsati sammāsamādhi. So kattha daṭṭhabbo? Catutthe jhāne pāramitāya. Catutthe hi jhāne aṭṭhaṅgasamannāgataṃ cittaṃ bhāvayati parisuddhaṃ pariyodātaṃ anaṅgaṇaṃ vigatūpakkilesaṃ mudu kammaniyaṃ ṭhitaṃ āneñjappattaṃ. So tattha aṭṭhavidhaṃ adhigacchati cha abhiññā dve ca visese, taṃ cittaṃ yato parisuddhaṃ, tato pariyodātaṃ, yato pariyodātaṃ, tato anaṅgaṇaṃ, yato anaṅgaṇaṃ, tato vigatūpakkilesaṃ, yato vigatūpakkilesaṃ, tato mudu, yato mudu, tato kammaniyaṃ, yato kammaniyaṃ, tato ṭhitaṃ, yato ṭhitaṃ, tato āneñjappattaṃ. Tattha aṅgaṇā ca upakkilesā ca tadubhayaṃ taṇhāpakkho. Yā ca iñjanā yā ca cittassa aṭṭhiti, ayaṃ diṭṭhipakkho.

Cattāri indriyāni dukkhindriyaṃ domanassindriyaṃ sukhindriyaṃ somanassindriyaṃ ca catutthajjhāne nirujjhanti, tassa upekkhindriyaṃ avasiṭṭhaṃ bhavati. So uparimaṃ samāpattiṃ santato manasikaroti, tassa uparimaṃ samāpattiṃ santato manasikaroto catutthajjhāne oḷārikā saññā saṅghahati ukkaṇṭhā ca paṭighasaññā, so sabbaso rūpasaññānaṃ samatikkamā paṭighasaññānaṃ atthaṅgamā nānattasaññānaṃ amanasikārā “anantaṃ ākāsa”nti ākāsaṇācāyatanaṃ samāpattiṃ sacchikatvā upasampajja viharati. Abhiññābhinihāro rūpasaññā vokāro nānattasaññā samatikkamati paṭighasaññā cassa abbatthaṃ gacchati, evaṃ samādhi tassa samāhitassa obhāso antaradhāyati dassanaṅca rūpaṇaṃ, so samādhi chaḷaṅgasamannāgato paccavekkhitabbo. Anabhijjhāsahagataṃ me mānasaṃ sabbaloke, abyāpannaṃ me cittaṃ sabbasattesu, āraddhaṃ me vīriyaṃ paggaḥitaṃ, passaddho me kāyo asāradhho,

samāhitaṃ me cittaṃ avikkhittaṃ, upaṭṭhitā me sati asammuṭṭhā [appammuṭṭhā (sī.)], tattha yañca anabhijjhāsahagataṃ mānasam sabbaloke yañca abyāpannaṃ cittaṃ sabbasattesu yañca āraddhaṃ vīriyaṃ paggaḥitaṃ yañca samāhitaṃ cittaṃ avikkhittaṃ, ayaṃ samatho. Yo passaddho kāyo asāraddho, ayaṃ samādhiparikkhāro. Yā upaṭṭhitā sati asammuṭṭhā ayaṃ vipassanā.

54. So samādhi pañcavidhena veditabbo. Ayaṃ samādhi “paccuppannasukho” ti itissa paccattameva ñāṇadassanaṃ paccupaṭṭhitaṃ bhavati, ayaṃ samādhi “āyatiṃ sukhavipāko” ti itissa paccattameva ñāṇadassanaṃ paccupaṭṭhitaṃ bhavati, ayaṃ samādhi “ariyo nirāmiso” ti itissa paccattameva ñāṇadassanaṃ paccupaṭṭhitaṃ bhavati, ayaṃ samādhi “akāpurisasevito” ti itissa paccattameva ñāṇadassanaṃ paccupaṭṭhitaṃ bhavati, ayaṃ samādhi “santo ceva paṇīto ca paṭippassaddhiladdho ca ekodibhāvādhigato ca na sasāṅkhāraniggayhavāritagato [sasāṅkhāraniggayhavāritavato (sī.), sasāṅkhāraniggayhavārivāṇo (ka.)] cā” ti itissa paccattameva ñāṇadassanaṃ paccupaṭṭhitaṃ bhavati. Taṃ kho panimaṃ samādhiṃ “sato samāpajjāmi sato vuṭṭhahāmī” ti itissa paccattameva ñāṇadassanaṃ paccupaṭṭhitaṃ bhavati. Tattha yo ca samādhi paccuppannasukho yo ca samādhi āyatiṃ sukhavipāko ayaṃ samatho. Yo ca samādhi ariyo nirāmiso, yo ca samādhi akāpurisasevito, yo ca samādhi santo ceva paṇīto paṭippassaddhiladdho ca ekodibhāvādhigato ca na sasāṅkhāraniggayhavāritagato ca yañcāhaṃ taṃ kho panimaṃ samādhiṃ sato samāpajjāmi sato vuṭṭhahāmīti, ayaṃ vipassanā.

So samādhi pañcavidhena veditabbo pītipharaṇatā sukhapharaṇatā cetopharaṇatā ālokapharaṇatā paccavekkhaṇānimittaṃ. Tattha yo ca pītipharaṇo yo ca sukhapharaṇo yo ca cetopharaṇo, ayaṃ samatho. Yo ca ālokapharaṇo yañca paccavekkhaṇānimittaṃ. Ayaṃ vipassanā.

55. Dasa kasiṇāyatanāni pathavīkasiṇaṃ āpokasiṇaṃ tejokasiṇaṃ vāyokasiṇaṃ nīlakasiṇaṃ pītakasiṇaṃ lohitaṅkasiṇaṃ odātakasiṇaṃ ākāsakasiṇaṃ viññāṇakasiṇaṃ. Tattha yañca pathavīkasiṇaṃ yañca āpokasiṇaṃ evaṃ sabbam, yañca odātakasiṇaṃ. Imāni aṭṭha kasiṇāni samatho. Yañca ākāsakasiṇaṃ yañca viññāṇakasiṇaṃ, ayaṃ vipassanā. Evaṃ sabbo ariyo maggo yena yena ākārena vutto, tena tena samathavipassanena yojayitabbo. Te tīhi dhammehi saṅgahitā aniccatāya dukkhatāya anattatāya. So samathavipassanaṃ bhāvayamāno tīṇi vimokkhamukhāni bhāvayati. Tīṇi vimokkhamukhāni bhāvayanto tayo khandhe bhāvayati. Tayo khandhe bhāvayanto ariyaṃ aṭṭhaṅgikaṃ maggaṃ bhāvayati.

Rāgacarito puggalo animittena vimokkhamukhena niyyāti [niyyāti (sī.)] adhicittasikkhāya sikkhanto lobhaṃ akusalamūlaṃ pajahanto sukhavedanīyaṃ phassaṃ anupagacchanto sukhaṃ vedanaṃ pariṇānanto rāgamalaṃ pavāhento rāgarajaṃ niddhunanto rāgavisaṃ vamento rāgaggiṃ nibbāpento rāgasallaṃ uppāṇento rāgajaṭṭhaṃ vijāṇento. Dosacarito puggalo appaṇihitena vimokkhamukhena niyyāti adhisīlasikkhāya sikkhanto dosaṃ akusalamūlaṃ pajahanto dukkhavedanīyaṃ phassaṃ anupagacchanto dukkhavedanaṃ pariṇānanto dosamalaṃ pavāhento dosarajaṃ niddhunanto dosavisaṃ vamento dosaggiṃ nibbāpento dosasallaṃ uppāṇento dosajaṭṭhaṃ vijāṇento. Mohacarito puggalo suññatavimokkhamukhena niyyāti adhipaññāsikkhāya sikkhanto moham akusalamūlaṃ pajahanto adukkhamasukhavedanīyaṃ phassaṃ anupagacchanto adukkhamasukhaṃ vedanaṃ pariṇānanto mohamalaṃ pavāhento moharajaṃ niddhunanto mohavisaṃ vamento mohaggiṃ nibbāpento mohasallaṃ uppāṇento mohajaṭṭhaṃ vijāṇento.

Tattha suññatavimokkhamukhaṃ paññākkhandho, animittavimokkhamukhaṃ samādhikkhandho, appaṇihitavimokkhamukhaṃ sīlakkhandho. So tīṇi vimokkhamukhāni bhāvayanto tayo khandhe bhāvayati, tayo khandhe bhāvayanto ariyaṃ aṭṭhaṅgikaṃ maggaṃ bhāvayati. Tattha yā ca sammāvācā yo ca sammākammanto yo ca sammāājīvo, ayaṃ sīlakkhandho, yo ca sammāvāyāmo yā ca sammāsati yo ca sammāsamādhi, ayaṃ samādhikkhandho, yā ca sammādiṭṭhi yo ca sammāsankappo, ayaṃ paññākkhandho.

Tattha sīlakkhandho ca samādhikkhandho ca samatho, paññākkhandho vipassanā. Yo samathavipassanaṃ bhāveti, tassa dve bhavaṅgāni bhāvanaṃ gacchanti kāyo cittaṅca, bhavanirodhagāminī paṭipadā dve padāni sīlaṃ samādhi ca. So hoti bhikkhu bhāvitakāyo bhāvitasīlo bhāvitacitto bhāvitapañño. Kāye bhāviyamāne dve dhammā bhāvanaṃ gacchanti sammākammanto sammāvāyāmo ca, sīle bhāviyamāne dve dhammā bhāvanaṃ gacchanti sammāvācā sammāājīvo ca, citte bhāviyamāne dve dhammā bhāvanaṃ gacchanti sammāsati sammāsamādhi ca, paññāya bhāviyamānāya dve dhammā bhāvanaṃ gacchanti sammādiṭṭhi sammāsaṅkappo ca.

Tattha yo ca sammākammanto yo ca sammāvāyāmo siyā kāyiko siyā cetasiko, tattha yo kāyasaṅgaho, so kāye bhāvite bhāvanaṃ gacchati, yo cittasaṅgaho, so citte bhāvite bhāvanaṃ gacchati. So samathavipassanaṃ bhāvayanto pañcavidhaṃ adhigamaṃ gacchati [adhigacchati (sī.)] khippādhigamo ca hoti, vimuttādhigamo ca hoti, mahādhigamo ca hoti, vipulādhigamo ca hoti, anavasesādhigamo ca hoti. Tattha samathena khippādhigamo ca mahādhigamo ca vipulādhigamo ca hoti, vipassanāya vimuttādhigamo ca anavasesādhigamo ca hoti.

56. Tattha yo desayati, so dasabalasamannāgato satthā ovādena sāvake na visaṃvādayati. So tividhaṃ idaṃ karotha iminā upāyena karotha idaṃ vo kurumānānaṃ hitāya sukhāya bhavissati, so tathā ovadito tathānusiṭṭho tathākaronto tathāpaṭipajjanto taṃ bhūmiṃ na pāpuṇissatīti netam ṭhānaṃ vijjati. So tathā ovadito tathānusiṭṭho sīlakkhandhaṃ aparipūrayanto taṃ bhūmiṃ anupāpuṇissatīti netam ṭhānaṃ vijjati. So tathā ovadito tathānusiṭṭho sīlakkhandhaṃ paripūrayanto taṃ bhūmiṃ anupāpuṇissatīti ṭhānametaṃ vijjati.

Sammāsambuddhassa te sato ime dhammā anabhisambuddhāti netam ṭhānaṃ vijjati. Sabbāsavaparikkhīṇassa te sato ime āsavā aparikkhīṇāti netam ṭhānaṃ vijjati. Yassa te atthāya dhammo desito, so na niyyāti takkarassa sammā dukkhakkhayāyāti netam ṭhānaṃ vijjati. Sāvako kho pana te dhammānudhammapaṭipanno sāmīcippaṭipanno anudhammacārī so pubbena aparaṃ uḷāraṃ visesādhigamaṃ na sacchikarissatīti netam ṭhānaṃ vijjati.

Ye kho pana dhammā antarāyikā, te paṭisevato nālaṃ antarāyāyāti netam ṭhānaṃ vijjati. Ye kho pana dhammā aniyyānikā, te niyyanti takkarassa sammā dukkhakkhayāyāti netam ṭhānaṃ vijjati. Ye kho pana dhammā niyyānikā, te niyyanti takkarassa sammā dukkhakkhayāyāti ṭhānametaṃ vijjati. Sāvako kho pana te saupādiseso anupādisesaṃ nibbānadhātuṃ anupāpuṇissatīti netam ṭhānaṃ vijjati.

Diṭṭhisampanno mātaraṃ jīvitā voropeyya hatthehi vā pādehi vā suhataṃ kareyyāti netam ṭhānaṃ vijjati, puthujjano mātaraṃ jīvitā voropeyya hatthehi vā pādehi vā suhataṃ kareyyāti ṭhānametaṃ vijjati. Evaṃ pītaṃ, arahantaṃ, bhikkhuṃ. Diṭṭhisampanno puggalo saṅghaṃ bhindeyya saṅghe vā saṅgharājīṃ janeyyāti netam ṭhānaṃ vijjati, puthujjano saṅghaṃ bhindeyya saṅghe vā saṅgharājīṃ janeyyāti ṭhānametaṃ vijjati, diṭṭhisampanno tathāgatassa duṭṭhacitto lohitaṃ uppādeyya, parinibbutassa vā tathāgatassa duṭṭhacitto thūpaṃ bhindeyyāti netam ṭhānaṃ vijjati. Puthujjano tathāgatassa duṭṭhacitto lohitaṃ uppādeyya, parinibbutassa vā tathāgatassa duṭṭhacitto thūpaṃ bhindeyyāti ṭhānametaṃ vijjati. Diṭṭhisampanno aññaṃ satthāraṃ apadiseyya api jīvitahetūti netam ṭhānaṃ vijjati, puthujjano aññaṃ satthāraṃ apadiseyyāti ṭhānametaṃ vijjati. Diṭṭhisampanno ito bahiddhā aññaṃ dakkhiṇeyyaṃ pariyeseyyāti netam ṭhānaṃ vijjati, puthujjano ito bahiddhā aññaṃ dakkhiṇeyyaṃ pariyeseyyāti ṭhānametaṃ vijjati, diṭṭhisampanno kutūhalamaṅgalena suddhiṃ pacceyyāti netam ṭhānaṃ vijjati. Puthujjano kutūhalamaṅgalena suddhiṃ pacceyyāti ṭhānametaṃ vijjati.

57. Itthī rājā cakkavattī siyāti netam ṭhānaṃ vijjati, puriso rājā cakkavattī siyāti ṭhānametaṃ vijjati; itthī sakko devānamindo siyāti netam ṭhānaṃ vijjati, puriso sakko devānamindo siyāti ṭhānametaṃ vijjati; itthī māro pāpimā siyāti netam ṭhānaṃ vijjati, puriso māro pāpimā siyāti ṭhānametaṃ vijjati; itthī mahābrahmā siyāti netam ṭhānaṃ vijjati, puriso mahābrahmā siyāti ṭhānametaṃ vijjati; itthī tathāgato arahaṃ sammāsambuddho siyāti netam ṭhānaṃ vijjati, puriso tathāgato arahaṃ sammāsambuddho siyāti

ṭhānametaṃ vijjati.

Dve tathāgatā arahanto sammāsambuddhā apubbaṃ acarimaṃ ekissā lokadhātuyā uppajjeyyūṃ vā dhammaṃ vā deseyyunti netāṃ ṭhānaṃ vijjati, ekova tathāgato arahaṃ sammāsambuddho ekissā lokadhātuyā uppajjissati vā dhammaṃ vā desessatīti ṭhānametaṃ vijjati.

Tiṇṇaṃ duccharitānaṃ iṭṭho kanto piyo manāpo vipāko bhavissatīti netāṃ ṭhānaṃ vijjati, tiṇṇaṃ duccharitānaṃ aniṭṭho akanto appiyo amanāpo vipāko bhavissatīti ṭhānametaṃ vijjati. Tiṇṇaṃ succharitānaṃ aniṭṭho akanto appiyo amanāpo vipāko bhavissatīti netāṃ ṭhānaṃ vijjati, tiṇṇaṃ succharitānaṃ iṭṭho kanto piyo manāpo vipāko bhavissatīti ṭhānametaṃ vijjati.

Aññataro samaṇo vā brāhmaṇo vā kuhako lapako nemittako kuhanalapananemittakattaṃ pubbaṅgamaṃ katvā pañca nīvaraṇe appahāya cetaso upakkilese paññāya dubbalīkaṇe catūsu satipaṭṭhānesu anupaṭṭhitassati [anupaṭṭhitasati (sī.)] viharanto satta bojjhaṅge abhāvayitvā anuttaraṃ sammāsambodhiṃ abhisambujjhissatīti netāṃ ṭhānaṃ vijjati, aññataro samaṇo vā brāhmaṇo vā sabbadosāpagato pañca nīvaraṇe pahāya cetaso upakkilese paññāya dubbalīkaṇe catūsu satipaṭṭhānesu upaṭṭhitassati viharanto satta bojjhaṅge bhāvayitvā anuttaraṃ sammāsambodhiṃ abhisambujjhissatīti ṭhānametaṃ vijjati. Yaṃ ettha ñāṇaṃ hetuso ṭhānaṃ anodhiso idaṃ vuccati ṭhānāṭṭhānañāṇaṃ paṭhamāṃ tathāgatabalaṃ.

Iti ṭhānāṭṭhānagatā sabbe khayadhammā vayadhammā virāgadhammā nirodhadhammā keci saggūpagā keci apāyūpagā keci nibbānūpagā, evaṃ bhagavā āha –

58. Sabbe sattā [passa saṃ. ni. 1.133] marissanti, maraṇantaṃ hi jīvitam;
Yathākammaṃ gamissanti, puññapāpaphalūpagā;
Nirayaṃ pāpakammantā, puññakammā ca suggaṭṭim;
Apare ca maggaṃ bhāvetvā, parinibbantīnāsavāti [parinibbanti anāsavāti (sī. ka.).]

Sabbe sattāti ariyā ca anariyā ca sakkāyapariyāpannā ca sakkāyavītivattā ca. **Marissanti**ti dvīhi maraṇehi dandhamaraṇena ca adandhamaraṇena ca, sakkāyapariyāpannānaṃ adandhamaraṇaṃ sakkāyavītivattānaṃ dandhamaraṇaṃ. **Maraṇantaṃ hi jīvanti** khayā āyussa indriyānaṃ uparodhā jīvitapariyanto maraṇapariyanto. **Yathākammaṃ gamissanti**ti kammassakatā. **Puññapāpaphalūpagā**ti kammānaṃ phaladassāvitā ca avippavāso ca.

Nirayaṃ pāpakammantāti apuññasaṅkhārā. **Puññakammā ca suggaṭṭim**ti puññasaṅkhārā suggaṭṭim gamissanti. **Apare ca maggaṃ bhāvetvā, parinibbantīnāsavā**ti sabbasaṅkhārānaṃ samatikkamaṇaṃ. Tenāha bhagavā – “sabbe...pe... nāsavā”ti.

“Sabbe sattā marissanti, maraṇantaṃ hi jīvitam. Yathākammaṃ gamissanti, puññapāpaphalūpagā. Nirayaṃ pāpakammantā”ti āgāḷhā ca nijjhāma ca paṭipadā. “Apare ca maggaṃ bhāvetvā, parinibbantīnāsavā”ti majjhimā paṭipadā. “Sabbe sattā marissanti, maraṇantaṃ hi jīvitam, yathākammaṃ gamissanti, puññapāpaphalūpagā, nirayaṃ pāpakammantā”ti ayaṃ saṃkilesa. Evaṃ saṃsāraṃ nibbattayati. “Sabbe sattā marissanti...pe... nirayaṃ pāpakammantā”ti ime tayo vaṭṭā dukkhavaṭṭo kammavaṭṭo kilesavaṭṭo. “Apare ca maggaṃ bhāvetvā, parinibbantīnāsavā”ti tiṇṇaṃ vaṭṭānaṃ vivaṭṭanā. “Sabbe sattā marissanti...pe... nirayaṃ pāpakammantā”ti ādīnava, “puññakammā ca suggaṭṭim”ti assādo, “apare ca maggaṃ bhāvetvā, parinibbantīnāsavā”ti nissaraṇaṃ. “Sabbe sattā marissanti...pe... nirayaṃ pāpakammantā”ti hetu ca phalañca, pañcakkhandhā phalaṃ, taṇhā hetu, “apare ca maggaṃ bhāvetvā, parinibbantīnāsavā”ti maggo ca phalañca. “Sabbe sattā marissanti, maraṇantaṃ hi jīvitam. Yathākammaṃ gamissanti, puññapāpaphalūpagā, nirayaṃ pāpakammantā”ti ayaṃ saṃkilesa, so saṃkilesa tividho taṇhāsaṃkilesa diṭṭhisamkilesa duccharitasamkilesoti.

59. Tattha taṇhāsaṃkilesa tīhi taṇhāhi niddisitaḅbo – kāmataṇhāya bhavataṇhāya vibhavataṇhāya. Yena yena vā pana vatthunā ajjhositō, tena teneva niddisitaḅbo, tassā vitthāro chattimsāya taṇhāya jāliniyā vicarītāni. Tattha diṭṭhisāṃkilesō ucchedasassatena niddisitaḅbo, yena yena vā pana vatthunā diṭṭhivasena abhinivisati, “idameva saccaṃ moghamañña”nti tena teneva niddisitaḅbo, tassā vitthāro dvāsaṭṭhi diṭṭhigatāni. Tattha duccharitasāṃkilesō cetanā cetasikakammena niddisitaḅbo, tīhi duccharitehi kāyaduccharitena vacīduccaritena manoduccharitena, tassā vitthāro dasa akusalakammāpathā. Apare ca maggaṃ bhāvetvā, parinibbantināsavāti idaṃ vodānaṃ.

Tayidaṃ vodānaṃ tividhaṃ; taṇhāsaṃkilesō samathena visujjhati, so samatho samādhikkhandho, diṭṭhisāṃkilesō vipassanāya visujjhati, sā vipassanā paññākkhandho, duccharitasāṃkilesō sucaritena visujjhati, taṃ sucaritaṃ sīlakkhandho.

“Sabbe sattā marissanti, maraṇantaṃ hi jīvitaṃ, yathākammaṃ gamissanti, puññapāpaphalūpagā, nirayaṃ pāpakammantā”ti apuññappaṭipadā, “puññakammā ca suggati”nti puññappaṭipadā, “apare ca maggaṃ bhāvetvā, parinibbantināsavā”ti puññapāpasamatikkappaṭipadā, tattha yā ca puññappaṭipadā yā ca apuññappaṭipadā, ayaṃ ekā paṭipadā sabbatthagāminī ekā apāyesu, ekā devesu, yā ca puññapāpasamatikkamā paṭipadā ayaṃ tattha tattha gāminī paṭipadā.

Tayo rāsī – micchattaniyato rāsī, sammattaniyato rāsī, aniyato rāsī, tattha yo ca micchattaniyato rāsī yo ca sammattaniyato rāsī ekā paṭipadā tattha tattha gāminī, tattha yo aniyato rāsī, ayaṃ sabbatthagāminī paṭipadā. Kena kāraṇena? Paccayaṃ labhanto niraye upapajjeyya, paccayaṃ labhanto tiracchānayanōsu upapajjeyya, paccayaṃ labhanto pettivisāyesu upapajjeyya, paccayaṃ labhanto asuresu upapajjeyya, paccayaṃ labhanto devesu upapajjeyya, paccayaṃ labhanto manussesu upapajjeyya, paccayaṃ labhanto parinibbāyeyya, tasmāyaṃ sabbatthagāminī paṭipadā, yaṃ ettha ñāṇaṃ hetuso ṭhānaso anodhiso, idaṃ vuccati sabbatthagāminī paṭipadā ñāṇaṃ dutiyaṃ tathāgatabalaṃ.

Iti sabbatthagāminī paṭipadā anekadhātuloko, tattha tattha gāminī paṭipadā nānādhātuloko. Tattha katamo anekadhātuloko? Cakkhudhātu rūpadhātu cakkhuvīññādhātu, sotadhātu saddadhātu sotaviññādhātu, ghānadhātu gandhadhātu ghānaviññādhātu, jivhādadhātu rasadhātu jivhāvīññādhātu, kāyadhātu phoṭṭhabbhadhātu kāyaviññādhātu, manodhātu dhammadhātu manoviññādhātu, pathavīdhātu, āpodhātu, tejodhātu, vāyodhātu, ākāsadhātu, viññādhātu, kāmādhātu, byāpādadhātu, vihiṃsādhātu, nekkhammadhātu, abyāpādadhātu, avihīṃsādhātu, dukkhadhātu, domanassadhātu, avijjādhātu, sukhadhātu, somanassadhātu, upekkhādadhātu, rūpadhātu, arūpadhātu, nirodhadhātu, saṅkhāradhātu, nibbānadhātu, ayaṃ anekadhātuloko.

Tattha katamo nānādhātuloko? Aññā cakkhudhātu, aññā rūpadhātu, aññā cakkhuvīññādhātu. Evaṃ sabbā. Aññā nibbānadhātu. Yaṃ ettha ñāṇaṃ hetuso ṭhānaso anodhiso, idaṃ vuccati anekadhātu nānādhātu ñāṇaṃ tatiyaṃ tathāgatabalaṃ.

60. Iti anekadhātu nānādhātukassa lokassa yaṃ yadeva dhātuṃ sattā adhimuccanti, taṃ tadeva adhiṭṭhahanti abhinivisanti, keci rūpādhimuttā, keci saddādhimuttā, keci gandhādhimuttā, keci rasādhimuttā, keci phoṭṭhabbādhimuttā, keci dhammādhimuttā, keci itthādhimuttā, keci purisādhimuttā, keci cāgādhimuttā, keci hīnādhimuttā, keci paṇītādhimuttā, keci devādhimuttā, keci manussādhimuttā, keci nibbānādhimuttā. Yaṃ ettha ñāṇaṃ hetuso ṭhānaso anodhiso, ayaṃ veneyyo, ayaṃ na veneyyo, ayaṃ saggagāmī, ayaṃ duggatigāmīti, idaṃ vuccati sattānaṃ nānādhimuttikatā ñāṇaṃ catutthaṃ tathāgatabalaṃ.

Iti te yathādhimuttā ca bhavanti, taṃ taṃ kammaṃ samādānaṃ samādiyanti. Te chabbidhaṃ kammaṃ samādiyanti – keci lobhasena, keci dosavasena, keci mohavasena, keci saddhāvasena, keci vīriyavasena, keci paññāvasena. Taṃ vibhajjamaṇaṃ duvidhaṃ – saṃsāragāmi ca nibbānagāmi ca.

Tattha yaṃ lobhavasena dosavasena mohavasena ca kammaṃ karoti, idaṃ kammaṃ kaṇhaṃ kaṇhavipākaṃ. Tattha yaṃ saddhāvasena kammaṃ karoti, idaṃ kammaṃ sukkaṃ sukkavipākaṃ. Tattha yaṃ lobhavasena dosavasena mohavasena saddhāvasena ca kammaṃ karoti, idaṃ kammaṃ kaṇhasukkaṃ kaṇhasukkavipākaṃ. Tattha yaṃ vīriyavasena paññāvasena ca kammaṃ karoti, idaṃ kammaṃ akaṇhaṃ asukkaṃ akaṇhaasukkavipākaṃ kammuttamaṃ kammasetṭhaṃ kammakkhayāya saṃvattati.

Cattāri kammaṃsamādānāni. Atthi kammaṃsamādānaṃ paccuppannasukhaṃ āyatim dukkhavipākaṃ, atthi kammaṃsamādānaṃ paccuppannadukkhāya āyatim sukhavipākaṃ, atthi kammaṃsamādānaṃ paccuppannadukkhāya āyatim ca dukkhavipākaṃ, atthi kammaṃsamādānaṃ paccuppannasukhaṃ āyatim ca sukhavipākaṃ. Yaṃ evaṃ jātiyaṃ kammaṃsamādānaṃ, iminā puggalena akusalakammaṃsamādānaṃ upacitaṃ avipakkaṃ vipākāya paccupaṭṭhitaṃ na ca bhabbo abhinibbidhā gantunti taṃ bhagavā na ovasati. Yathā devadattaṃ kokālikaṃ sunakkhattaṃ licchaviputtaṃ, ye vā panaññepi sattā micchattaniyatā imesaṃca puggalānaṃ upacitaṃ akusalaṃ na ca tāva pāripūriṃ gataṃ, purā pāripūriṃ gacchati. Purā phalaṃ nibbattayati, purā maggamāvārayati, purā veneyyattaṃ samatikkamatīti te bhagavā asamatte ovasati. Yathā puṇṇaṃca govatikaṃ acelaṃca kukkuravatikaṃ.

61. Imassa ca puggalassa akusalakammaṃsamādānaṃ paripūramānaṃ maggaṃ āvārayissati purā pāripūriṃ gacchati, purā phalaṃ nibbattayati, purā maggamāvārayati, purā veneyyattaṃ samatikkamatīti taṃ bhagavā asamattaṃ ovasati. Yathā āyasmantaṃ aṅgulimālaṃ.

Sabbesaṃ mudumajjhādhimattatā. Tattha mudu āneñjābhisaṅkhārā majjhaṃ avasesakusalasaṅkhārā, adhimattaṃ akusalasaṅkhārā, yaṃ ettha ñāṇaṃ hetuso ṭhānaso anodhiso, idaṃ diṭṭhadhammavedanīyaṃ, idaṃ upapajjavedanīyaṃ, idaṃ aparāpariyavedanīyaṃ, idaṃ nirayavedanīyaṃ, idaṃ tiracchānavedanīyaṃ, idaṃ pettivisayavedanīyaṃ, idaṃ asuravedanīyaṃ, idaṃ devavedanīyaṃ, idaṃ manussavedanīyanti, idaṃ vuccati atītānāgatapaccuppannānaṃ kammaṃsamādānaṃ hetuso ṭhānaso anodhiso vipākavemattatā ñāṇaṃ pañcamāṃ tathāgatabalaṃ.

62. Iti tathā samādinnaṃ kammaṃsamādānaṃ jhānaṃ vimokkhānaṃ samādhīnaṃ samāpattīnaṃ ayaṃ saṃkilesa, idaṃ vodānaṃ, idaṃ vuṭṭhānaṃ, evaṃ saṃkilissati, evaṃ vodāyati, evaṃ vuṭṭhahatīti ñāṇaṃ anāvaraṇaṃ.

Tattha kati jhānāni? Cattāri jhānāni. Kati vimokkhā? Ekādasa ca aṭṭha ca satta ca tayo ca dve ca. Kati samādhī? Tayo samādhī – savitakko savicāro samādhī, avitakko vicāramatto samādhī, avitakko avicāro samādhī. Kati samāpattīyo? Pañca samāpattīyo – saññāsamāpattī asaññāsamāpattī nevasaññāsaññāsamāpattī vibhūtasaññāsamāpattī [vibhūtasamāpattī (sī. ka.)] nirodhasamāpattī.

Tattha katamo saṃkilesa? Paṭhamajjhānassa kāmarāgabyāpādā saṃkilesa. Ye ca kukkuṭajjhāyī dve paṭhamakā yo vā pana koci hānabhāgiyo samādhī, ayaṃ saṃkilesa. Tattha katamaṃ vodānaṃ, nīvaraṇapārisuddhi, paṭhamassa jhānassa ye ca kukkuṭajjhāyī dve pacchimakā yo vā pana koci viśesabhāgiyo samādhī, idaṃ vodānaṃ. Tattha katamaṃ vuṭṭhānaṃ? Yaṃ samāpattīvuṭṭhānakosallaṃ, idaṃ vuṭṭhānaṃ. Yaṃ ettha ñāṇaṃ hetuso ṭhānaso anodhiso, idaṃ vuccati sabbesaṃ jhānavimokkhasamādhīsamāpattīnaṃ saṃkilesavodānavuṭṭhānañāṇaṃ chaṭṭhaṃ tathāgatabalaṃ.

63. Iti tasseva samādhissa tayo dhammā parivārā indriyāni balāni vīriyamiti, tāniyeva indriyāni vīriyavasena balāni bhavanti, ādhipateyyaṭṭhena indriyāni, akampiyatṭhena balāni, iti tesam mudumajjhādhimattatā ayaṃ mudindriyo ayaṃ majjhindriyo ayaṃ tikkhindriyoti. Tattha bhagavā tikkhindriyaṃ saṃkhittena ovādena ovasati, majjhindriyaṃ bhagavā saṃkhittavittārena ovasati, mudindriyaṃ bhagavā vittārena ovasati. Tattha bhagavā tikkhindriyassa mudukaṃ dhammadesanaṃ upadisati, majjhindriyassa bhagavā mudutikkhadhammadesanaṃ upadisati, mudindriyassa bhagavā tikkhaṃ dhammadesanaṃ upadisati. Tattha bhagavā tikkhindriyassa samathaṃ upadisati,

majjhindriyassa bhagavā samathavipassanaṃ upadisati, mudindriyassa bhagavā vipassanaṃ upadisati. Tattha bhagavā tikkhindriyassa nissaraṇaṃ upadisati, majjhindriyassa bhagavā ādīnavañca nissaraṇaṃ upadisati, mudindriyassa bhagavā assādañca ādīnavañca nissaraṇaṃ upadisati. Tattha bhagavā tikkhindriyassa adhipaññāsikkhāya paññāpayati, majjhindriyassa bhagavā adhicittasikkhāya paññāpayati, mudindriyassa bhagavā adhisīlasikkhāya paññāpayati.

Yaṃ ettha ñāṇaṃ hetuso tñānaso anodhiso ayaṃ imaṃ bhūmiṃ bhāvanañca gato, imāya velāya imāya anusāsanīyā evaṃ dhātuko cāyaṃ ayaṃ cassa āsayo ayañca anusayo iti, idaṃ vuccati parasattānaṃ parapuggalānaṃ indriyaparopariyattavemattatā ñāṇaṃ sattamaṃ tathāgatabalaṃ.

Iti tattha yaṃ anekavihitaṃ pubbenivāsaṃ anussarati. Seyyathidaṃ, ekampi jātiṃ dvepi jātiyo tissopi jātiyo catassopi jātiyo pañcapi jātiyo dasapi jātiyo vīsampi jātiyo tiṃsampi jātiyo cattārisampi jātiyo paññāsampi jātiyo jātisatampi jātisahassampi jātisatasahassampi anekānīpi jātisatāni anekānīpi jātisahassāni anekānīpi jātisatasahassāni anekepi saṃvaṭṭakappe anekepi vivaṭṭakappe anekepi saṃvaṭṭavivaṭṭakappe. Amutrāsīṃ evaṃnāmo evaṃgotto evaṃvaṇṇo evamāhāro evaṃsukhadukkhappaṭisaṃvedī evamāyupariyanto, so tato cuto amutra udapādim. Tatrāpāsīṃ evaṃnāmo evaṃgotto evaṃvaṇṇo evamāhāro evaṃsukhadukkhappaṭisaṃvedī evamāyupariyanto, so tato cuto idhūpapannoti, iti sākāraṃ sauddesaṃ anekavihitaṃ pubbenivāsaṃ anussarati.

64. Tattha saggūpagesu ca sattesu manussūpagesu ca sattesu apāyūpagesu ca sattesu imassa puggalassa lobhādayo ussannā alobhādayo mandā, imassa puggalassa alobhādayo ussannā lobhādayo mandā, ye vā pana ussannā ye vā pana mandā imassa puggalassa imāni indriyāni upacitāni imassa puggalassa imāni indriyāni anupacitāni amukāya vā kappakoṭiyāṃ kappasatasahassee vā kappasahassee vā kappasate vā kappe vā antarakappe vā upaḍḍhakappe vā saṃvacchare vā upaḍḍhasaṃvacchare vā māse vā pakkhe vā divase vā muhutte vā iminā pamādena vā pasādena vāti. Taṃ taṃ bhavaṃ bhagavā anussaranto asesam jānāti, tattha yaṃ dibbena cakkhunā visuddhena atikkantamānusakena satte passati cavamāne upapajjamāne hīne paṇīte suvaṇṇe dubbaṇṇe sugate duggate yathākammūpage satte pajānāti ime vata bhonto sattā kāyaduccaritena samannāgatā vacīduccaritena samannāgatā manoduccaritena samannāgatā ariyānaṃ upavādakā micchādīṭṭhikā micchādīṭṭhikammasamādānā, te kāyassa bhedā paraṃ maraṇā apāyaṃ duggatiṃ vinipātaṃ nirayaṃ upapannā.

Ime vā pana bhonto sattā kāyasucaritena samannāgatā vacīsucaritena samannāgatā manosucaritena samannāgatā ariyānaṃ anupavādakā sammādīṭṭhikā sammādīṭṭhikammasamādānā, te kāyassa bhedā paraṃ maraṇā sugatiṃ saggam lokaṃ upapannā, tattha saggūpagesu ca sattesu manussūpagesu ca sattesu apāyūpagesu ca sattesu iminā puggalena evarūpaṃ kammaṃ amukāya kappakoṭiyāṃ upacitaṃ kappasatasahassee vā kappasahassee vā kappasate vā kappe vā antarakappe vā upaḍḍhakappe vā saṃvacchare vā upaḍḍhasaṃvacchare vā māse vā pakkhe vā divase vā muhutte vā iminā pamādena vā pasādena vāti. Imāni bhagavato dve ñāṇāni – pubbenivāsānussatiñāṇaṃ dibbacakkhu ca aṭṭhamaṃ navamaṃ tathāgatabalaṃ.

Iti tattha yaṃ sabbaññutā pattā viditā sabbadhammā virajaṃ vītamaṃ uppannaṃ sabbaññutañāṇaṃ nihato māro bodhimūle, idaṃ bhagavato dasamaṃ balaṃ sabbāsavaparikkhayaṃ ñāṇaṃ. Dasabalasamannāgatā hi buddhā bhagavantoti.

Niyutto vicayo hārasampāto.

3. Yuttihārasampāto

- 65.** Tattha katamo yuttihārasampāto?
 “Tasmā rakkhitaṃcittassa, sammāsaṅkappagocaro;
 Sammādīṭṭhipurekkhāro, ñatvāna udayabbayaṃ;

Thinamiddhābhībhū bhikkhu, sabbā duggatiyo jahe’’ti.

‘‘Tasmā rakkhitacittassa, sammāsaṅkappagocaro’’ti rakkhitacittassa sammāsaṅkappagocaro bhavissatīti yujjati, sammāsaṅkappagocaro sammādiṭṭhi bhavissatīti yujjati, sammādiṭṭhipurekkhāro viharanto udayabbayaṃ paṭivijjhissatīti yujjati, udayabbayaṃ paṭivijjhanto sabbā duggatiyo jahissatīti yujjati. Sabbā duggatiyo jahanto sabbāni duggativinipātabhayāni samatikkamissatīti yujjatīti.

Niyutto yuttihārasampāto.

4. Padaṭṭhānahārasampāto

66. Tattha katamo padaṭṭhāno hārasampāto?

‘‘Tasmā rakkhitacittassa, sammāsaṅkappagocaro’’ti gāthā. ‘‘Tasmā rakkhitacittassā’’ti tiṇṇaṃ sucaritānaṃ padaṭṭhānaṃ. ‘‘Sammāsaṅkappagocaro’’ti samathassa padaṭṭhānaṃ. ‘‘Sammādiṭṭhipurekkhāro’’ti vipassanāya padaṭṭhānaṃ. ‘‘Ñatvāna udayabbaya’’nti dassanabhūmiyā padaṭṭhānaṃ. ‘‘Thinamiddhābhībhū bhikkhū’’ti vīriyassa padaṭṭhānaṃ. ‘‘Sabbā duggatiyo jahe’’ti bhāvanāya padaṭṭhānaṃ.

Niyutto padaṭṭhāno hārasampāto.

5. Lakkhaṇahārasampāto

67. Tattha katamo lakkhaṇo hārasampāto?

‘‘Tasmā rakkhitacittassa, sammāsaṅkappagocaro’’ti gāthā. ‘‘Tasmā rakkhitacittassa, sammāsaṅkappagocaro’’ti idaṃ satindriyaṃ, satindriye gahite gahitāni bhavanti pañcindriyāni. ‘‘Sammādiṭṭhipurekkhāro’’ti sammādiṭṭhiyā gahitāya gahito bhavati ariyo aṭṭhaṅgiko maggo. Taṃ kissa hetu? Sammādiṭṭhito hi sammāsaṅkappo pabhavati, sammāsaṅkappato sammāvācā pabhavati, sammāvācāto sammākammanto pabhavati, sammākammantato sammāājīvo pabhavati, sammāājīvato sammāvāyāmo pabhavati, sammāvāyāmato sammāsati pabhavati, sammāsatīto sammāsamādhi pabhavati, sammāsamādhito sammāvimutti pabhavati, sammāvimuttito sammāvimuttiñāḍassanaṃ pabhavati.

Niyutto lakkhaṇo hārasampāto.

6. Catubyūhahārasampāto

68. Tattha katamo catubyūho hārasampāto.

‘‘Tasmā rakkhitacittassa, sammāsaṅkappagocaro’’ti gāthā. ‘‘Tasmā rakkhitacittassā’’ti rakkhitaṃ paripālīyatīti esā nirutti. Idha bhagavato ko adhippāyo? Ye duggatīhi parimuccitukāmā bhavissanti, te dhammacārino bhavissantīti ayaṃ ettha bhagavato adhippāyo. Kokāliko hi sārīputtamoggallānesu thesū cittaṃ padosayitvā mahāpadumaniraye upapanno. Bhagavā ca satīārakkhena cetasā samannāgato, suttamhi vuttaṃ ‘‘satiyā cittaṃ rakkhitabba’’nti.

Niyutto catubyūho hārasampāto.

7. Āvaṭṭahārasampāto

69. Tattha katamo āvaṭṭo hārasampāto?

“Tasmā rakkhitaṭṭassa, sammāsaṅkappagocaro”ti gāthā. “Tasmā rakkhitaṭṭassa, sammāsaṅkappagocaro”ti samatho [ayam samatho (sī. ka.)]. “Sammādiṭṭhipurekkhāro”ti vipassanā. “Ñatvāna udayabbaya”nti dukkhapariññā. “Thinamiddhābhībhū bhikkhū”ti samudayapahānaṃ. “Sabbā duggatiyo jahe”ti nirodho [ayam nirodho (sī. ka.)]. Imāni cattāri saccāni.

Niyutto āvaṭṭo hārasampāto.

8. Vibhattihārasampāto

70. Tattha katamo vibhattihārasampāto?

“Tasmā rakkhitaṭṭassa, sammāsaṅkappagocaro”ti gāthā. Kusalapakkho kusalapakkhena niddisitaṭṭo. Akusalapakkho akusalapakkhena niddisitaṭṭo.

Niyutto vibhattihārasampāto.

9. Parivattanahārasampāto

71. Tattha katamo parivattano hārasampāto?

“Tasmā rakkhitaṭṭassa, sammāsaṅkappagocaro”ti gāthā. Samathavipassanāya bhāvitāya nirodho phalaṃ, pariññātaṃ dukkhaṃ, samudayo pahīno, maggo bhāvito paṭipakkhena.

Niyutto parivattano hārasampāto.

10. Vevacanaḥārasampāto

72. Tattha katamo vevacano hārasampāto?

“Tasmā rakkhitaṭṭassa, sammāsaṅkappagocaro”ti gāthā. “Tasmā rakkhitaṭṭassā”ti cittaṃ mano viññānaṃ manindriyaṃ manāyatanāṃ vijānaṇā vijānitattaṃ, idaṃ vevacanaṃ. “Sammāsaṅkappagocaro”ti nekkhammasaṅkappo abyāpādasāṅkappo avihimsāsaṅkappo, idaṃ vevacanaṃ. “Sammādiṭṭhipurekkhāro”ti sammādiṭṭhi nāma paññasatthaṃ paññākhaggo paññāratanaṃ paññāpajjoto paññāpatodo paññāpāsādo, idaṃ vevacanaṃ.

Niyutto vevacano hārasampāto.

11. Paññattihārasampāto

73. Tattha katamo paññattihārasampāto?

“Tasmā rakkhitaṭṭassa, sammāsaṅkappagocaro”ti gāthā. “Tasmā rakkhitaṭṭassā”ti padaṭṭhānapaññatti satiyā. “Sammāsaṅkappagocaro”ti bhāvanāpaññatti samathassa. “Sammādiṭṭhipurekkhāro, ñatvāna udayabbaya”nti dassanabhūmiyā nikkhepaññatti. “Thinamiddhābhībhū bhikkhū”ti samudayassa anavasesappahānapaññatti, “sabbā duggatiyo jahe”ti bhāvanāpaññatti maggassa.

Niyutto paññattihārasampāto.

12. Otaṇaḥārasampāto

74. Tattha katamo otaṇo hārasampāto?

“Tasmā rakkhitacittassa, sammāsaṅkappagocarō”’ti gāthā. “Tasmā rakkhitacittassa, sammāsaṅkappagocarō”’. “Sammādiṭṭhipurekkhāro”’ti sammādiṭṭhiyā gahitāya gahitāni bhavanti pañcīndriyāni, ayaṃ indriyehi otaṇā.

Tāniyeva indriyāni vijjā, vijjuppādā avijjānirodho, avijjānirodhā saṅkhāranirodho, saṅkhāranirodhā viññānanirodho, evaṃ sabbaṃ, ayaṃ paṭiccasamuppādena otaṇā.

Tāniyeva pañcīndriyāni tīhi khandhehi saṅgahitāni – sīlakkhandhena samādhikkhandhena paññākkhandhena. Ayaṃ khandhehi otaṇā.

Tāni yeva pañcīndriyāni saṅkhārapariyāpannāni. Ye saṅkhārā anāsavā no ca bhavaṅgā, te saṅkhārā dhammadhātusaṅgahitā, ayaṃ dhātūhi otaṇā.

Sā dhammadhātu dhammāyatanapariyāpannā, yaṃ āyatanam anāsavam no ca bhavaṅgam, ayaṃ āyatanehi otaṇā.

Niyutto otaṇo hārasampāto.

13. Sodhanahārasampāto

75. Tattha katamo sodhano hārasampāto?

“Tasmā rakkhitacittassa, sammāsaṅkappagocarō”’ti gāthā. Yattha ārambho suddho, so pañho visajjito bhavati. Yattha pana ārambho na suddho, na tāva so pañho visajjito bhavati.

Niyutto sodhano hārasampāto.

14. Adhiṭṭhānahārasampāto

76. Tattha katamo adhiṭṭhāno hārasampāto?

Tasmā rakkhitacittassa, sammāsaṅkappagocaroti gāthā. Tasmā rakkhitacittassāti ekattatā. Cittaṃ mano viññāṇam, ayaṃ vemattatā. Sammāsaṅkappagocaroti ekattatā. Nekkhammasaṅkappo abyāpādasāṅkappo avihimsāsaṅkappo ayaṃ vemattatā. Sammādiṭṭhipurekkhāroti ekattatā. Sammādiṭṭhi nāma yaṃ dukkhe ñāṇam dukkhasamudaye ñāṇam dukkhanirodhe ñāṇam dukkhanirodhagāminiyā paṭipadāya ñāṇam magge ñāṇam hetumhi ñāṇam hetusamuppannesu dhammesu ñāṇam paccaye ñāṇam paccayasamuppannesu dhammesu ñāṇam, yaṃ tattha tattha yathābhūtam ñāṇadassanam abhisamayo sampaṭivedho saccāgamanam, ayaṃ vemattatā. Natvāna udayabbayanti ekattatā, udayena avijjāpaccayā saṅkhārā, saṅkhārapaccayā viññāṇam, evaṃ sabbaṃ samudayo bhavati. Vayena avijjānirodhā saṅkhāranirodho, evaṃ sabbaṃ nirodho hoti, ayaṃ vemattatā. Thinamiddhābhībhū bhikkhūti ekattatā, thinam nāma yā cittassa akallatā akammaniyatā, middham nāma yaṃ kāyassa līnattam, ayaṃ vemattatā. Sabbā duggatiyo jaheti ekattatā, devamanusse vā upanidhāya apāyā duggati, nibbānam vā upanidhāya sabbā upapattiyo duggati, ayaṃ vemattatā.

Niyutto adhiṭṭhāno hārasampāto.

15. Parikkhārahārasampāto

77. Tattha katamo parikkhāro hārasampāto?

“Tasmā rakkhitacittassa, sammāsaṅkappagocaro”’ti gāthā. Ayaṃ samathavipassanāya parikkhāro.

Niyutto parikkhāro hārasampāto.

16. Samāropanahārasampāto

78. Tattha katamo samāropano hārasampāto?

“Tasmā rakkhitacittassa, sammāsaṅkappagocaro;
Sammādiṭṭhipurekkhāro, ñatvāna udayabbayaṃ;
Thinamiddhābhībhū bhikkhu, sabbā duggatiyo jahe”’ti.

Tasmā rakkhitacittassāti tiṇṇaṃ sucaritānaṃ padaṭṭhānaṃ, citte rakkhite taṃ rakkhitaṃ bhavati kāyakammaṃ vacīkammaṃ manokammaṃ. Sammādiṭṭhipurekkhāroti sammādiṭṭhiyā bhāvitāya bhāvito bhavati ariyo aṭṭhaṅgiko maggo. Kena kāraṇena? Sammādiṭṭhito hi sammāsaṅkappo pabhavati, sammāsaṅkappato sammāvācā pabhavati, sammāvācāto sammākammanto pabhavati, sammākammantato sammāājīvo pabhavati, sammāājīvato sammāvāyāmo pabhavati, sammāvāyāmato sammāsati pabhavati, sammāsati sammāsamādhi pabhavati, sammāsamādhito sammāvimutti pabhavati, sammāvimuttito sammāvimuttiñāṇadassanaṃ pabhavati. Ayaṃ anupādiseso puggalo anupādisesā ca nibbānadhātu.

Niyutto samāropano hārasampāto.

Tenāha āyasmā mahākaccāyano –

“Soḷasa hārā paṭhamaṃ, disalocanato disā viloketvā;
Saṅkhipiya aṅkusena hi, nayehi tīhi niddise sutta”’nti.

Niyutto hārasampāto.

Nayasamuṭṭhānaṃ

79. Tattha katamaṃ nayasamuṭṭhānaṃ? Pubbā koṭi na paññāyati avijjāyaca bhavataṇhāya ca, tattha avijjānīvaraṇaṃ taṇhāsaṃyojanaṃ. Avijjānīvaraṇā sattā avijjāsaṃyuttā [avijjāya saṃyuttā (sī. ka.)] avijjāpakkhena vicaranti, te vuccanti diṭṭhacaritāti. Taṇhāsaṃyojanā sattā taṇhāsaṃyuttā taṇhāpakkhena vicaranti, te vuccanti taṇhācaritāti. Diṭṭhacaritā ito bahiddhā pabbajitā attakilamathānuyogamanuyuttā viharanti. Taṇhācaritā ito bahiddhā pabbajitā kāmesu kāmasukhallikānuyogamanuyuttā viharanti.

Tattha kiṃkāraṇaṃ yaṃ diṭṭhacaritā ito bahiddhā pabbajitā attakilamathānuyogamanuyuttā viharanti, taṇhācaritā ito bahiddhā pabbajitā kāmesu kāmasukhallikānuyogamanuyuttā viharanti? Ito bahiddhā natthi saccavavattānaṃ, kuto catusaccappakāsanā vā samathavipassanākosallaṃ vā upasamasukhappatti vā! Te upasamasukhassa anabhiññā viparītacetā evamaḥamsu “natthi sukkena sukhaṃ, dukkhena nāma sukhaṃ adhigantabba”’nti. Yo kāme paṭisevati, so lokaṃ vaḍḍhayati, yo lokaṃ vaḍḍhayati, so bahuṃ puññaṃ pasavatīti te evaṃsaññā evaṃdiṭṭhī dukkhena sukhaṃ patthayamānā kāmesu puññaññā attakilamathānuyogamanuyuttā ca viharanti kāmasukhallikānuyogamanuyuttā ca, te tadabhiññā santā rogameva vaḍḍhayanti, gaṇḍameva vaḍḍhayanti, sallameva vaḍḍhayanti, te

rogābhitunnā gaṇḍapaṭipīlitā sallānuviddhā nirayatiracchānayanonipetāsuresu ummujjanimujjāni karontā ugghātanigghātaṃ paccanubhontā rogagaṇḍasallabhesajjaṃ na vindanti. Tattha attakilamathānuyogo kāmasukhallikānuyogo ca saṃkilesa, samathavipassanā vodānaṃ. Attakilamathānuyogo kāmasukhallikānuyogo ca rogo, samathavipassanā roganigghātakabhesajjaṃ. Attakilamathānuyogo kāmasukhallikānuyogo ca gaṇḍo, samathavipassanā gaṇḍanigghātakabhesajjaṃ. Attakilamathānuyogo kāmasukhallikānuyogo ca sallo, samathavipassanā salluddharaṇabhesajjaṃ.

Tattha saṃkilesa dukkhaṃ, tadabhisaṅgo taṇhā samudayo, taṇhānirodho dukkhanirodho, samathavipassanā dukkhanirodhagāminī paṭipadā, imāni cattāri saccāni. Dukkhaṃ pariññeyyaṃ, samudayo pahātabbo, maggo bhāvetabbo, nirodho sacchikātabbo.

80. Tattha diṭṭhacaritā rūpaṃ attato upagacchanti. Vedanaṃ...pe... saññaṃ...pe... saṅkhāre...pe... viññānaṃ attato upagacchanti. Taṇhācaritā rūpavantaṃ attānaṃ upagacchanti. Attani vā rūpaṃ, rūpasmiṃ vā attānaṃ, vedanāvantaṃ...pe... saññāvantaṃ...pe... saṅkhāravantaṃ...pe... viññānavantaṃ attānaṃ upagacchanti, attani vā viññānaṃ, viññānasmim vā attānaṃ, ayaṃ vuccati vīsativatthukā sakkāyadiṭṭhi.

Tassā paṭipakkho lokuttarā sammādiṭṭhi, anvāyikā sammāsaṅkappo sammāvācā sammākammanto sammāājīvo sammāvāyāmo sammāsati sammāsamādhī, ayaṃ ariyo aṭṭhaṅgiko maggo. Te tayo khandhā sīlakkhandho samādhikkhandho paññākkhandho. Sīlakkhandho samādhikkhandho ca samatho, paññākkhandho vipassanā. Tattha sakkāyo dukkhaṃ, sakkāyasamudayo dukkhasamudayo, sakkāyanirodho dukkhanirodho, ariyo aṭṭhaṅgiko maggo dukkhanirodhagāminī paṭipadā, imāni cattāri saccāni. Dukkhaṃ pariññeyyaṃ, samudayo pahātabbo, maggo bhāvetabbo, nirodho sacchikātabbo.

Tattha ye rūpaṃ attato upagacchanti. Vedanaṃ...pe... saññaṃ...pe... saṅkhāre...pe... viññānaṃ attato upagacchanti. Ime vuccanti “ucchedavādino”ti. Ye rūpavantaṃ attānaṃ upagacchanti. Attani vā rūpaṃ, rūpasmiṃ vā attānaṃ. Ye vedanāvantaṃ...pe... ye saññāvantaṃ...pe... ye saṅkhāravantaṃ...pe... ye viññānavantaṃ attānaṃ upagacchanti, attani vā viññānaṃ, viññānasmim vā attānaṃ. Ime vuccanti “sassatavādino”ti, tattha ucchedasassatavādā ubho antā, ayaṃ saṃsārapavatti. Tassa paṭipakkho majjhimā paṭipadā ariyo aṭṭhaṅgiko maggo, ayaṃ saṃsāranivatti. Tattha pavatti dukkhaṃ, tadabhisaṅgo taṇhā samudayo, taṇhānirodho dukkhanirodho, ariyo aṭṭhaṅgiko maggo dukkhanirodhagāminī paṭipadā, imāni cattāri saccāni. Dukkhaṃ pariññeyyaṃ, samudayo pahātabbo, maggo bhāvetabbo, nirodho sacchikātabbo.

Tattha ucchedasassataṃ samāsato vīsativatthukā sakkāyadiṭṭhi, vitthārato dvāsaṭṭhi diṭṭhigatāni, tesam paṭipakkho tecattālīsam bodhipakkhiyā dhammā aṭṭha vimokkhā dasa kasiṇāyatanāni. Dvāsaṭṭhi diṭṭhigatāni mohajālaṃ anādiānidhanappavattaṃ. Tecattālīsam [tetālīsam (sī.)] bodhipakkhiyā dhammā ñāṇavajiraṃ mohajālappadālanam. Tattha moho avijjā, jālaṃ bhavataṇhā, tena vuccati “pubbā koṭi na paññāyati avijjāya ca bhavataṇhāya cā”ti.

81. Tattha diṭṭhacarito asmim sāsane pabbajito sallekhānusantataṃ bhavati sallekhe tibbagāro. Taṇhācarito asmim sāsane pabbajito sikkhānusantataṃ bhavati sikkhāya tibbagāro. Diṭṭhacarito sammattaniyāmaṃ okkamanto dhammānusārī bhavati. Taṇhācarito sammattaniyāmaṃ okkamanto saddhānusārī bhavati, diṭṭhacarito sukhāya paṭipadāya dandhābhiññāya khippābhiññāya ca niyyāti. Taṇhācarito dukkhāya paṭipadāya dandhābhiññāya khippābhiññāya ca niyyāti.

Tattha kiṃkāraṇam, yaṃ taṇhācarito dukkhāya paṭipadāya dandhābhiññāya khippābhiññāya ca niyyāti, tassa hi kāmā apariccattā bhavanti, so kāmehi viveciyamāno dukkhena paṭinissarati dandhañca dhammaṃ ājānāti? Yo paṇāyam diṭṭhacarito ayaṃ āditoyeva kāmehi anattthiko bhavati. So tato viveciyamāno khippaṇca paṭinissarati, khippaṇca dhammaṃ ājānāti. Dukkhāpi paṭipadā duvidhā dandhābhiññā ca khippābhiññā ca. Sukhāpi paṭipadā duvidhā dandhābhiññā ca khippābhiññā ca. Sattāpi

duvidhā mudindriyāpi tikkhindriyāpi. Ye mudindriyā, te dandhañca paṭinissaranti dandhañca dhammaṃ ājananti. Ye tikkhindriyā, te khippañca paṭinissaranti, khippañca dhammaṃ ājananti, imā catasso paṭipadā. Ye hi keci niyyiṃsu vā niyyanti vā niyyissanti vā, te imāhi eva catūhi paṭipadāhi. Evaṃ ariyā catukkamaggaṃ paññāpentī abudhajanasevitāya bālakantāya rattavāsiniyā nandiyā bhavataṇhāya avaṭṭanattamaṃ [avaṭṭanattamaṃ (sī. ka.)]. Ayaṃ vuccati nandiyāvaṭṭassa nayassa bhūmīti, tenāha “taṇhañca avijjampi ca samathenā”ti.

82. Veyyākaraṇesu hi ye kusalākusalāti te duvidhā upaparikkhitabbā – lokavaṭṭānusārī ca lokavivaṭṭānusārī ca. Vaṭṭamaṃ nāma saṃsāro. Vivaṭṭamaṃ nibbānaṃ. Kammakilesā hetu saṃsārassa. Tattha kammaṃ cetanā cetasikañca niddisitabbaṃ. Taṃ kathaṃ daṭṭhabbaṃ? Upacayena sabbehi kilesā catūhi vipallāsehi niddisitabbaṃ. Te kattha daṭṭhabbā? Dasa vatthuke kilesapuñje. Katamāni dasa vatthūni? Cattāro āhārā, cattāro vipallāsā, cattāri upādānāni, cattāro yogā, cattāro ganthā, cattāro āsavā, cattāro oghā, cattāro sallā, catasso viññāṇaṭṭhitiyo cattāri agatigamanāni. Paṭhame āhāre paṭhama vipallāso, dutiye āhāre dutiyo vipallāso, tatiye āhāre tatiyo vipallāso, catutthe āhāre catuttho vipallāso. Paṭhame vipallāse paṭhamamaṃ upādānaṃ. Dutu ye vipallāse dutiyamaṃ upādānaṃ, tatiye vipallāse tatiyamaṃ upādānaṃ, catutthe vipallāse catutthamaṃ upādānaṃ. Paṭhame upādāne paṭhama yogo, dutiye upādāne dutiyo yogo, tatiye upādāne tatiyo yogo, catutthe upādāne catuttho yogo. Paṭhame yoge paṭhama gantho, dutiye yoge dutiyo gantho, tatiye yoge tatiyo gantho, catutthe yoge catuttho gantho, paṭhame ganthe paṭhama āsavo, dutiye ganthe dutiyo āsavo, tatiye ganthe tatiyo āsavo, catutthe ganthe catuttho āsavo. Paṭhame āsave paṭhama ogho, dutiye āsave dutiyo ogho, tatiye āsave tatiyo ogho, catutthe āsave catuttho ogho. Paṭhame oghe paṭhama sallo, dutiye oghe dutiyo sallo, tatiye oghe tatiyo sallo, catutthe oghe catuttho sallo. Paṭhame salle paṭhamā viññāṇaṭṭhiti, dutiye salle dutiyā viññāṇaṭṭhiti, tatiye salle tatiyā viññāṇaṭṭhiti, catutthe salle catutthī [catutthā (sī.)] viññāṇaṭṭhiti, paṭhamāyamaṃ viññāṇaṭṭhitiyamaṃ paṭhamamaṃ agatigamaṃ. Dutiyāyamaṃ viññāṇaṭṭhitiyamaṃ dutiyamaṃ agatigamaṃ. Tatiyāyamaṃ viññāṇaṭṭhitiyamaṃ tatiyamaṃ agatigamaṃ, catutthiyamaṃ [catutthāyamaṃ (sī.)] viññāṇaṭṭhitiyamaṃ catutthamaṃ agatigamaṃ.

83. Tattha yo ca kabalīkāro āhāro phasso āhāro, ime taṇhācaritassa puggalassa upakkilesā. Yo ca manosañcetanāhāro yo ca viññāṇāhāro, ime diṭṭhacaritassa puggalassa upakkilesā. Tattha yo ca “asubhe subha”nti vipallāso, yo ca “dukkhe sukha”nti vipallāso, ime taṇhācaritassa puggalassa upakkilesā. Yo ca “anicce nicca”nti vipallāso, yo ca “anattani attā”ti vipallāso, ime diṭṭhacaritassa puggalassa upakkilesā. Tattha yañca kāmupādānaṃ yañca bhavupādānaṃ, ime taṇhācaritassa puggalassa upakkilesā. Yañca diṭṭhupādānaṃ yañca attavādupādānaṃ, ime diṭṭhacaritassa puggalassa upakkilesā. Tattha yo ca kāmavayo, yo ca bhavavayo, ime taṇhācaritassa puggalassa upakkilesā. Yo ca diṭṭhiyogo, yo ca avijjāyogo, ime diṭṭhacaritassa puggalassa upakkilesā. Tattha yo ca abhijjhākāyagantho, yo ca byāpādo kāyagantho, ime taṇhācaritassa puggalassa upakkilesā. Yo ca parāmāsakāyagantho, yo ca idaṃsaccābhinivesakāyagantho, ime diṭṭhacaritassa puggalassa upakkilesā. Tattha yo ca kāmāsavo, yo ca bhavāsavo, ime taṇhācaritassa puggalassa upakkilesā. Yo ca diṭṭhāsavo, yo ca avijjāsavo, ime diṭṭhacaritassa puggalassa upakkilesā. Tattha yo ca kāmoghho, yo ca bhavoghho, ime taṇhācaritassa puggalassa upakkilesā. Yo ca diṭṭhogho, yo ca avijjogho, ime diṭṭhacaritassa puggalassa upakkilesā. Tattha yo ca rāgasallo, yo ca dosasallo, ime taṇhācaritassa puggalassa upakkilesā. Yo ca mānasallo, yo ca mohasallo, ime diṭṭhacaritassa puggalassa upakkilesā. Tattha yā ca rūpūpagā viññāṇaṭṭhiti, yā ca vedanūpagā viññāṇaṭṭhiti, ime taṇhācaritassa puggalassa upakkilesā. Yā ca saññūpagā viññāṇaṭṭhiti, yā ca saṅkhārūpagā viññāṇaṭṭhiti, ime diṭṭhacaritassa puggalassa upakkilesā. Tattha yañca chandā agatigamaṃ yañca dosā agatigamaṃ, ime taṇhācaritassa puggalassa upakkilesā. Yañca bhayā agatigamaṃ, yañca mohā agatigamaṃ, ime diṭṭhacaritassa puggalassa upakkilesā.

84. Tattha kabalīkāre āhāre “asubhe subha”nti vipallāso, phasse āhāre “dukkhe sukha”nti vipallāso, viññāṇe āhāre “anicce nicca”nti vipallāso, manosañcetanāya āhāre “anattani attā”nti vipallāso. Paṭhame vipallāse ṭhito kāme upādiyati, idaṃ vuccati kāmupādānaṃ; dutiye vipallāse ṭhito anāgataṃ bhavaṃ upādiyati, idaṃ vuccati bhavupādānaṃ; tatiye vipallāse ṭhito saṃsārābhinandinim diṭṭhim upādiyati, idaṃ vuccati diṭṭhupādānaṃ; catutthe vipallāse ṭhito attānaṃ kappiyamaṃ upādiyati,

idaṃ vuccati attavādupādānaṃ.

Kāmupādānena kāmehi saṃyujjati, ayaṃ vuccati kāmayogo; bhavupādānena bhavehi saṃyujjati, ayaṃ vuccati bhavayogo; diṭṭhupādānena pāpikāya diṭṭhiyā saṃyujjati, ayaṃ vuccati diṭṭhiyogo; attavādupādānena avijjāya saṃyujjati, ayaṃ vuccati avijjāyogo.

Paṭhame yoge ṭhito abhijjhāya kāyaṃ ganthati, ayaṃ vuccati abhijjhākāyagantho; dutiye yoge ṭhito byāpādena kāyaṃ ganthati, ayaṃ vuccati byāpādakāyagantho; tatiye yoge ṭhito parāmāsena kāyaṃ ganthati, ayaṃ vuccati parāmāsakāyagantho; catutthe yoge ṭhito idaṃsaccābhinivesena kāyaṃ ganthati, ayaṃ vuccati idaṃsaccābhinivesakāyagantho.

Tassa evaṃganthitā kilesā āsavanti. Kuto ca vuccati āsavantīti? Anusayato vā pariyuṭṭhānato vā. Tattha abhijjhākāyaganthena kāmāsavo, byāpādakāyaganthena bhavāsavo, parāmāsakāyaganthena diṭṭhāsavo, idaṃsaccābhinivesakāyaganthena avijjāsavo.

Tassa ime cattāro āsavā vepullaṃ gatā oghā bhavanti. Iti āsavavepullā oghavepullaṃ. Tattha kāmāsavena kāmogho, bhavāsavena bhavogho, diṭṭhāsavena diṭṭhogho, avijjāsavena avijjogho.

Tassa ime cattāro oghā anusayasahagatā ajjhāsayaṃ anupaviṭṭhā hadayaṃ āhacca tiṭṭhanti, tena vuccanti sallāiti. Tattha kāmoghena rāgasallo, bhavoghena dosasallo, diṭṭhoghena mānasallo, avijjoghena mohasallo.

Tassa imehi catūhi sallehi pariyādinnaṃ [pariyādiṇṇaṃ (ka.)] viññāṇaṃ catūsu dhammesu saṅghahati rūpe vedanāya saññāya saṅkhāresu. Tattha rāgasallena nandūpasecanena viññāṇena rūpūpagā viññāṇaṭṭhiti, dosasallena nandūpasecanena viññāṇena vedanūpagā viññāṇaṭṭhiti, mānasallena nandūpasecanena viññāṇena saññūpagā viññāṇaṭṭhiti, mohasallena nandūpasecanena viññāṇena saṅkhārūpagā viññāṇaṭṭhiti.

Tassa imāhi catūhi viññāṇaṭṭhitīhi upatthaddhaṃ viññāṇaṃ catūhi dhammehi agatiṃ gacchati chandā dosā bhayā mohā. Tattha rāgena chandāgatiṃ gacchati, dosena dosāgatiṃ gacchati, bhayena bhayāgatiṃ gacchati, mohena mohāgatiṃ gacchati. Iti kho taṅca kammaṃ ime ca kilesā, esa hetu saṃsārassa, evaṃ sabbe kilesā catūhi vipallāsehi niddisitabbā.

85. Tattha imā catasso disā kabaḷīkāro āhāro “asubhe subha”nti vipallāso, kāmupādānaṃ, kāmayogo, abhijjhākāyagantho, kāmāsavo, kāmogho, rāgasallo, rūpūpagā viññāṇaṭṭhiti, chandā agatigamananti paṭhamā disā.

Phasso āhāro, “dukkhe sukha”nti vipallāso, bhavupādānaṃ, bhavayogo, byāpādakāyagantho, bhavāsavo, bhavogho, dosasallo, vedanūpagā viññāṇaṭṭhiti, dosā agatigamananti dutiyā disā.

Viññāṇāhāro “anicce nicca”nti vipallāso, diṭṭhupādānaṃ, diṭṭhiyogo parāmāsakāyagantho, diṭṭhāsavo, diṭṭhogho, mānasallo, saññūpagā viññāṇaṭṭhiti, bhayā agatigamananti tatiyā disā.

Manosañcetanāhāro “anattani attā”ti vipallāso, attavādupādānaṃ, avijjāyogo, idaṃsaccābhinivesakāyagantho, avijjāsavo, avijjogho, mohasallo, saṅkhārūpagā viññāṇaṭṭhiti, mohā agatigamananti catutthī disā.

Tattha yo ca kabaḷīkāro āhāro yo ca “asubhe subha”nti vipallāso, kāmupādānaṃ, kāmayogo, abhijjhākāyagantho, kāmāsavo, kāmogho, rāgasallo, rūpūpagā viññāṇaṭṭhiti chandā agatigamananti, imesaṃ dasannaṃ suttānaṃ eko attho, byañjanameva nānaṃ. Ime rāgacaritassa puggalassa upakkilesā.

Tattha yo ca phasso āhāro yo ca “dukkhe sukha”nti vipallāso, bhavupādānaṃ, bhavayogo, byāpādakāyagantho, bhavāsavo, bhavogho, dosasallo, vedanūpagā viññāṇaṭṭhiti, dosā agatigamananti imesaṃ dasannaṃ suttānaṃ eko attho byañjanaṃ nānaṃ, ime dosacaritassa puggalassa upakkilesā.

Tattha yo ca viññāṇāhāro yo ca “anicce nicca”nti vipallāso, diṭṭhupādānaṃ, diṭṭhiyogo, parāmāsakāyagantho, diṭṭhāsavo, diṭṭhogho, mānasallo, saññūpagā viññāṇaṭṭhiti, bhayā agatigamananti imesaṃ dasannaṃ suttānaṃ eko attho, byañjanaṃ nānaṃ. Ime diṭṭhacaritassa mandassa upakkilesā.

Tattha yo ca manosañcetanāhāro yo ca “anattani attā”ti vipallāso, attavādupādānaṃ, avijjāyogo, idaṃsaccābhinivesakāyagantho, avijjāsavo, avijjogho, mohasallo, saṅkhārūpagā viññāṇaṭṭhiti, mohā agatigamananti, imesaṃ dasannaṃ suttānaṃ eko attho, byañjanaṃ nānaṃ. Ime diṭṭhacaritassa udattassa [udatthassa (sī. ka.)] upakkilesā.

Tattha yo ca kabaḷikāro āhāro yo ca phasso āhāro, ime appaṇihitena vimokkhamukhena pariññaṃ gacchanti, viññāṇāhāro suññatāya, manosañcetanāhāro animittena, tattha yo ca “asubhe subha”nti vipallāso, yo ca “dukkhe sukha”nti vipallāso, ime appaṇihitena vimokkhamukhena pahānaṃ abbatthaṃ gacchanti. “Anicce nicca”nti vipallāso suññatāya, “anattani attā”ti vipallāso animittena. Tattha kāmupādānaṃca bhavupādānaṃca appaṇihitena vimokkhamukhena pahānaṃ gacchanti. Diṭṭhupādānaṃ suññatāya, attavādupādānaṃ animittena. Tattha kāmāyogo ca bhavayogo ca appaṇihitena vimokkhamukhena pahānaṃ gacchanti, diṭṭhiyogo suññatāya, avijjāyogo animittena. Tattha abhijjhākāyagantho ca byāpādakāyagantho ca appaṇihitena vimokkhamukhena pahānaṃ gacchanti, parāmāsakāyagantho suññatāya, idaṃsaccābhinivesakāyagantho animittena.

Tattha kāmāsavo ca bhavāsavo ca appaṇihitena vimokkhamukhena pahānaṃ gacchanti, diṭṭhāsavo suññatāya, avijjāsavo animittena. Tattha kāmogho ca bhavogho ca appaṇihitena vimokkhamukhena pahānaṃ gacchanti, diṭṭhogho suññatāya, avijjogho animittena. Tattha rāgasallo ca dosasallo ca appaṇihitena vimokkhamukhena pahānaṃ gacchanti, mānasallo suññatāya, mohasallo animittena. Tattha rūpūpagā ca viññāṇaṭṭhiti vedanūpagā ca viññāṇaṭṭhiti appaṇihitena vimokkhamukhena pariññaṃ gacchanti, saññūpagā suññatāya, saṅkhārūpagā animittena.

Tattha chandā ca agatigamaṃ dosā ca agatigamaṃ appaṇihitena vimokkhamukhena pahānaṃ gacchanti, bhayā agatigamaṃ suññatāya, mohā agatigamaṃ animittena vimokkhamukhena pahānaṃ gacchanti. Iti sabbe lokavaṭṭānusārino dhammā niyyanti. Te lokā tīhi vimokkhamukhehi.

86. Tatridaṃ niyyānaṃ –

Catasso paṭipadā, cattāro satipaṭṭhānā, cattāri jhānāni, cattāro vihārā, cattāro sammappadhānā, cattāro acchariyā abbhutā dhammā, cattāri adhiṭṭhānāni, catasso samādhībhāvanā, cattāro sukhabhāgiyā dhammā, catasso appamāṇā.

Paṭhamā paṭipadā paṭhamam satipaṭṭhānaṃ, dutiyā paṭipadā dutiyam satipaṭṭhānaṃ, tatiyā paṭipadā tatiyam satipaṭṭhānaṃ, catutthī paṭipadā catuttham satipaṭṭhānaṃ. Paṭhamam satipaṭṭhānaṃ paṭhamam jhānaṃ, dutiyam satipaṭṭhānaṃ dutiyam jhānaṃ, tatiyam satipaṭṭhānaṃ tatiyam jhānaṃ. Catuttham satipaṭṭhānaṃ catuttham jhānaṃ. Paṭhamam jhānaṃ paṭhamo vihāro, dutiyam jhānaṃ dutiyo vihāro, tatiyam jhānaṃ tatiyo vihāro, catuttham jhānaṃ catuttho vihāro. Paṭhamo vihāro paṭhamam sammappadhānaṃ, dutiyo vihāro dutiyam sammappadhānaṃ, tatiyo vihāro tatiyam sammappadhānaṃ, catuttho vihāro catuttham sammappadhānaṃ. Paṭhamam sammappadhānaṃ paṭhamo acchariyō abbhuto dhammo, dutiyam dutiyo, tatiyam tatiyo, catuttham sammappadhānaṃ catuttho acchariyō abbhuto dhammo. Paṭhamo acchariyō abbhuto dhammo paṭhamam adhiṭṭhānaṃ, dutiyo acchariyō abbhuto dhammo dutiyam adhiṭṭhānaṃ, tatiyo acchariyō abbhuto dhammo tatiyam adhiṭṭhānaṃ, catuttho acchariyō abbhuto dhammo catuttham adhiṭṭhānaṃ. Paṭhamam adhiṭṭhānaṃ paṭhamā samādhībhāvanā,

dutiyam adhiṭṭhānam dutiyā samādhībhāvanā, tatiyam adhiṭṭhānam tatiyā samādhībhāvanā, catuttham adhiṭṭhānam catutthī samādhībhāvanā. Paṭhamā samādhībhāvanā paṭhamo sukhabhāgiyo dhammo, dutiyā samādhībhāvanā dutiyo sukhabhāgiyo dhammo, tatiyā samādhībhāvanā tatiyo sukhabhāgiyo dhammo, catutthī samādhībhāvanā catuttho sukhabhāgiyo dhammo. Paṭhamo sukhabhāgiyo dhammo paṭhamam appamāṇam, dutiyo sukhabhāgiyo dhammo dutiyam appamāṇam, tatiyo sukhabhāgiyo dhammo tatiyam appamāṇam, catuttho sukhabhāgiyo dhammo catuttham appamāṇam. Paṭhamā paṭipadā bhāvitā bahulīkatā [bahulīkatā (ka.)] paṭhamam satipaṭṭhānam paripūreti, dutiyā paṭipadā bhāvitā bahulīkatā dutiyam satipaṭṭhānam paripūreti, tatiyā paṭipadā bhāvitā bahulīkatā tatiyam satipaṭṭhānam paripūreti, catutthī paṭipadā bhāvitā bahulīkatā catuttham satipaṭṭhānam paripūreti. Paṭhamo satipaṭṭhāno bhāvito bahulīkato paṭhamam jhānam paripūreti, dutiyo satipaṭṭhāno bhāvito bahulīkato dutiyam jhānam paripūreti, tatiyo satipaṭṭhāno bhāvito bahulīkato tatiyam jhānam paripūreti, catuttho satipaṭṭhāno bhāvito bahulīkato catuttham jhānam paripūreti.

Paṭhamam jhānam bhāvitam bahulīkatam paṭhamam vihāram paripūreti, dutiyam jhānam bhāvitam bahulīkatam dutiyam vihāram paripūreti, tatiyam jhānam bhāvitam bahulīkatam tatiyam vihāram paripūreti, catuttham jhānam bhāvitam bahulīkatam catuttham vihāram paripūreti. Paṭhamo vihāro bhāvito bahulīkato anuppanānam pāpakānam akusalānam dhammānam anuppādam paripūreti, dutiyo vihāro bhāvito bahulīkato uppanānam pāpakānam akusalānam dhammānam pahānam paripūreti, tatiyo vihāro bhāvito bahulīkato anuppanānam kusalānam dhammānam uppādam paripūreti, catuttho vihāro bhāvito bahulīkato uppanānam kusalānam dhammānam ṭhitim asammosaṃ bhiyyobhāvam paripūreti. Paṭhamam sammappadhānam bhāvitam bahulīkatam mānappahānam paripūreti, dutiyam sammappadhānam bhāvitam bahulīkatam ālayasamugghātam paripūreti, tatiyam sammappadhānam bhāvitam bahulīkatam avijjāpahānam paripūreti, catuttham sammappadhānam bhāvitam bahulīkatam bhavūpasamaṃ paripūreti. Mānappahānam bhāvitam bahulīkatam saccādhīṭṭhānam paripūreti, ālayasamugghāto bhāvito bahulīkato cāgādhīṭṭhānam paripūreti, avijjāpahānam bhāvitam bahulīkatam paññādhīṭṭhānam paripūreti, bhavūpasamo bhāvito bahulīkato upasamādhīṭṭhānam paripūreti. Saccādhīṭṭhānam bhāvitam bahulīkatam chandasamādhiṃ paripūreti, cāgādhīṭṭhānam bhāvitam bahulīkatam vīriyasamādhiṃ paripūreti, paññādhīṭṭhānam bhāvitam bahulīkatam cittasamādhiṃ paripūreti, upasamādhīṭṭhānam bhāvitam bahulīkatam vīmaṃsāsamādhiṃ paripūreti. Chandasamādhi bhāvito bahulīkato indriyaṣaṃvaraṃ paripūreti, vīriyasamādhi bhāvito bahulīkato tapaṃ paripūreti, cittasamādhi bhāvito bahulīkato buddhiṃ paripūreti, vīmaṃsāsamādhi bhāvito bahulīkato sabbūpadhipaṭinissaggaṃ paripūreti. Indriyaṣaṃvaro bhāvito bahulīkato mettaṃ paripūreti, tapo bhāvito bahulīkato karuṇaṃ paripūreti, buddhi bhāvitā bahulīkatā muditaṃ paripūreti, sabbūpadhipaṭinissaggo bhāvito bahulīkato upekkhāṃ paripūreti.

87. Tattha imā catasso disā paṭhamā paṭipadā paṭhamo satipaṭṭhāno paṭhamam jhānam paṭhamo vihāro paṭhamo sammappadhāno paṭhamo acchariyo abbhuto dhammo saccādhīṭṭhānam chandasamādhi indriyaṣaṃvaro mettā iti paṭhamā disā.

Dutiyā paṭipadā dutiyo satipaṭṭhāno dutiyo vihāro dutiyo sammappadhāno dutiyo acchariyo abbhuto dhammo bhavādhīṭṭhānam vīriyasamādhi tapo karuṇā iti dutiyā disā.

Tatiyā paṭipadā tatiyo satipaṭṭhāno tatiyam jhānam tatiyo vihāro tatiyo sammappadhāno tatiyo acchariyo abbhuto dhammo paññādhīṭṭhānam cittasamādhi buddhi muditā iti tatiyā disā.

Catutthī paṭipadā catuttho satipaṭṭhāno catuttham jhānam catuttho vihāro catuttho sammappadhāno catuttho acchariyo abbhuto dhammo upasamādhīṭṭhānam vīmaṃsāsamādhi sabbūpadhipaṭinissaggo upekkhā iti catutthī disā.

Tattha paṭhamā paṭipadā paṭhamo satipaṭṭhāno paṭhamam jhānam paṭhamo vihāro paṭhamo sammappadhāno paṭhamo acchariyo abbhuto dhammo saccādhīṭṭhānam chandasamādhi indriyaṣaṃvaro,

mettā iti imesaṃ dasannaṃ suttānaṃ eko attho, byañjanaṃ eva nānaṃ. Idaṃ rāgacaritassa puggalassa bhesajjaṃ.

Dutiyaṃ paṭipadā dutiyo satipaṭṭhāno dutiyaṃ jhānaṃ dutiyo vihāro dutiyo sammappadhāno dutiyo acchariyo abbhuto dhammo cāgādhiṭṭhānaṃ vīriyasamādhi tapo karuṇā iti imesaṃ dasannaṃ suttānaṃ eko attho, byañjanaṃ eva nānaṃ. Idaṃ dosacaritassa puggalassa bhesajjaṃ.

Tatiyaṃ paṭipadā tatiyo satipaṭṭhāno tatiyaṃ jhānaṃ tatiyo vihāro tatiyo sammappadhāno tatiyo acchariyo abbhuto dhammo paññādhiṭṭhānaṃ cittasamādhi buddhi muditā iti imesaṃ dasannaṃ suttānaṃ eko attho, byañjanaṃ eva nānaṃ. Idaṃ diṭṭhacaritassa mandassa bhesajjaṃ.

Catutthī paṭipadā catuttho satipaṭṭhāno catutthaṃ jhānaṃ catuttho vihāro catuttho sammappadhāno catuttho acchariyo abbhuto dhammo upasamādhiṭṭhānaṃ vīmaṃsāsamādhi sabbūpadhipaṭinissaggo upekkhā iti imesaṃ dasannaṃ suttānaṃ eko attho, byañjanaṃ eva nānaṃ. Idaṃ diṭṭhacaritassa udattassa bhesajjaṃ.

Tattha dukkhā ca paṭipadā dandhābhiññā dukkhā ca paṭipadā khippābhiññā appaṇihitaṃ vimokkhamukhaṃ, sukhā paṭipadā dandhābhiññā suññataṃ vimokkhamukhaṃ, sukhā paṭipadā khippābhiññā animittaṃ vimokkhamukhaṃ.

Tattha kāye kāyānupassitā satipaṭṭhānaṃ vedanāsu vedanānupassitā satipaṭṭhānaṃ appaṇihitaṃ vimokkhamukhaṃ, citte cittānupassitā suññataṃ vimokkhamukhaṃ. Dhammesu dhammānupassitā animittaṃ vimokkhamukhaṃ.

Tattha paṭhamaṃ jhānaṃ dutiyaṃ jhānaṃ appaṇihitaṃ vimokkhamukhaṃ, tatiyaṃ jhānaṃ suññataṃ vimokkhamukhaṃ, catutthaṃ jhānaṃ animittaṃ vimokkhamukhaṃ.

Tattha paṭhamo ca vihāro dutiyo ca vihāro appaṇihitaṃ vimokkhamukhaṃ, tatiyo vihāro suññataṃ vimokkhamukhaṃ, catuttho vihāro animittaṃ vimokkhamukhaṃ.

Yattha paṭhamaṃ sammappadhānaṃ dutiyaṃ sammappadhānaṃ appaṇihitaṃ vimokkhamukhaṃ, tatiyaṃ sammappadhānaṃ suññataṃ vimokkhamukhaṃ, catutthaṃ sammappadhānaṃ animittaṃ vimokkhamukhaṃ.

Tattha mānappahānaṃ ālayasamugghāto ca appaṇihitaṃ vimokkhamukhaṃ, avijjāpahānaṃ suññataṃ vimokkhamukhaṃ, bhavūpasamo animittaṃ vimokkhamukhaṃ.

Tattha saccādhiṭṭhānaṃ cāgādhiṭṭhānaṃ appaṇihitaṃ vimokkhamukhaṃ, paññādhiṭṭhānaṃ suññataṃ vimokkhamukhaṃ, upasamādhiṭṭhānaṃ animittaṃ vimokkhamukhaṃ.

Tattha chandasamādhi ca vīriyasamādhi ca appaṇihitaṃ vimokkhamukhaṃ, cittasamādhi suññataṃ vimokkhamukhaṃ, vīmaṃsāsamādhi animittaṃ vimokkhamukhaṃ.

Tattha indriyaṃ varo ca tapo ca appaṇihitaṃ vimokkhamukhaṃ, buddhi suññataṃ vimokkhamukhaṃ sabbūpadhipaṭinissaggo animittaṃ vimokkhamukhaṃ.

Tattha mettā ca karuṇā ca appaṇihitaṃ vimokkhamukhaṃ, muditā suññataṃ vimokkhamukhaṃ upekkhā animittaṃ vimokkhamukhaṃ.

Tesaṃ vikkīlitaṃ. Cattāro āhārā tesaṃ paṭipakkho catasso paṭipadā...pe... cattāro vipallāsā tesaṃ paṭipakkho cattāro satipaṭṭhānā. Cattāri upādānāni tesaṃ paṭipakkho cattāri jhānāni. Cattāro yogā tesaṃ

paṭipakkho cattāro vihārā. Cattāro ganthā tesam paṭipakkho cattāro sammappadhānā. Cattāro āsavā tesam paṭipakkho cattāro acchariyā abbhutā dhammā. Cattāro oghā tesam paṭipakkho cattāri adhiṭṭhānāni. Cattāro sallā tesam paṭipakkho catasso samādhībhāvanā. Catasso viññāṇaṭṭhitiyo tāsam paṭipakkho cattāro sukhabhāgiyā dhammā. Cattāri agatigamanāni tesam paṭipakkho catasso appamāṇā.

Sīhā buddhā paccekabuddhā sāvaka ca hatarāgadosamohā, tesam vikkīlitaṃ bhāvanā sacchikiriyā byantikiriya ca. Vikkīlitaṃ indriyādhiṭṭhānaṃ vikkīlitaṃ vipariyāsānadhiṭṭhānañca. Indriyāni saddhammagocarō vipariyāsā kilesagocarō. Ayaṃ vuccati sīhavikkīlitaṃ ca nayassa disālocanassa ca nayassa bhūmīti. Tenāha “yo neti vipallāsehi saṃkilese”ti. Veyyākaraṇesu hi ye “kusalākusalā”ti ca.

Tattha ye dukkhāya paṭipadāya dandhābhiññāya khippābhiññāya ca niyyanti, ime dve puggalā; ye sukhāya paṭipadāya dandhābhiññāya khippābhiññāya ca niyyanti, ime dve puggalā. Tesam catunnaṃ puggalānaṃ ayaṃ saṃkilesō, cattāro āhārā, cattāro vipallāsā, cattāri upādānāni, cattāro yogā, cattāro ganthā, cattāro āsavā, cattāro oghā, cattāro sallā, catasso viññāṇaṭṭhitiyo, cattāri agatigamanānīti. Tesam catunnaṃ puggalānaṃ idaṃ vodānaṃ, catasso paṭipadā, cattāro satipaṭṭhānā, cattāri jhānāni, cattāro vihārā, cattāro sammappadhānā, cattāro acchariyā abbhutā dhammā, cattāri adhiṭṭhānāni, catasso samādhībhāvanā, cattāro sukhabhāgiyā dhammā, catasso appamāṇā iti.

88. Tattha ye dukkhāya paṭipadāya dandhābhiññāya khippābhiññāya ca niyyanti ime dve puggalā. Ye sukhāya paṭipadāya dandhābhiññāya khippābhiññāya ca niyyanti, ime dve puggalā. Tattha yo sukhāya paṭipadāya khippābhiññāya niyyāti, ayaṃ ugghaṭitaññū. Yo sādharmaṇāya, ayaṃ vipaṇcitaññū. Yo dukkhāya paṭipadāya dandhābhiññāya niyyāti, ayaṃ neyyo.

Tattha bhagavā ugghaṭitaññussa puggalassa samathaṃ upadisati, neyyassa vipassanaṃ, samathavipassanaṃ vipaṇcitaññussa. Tattha bhagavā ugghaṭitaññussa puggalassa mudukaṃ dhammadesanaṃ upadisati, tikkhaṃ neyyassa, mudutikkhaṃ vipaṇcitaññussa, tattha bhagavā ugghaṭitaññussa puggalassa saṃkhittena dhammaṃ desayati, saṃkhittavitthārena vipaṇcitaññussa, vitthārena neyyassa. Tattha bhagavā ugghaṭitaññussa puggalassa nissaraṇaṃ upadisati, vipaṇcitaññussa ādīnavañca nissaraṇaṇca upadisati, neyyassa assādañca ādīnavañca nissaraṇaṇca upadisati. Tattha bhagavā ugghaṭitaññussa adhipaññāsikkhaṃ paññāpayati, adhicittaṃ vipaṇcitaññussa, adhisīlaṃ neyyassa.

Tattha ye dukkhāya paṭipadāya dandhābhiññāya khippābhiññāya ca niyyanti, ime dve puggalā. Ye sukhāya paṭipadāya dandhābhiññāya khippābhiññāya ca niyyanti. Ime dve puggalā. Iti kho cattāri hutvā tīṇi bhavanti ugghaṭitaññū vipaṇcitaññū neyyoti.

Tesam tiṇṇaṃ puggalānaṃ ayaṃ saṃkilesō, tīṇi akusalamūlāni lobho akusalamūlaṃ doṣo akusalamūlaṃ moho akusalamūlaṃ, tīṇi duccharitāni – kāyaduccharitaṃ vacīduduccharitaṃ manoduccharitaṃ; tayo akusalavitakkā – kāmavitakko byāpādavitaṃ vihiṃsāvitaṃ; tisso akusalasaññā – kāmasaññā byāpādasaññā vihiṃsāsāññā; tisso viparītasāññā – niccasaññā sukhasaññā attasaññā; tisso vedanā – sukhā vedanā dukkhā vedanā adukkhamasukhā vedanā; tisso dukkhatā – dukkhadukkhatā saṅkhāradukkhatā vipariṇāmadukkhatā; tayo aggī – rāgaggi dosaggi mohaggi; tayo sallā – rāgasallo dosasallo mohasallo; tisso jaṭā – rāgajaṭā dosajaṭā mohajaṭā; tisso akusalūpaparikkhā – akusalaṃ kāyakammaṃ akusalaṃ vacīkammaṃ akusalaṃ manokammaṃ. Tisso vipattiyo – sīlavipatti diṭṭhivipatti ācāravipattīti. Tesam tiṇṇaṃ puggalānaṃ idaṃ vodānaṃ. Tīṇi kusalamūlāni – alobho kusalamūlaṃ adoso kusalamūlaṃ amoho kusalamūlaṃ. Tīṇi sucaritāni – kāyasucaritaṃ vacīsucaritaṃ manosucaritaṃ. Tayo kusalavitakkā – nekkhamavitakko abyāpādavitaṃ vihiṃsāvitaṃ. Tayo samādhi – savitakko savicāro samādhi avitakko vicāramatto samādhi avitakko avicāro samādhi. Tisso kusalasaññā – nekkhammasaññā abyāpādasāññā vihiṃsāsāññā. Tisso aviparītasāññā – aniccasaññā dukkhasaññā anattasaññā. Tisso kusalūpaparikkhā – kusalaṃ kāyakammaṃ kusalaṃ vacīkammaṃ kusalaṃ manokammaṃ. Tīṇi soceyyāni – kāyasoceyyaṃ vacīsoceyyaṃ manosocceyyaṃ; tisso sampattiyo –

sīlasampatti samādhisampatti paññāsampatti. Tisso sikkhā – adhisīlasikkhā adhicittasikkhā adhipaññāsikkhā; tayo khandhā – sīlakkhandho samādhikkhandho paññākkhandho. Tīṇi vimokkhamukhāni – suññataṃ animittaṃ appaṇihitanti.

Iti kho cattāri hutvā tīṇi bhavanti, tīṇi hutvā dve bhavanti taṇhācarito ca diṭṭhacarito ca.

Tesaṃ dvinnaṃ puggalānaṃ ayaṃ saṃkilesa, taṇhā ca avijjā ca ahirikaṇca anottappaṇca assati ca asampajaññaṇca ayoniso manasikāro ca kosajjaṇca dovacassaṇca ahaṃkāro ca mamaṃkāro ca assaddhā ca pamādo ca asaddhammassavanaṇca asaṃvaro ca abhijjhā ca byāpādo ca nīvaraṇaṇca saṃyojanaṇca kodho ca upanāho ca makkho ca palāso ca issā ca maccheraṇca māyā ca sāṭṭheyyaṇca sassatadiṭṭhi ca ucchedadiṭṭhicāti.

Tesaṃ dvinnaṃ puggalānaṃ idaṃ vodānaṃ, samatho ca vipassanā ca hirī ca ottappaṇca sati ca sampajaññaṇca yoniso manasikāro ca vīriyārambho ca sovacassaṇca dhamme ñāṇaṇca anvaye ñāṇaṇca khaye ñāṇaṇca anuppāde ñāṇaṇca saddhā ca appamādo ca saddhammassavanaṇca saṃvaro ca anabhijjhā ca abyāpādo ca rāgavirāgā ca cetovimutti avijjāvirāgā ca paññāvimutti abhisamayo ca appicchatā ca santuṭṭhi ca akkodho ca anupanāho ca amakkho ca apaḷāso ca issāpahānaṇca macchariyappaṇaṇca vijjā ca vimutti ca saṅkhatārammaṇo ca vimokkho asaṅkhatārammaṇo ca vimokkho saupādisesā ca nibbānadhātu anupādisesā ca nibbānadhātūti.

Ayaṃ vuccati tipukkhalassa ca nayassa aṅkusassa ca nayassa bhūmīti. Tenāha “yo akusale samūlehi netī”ti “oloketvā disalocanena”ti ca.

Niyuttaṃ nayasamuṭṭhānaṃ.

Sāsanapaṭṭhānaṃ

89. Tattha aṭṭhārasa mūlapadā kuhiṃ daṭṭhabbā? Sāsanapaṭṭhāne. Tattha katamaṃ sāsanapaṭṭhānaṃ? Saṃkilesabhāgiyaṃ suttaṃ, vāsanābhāgiyaṃ suttaṃ, nibbedhabhāgiyaṃ suttaṃ, asekkhabhāgiyaṃ suttaṃ, saṃkilesabhāgiyaṇca vāsanābhāgiyaṇca suttaṃ, saṃkilesabhāgiyaṇca nibbedhabhāgiyaṇca suttaṃ, saṃkilesabhāgiyaṇca asekkhabhāgiyaṇca suttaṃ, saṃkilesabhāgiyaṇca nibbedhabhāgiyaṇca asekkhabhāgiyaṇca suttaṃ, saṃkilesabhāgiyaṇca vāsanābhāgiyaṇca nibbedhabhāgiyaṇca suttaṃ, vāsanābhāgiyaṇca nibbedhabhāgiyaṇca suttaṃ, taṇhāsaṃkilesabhāgiyaṃ suttaṃ, diṭṭhisāṃkilesabhāgiyaṃ suttaṃ, duccharitasāṃkilesabhāgiyaṃ suttaṃ, taṇhāvodānabhāgiyaṃ suttaṃ, diṭṭhivodānabhāgiyaṃ suttaṃ, duccharitavodānabhāgiyaṃ suttaṃ.

Tattha saṃkilesa tividho – taṇhāsaṃkilesa diṭṭhisāṃkilesa duccharitasāṃkilesa. Tattha taṇhāsaṃkilesa samathena visujjhati, so samatho samādhikkhandho. Diṭṭhisāṃkilesa vipassanāya visujjhati, sā vipassanā paññākkhandho. Duccharitasāṃkilesa sucaritena visujjhati, taṃ sucariṭaṃ sīlakkhandho. Tassa sīle patiṭṭhitassa yadi āsatti uppajjati bhavesu, evaṃ sāyaṃ samathavipassanā bhāvanāmayam puññakriyavatthu bhavati tatrūpapattiyā saṃvattati. Imāni cattāri suttāni, sādharmaṇāni katāni aṭṭha bhavanti, tāniyeva aṭṭha suttāni sādharmaṇāni katāni soḷasa bhavanti.

Imehi soḷasahi suttehi bhinnehi navavidhaṃ suttaṃ bhinnaṃ bhavati. Gāthāya gāthā anuminitabbā, veyyākaraṇena veyyākaraṇaṃ anuminitabbam. Suttana suttaṃ anuminitabbam.

90. Tattha katamaṃ saṃkilesabhāgiyaṃ suttaṃ?

“Kāmandhā jālasañchannā, taṇhāchadanachādītā;
Pamattabandhanā [pamattabandhunā (udā. 74)] baddhā, macchāva kumināmukhe;

Jarāmarañamanventi, vaccho khīrapakova [[khīrūpakova \(ka.\) passa udā. 64](#)] mātara’’nti.

Idaṃ saṃkilesabhāgiyaṃ suttaṃ.

Cattārimāni, bhikkhave, agatigamanāni. Katamāni cattāri? Chandāgatim [[chandā agatim \(sī. ka.\) passa a. ni. 4.17](#)] gacchati, dosāgatim gacchati, mohāgatim gacchati, bhayāgatim gacchati. Imāni kho, bhikkhave, cattāri agatigamanāni. Idamavoca bhagavā, idaṃ vatvāna sugato, athāparaṃ etadavoca satthā

“Chandā dosā bhayā mohā, yo dhammaṃ ativattati;
Nihīyati tassa yaso, kāḷapakkheva candimā’’ti.

Idaṃ saṃkilesabhāgiyaṃ suttaṃ.

“Manopubbaṅgamā dhammā, manoseṭṭhā manomayā;
Manasā ce paduṭṭhena, bhāsati vā karoti vā;
Tato naṃ dukkhamanveti, cakkamva vahato pada’’nti.

Idaṃ saṃkilesabhāgiyaṃ suttaṃ.

“Middhī [[passa dha. pa. 325](#)] yadā hoti mahagghaso ca, niddāyitā samparivattasāyī;
Mahāvarāhova nivāpapuṭṭho, punappunaṃ gabbhamupeti mando’’ti.

Idaṃ saṃkilesabhāgiyaṃ suttaṃ.

“Ayasāva malaṃ samuṭṭhitam, tatutuṭṭhāya [[taduṭṭhāya \(sī.\) passa dha. pa. 240](#)] tameva khādati;
Evaṃ atidhonacāriṇam, sāni [[tāni \(sī.\) passa dha. pa. 240](#)] kammāni nayanti duggati’’nti.

Idaṃ saṃkilesabhāgiyaṃ suttaṃ.

“Coro yathā sandhimukhe gahīto, sakammunā haññati bajjhate ca;
Evaṃ ayaṃ pecca pajā parattha, sakammunā haññati bajjhate cā’’ti.

Idaṃ saṃkilesabhāgiyaṃ suttaṃ.

“Sukhakāmāni bhūtāni, yo daṇḍena vihiṃsati;
Attano sukhamesāno, pecca so na labhate [[labhe \(ka.\) passa dha. pa. 131](#)] sukha’’nti.

Idaṃ saṃkilesabhāgiyaṃ suttaṃ.

“Gunaṃ ce taramānānaṃ, jimhaṃ gacchati puṅgavo;
Sabbā tā jimhaṃ gacchanti, nette jimhaṃ gate [[jimhagate \(sī. ka.\) passa a. ni. 4.70](#)] sati.

“Evameva manussesu, yo hoti seṭṭhasammato;
So ce adhammaṃ carati, pageva itarā pajā;
Sabbam raṭṭham dukkham seti, rājā ce hoti adhammiko’’ti.

Idaṃ saṃkilesabhāgiyaṃ suttaṃ.

“Sukiccharūpāvatime manussā, karonti pāpaṃ upadhīsu rattā;
Gacchanti te bahujanāsannivāsaṃ, nirayaṃ avīciṃ kaṭukaṃ bhayānaka’’nti.

Idaṃ saṅkilesabhāgiyaṃ suttaṃ.

“Phalaṃ ve [passa a. ni. 4.68] kadaliṃ hanti, phalaṃ veḷuṃ phalaṃ naḷaṃ;
Sakkāro kāpurisaṃ hanti, gabbho assatarīṃ yathā”’ti.

Idaṃ saṅkilesabhāgiyaṃ suttaṃ.

“Kodhamakkhagaru bhikkhu, lābhasakkāragāraṃ [lābhasakkākāraṇā (sī. ka.) passa a. ni. 4.43];
Sukhette pūtibjaṃva, saddhamme na virūhati”’ti.

Idaṃ saṅkilesabhāgiyaṃ suttaṃ.

91. “Idhāhaṃ, bhikkhave, ekaccaṃ puggalaṃ paduṭṭhacittaṃ evaṃ cetasā ceto paricca pajānāmi,
(yathā kho ayaṃ puggalo iriyati, yañca paṭipadaṃ paṭipanno, yañca maggaṃ samārūḷho) [() natthi a. ni. 1.43-44; itivu. 20].
Imamhi cāyaṃ samaye kālaṃ kareyya, yathābhatāṃ nikkhitto, evaṃ niraye. Taṃ kissa hetu? Cittaṃ hissa, bhikkhave, paduṭṭhaṃ [padositāṃ (sī. ka.) a. ni. 1.43; itivu. 20 passitabbāṃ],
cetopadosahetu [cittapadosahetu (sī. ka.)] kho pana, bhikkhave, evamidhekacce sattā kāyassa bhedaṃ
paraṃ maraṇā apāyaṃ duggatiṃ vinipātaṃ nirayaṃ upapajjantī”’ti. Etamatthaṃ bhagavā avoca,
tattathaṃ iti vuccati –

“Paduṭṭhacittaṃ ñatvāna, ekaccaṃ idha puggalaṃ;
Etamatthañca byākāsi, buddho [satthā (sī. ka.)] bhikkhūna santike;

Imamhi cāyaṃ samaye, kālaṃ kayirātha puggalo;
Nirayaṃ upapajjeyya, cittaṃ hissa padūsitaṃ;
Cetopadosahetu hi, sattā gacchanti duggatiṃ.

Yathābhatāṃ nikkhipeyya, evameva tathāvidho;
Kāyassa bhedaṃ duppañño, nirayaṃ sopapajjati”’ti.

Ayampi attho vutto bhagavatā iti me sutanti.

Idaṃ saṅkilesabhāgiyaṃ suttaṃ.

“Sace bhāyatha dukkhassa, sace vo dukkhamappiyaṃ;
Mākattha pāpakaṃ kammaṃ, āvi [āvī (sī.) passa udā. 44] vā yadi vā raho.

“Sace ca pāpakaṃ kammaṃ, karissatha karotha vā;
Na vo dukkhā pamutyatthi, upeccapi palāyata”’nti.

Idaṃ saṅkilesabhāgiyaṃ suttaṃ.

“Adhammena dhaṇaṃ laddhā, musāvādena cūbhayaṃ;
Mameti bālā maññanti, taṃ kathaṃ nu bhavissati.

“Antarāyā su bhavissanti, sambhatassa vinassati;
Matā saggāṃ na gacchanti, nanu ettāvataṃ hatā”’ti.

Idaṃ saṅkilesabhāgiyaṃ suttaṃ.

“Kathaṃ khaṇati attānaṃ, kathaṃ mittehi jīrati;
Kathaṃ vivaṭṭate dhammā, kathaṃ saggam na gacchati.

“Lobhā khaṇati attānaṃ, luddho mittehi jīrati;
Lobhā vivaṭṭate dhammā, lobhā saggam na gacchatī”ti.

Idaṃ saṃkilesabhāgiyaṃ suttaṃ.

“Caranti bālā dummedhā, amitteneva attanā;
Karontā pāpakam kammaṃ, yaṃ hoti kaṭukapphalaṃ [kaṭakam phalam (ka.) passa dha. pa. 66].

“Na taṃ kammaṃ kataṃ sādhu, yaṃ katvā anutappati;
Yassa assumukho rodaṃ, vipākam paṭisevatī”ti.

Idaṃ saṃkilesabhāgiyaṃ suttaṃ.

“Dukkaram duttitikkhaṇca, abyattena ca [aviyattena (sī. ka.) passa saṃ. ni. 1.17] sāmaññaṃ;
Bahū hi tattha sambādhā, yattha bālo visīdati.

“Yo hi atthaṇca dhammaṇca, bhāsamāne tathāgate;
Manam padosaye bālo, mogham kho tassa jīvitam.

“Etañcāham arahāmi, dukkhaṇca ito ca pāpiyataram bhante;
Yo appameyyesu tathāgatesu, cittaṃ padosemi avītarāgo”ti.

Idaṃ saṃkilesabhāgiyaṃ suttaṃ.

“Appameyyam paminanto, kodha vidvā vikappaye;
Appameyyam pamāyinaṃ [pamāyantaṃ (sī. ka.) passa saṃ. ni. 1.179], nivutaṃ taṃ maññe
akissava”nti.

Idaṃ saṃkilesabhāgiyaṃ suttaṃ.

“Purisassa hi jātassa, kuṭhārī [kudhārī (ka.) passa saṃ. ni. 1.180] jāyate mukhe;
Yāya chindati attānaṃ, bālo dubbhāsitaṃ bhaṇam.

“Na hi satthaṃ sunisitaṃ, visaṃ halāhalaṃ iva;
Evaṃ viraddham pātetī, vācā dubbhāsitā yathā”ti.

Idaṃ saṃkilesabhāgiyaṃ suttaṃ.

92. “Yo nindiyam pasamsati, taṃ vā nindati yo pasamsiyo;
Vicināti mukhena so kalim, kalinā tena sukham na vindati.

“Appamatto ayam kali, yo akkhesu dhanaparājayo;
Sabbassāpi sahāpi attanā, ayameva mahantataro [mahattaro (ka.) passa a. ni. 4.3; saṃ. ni. 1.180] kali;
Yo sugatesu manam padosaye.

“Sataṃ sahaṣṣānaṃ nirabbudānaṃ, chattiṃsatī pañca ca abbudāni;
Yamariyagarahī nirayaṃ upeti, vācaṃ manañca pañidhāya pāpaka’nti.

Idaṃ saṃkilesabhāgiyaṃ suttaṃ.

“Yo lobhaguṇe anuyutto, so vacasā [vacasā ca (ka.) passa su. ni. 668] paribhāsati aññe;
Assaddho kadariyo [anariyo (sī. ka.)] avadaññū, macchari pesuṇiyaṃ anuyutto.

“Mukhadugga vibhūta anariya, bhūnahu pāpaka dukkaṭakāri;
Purisanta kalī avajātaputta [avajātakaputta (sī. ka.) passa su. ni. 669], mā bahubhāñidha
nerayikosi.

“Rajamākirasī ahitāya, sante garahasi kibbisakārī;
Bahūni duccharitāni caritvā, gacchasi kho papataṃ ciraratta’nti.

Idaṃ saṃkilesabhāgiyaṃ suttaṃ.

Tattha katamaṃ vāsanābhāgiyaṃ suttaṃ?

“Manopubbaṅgamā dhammā, manoseṭṭhā manomayā;
Manasā ce pasannena, bhāsati vā karoti vā;
Tato naṃ sukhamanveti, chāyāva anapāyinī’nti [anupāyinīti (ka.) passa dha. pa. 2].

Idaṃ vāsanābhāgiyaṃ suttaṃ.

93. Mahānāmo sakko bhagavantaṃ etadavoca – “idaṃ, bhante, kapilavatthu iddhañceva phītañca bāhujaññaṃ [bahujanam (sī. ka.) passa sam. ni. 5.1018] ākiṇṇamanussaṃ sambādhabhūhaṃ, so kho ahaṃ, bhante, bhagavantaṃ vā payirupāsivā manobhāvanīye vā bhikkhū sāyanhasamayam kapilavatthum pavisanto bhantenapi hatthinā samāgacchāmi, bhantenapi assena samāgacchāmi, bhantenapi rathena samāgacchāmi, bhantenapi sakaṭena samāgacchāmi, bhantenapi purisena samāgacchāmi, tassa mayhaṃ, bhante, tasmim samaye mussateva bhagavantaṃ ārabha sati, mussati dhammaṃ ārabha sati, mussati saṅghaṃ ārabha sati. Tassa mayhaṃ, bhante, evaṃ hoti ‘imamhi cāhaṃ sāyanhasamaye kālaṃ kareyyaṃ, kā mayhaṃ [mamassa (sī. ka.) passa sam. ni. 5.1018] gati, ko abhisamparāyo’nti.

“Mā bhāyi, mahānāma, mā bhāyi, mahānāma, apāpakaṃ te maraṇaṃ bhavissati, apāpikā [apāpikā te (sī.)] kālaṅkiriya. Catūhi kho, mahānāma, dhammehi samannāgato ariyasāvako nibbānaninno hoti nibbānaṇo nibbānapabbhāro. Katamehi catūhi? Idha, mahānāma, ariyasāvako buddhe aveccappasādena samannāgato hoti, itipi so bhagavā arahaṃ...pe... buddho bhagavāti. Dhamme...pe... saṅghe...pe... ariyakantehi sīlehi samannāgato hoti akhaṇḍehi...pe... samādhisaṃvattanikehi. Seyyathāpi, mahānāma, rukkho pācīnaninno pācīnaṇo pācīnapabbhāro, so mūlacchinno [mūlehi chinno (sī. ka.)] katamena papateyyā’nti? “Yena, bhante, ninno yena ṇo yena pabbhāro’nti. “Evameva kho, mahānāma, imehi catūhi dhammehi samannāgato ariyasāvako nibbānaninno hoti nibbānaṇo nibbānapabbhāro. Mā bhāyi, mahānāma, mā bhāyi, mahānāma, apāpakaṃ te maraṇaṃ bhavissati, apāpikā kālaṅkiriya’nti.

Idaṃ vāsanābhāgiyaṃ suttaṃ.

“Sukhakāmāni bhūtāni, yo daṇḍena na hiṃsati;
Attano sukhamesāno, pecca so labhate sukha’nti.

Idaṃ vāsanābhāgiyaṃ suttaṃ.

“Gunnāñce taramānānaṃ, ujum gacchati puṅgavo;
Sabbā tā ujum gacchanti, nette ujum gate sati.

“Evameva manussesu, yo hoti setṭhasammato;
So sace [so ceva (sī.) passa (sī.) passa a. ni. 4.70] dhammaṃ carati, pageva itarā pajā;
Sabbam raṭṭham sukham seti, rājā ce hoti dhammiko”ti.

Idaṃ vāsanābhāgiyaṃ suttaṃ.

94. Bhagavā sāvatthiyaṃ viharati jetavane anāthapiṇḍikassa ārāme. Tena kho pana samayena sambahulā bhikkhū bhagavato cīvarakammaṃ karonti “niṭṭhitacīvaro bhagavā temāsaccayena cārikaṃ pakkamissatī”ti. Tena kho pana samayena isidattapurāṇā thapatayo sākete [sādhuke (saṃ. ni. 5.1002)] paṭivasanti kenaci deva karaṇīyena. Assosum kho isidattapurāṇā thapatayo “sambahulā kira bhikkhū bhagavato cīvarakammaṃ karonti. Niṭṭhitacīvaro bhagavā temāsaccayena cārikaṃ pakkamissatī”ti.

Atha kho isidattapurāṇā thapatayo magge purisaṃ ṭhapesum “yadā tvaṃ ambho purisa passeyyāsī bhagavantam āgacchantam arahantam sammāsambuddham, atha amhākaṃ āroceyyāsī”ti. Dvīhatīham ṭhito kho so puriso addasa bhagavantam dūratova āgacchantam, disvāna yena isidattapurāṇā thapatayo tenupasaṅkami, upasaṅkamitvā isidattapurāṇe thapatayo etadavoca “ayaṃ so bhante [ayaṃ bhante (sī. ka.) passa saṃ. ni. 5.1002] bhagavā āgacchati araham sammāsambuddho, yassadāni kalam maññathā”ti.

Atha kho isidattapurāṇā thapatayo yena bhagavā tenupasaṅkamimsu, upasaṅkamitvā bhagavantam abhivādetvā bhagavantam piṭṭhito piṭṭhito anubandhimsu. Atha kho bhagavā maggā okkamma yena aññataram rukkhamūlam tenupasaṅkami, upasaṅkamitvā paññatte āsane nisīdi. Isidattapurāṇā thapatayo bhagavantam abhivādetvā ekamantam nisīdimsu, ekamantam nisinnā kho isidattapurāṇā thapatayo bhagavantam etadavocum –

“Yadā mayaṃ bhante bhagavantam suṇoma ‘sāvatthiyā kosalesu cārikaṃ pakkamissatī’ti, hoti no tasmiṃ samaye anattamanatā hoti domanassaṃ ‘dūre no bhagavā bhavissatī’ti. Yadā pana mayaṃ bhante bhagavantam suṇoma ‘sāvatthiyā kosalesu cārikaṃ pakkanto’ti, hoti no tasmiṃ samaye anattamanatā hoti domanassaṃ ‘dūre no bhagavā’ti...pe....

“Yadā pana mayaṃ bhante bhagavantam suṇoma ‘kāsīsu magadhesu [kāsīhi māgadhe (saṃ. ni. 5.1002)] cārikaṃ pakkamissatī’ti, hoti no tasmiṃ samaye anattamanatā hoti domanassaṃ ‘dūre no bhagavā bhavissatī’ti. Yadā pana mayaṃ bhante bhagavantam suṇoma ‘kāsīsu magadhesu cārikaṃ pakkanto’ti, anappakā no tasmiṃ samaye anattamanatā hoti anappakaṃ domanassaṃ ‘dūre no bhagavā’ti.

“Yadā pana mayaṃ bhante bhagavantam suṇoma ‘magadhesu kāsīsu cārikaṃ pakkamissatī’ti, hoti no tasmiṃ samaye attamanatā hoti somanassaṃ ‘āsanne no bhagavā bhavissatī’ti. Yadā pana mayaṃ bhante bhagavantam suṇoma ‘magadhesu kāsīsu cārikaṃ pakkanto’ti, hoti no tasmiṃ samaye attamanatā hoti somanassaṃ ‘āsanne no bhagavā’ti...pe....

“Yadā pana mayaṃ bhante bhagavantam suṇoma ‘kosalesu sāvatthim [sāvatthiyaṃ (sī. ka.)] cārikaṃ pakkamissatī’ti. Hoti no tasmiṃ samaye attamanatā hoti somanassaṃ ‘āsanne no bhagavā bhavissatī’ti.

“Yadā pana mayaṃ bhante bhagavantam suṇoma ‘sāvatthiyaṃ viharati jetavane anāthapiṇḍikassa ārāme’ti hoti anappakā no tasmiṃ samaye attamanatā, hoti anappakaṃ somanassaṃ ‘āsanne no

bhagavā’’ti.

‘‘Tasmātiha, thapatayo, sambādho gharāvāso rajāpatho, abbhokāso pabbajjā, alañca pana vo, thapatayo, appamādāyā’’ti. ‘‘Atthi kho no, bhante, etamhā sambādhā añño sambādho sambādhataro ceva sambādhasaṅkhātataro cā’’ti? ‘‘Katamo pana vo, thapatayo, etamhā sambādhā añño sambādho sambādhataro ceva sambādhasaṅkhātataro cā’’ti?

‘‘Idha mayaṃ, bhante, yadā rājā pasenadi kosalo uyyānabhūmiṃ niyyātukāmo [gantukāmo (sī. ka.) passa saṃ. ni. 5.1002] hoti, ye te rañño pasenadissa kosalassa nāgā opavayhā, te kappetvā yā tā rañño pasenadissa kosalassa pajāpatiyo piyā manāpā, tā [tāsaṃ (sī. ka.)] ekaṃ purato ekaṃ pacchato nisīdāpema, tāsaṃ kho pana, bhante, bhaginīnaṃ evarūpo gandho hoti. Seyyathāpi nāma gandhakarandaṅkassa tāvadeva vivariyamānassa, yathā taṃ rājakaññānaṃ [rājārahena (sī. ka.)] gandhena vibhūsitānaṃ. Tāsaṃ kho pana, bhante, bhaginīnaṃ evarūpo kāyasamphasso hoti, seyyathāpi nāma tūlapicuno vā kappāhapicuno vā, yathā taṃ rājakaññānaṃ sukhedhitānaṃ. Tasmīṃ kho pana, bhante, samaye nāgopi rakkhitabbo hoti. Tāpi bhaginiyo rakkhitabbā hoti. Attāpi rakkhitabbā hoti. Na kho pana mayaṃ, bhante, abhijānāma tāsū bhagīnisu pāpakaṃ cittamā ñappādentā, ayaṃ kho no, bhante, etamhā sambādhā añño sambādho sambādhataro ceva sambādhasaṅkhātataro cāti.

‘‘Tasmātiha, thapatayo, sambādho gharāvāso rajāpatho, abbhokāso pabbajjā. Alañca pana vo, thapatayo, appamādāya. Catūhi kho thapatayo, dhammehi samannāgato ariyasāvako sotāpanno hoti avinipātadhammo niyato sambodhiparāyaṇo.

‘‘Katamehi catūhi? Idha, thapatayo, sutavā ariyasāvako buddhe aveccappasādena samannāgato hoti itipi so bhagavā arahaṃ...pe... buddho bhagavāti, dhamme...pe... saṅghe...pe... vigatamalamaccherena cetasā agāraṃ ajjhāvasati, muttacāgo payatapāṇi vossaggarato yācayogo dānaṃvibhāgarato appaṭivibhattaṃ. Imehi kho, thapatayo, catūhi dhammehi samannāgato ariyasāvako sotāpanno hoti avinipātadhammo niyato sambodhiparāyaṇo.

‘‘Tumhe kho, thapatayo, buddhe aveccappasādena samannāgatā itipi so bhagavā arahaṃ...pe... buddho bhagavāti, dhamme...pe... saṅghe...pe... yaṃ kho pana kiñci kule deyyadhammaṃ, sabbaṃ taṃ appaṭivibhattaṃ sīlavantehi kalyāṇadhammehi, taṃ kiṃ maññatha, thapatayo, katividhā te kosalesu manussā ye tumhākaṃ samasamā yadidaṃ dānaṃvibhāgehi’’ti? ‘‘Lābhā no, bhante, suladdhaṃ no, bhante, yesaṃ no bhagavā evaṃ pajānāti’’ti.

Idaṃ vāsanābhāgiyaṃ suttaṃ.

95. ‘‘Ekapupphaṃ cajitvāna [yajitvāna (ka.) passa theragā. 96], sahaṃsaṃ kappakoṭiyo; Deve ceva manusse ca, sesena parinibbuto’’ti.

Idaṃ vāsanābhāgiyaṃ suttaṃ.

‘‘Assatthe haritobhāse, saṃvirūḷhamhi pādape;
Ekaṃ buddhagataṃ [buddhakataṃ (ka.) passa theragā. 217] saññaṃ, alabhiṃtthaṃ
[alabhiṃhaṃ (sī. ka.)] patissato.

‘‘Ajja tiṃsaṃ tato kappā, nābhijānāmi duggatiṃ;
Tisso vijjā sacchikatā, tassā saññāya vāsanā’’ti.

Idaṃ vāsanābhāgiyaṃ suttaṃ.

‘‘Piṇḍāya kosalaṃ puramā, pāvīsi aggapuggalo;

Anukampako purebhattaṃ, taṇhānighātako muni.

“Purisassa vaṭṭasako hatthe, sabbapupphelaṅkato;
So addasāsi sambuddhaṃ, bhikkhusaṅghapurakkhataṃ.

“Pavisantaṃ rājamaggena, devamānusapūjitaṃ;
Haṭṭho cittaṃ pasādetvā, sambuddhamupasaṅkama.

“So taṃ vaṭṭasakaṃ surabhiṃ, vaṇṇavantaṃ manoramaṃ;
Sambuddhassupaṇāmesi, pasanno sehi pāṇibhi.

“Tato aggisikhā vaṇṇā, buddhassa lapanantarā;
Sahassaraṃsi vijjuriva, okkā nikkhama ānana.

“Padakkhiṇaṃ karitvāna, sīse ādiccabandhuno;
Tikkhattuṃ parivaṭṭetvā, muddhanantaradhāyatha.

“Idaṃ disvā acchariyaṃ, abbhutaṃ lomahaṃsanaṃ;
Ekaṃsaṃ cīvamaṃ katvā, ānando etadabravi.

““Ko hetu sitakammaṃ, byākarohi mahāmune;
Dhammāloko bhavissati, kaṅkhaṃ vitara no mune.

““Yassa taṃ sabbadhammesu, sadā ñāṇaṃ pavattati;
Kaṅkhiṃ vematikaṃ theramaṃ, ānandaṃ etadabravi.

““Yo so ānanda puriso, mayi cittaṃ pasādayi;
Caturāsītikappāni, duggatiṃ na gamissati.

““Devesu devasobhaggaṃ, dibbaṃ rajjaṃ pasāsiya;
Manujesu manujindo, rājā raṭṭhe bhavissati.

““So carimaṃ pabbajitvā, sacchikatvāna [[sacchikatvā ca \(ka.\)](#)] dhammataṃ;
Paccekabuddho dhutarāgo, vaṭṭasako nāma bhavissati.

““Natthi citte [[passa vi. va. 804](#)] pasannaṃhi, appakā nāma dakkhiṇā;
Tathāgate vā sambuddhe, atha vā tassa sāvake.

““Evaṃ acintiyā [[passa apa. thera 1.1.82](#)] buddhā, buddhadhammā acintiyā;
Acintiye pasannaṃ, vipāko hoti acintiyoti.”

Idaṃ vāsanābhāgiyaṃ suttaṃ.

96. “Idhāhaṃ, bhikkhave, ekaccaṃ puggalaṃ pasannacittaṃ evaṃ cetasā ceto paricca pajānāmi
“(yathā kho ayaṃ puggalo iriyati, yaṅca paṭipadaṃ paṭipanno, yaṅca maggaṃ samārūḷho) [[\(\) natthi a. ni. 1.43-44; itivu. 21](#)]. Imamaṃhī cāyaṃ samaye kālaṃ kareyya, yathābhattaṃ nikkhitto evaṃ sagge. Taṃ kissa hetu? Cittaṃ hissa, bhikkhave, pasannaṃ, cetopasādahetu [[cittappasādahetu \(sī. ka.\)](#)] kho pana evamidhekacce sattā kāyassa bhedā paraṃ maraṇā sugatiṃ saggaṃ lokaṃ upapajjantī”ti. Etamatthaṃ bhagavā avoca, tatthetaṃ iti vuccati –

“Pasannacittaṃ ñatvāna, ekaccaṃ idha puggalaṃ;

Etamatthañca byākāsi, buddho [satthā (sī. ka.) passa itivu. 21] bhikkhūna santike.

“Imamhi cāyaṃ samaye, kālaṃ kayirātha puggalo;
Saggamhi upapajjeyya, cittaṃ hissa pasāditaṃ.

“Cetopasādahetu hi, sattā gacchanti suggatiṃ;
Yathābhatam nikkhipeyya, evamevaṃ tathāvidho;
Kāyassa bheda sappañño, saggam so upapajjati”’ti.

“Ayampi attho vutto bhagavatā iti me suta”’nti.

Idaṃ vāsanābhāgiyaṃ suttaṃ.

“Suvaṇṇacchadanaṃ nāvaṃ, nāri āruyha tiṭṭhasi;
Ogāhasi [ogāhase (sī. ka.) passa vi. va. 53] pokkharaṇiṃ, padmaṃ chindasi pāṇinā.

“Kena te tādiso vaṇṇo, ānubhāvo juti ca te;
Uppajjanti ca te bhogā, ye keci manasicchitā.

“Pucchitā devate saṃsa, kissa kammassidaṃ phalaṃ;
Sā devatā attamanā, devarājena pucchitā.

“Pañhaṃ puṭṭhā viyākāsi, sakkassa iti me suttaṃ;
Addhānaṃ paṭipannāhaṃ, disvā thūpaṃ manoramaṃ.

“Tattha cittaṃ pasādesiṃ, kassapassa yasassino;
Paddhapupphehi pūjesiṃ, pasannā sehi tasseva;
Kamassa phalaṃ vipāko, etādisaṃ katapuñña labhanti”’ti.

Idaṃ vāsanābhāgiyaṃ suttaṃ.

“Dānakathā sīlakathā saggakathā puññakathā puññavipākakathā”’ti;
Idaṃ vāsanābhāgiyaṃ suttaṃ.

“Apicāpi paṃsuthūpesu uddissakatesu dasabaladharānaṃ tatthapi kāraṃ katvā saggesu narā
pamodanti”’ti.

Idaṃ vāsanābhāgiyaṃ suttaṃ.

97. “Devaputtasarīravaṇṇā, sabbe subhagasaṅṭhiti;
Udakena paṃsum temetvā, thūpaṃ vaḍḍhetha kassapaṃ.

“Ayaṃ sugatte sugatassa thūpo, mahesino dasabaladhammadhārino;
Tasmim [yasmim (sī.)] ime devamanujā pasannā, kāraṃ karontā jarāmaraṇā pamuccare”’ti.

Idaṃ vāsanābhāgiyaṃ suttaṃ.

“Uḷāraṃ vata taṃ āsi, yāhaṃ thūpaṃ mahesino;
Uppalāni ca cattāri, mālañca abhiropayim.

“Ajja tiṃsaṃ tato kappā, nābhijānāmi duggatiṃ;
Vinipātaṃ na gacchāmi, thūpaṃ pūjetva [pūjetvā (ka.)] satthuno”’ti.

Idaṃ vāsanābhāgiyaṃ suttaṃ.

“Bāttiṃsalakkhaṇadharassa, vijitavijayassa lokanāthassa;
Satasahassaṃ kappe, mudito thūpaṃ apūjesi.

“Yaṃ mayā pasutaṃ puññaṃ, tena ca puññaena deva sobhaggaṃ;
Rajjāni ca kāritāni, anāgantuna vinipātaṃ.

“Yaṃ cakkhu adantadamakassa, sāsane paṇihitaṃ tathā;
Cittaṃ taṃ me sabbaṃ, laddhaṃ vimuttacittamhi vidhūtalato”’ti.

Idaṃ vāsanābhāgiyaṃ suttaṃ.

98. “Sāmākapatthodanamattameva hi, paccekabuddhamhi adāsi dakkhiṇaṃ;
Vimuttacitte akhile anāsava, araṇavihārimhi asaṅgamānase.

“Tasmiṅca okappayi dhammamuttamaṃ, tasmiṅca dhamme paṇidhesiṃ mānaṃ;
Evaṃ vihārīhi me saṅgamo siyā, bhava kudāsupi ca mā apekkhavā.

“Tasseva kammaṃ vipākato ahaṃ, saḥassakkhattuṃ kurusūpapajjatha [kurūsūpapajjatha (sī.)];
Dīghāyukesu amamesu pāṇisu, viśesagāmīsu ahīnagāmīsu.

“Tasseva kammaṃ vipākato ahaṃ, saḥassakkhattuṃ tidasopapajjatha;
Vicitramālābharaṇānulepisu, viśiṭṭhakāyūpagato yasassisu.

“Tasseva kammaṃ vipākato ahaṃ, vimuttacitto akhilo anāsavo;
Imehi me antimadehadhāribhi, samāgamo āsihi tāhi tāsīhi.

“Paccakkhaṃ khvimaṃ avaca tathāgato jino, samijjhate sīlavato yadicchatī;
Yathā yathā me manasā vicintitaṃ, tathā samiddhaṃ ayamantimo bhavo”’ti.

Idaṃ vāsanābhāgiyaṃ suttaṃ.

“Ekatiṃsamhi kappamhi jino anejo, anantadassī bhagavā sikhīti;
Tassāpi rājā bhātā sikhiddhe [sikhāṇḍi (sī.)], buddhe ca dhamme ca abhippasanno.

“Parinibbute lokavināyakamhi, thūpaṃ sakāsi vipulaṃ mahantaṃ;
Samantato gāvutikaṃ mahesino, devātidevassa naruttamaṃ.

“Tasmiṃ manusso balimābhīhārī, paggayha jātisumaṇaṃ pahaṭṭho;
Vātena pupphaṃ patitassa ekaṃ, tāhaṃ gahetvāna tasseva dāsi.

“So maṃ avocābhipasannacitto, tuyhameva etaṃ pupphaṃ dadāmi;
Tāhaṃ gahetvā abhiropayesiṃ, punappunaṃ buddhamanussaranto.

“Ajja tiṃsaṃ tato kappā, nābhijānāmi duggatiṃ;

Vinipātañca na gacchāmi, thūpapūjāyidaṃ phala’’nti.

Idaṃ vāsanābhāgiyaṃ suttaṃ.

“Kapilaṃ nāma nagaraṃ, suvibhattaṃ mahāpathaṃ;
Ākiṇṇamiddhaṃ phītañca, brahmadattassa rājino.

“Kummāsaṃ vikkiṇiṃ tattha, pañcālānaṃ puruttame;
Sohaṃ addasiṃ sambuddhaṃ, upariṭṭhaṃ yasassināṃ.

“Haṭṭho cittaṃ pasādetvā, nimantesiṃ naruttamaṃ;
Ariṭṭhaṃ dhuvabhattena, yaṃ me gehamhi vijjatha.

“Tato ca kattiko puṇṇo [kattikā puṇṇā (ka.)], puṇṇamāsī upaṭṭhitā;
Navaṃ dussayugaṃ gayha, ariṭṭhassopanāmayiṃ.

“Pasannacittaṃ ñatvāna, paṭiggaṇhi naruttamo;
Anukampako kāruṇiko, taṇhānighātaṃ muni.

“Tāhaṃ kammaṃ karitvāna, kalyāṇaṃ buddhavaṇṇitaṃ;
Deve ceva manusse ca, sandhāvitvā tato cuto.

“Bārāṇasiyaṃ nagare, seṭṭhissa ekaputtako;
Aḍḍhe kulasmaṃ uppajjiṃ, pāṇehi ca piyataro.

“Tato ca viññutaṃ patto, devaputtena codito;
Pāsādā rūhivāna, sambuddhamupasankamiṃ.

“So me dhammadesayi, anukampāya gotamo;
Dukkhaṃ dukkhasamuppādaṃ, dukkhassa ca atikkamaṃ.

“Ariyaṃ aṭṭhaṅgikaṃ maggaṃ, dukkhūpasamagāmiṃ;
Cattāri ariyasaccāni, muni dhammadesayi.

“Tassāhaṃ vacanaṃ sutvā, vihariṃ sāsane rato;
Samathaṃ paṭivijjhāhaṃ, rattindivamatandito.

“Ajjhattaṅca bahiddhā ca, ye me vijjiṃsu [vijjhiṃsu (sī.)] āsavā;
Sabbe āsuṃ samucchinnā, na ca uppajjare puna.

“Pariyantakataṃ dukkhaṃ, carimoyaṃ samussayo;
Jātimaṇasaṃsāro, natthidāni punabbhavo’’ti.

Idaṃ vāsanābhāgiyaṃ suttaṃ.

99. Tattha katamaṃ nibbedhabhāgiyaṃ suttaṃ?

“Uddhaṃ adho sabbadhi vippamutto, ayaṃ ahasmīti [ayamahasmīti (sī.) passa udā. 61]
anānupassī;
Evaṃ vimutto udatāri oghaṃ, atiṇṇapubbaṃ apunabbhavāyā’’ti.

Idaṃ nibbedhabhāgiyaṃ suttaṃ.

“Sīlavato, ānanda, na cetaṇā [cetanāya (a. ni. 11.2)] karaṇīyā ‘kinti me avippaṭṭisāro jāyeyyā’ ti. Dhammatā esā, ānanda, yaṃ sīlavato avippaṭṭisāro jāyeyya. Avippaṭṭisārinā, ānanda, na cetaṇā karaṇīyā ‘kinti me pāmojjaṃ jāyeyyā’ ti. Dhammatā esā, ānanda, yaṃ avippaṭṭisārino pāmojjaṃ jāyeyya. Pamuditena, ānanda, na cetaṇā karaṇīyā ‘kinti me pīti jāyeyyā’ ti. Dhammatā esā, ānanda, yaṃ pamuditassa pīti jāyeyya. Pīṭimanassa, ānanda, na cetaṇā karaṇīyā ‘kinti me kāyo passambheyyā’ ti. Dhammatā esā, ānanda, yaṃ pīṭimanassa kāyo passambheyya. Passaddhakāyassa ānanda, na cetaṇā karaṇīyā ‘kintāhaṃ sukhaṃ vediyeyya’ nti. Dhammatā esā, ānanda, yaṃ passaddhakāyo sukhaṃ vediyeyya. Sukhino ānanda, na cetaṇā karaṇīyā ‘kinti me samādhi jāyeyyā’ ti. Dhammatā esā, ānanda, yaṃ sukhino samādhi jāyeyya. Samāhitassa ānanda, na cetaṇā karaṇīyā ‘kintāhaṃ yathābhūtaṃ pajāneyya’ nti. Dhammatā esā, ānanda, yaṃ samāhito yathābhūtaṃ pajāneyya. Yathābhūtaṃ pajānātā, ānanda, na cetaṇā karaṇīyā ‘kinti me nibbidā jāyeyyā’ ti. Dhammatā esā, ānanda, yaṃ yathābhūtaṃ pajānanto nibbindeyya. Nibbindantena, ānanda, na cetaṇā karaṇīyā ‘kinti me virāgo jāyeyyā’ ti. Dhammatā esā, ānanda, yaṃ nibbindanto virajjeyya. Virajjantena ānanda na cetaṇā karaṇīyā ‘kinti me vimutti jāyeyyā’ ti. Dhammatā esā, ānanda, yaṃ virajjanto vimucceyya. Vimuttena, ānanda, na cetaṇā karaṇīyā ‘kinti me vimuttiñāṇadassanaṃ uppajjeyyā’ ti. Dhammatā esā, ānanda, yaṃ vimuttassa vimuttiñāṇadassanaṃ uppajjeyyā’ ti.

Idaṃ nibbedhabhāgiyaṃ suttaṃ.

100. “Yadā have pātubhavanti dhammā, ātāpino jhāyato brāhmaṇassa;
Athassa kaṅkhā vapayanti sabbā, yato pajānāti sahetudhamma’ nti.

Idaṃ nibbedhabhāgiyaṃ suttaṃ.

“Yadā have pātubhavanti dhammā, ātāpino jhāyato brāhmaṇassa;
Athassa kaṅkhā vapayanti sabbā, yato khayaṃ paccayānaṃ avedī’ ti.

Idaṃ nibbedhabhāgiyaṃ suttaṃ.

“Kiṃnu [passa saṃ. ni. 2.243] kujjhasi mā kujjhi, akkodho tissa te varam;
Kodhamānamakkhavinayatthaṃ hi, tissa brahmacariyaṃ vussatī’ ti.

Idaṃ nibbedhabhāgiyaṃ suttaṃ.

“Kadāhaṃ nandaṃ passeyyaṃ, āraññaṃ [araññaṃ (ka.) passa saṃ. ni. 2.242] paṃsukūlikam;
Aññātuñchena yāpentam, kāmesu anapekkhina’ nti.

Idaṃ nibbedhabhāgiyaṃ suttaṃ.

“Kiṃsu chetvā sukhaṃ seti, kiṃsu chetvā na socati;
Kissassu [kissassa (sī. ka.) passa saṃ. ni. 1.187] ekadhammassa, vadaṃ rocesi gotamāti.

“Kodhaṃ chetvā sukhaṃ seti, kodhaṃ chetvā na socati;
Kodhassa visamūlassa, madhuraggassa brāhmaṇa;
Vadaṃ ariyā pasamsanti, taṃ hi chetvā na socatī’ ti.

Idaṃ nibbedhabhāgiyaṃ suttaṃ.

“Kiṃsu hane uppataṃ, kiṃsu jātaṃ vinodaye;

Kiñcassu pajahe dhīro, kissābhisamayo sukho.

“Kodhaṃ hane uppatitaṃ, rāgaṃ jātaṃ vinodaye;
Avijjaṃ pajahe dhīro, saccābhisamayo sukho”’ti.

Idaṃ nibbedhabhāgiyaṃ suttaṃ.

101. “Sattiyā viya omaṭṭho, ḍayhamānova [dayhamāneva (ka.) saṃ. ni. 1.21; theragā. 39 passitabbam] matthake;
Kāmarāgappahānāya, sato bhikkhu paribbaje.

“Sattiyā viya omaṭṭho, ḍayhamānova matthake;
Sakkāyadiṭṭhippahānāya, sato bhikkhu paribbaje”’ti.

Idaṃ nibbedhabhāgiyaṃ suttaṃ.

“Sabbe khayantā nicayā, patanantā samussayā;
Sabbesaṃ maraṇamāgama, sabbesaṃ jīvitamaddhavaṃ;
Etaṃ bhayaṃ maraṇe [maraṇaṃ (ka.) passa saṃ. ni. 1.100] pekkhamāno, puññāni kayirātha
sukhāvahāni.

“Sabbe khayantā nicayā, patanantā samussayā;
Sabbesaṃ maraṇamāgama, sabbesaṃ jīvitamaddhavaṃ;
Etaṃ bhayaṃ maraṇe pekkhamāno, lokāmiṣaṃ pajahe santipekko”’ti.

Idaṃ nibbedhabhāgiyaṃ suttaṃ.

“Sukhaṃ sayanti munayo, na te socanti māvidha;
Yesaṃ jhānataṃ cittaṃ, paññavā susamāhito;
Āraddhavīriyo pahitatto, oghaṃ tarati duttaraṃ.

“Virato kāmasaññāya, sabbasaṃyojanātīto [sabbasaṃyojanātigo (sī.) passa saṃ. ni. 1.96];
Nandibhavaparikkhīṇo [nandīrāgaparikkhīṇo (ka.) saṃ. ni. 1.96], so gambhīre na sīdatī”’ti.

Idaṃ nibbedhabhāgiyaṃ suttaṃ.

“Saddahāno arahataṃ, dhammaṃ nibbānapattiyā;
Sussūsaṃ labhate paññaṃ, appamatto vicakkhaṇo.

Patirūpakārī dhuravā, uṭṭhātā vindate dhanaṃ;
Saccena kittiṃ pappoti, dadaṃ mittāni ganthati;
Asmā lokā paraṃ lokam, evaṃ [save (sī.) passa saṃ. ni. 1.246] pecca na socatī”’ti.

Idaṃ nibbedhabhāgiyaṃ suttaṃ.

“Sabbaganthapahīnassa, vippamuttassa te sato;
Samaṇassa na taṃ sādhu, yadaññamanusāsasīti.

“Yena kenaci vaṇṇena, saṃvāso sakka jāyati;
Na taṃ arahati sappañño, manasā anukampitaṃ [ananukampitaṃ (sī. ka.) passa saṃ. ni.

1.236].

“Manasā ce pasannena, yadaññāmanusāsati;
Na tena hoti saṃyutto, yānukampā anuddayā”’ti.

Idaṃ nibbedhabhāgiyaṃ suttaṃ.

102. “Rāgo ca doso ca kutonidānā, aratī ratī [arati rati (ka.) saṃ. ni. 1.237; su. ni. 273 passitabbaṃ]
lomahaṃso kutojā;
Kuto samuṭṭhāya manovitakkā, kumārakā dhaṅkamivossajanti.

“Rāgo ca doso ca itonidānā, aratī ratī lomahaṃso itojā;
Ito samuṭṭhāya manovitakkā, kumārakā dhaṅkamivossajanti.

“Snehajā attasambhūtā, nigrodhasseva khandhajā;
Puthu visattā kāmesu, māluvāva vitatā vane.

“Ye naṃ pajānanti yatonidānaṃ, te naṃ vinodenti suṇohi yakkha;
Te duttaraṃ oghamimaṃ taranti, atiṇṇapubbaṃ apunabbhavāyā”’ti.

Idaṃ nibbedhabhāgiyaṃ suttaṃ.

“Dukkaraṃ bhagavā sudukkaraṃ bhagavā”’ti;

“Dukkaraṃ vāpi karonti, [kāmadāti bhagavā]
Sekkhā sīlasamāhitā;
Ṭhitattā anagāriyupetassa, tuṭṭhi hoti sukhāvahā”’ti.

“Dullabhā [dullabhaṃ (sī. ka.) passa saṃ. ni. 1.87] bhagavā yadidaṃ tuṭṭhī”’ti;

“Dullabhaṃ vāpi labhanti, [kāmadāti bhagavā]
Cittavūpasame ratā;
Yesaṃ divā ca ratto ca, bhāvanāya rato mano”’ti.

“Dussamādahaṃ bhagavā yadidaṃ citta”’nti;
“Dussamādahaṃ vāpi samādahanti, [kāmadāti bhagavā]
Indriyūpasame ratā;
Te chetvā maccuno jālaṃ, ariyā gacchanti kāmadā”’ti.

“Duggamo bhagavā visamo maggo”’ti;
“Duggame visame vāpi, ariyā gacchanti kāmada [kāmadā (ka.) passa saṃ. ni. 1.87];
Anariyā visame magge, papatanti avamsirā;
Ariyānaṃ samo maggo, ariyā hi visame samā”’ti.

Idaṃ nibbedhabhāgiyaṃ suttaṃ.

103. “Idaṃ hi [passa saṃ. ni. 1.101] taṃ jetavanaṃ, isisaṅghanisevitaṃ;
Āvutthaṃ dhammarājena, pītisañjananaṃ mama.

“Kammaṃ vijjā ca dhammo ca, sīlaṃ jīvitamuttamaṃ;
Etena maccā sujjhanti, na gottena dhanena vā.

“Tasmā hi paṇḍito poso, sampassaṃ atthamattano;
Yoniso vicine dhammaṃ, evaṃ tattha visujjhati.

“Sāriputtova paññāya, sīlena upasamena ca;
Yopi pāraṅgato bhikkhu, etāvaparamo siyā”ti.

Idaṃ nibbedhabhāgiyaṃ suttaṃ.

“Atītaṃ nānvāgameyya, nappaṭikaṅkhe anāgataṃ;
Yadatītaṃ pahīnaṃ [pahīnaṃ (sī.) passa ma. ni. 3.272] taṃ, appattañca anāgataṃ.

“Paccuppannañca yo dhammaṃ, tattha tattha vipassati;
Asaṃhīraṃ asaṃkappaṃ, taṃ vidvā manubrūhaye.

“Ajjeva kiccaṃātappaṃ [kiccaṃ ātappaṃ (sī.)], ko jaññā maraṇaṃ suve;
Na hi no saṅgamaṃ tena, mahāsenena maccunā.

“Evaṃ vihāriṃ ātāpiṃ, ahorattamatanditaṃ;
Taṃ ve “bhaddekaratto”ti, santo ācikkhate munī”ti.

Idaṃ nibbedhabhāgiyaṃ suttaṃ.

“Cattārimāni, bhikkhave, sacchikātabbāni. Katamāni cattāri? Atthi, bhikkhave, dhammā cakkhunā paññāya ca sacchikātabbā, atthi dhammā satiyā paññāya ca sacchikātabbā, atthi dhammā kāyena paññāya ca sacchikātabbā, atthi dhammā paññāya veditabbā, paññāya ca sacchikātabbā.

“Katame ca, bhikkhave, dhammā cakkhunā paññāya ca sacchikātabbā? Dibbacakkhu suvisuddhaṃ atikkantamānusakaṃ cakkhunā paññāya ca sacchikātabbaṃ.

“Katame ca, bhikkhave, dhammā satiyā paññāya ca sacchikātabbā? Pubbenivāsānussati satiyā paññāya ca sacchikātabbā.

“Katame ca, bhikkhave, dhammā kāyena paññāya ca sacchikātabbā? Iddhividhā nirodhā kāyena paññāya ca sacchikātabbā.

“Katame ca, bhikkhave, dhammā paññāya veditabbā, paññāya sacchikātabbā? Āsavānaṃ khaye ñāṇaṃ paññāya veditabbaṃ, paññāya ca sacchikātabba”nti.

Idaṃ nibbedhabhāgiyaṃ suttaṃ.

104. Tattha katamaṃ asekkhabhāgiyaṃ suttaṃ?

“Yassa selūpamaṃ cittaṃ, ṭhitaṃ nānupakampati;
Virattaṃ rajaniyesu, kopaneyye na kuppati;
Yassevaṃ bhāvitaṃ cittaṃ, kuto naṃ [taṃ (udā. 34)] dukkhamessatī”ti.

Idaṃ asekkhabhāgiyaṃ suttaṃ.

Āyasmato ca sārīputtassa cārikādasamaṃ veyyākaraṇaṃ kātabbanti.

Idaṃ asekkhabhāgiyaṃ suttaṃ.

“Yo brāhmaṇo bāhitapāpadhammo, niḥuṃhuṅko [nihuṃhuṅko (sī.) passa udā. 4] nikkasāvo yatatto;
Vedantagū vūsitabrahmacariyo, dhammena so brahmavādaṃ vadeyya;
Yassussadā natthi kuhiñci loke”ti.

Idaṃ asekkhabhāgiyaṃ suttaṃ.

“Bāhitvā pāpake dhamme, ye caranti sadā satā;
Khīṇasaṃyojanā buddhā, te ve lokasmi [lokasmiṃ (sī. ka.) passa udā. 5] brāhmaṇā”ti.

Idaṃ asekkhabhāgiyaṃ suttaṃ.

“Yattha āpo ca pathavī, tejo vāyo na gādhati;
Na tattha sukkā jotanti, ādicco nappakāsati;
Na tattha candimā bhāti, tamo tattha na vijjati.

“Yadā ca attanāvedī [vedī (sī.) passa udā. 10], muni monena brāhmaṇo;
Atha rūpā arūpā ca, sukhadukkhā pamuccatī”ti.

Idaṃ asekkhabhāgiyaṃ suttaṃ.

“Yadā sakesu [passa udā. 7] dhammesu, pāragū hoti brāhmaṇo;
Atha etaṃ pisācaṅca, pakkulañcātivattatī”ti.

Idaṃ asekkhabhāgiyaṃ suttaṃ.

“Nābhinandati āyantim [āyantim nābhinandati (udā. 8)], pakkamantim na socati;
Saṅgā saṅgāmajim muttam, tamahaṃ brūmi brāhmaṇa”nti.

Idaṃ asekkhabhāgiyaṃ suttaṃ.

“Na udakena sucī [suci (sī. ka.) passa udā. 9] hoti, bahvettha nhāyatī [nahāyati (sī.)] jano;
Yamhi saccaṅca dhammo ca, so sucī so ca brāhmaṇo”ti.

Idaṃ asekkhabhāgiyaṃ suttaṃ.

“Yadā have pātubhavanti dhammā, ātāpino jhāyato brāhmaṇassa;
Vidhūpayam tiṭṭhati mārasenaṃ, sūriyova obhāsayamantalikkha”nti.

Idaṃ asekkhabhāgiyaṃ suttaṃ.

“Santindriyam passatha iriyamānaṃ, tevijjapattaṃ apahānadhammaṃ;
Sabbāni yogāni upātivatto, akiñcano iriyati paṃsukūliko.

“Taṃ devatā sambahulā ulārā, brahmavimānaṃ upasankamitvā;
Ājāniyam jātibalaṃ nisedhaṃ, nidha namassanti pasannacittā.

“Namo te purisājañña, namo te purisuttama;

Yassa te nābhijānāma, kiṃ tvaṃ nissāya jhāyasī’’ti.

Idaṃ asekkhabhāgiyaṃ suttaṃ.

‘‘Sahāyā vatime bhikkhū, cirarattaṃ sametikā;
Sameti nesam saddhammo, dhamme buddhappavedite’’.

‘‘Suvinīta kappinena, dhamme ariyappavedite;
Dhārenti antimaṃ dehaṃ, jetvā māraṃ savāhini’’nti [[savāhana’’nti \(ka.\) passa saṃ. ni. 2.246](#)].

Idaṃ asekkhabhāgiyaṃ suttaṃ.

‘‘Nayidaṃ sithilamārabba, nayidaṃ appena thāmasā;
Nibbānaṃ adhigantabbaṃ, sabbadukkhappamocanaṃ [[sabbagantapamocanaṃ \(ka.\) passa saṃ. ni. 2.238](#)].

‘‘Ayañca daharo bhikkhu, ayamuttamapuriso;
Dhāreti antimaṃ dehaṃ, jetvā māraṃ savāhini’’nti.

Idaṃ asekkhabhāgiyaṃ suttaṃ.

‘‘Dubbaṇṇako lūkhacīvaro, mogharājā sadā sato;
Khīṇāsavo viṣaṃyutto, katakicco anāsavo.

‘‘Tevijjo iddhippatto ca, cetopariyakovido [[cetopariyāyakovido \(sī.\)](#)];
Dhāreti antimaṃ dehaṃ, jetvā māraṃ savāhini’’nti.

Idaṃ asekkhabhāgiyaṃ suttaṃ.

105. ‘‘Tathāgato, bhikkhave, araham sammāsambuddho rūpassa nibbidā virāgā nirodhā anupādā vimutto sammāsambuddhoti vuccati. Bhikkhupi, bhikkhave, paññāvimutto rūpassa nibbidā virāgā nirodhā anupādā vimutto paññāvimuttoti vuccati.

‘‘Tathāgato, bhikkhave, araham sammāsambuddho vedanāya...pe... saññāya...pe... sañkhārānaṃ...pe... viññāṇassa nibbidā virāgā nirodhā anupādā vimutto sammāsambuddhoti vuccati. Bhikkhupi, bhikkhave, paññāvimutto viññāṇassa nibbidā virāgā nirodhā anupādā vimutto paññāvimuttoti vuccati.

‘‘Tatra kho, bhikkhave, ko viseso ko adhippayāso [[adhippāyo \(ka.\) passa saṃ. ni. 3.58](#)] kiṃ nānākaṇaṃ tathāgatassa arahato sammāsambuddhassa paññāvimuttena bhikkhunāti? Bhagavaṃmūlakā no, bhante, dhammā...pe...

‘‘Tathāgato, bhikkhave, araham sammāsambuddho anuppannassa maggassa uppādetā, asañjātassa maggassa sañjanetā, anakkhātassa maggassa akkhātā, maggaññū maggavidū maggakovido, maggānugā ca, bhikkhave, etarahi sāvakā viharanti pacchāsamannāgatā. Ayaṃ kho, bhikkhave, viseso, ayaṃ adhippayāso, idaṃ nānākaṇaṃ tathāgatassa arahato sammāsambuddhassa paññāvimuttena bhikkhunā’’ti.

Idaṃ asekkhabhāgiyaṃ suttaṃ.

106. Tattha katamaṃ saṃkilesabhāgiyaṅca vāsanābhāgiyaṅca suttaṃ?

“Channamativassati [passa udā. 45], vivaṭaṃ nātivassati;
Tasmā channaṃ vivaretha, evaṃ taṃ nātivassatī”ti.

“Channamativassatī”ti saṃkilesa, “vivaṭaṃ nātivassatī”ti vāsanā, “tasmā channaṃ vivaretha, evaṃ taṃ nātivassatī”ti ayaṃ saṃkilesa ca vāsanā ca. Idaṃ saṃkilesabhāgiyaṅca vāsanābhāgiyaṅca suttaṃ.

“Cattārome, mahārāja [bhikkhave (a. ni. 4.85)], puggalā santo saṃvijjamānā lokasmiṃ. Katame cattāro? Tamo tamaparāyaṇo tamo jotiparāyaṇo joti tamaparāyaṇo joti jotiparāyaṇo”ti. Tattha yo ca puggalo joti tamaparāyaṇo yo ca puggalo tamo tamaparāyaṇo, ime dve puggalā saṃkilesabhāgiyā, yo ca puggalo tamo jotiparāyaṇo yo ca puggalo joti jotiparāyaṇo, ime dve puggalā vāsanābhāgiyā. Idaṃ saṃkilesabhāgiyaṅca vāsanābhāgiyaṅca suttaṃ.

Tattha katamaṃ saṃkilesabhāgiyaṅca nibbedhabhāgiyaṅca suttaṃ?

“Na taṃ dalhaṃ bandhanamāhu dhīrā, yadāyasam dārujapabbajaṅca [dārujaṃ pabbajaṅca (saṃ. ni. 1.121)];
Sārattarattā maṇikuṇḍalesu, puttesu dāresu ca yā apekkhā”ti;
Ayaṃ saṃkilesa.

“Etaṃ dalhaṃ bandhanamāhu dhīrā, ohāriṇaṃ sithilaṃ duppamuñcaṃ;
Etampi chetvāna paribbajanti, anapekkhino kāmasukhaṃ pahāyā”ti.

Ayaṃ nibbedho. Idaṃ saṃkilesabhāgiyaṅca nibbedhabhāgiyaṅca suttaṃ.

107. “Yaṅca, bhikkhave, ceteti, yaṅca pakappeti, yaṅca anuseti. Ārammaṇametaṃ hoti viññāṇassa ṭhitiyā, ārammaṇe sati patitṭhā viññāṇassa hoti, tasmim patitṭhite viññāṇe virūlḥe āyatim [āyati (sī. ka.) passa saṃ. ni. 2.38] punabbhavābhiniḥbatti hoti, āyatim punabbhavābhiniḥbattiyā sati āyatim [āyati (sī. ka.) passa saṃ. ni. 2.38] jātijarāmarāṇaṃ sokaparidevadukkhadomanassupāyāsā sambhavanti, evametassa kevalassa dukkhakkhandhassa samudayo hoti.

“No ce, bhikkhave, ceteti, no ce pakappeti, atha ce anuseti. Ārammaṇametaṃ hoti viññāṇassa ṭhitiyā, ārammaṇe sati patitṭhā viññāṇassa [tassa viññāṇassa (sī. ka.) passa saṃ. ni. 2.38] hoti, tasmim patitṭhite viññāṇe virūlḥe āyatim punabbhavābhiniḥbatti hoti, āyatim punabbhavābhiniḥbattiyā sati āyatim jātijarāmarāṇaṃ sokaparidevadukkhadomanassupāyāsā sambhavanti, evametassa kevalassa dukkhakkhandhassa samudayo hotī”ti. Ayaṃ saṃkilesa.

“Yato ca kho, bhikkhave, no ceva [ca (sī. ka.)] ceteti, no ca pakappeti, no ca anuseti. Ārammaṇametaṃ na hoti viññāṇassa ṭhitiyā, ārammaṇe asati patitṭhā viññāṇassa na hoti, tasmim appatitṭhite viññāṇe avirūlḥe āyatim punabbhavābhiniḥbatti na hoti, āyatim punabbhavābhiniḥbattiyā asati āyatim jātijarāmarāṇaṃ sokaparidevadukkhadomanassupāyāsā nirujjhanti. Evametassa kevalassa dukkhakkhandhassa nirodho hotī”ti, ayaṃ nibbedho. Idaṃ saṃkilesabhāgiyaṅca nibbedhabhāgiyaṅca suttaṃ.

108. Tattha katamaṃ saṃkilesabhāgiyaṅca asekkhabhāgiyaṅca suttaṃ?

““Samuddo samuddo”ti kho, bhikkhave, assutavā puthujjano bhāsati, neso, bhikkhave, ariyassa vinaye samuddo, mahā eso bhikkhave, udakarāsi mahāudakaṇṇavo. Cakkhu, bhikkhave, purisassa samuddo, tassa rūpamayo vego. Ayaṃ saṃkilesa.

“Yo taṃ rūpamayaṃ vegaṃ sahati ayaṃ vuccati, bhikkhave, atari [atāri (sī. ka.) passa saṃ. ni. 4.228] cakkhusamuddaṃ saūmiṃ sāvattaṃ sagahaṃ [sagāhaṃ (saṃ. ni. 4.228)] sarakkhasaṃ tiṇṇo pāraṅgato thale tiṭṭhati brāhmaṇo”ti. Ayaṃ asekkho.

“Sotaṃ, bhikkhave...pe... ghānaṃ...pe... jivhā...pe... kāyo...pe... mano, bhikkhave, purisassa samuddo tassa dhammamayo vegoti. Ayaṃ saṃkilesa.

“Yo taṃ dhammamayaṃ vegaṃ sahati, ayaṃ vuccati, bhikkhave, atari manosamuddaṃ saūmiṃ sāvattaṃ sagahaṃ sarakkhasaṃ tiṇṇo pāraṅgato thale tiṭṭhati brāhmaṇo”ti. Ayaṃ asekkho. Idamavoca bhagavā, idaṃ vatvāna sugato, athāparaṃ etadavoca satthā –

“Yo imaṃ samuddaṃ sagahaṃ sarakkhasaṃ,
Saūmiṃ sāvattaṃ sabhayaṃ duttaraṃ accatari;
Sa vedantagū vusitabrahmacariyo, lokantagū pāragatoti vuccatī”ti.

Ayaṃ asekkho. Idaṃ saṃkilesabhāgiyaṅca asekkhabhāgiyaṅca suttaṃ.

“Chayime, bhikkhave, baḷisā lokasmiṃ anayāya sattānaṃ byābādhāya [vadhāya (saṃ. ni. 4.230)] pāṇīnaṃ. Katame cha? Santi, bhikkhave, cakkhaviññeyyā rūpā iṭṭhā kantā manāpā piyarūpā kāmūpasamhitā rajanīyā, tañce bhikkhu abhinandati abhivadati ajjhosāya tiṭṭhati, ayaṃ vuccati, bhikkhave, bhikkhu gilitabaḷiso [gilabaḷiso (sī. ka.) passa saṃ. ni. 4.230] mārassa anayaṃ āpanno, byasanaṃ āpanno, yathākāmaṃ karaṇīyo pāpimato.

“Santi, bhikkhave, sotaviññeyyā saddā...pe... ghānaviññeyyā gandhā...pe... jivhāviññeyyā rasā...pe... kāyaviññeyyā phoṭṭhabbā...pe... manoviññeyyā dhammā iṭṭhā kantā manāpā piyarūpā kāmūpasamhitā rajanīyā, tañce bhikkhu abhinandati abhivadati ajjhosāya tiṭṭhati. Ayaṃ vuccati, bhikkhave, bhikkhu gilitabaḷiso mārassa anayaṃ āpanno, byasanaṃ āpanno, yathākāmaṃ karaṇīyo [yathākāmakaraṇīyo (sī.) saṃ. ni. 4.230] pāpimato”ti. Ayaṃ saṃkilesa.

“Santi ca, bhikkhave, cakkhaviññeyyā rūpā iṭṭhā kantā manāpā piyarūpā kāmūpasamhitā rajanīyā, tañce bhikkhu nābhinandati nābhivadati nājhosāya tiṭṭhati, ayaṃ vuccati, bhikkhave, bhikkhu na gilitabaḷiso mārassa, abhedi baḷisaṃ, paribhedi baḷisaṃ, na anayaṃ āpanno, na byasanaṃ āpanno, na yathākāmaṃ karaṇīyo pāpimato.

“Santi ca, bhikkhave, sotaviññeyyā saddā...pe... manoviññeyyā dhammā iṭṭhā kantā manāpā piyarūpā kāmūpasamhitā rajanīyā, tañce bhikkhu nābhinandati nābhivadati, nājhosāya tiṭṭhati. Ayaṃ vuccati, bhikkhave, bhikkhu na gilitabaḷiso mārassa, abhedi baḷisaṃ, paribhedi baḷisaṃ, na anayaṃ āpanno, na byasanaṃ āpanno, na yathākāmaṃ karaṇīyo pāpimato”ti. Ayaṃ asekkho. Idaṃ saṃkilesabhāgiyaṅca asekkhabhāgiyaṅca suttaṃ.

109. Tattha katamaṃ saṃkilesabhāgiyaṅca nibbedhabhāgiyaṅca asekkhabhāgiyaṅca suttaṃ?

“Ayaṃ loko santāpajāto, phassapareto rogaṃ vadati attato [attano (sī. ka.) passa udā. 30]; Yena yena hi maññati [maññanti (sī. ka.)], tato taṃ hoti aññathā.

“Aññathābhāvī bhavasatto loko, bhavapareto bhavamevābhinandati;
Yadabhinandati taṃ bhayaṃ;
Yassa bhāyati taṃ dukkha”nti; Ayaṃ saṃkilesa.

“Bhavavippahānāya kho panidaṃ brahmacariyaṃ vussatī”ti; Ayaṃ nibbedho;

“Ye hi keci samaṇā vā brāhmaṇā vā bhavena bhavassa vip̄pamokkhamāhaṃsu, sabbe te ‘avippamuttā bhavasmā’ ti vadāmi. Ye vā pana keci samaṇā vā brāhmaṇā vā vibhavana bhavassa nissaraṇamāhaṃsu, sabbe te ‘anissaṭṭā bhavasmā’ ti vadāmi. Upadhiṃ [upadhi (sī. ka.) passa udā. 30] hi paṭicca dukkhamidaṃ sambhotī” ti. Ayaṃ saṃkilesa.

“Sabbupādānakkhayā natthi dukkhassa sambhavo” ti. Ayaṃ nibbedho.

“Lokamimaṃ passa, puthū avijjāya paretā bhūtā bhūtaratā, bhavā aparimuttā, ye hi keci bhavā sabbadhi sabbatthatāya, sabbe te bhavā aniccā dukkhā vipariṇāmadhammā” ti. Ayaṃ saṃkilesa.

“Evametam yathābhūtam, sammappaññāya passato;
Bhavataṇhā pahīyati, vibhavaṃ nābhinandati;
Sabbaso taṇhānaṃ khayā, asesavirāganirodho nibbāna’ nti;
Ayaṃ nibbedho.

“Tassa nibbutassa bhikkhuno, anupādā punabbhavo na hoti;
Abhibhūto māro vijitasāṅgāmo, upaccagā sabbabhavāni tādi’ ti.

Ayaṃ asekkho. Idaṃ saṃkilesabhāgiyaṅca nibbedhabhāgiyaṅca asekkhabhāgiyaṅca suttaṃ.

“Cattārome, bhikkhave [passa a. ni. 4.5], puggalā. Katame cattāro? Anusotagāmī paṭisotagāmī ṭhitatto tiṇṇo pāraṅgato thale tiṭṭhati brāhmaṇo” ti. Tattha yoyaṃ puggalo anusotagāmī, ayaṃ puggalo saṃkilesabhāgiyo. Tattha yoyaṃ puggalo paṭisotagāmī yo ca ṭhitatto, ime dve puggalā nibbedhabhāgiyā. Tattha yoyaṃ puggalo tiṇṇo pāraṅgato thale tiṭṭhati brāhmaṇo, ayaṃ asekkho. Idaṃ saṃkilesabhāgiyaṅca nibbedhabhāgiyaṅca asekkhabhāgiyaṅca suttaṃ.

110. Tattha katamaṃ saṃkilesabhāgiyaṅca vāsanābhāgiyaṅca nibbedhabhāgiyaṅca suttaṃ?

Chaḷābhijātiko atthi puggalo kaṇho kaṇhābhijātiko kaṇhaṃ dhammaṃ abhijāyati, atthi puggalo kaṇho kaṇhābhijātiko sukkaṃ dhammaṃ abhijāyati, atthi puggalo kaṇho kaṇhābhijātiko akaṇhaṃ asukkaṃ akaṇhaasukkavipākaṃ accantadiṭṭhaṃ [antaṃ niṭṭhaṃ (sī.)] nibbānaṃ ārādheti, atthi puggalo sukko sukkābhijātiko kaṇhaṃ dhammaṃ abhijāyati, atthi puggalo sukko sukkābhijātiko sukkaṃ dhammaṃ abhijāyati, atthi puggalo sukko sukkābhijātiko akaṇhaṃ asukkaṃ akaṇhaasukkavipākaṃ accantadiṭṭhaṃ nibbānaṃ ārādheti.

Tattha yo ca puggalo kaṇho kaṇhābhijātiko kaṇhaṃ dhammaṃ abhijāyati, yo ca puggalo sukko sukkābhijātiko kaṇhaṃ dhammaṃ abhijāyati, ime dve puggalā saṃkilesabhāgiyā.

Tattha yo ca puggalo kaṇho kaṇhābhijātiko sukkaṃ dhammaṃ abhijāyati, yo ca puggalo sukko sukkābhijātiko sukkaṃ dhammaṃ abhijāyati, ime dve puggalā vāsanābhāgiyā.

Tattha yo ca puggalo kaṇho kaṇhābhijātiko akaṇhaṃ asukkaṃ akaṇhaasukkavipākaṃ accantadiṭṭhaṃ nibbānaṃ ārādheti, yo ca puggalo sukko sukkābhijātiko akaṇhaṃ asukkaṃ akaṇhaasukkavipākaṃ accantadiṭṭhaṃ nibbānaṃ ārādheti, ime dve puggalā nibbedhabhāgiyā, idaṃ saṃkilesabhāgiyaṅca vāsanābhāgiyaṅca nibbedhabhāgiyaṅca suttaṃ.

“Cattārimāni, bhikkhave [passa a. ni. 4.232-233], kammāni. Katamāni cattāri? Atthi kammaṃ kaṇhaṃ kaṇhavipākaṃ, atthi kammaṃ sukkaṃ sukkavipākaṃ, atthi kammaṃ kaṇhasukkaṃ kaṇhasukkavipākaṃ, atthi kammaṃ akaṇhaṃ asukkaṃ akaṇhaasukkavipākaṃ kammuttamaṃ kammasetṭhaṃ kammakkhayāya saṃvattati”.

Tattha yañca kammaṃ kaṇhaṃ kaṇhavipākaṃ, yañca kammaṃ kaṇhasukkaṃ kaṇhasukkavipākaṃ, ayaṃ saṃkilesa. Yañca kammaṃ sukkaṃ sukkaṃvipākaṃ, ayaṃ vāsanā. Yañca kammaṃ akaṇhaṃ asukkaṃ akaṇhaasukkavipākaṃ kammuttamaṃ kammaseṭṭhaṃ kammakkhayāya saṃvattati, ayaṃ nibbedho. Idaṃ saṃkilesabhāgiyañca vāsanābhāgiyañca nibbedhabhāgiyañca suttaṃ.

111. Tattha katamaṃ vāsanābhāgiyañca, nibbedhabhāgiyañca suttaṃ?

“Laddhāna mānusattaṃ dve, kiccaṃ akiccameva ca;
Sukiccaṃ ceva puññāni, saṃyojanavippahānaṃ vā”ti.

“Sukiccaṃ ceva puññāni”ti vāsanā. “Saṃyojanavippahānaṃ vā”ti nibbedho.

“Puññāni karitvāna, saggā saggam vajanti katapuññā;
Saṃyojanappahānā, jarāmaraṇā vippamuccanti”ti.

“Puññāni karitvāna, saggā saggam vajanti katapuññā”ti vāsanā. “Saṃyojanappahānā jarāmaraṇā vippamuccanti”ti nibbedho. Idaṃ vāsanābhāgiyañca nibbedhabhāgiyañca suttaṃ.

“Dvemāni, bhikkhave, padhānāni [passa a. ni. 2.2]. Katamāni dve? Yo ca agāasmā anagāriyaṃ pabbajitesu cīvarapiṇḍapātasenāsanagilānapaccayabhesajjaparikkhāraṃ pariccajati, yo ca agāasmā anagāriyaṃ pabbajitesu sabbūpadhipaṭinissaggo taṇhakkhayo virāgo nirodho nibbāna”nti. Tattha yo agāasmā anagāriyaṃ pabbajitesu cīvarapiṇḍapātasenāsanagilānapaccayabhesajjaparikkhāraṃ pariccajati, ayaṃ vāsanā.

Yo agāasmā anagāriyaṃ pabbajitesu sabbūpadhipaṭinissaggo taṇhakkhayo virāgo nirodho nibbānaṃ, ayaṃ nibbedho. Idaṃ vāsanābhāgiyañca nibbedhabhāgiyañca suttaṃ.

Tattha taṇhāsaṃkilesabhāgiyaṃ suttaṃ taṇhāpakkheneva niddisitabbaṃ tīhi taṇhāhi – kāmataṇhāya bhavataṇhāya vibhavataṇhāya. Yena yena vā pana vatthunā ajjhositā, tena teneva niddisitabbaṃ, tassā vitthāro chattimṣataṇhājāliniyāvicaritāni.

Tattha diṭṭhisamkilesabhāgiyaṃ suttaṃ diṭṭhipakkheneva niddisitabbaṃ ucchedasassatena, yena yena vā pana vatthunā diṭṭhivasena abhinivisati “idameva saccaṃ moghamañña”nti, tena teneva niddisitabbaṃ, tassā vitthāro dvāsaṭṭhiditṭhigatāni.

Tattha duccharitasamkilesabhāgiyaṃ suttaṃ cetanāya cetasikakammaena niddisitabbaṃ tīhi duccharitehi – kāyaduccharitena vacīduccaritena manoduccharitena, tassa vitthāro dasaakusalakammamathā.

Tattha taṇhāvodānabhāgiyaṃ suttaṃ samathena niddisitabbaṃ, diṭṭhivodānabhāgiyaṃ suttaṃ vipassanā niddisitabbaṃ, duccharitavodānabhāgiyaṃ suttaṃ sucaritena niddisitabbaṃ. Tīhi akusalamūlāni. Taṃ kissa hetu? Saṃsārassa nibbattiyā. Tathā nibbatte saṃsāre kāyaduccharitaṃ kāyasucaritaṃ vacīduccaritaṃ vacīsucaritaṃ manoduccharitaṃ manosucaritaṃ iminā asubhena kammavipākena idaṃ bālalakkhaṇaṃ nibbattatīti. Idaṃ saṃkilesabhāgiyaṃ suttaṃ.

Iminā subhena kammavipākena idaṃ mahāpurisalakkhaṇaṃ nibbattatīti. Idaṃ vāsanābhāgiyaṃ suttaṃ.

Tattha saṃkilesabhāgiyaṃ suttaṃ catūhi kilesabhūmīhi niddisitabbaṃ – anusayabhūmiyā pariyuṭṭhānabhūmiyā saṃyojanabhūmiyā upādānabhūmiyā. Sānusayassa pariyuṭṭhānaṃ jāyati, pariyuṭṭhito saṃyujjati, saṃyujjanto upādiyati, upādānapaccayā bhavo, bhavapaccayā jāti, jātipaccayā jarāmaraṇaṃ sokaparidevadukkhadomanassupāyāsā sambhavanti, evametassa kevalassa

dukkhakkhandhassa samudayo hoti. Imāhi catūhi kilesabhūmīhi sabbe kilesā saṅgahaṃ samosaraṇaṃ gacchanti, idaṃ saṃkilesabhāgiyaṃ suttaṃ.

Vāsanābhāgiyaṃ suttaṃ tīhi sucaritehi niddisitabbaṃ, nibbedhabhāgiyaṃ suttaṃ catūhi saccehi niddisitabbaṃ, asekkhabhāgiyaṃ suttaṃ tīhi dhammehi niddisitabbaṃ – buddhadhammehi paccekabuddhadhammehi sāvaka bhūmiyā. Jhāyivisaye niddisitabbanti.

112. Tattha katame aṭṭhārasa mūlapadā? Lokiyaṃ lokuttaraṃ lokiyañca lokuttarañca, sattādhiṭṭhānaṃ dhammādhiṭṭhānaṃ sattādhiṭṭhānañca dhammādhiṭṭhānañca, ñāṇaṃ ñeyyaṃ ñāṇañca ñeyyañca, dassanaṃ bhāvanā dassanañca bhāvanā ca, sakavacanaṃ paravacanaṃ sakavacanañca paravacanañca, visajjanīyaṃ avisajjanīyaṃ visajjanīyañca avisajjanīyañca, kammaṃ vipāko kammañca vipāko ca, kusalaṃ akusalaṃ kusalañca akusalañca, anuññātaṃ paṭikkhitaṃ anuññātañca paṭikkhitañca, thavo cāti.

Tattha katamaṃ lokiyaṃ?

“Na hi pāpaṃ kataṃ kammaṃ, sajjukhīraṃva muccati;
Dahantaṃ [dahantaṃ (sī. ka.) passa dha. pa. 71] bālaṃveti, bhasmacchannova
[bhasmāchannova (ka.)] pāvakoti.

Idaṃ lokiyaṃ.

“Cattārimāni, bhikkhave, agatigamanāni sabbaṃ...pe... nihīyate tassa yaso kālapakkheva candimā”ti. Idaṃ lokiyaṃ.

“Aṭṭhime, bhikkhave, lokadhammā [passa a. ni. 8.6]. Katame aṭṭha? Lābho alābho, yaso ayaso, nindā pasamsā, sukhaṃ dukkhaṃ. Ime kho, bhikkhave, aṭṭha lokadhammā”ti. Idaṃ lokiyaṃ.

Tattha katamaṃ lokuttaraṃ?

“Yassindriyāni samathaṅgatāni [samathaṃ gatāni (sī.) passa dha. pa. 94]; Assā yathā sārathinā sudantā;
Pahīnamānassa anāsavassa, devāpi tassa pihayanti tādino”ti.

Idaṃ lokuttaraṃ.

“Pañcimāni, bhikkhave, indriyāni lokuttarāni. Katamāni pañca? Saddhindriyaṃ vīriyindriyaṃ satindriyaṃ samādhindriyaṃ paññindriyaṃ. Imāni kho, bhikkhave, pañcindriyāni lokuttarāni”ti. Idaṃ lokuttaraṃ.

Tattha katamaṃ lokiyañca lokuttarañca?

“Laddhāna mānusaṃ dve, kiccaṃ akiccameva cā”ti dve gāthā. Yaṃ iha “sukiccaṃ ceva puññāni”ti ca “puññāni karitvāna, saggā saggāṃ vajanti katapuññā”ti ca. Idaṃ lokiyaṃ.

Yaṃ iha “saṃyojanavippahānaṃ vā”ti ca “saṃyojanappahānā, jarāmaraṇā vippamuccantī”ti ca, idaṃ lokuttaraṃ. Idaṃ lokiyañca lokuttarañca.

“Viññāṇe ce, bhikkhave, āhāre sati nāmarūpassa avakkanti hoti, nāmarūpassa avakkantiyā sati punabbhavo hoti, punabbhavo sati jāti hoti, jātiyā sati jarāmaraṇaṃ

sokaparidevadukkhadomanassupāyāsā sambhavanti. Evametassa kevalassa dukkhakkhandhassa samudayo hoti. Seyyathāpi, bhikkhave [passa sam. ni. 2.55], mahārukkho, tassa yāni ceva mūlāni adhogamāni yāni ca tiriyam gamāni, sabbāni tāni uddham ojaṃ abhiharanti. Evaṃ hi so, bhikkhave, mahārukkho tadāhāro tadupādāno ciraṃ dīghamaddhānaṃ tiṭṭheyya. Evameva kho, bhikkhave, viññāṇe āhāre sati nāmarūpassa avakkanti hoti sabbam...pe... evametassa kevalassa dukkhakkhandhassa samudayo hoti”ti. Idam lokiyam.

“Viññāṇe ce, bhikkhave, āhāre asati nāmarūpassa avakkanti na hoti, nāmarūpassa avakkantiyā asati punabbhavo na hoti, punabbhavo asati jāti na hoti, jātiyā asati jarāmaṇaṃ sokaparidevadukkhadomanassupāyāsā nirujjhanti. Evametassa kevalassa dukkhakkhandhassa nirodho hoti. Seyyathāpi, bhikkhave, mahārukkho atha puriso āgaccheyya kuddālapīṭakaṃ [kudālapīṭakaṃ (ka.)] ādāya, so taṃ rukkhamaṃ mūle chindeyya, mūle [mūlam (sam. ni. 2.55)] chetvā palikhaṇeyya, palikhaṇitvā mūlāni uddhareyya antamaso usīranālimattānīpi. So taṃ rukkhamaṃ khaṇḍākhāṇḍikamaṃ chindeyya, khaṇḍākhāṇḍikamaṃ chinditvā [chitvā (sī. ka.)] phāleyya, phāletvā sakalikaṃ sakalikaṃ kareyya, sakalikaṃ sakalikaṃ karitvā vātātape visoseyya, vātātape visosetvā agginā ḍaheyya, agginā ḍahetvā masiṃ kareyya, masiṃ karitvā mahāvāte vā ophuneyya, nadiyā vā sīghasotāya pavāheyya, evaṃ hi so, bhikkhave, mahārukkho ucchinnamūlo assa tālavatthukato anabhāvaṃkato [anabhāvaṃgato (sī.)] āyatim anuppādadhammo. Evameva kho, bhikkhave, viññāṇe āhāre asati nāmarūpassa avakkanti na hoti, nāmarūpassa avakkantiyā asati sabbam...pe... evametassa kevalassa dukkhakkhandhassa nirodho hoti”ti. Idam lokuttaram. Idam lokiyañca lokuttarañca.

113. Tattha katamaṃ sattādhiṭṭhānaṃ?

“Sabbā disā anuparigamma cetasā, nevajjhagā piyataramattanā kvaci; Evaṃ piyo puthu attā paresam, tasmā na hiṃse paramattakāmo”ti [param attakāmoti (sī.) sam. ni. 1.119; udā. 41 passitabbaṃ].

Idam sattādhiṭṭhānaṃ.

“Ye keci bhūtā bhavissanti ye vāpi [ca (sī. ka.) passa udā. 42], sabbe gamissanti pahāya dehaṃ; Taṃ sabbajāniṃ kusalo viditvā, ātāpiyo [ātāpī so (sī. ka.) passa udā. 42] brahmacariyam careyyā”ti.

Idam sattādhiṭṭhānaṃ.

“Sattahi, bhikkhave, aṅgehi samannāgataṃ kalyāṇamittaṃ api viveciyamānena paṇāmiyamānena gale pisanamajjamānena [galepi pamajjamānena (sī.)] yāvajīvamaṃ na vijahitabbaṃ. Katamehi sattahi? Piyo ca hoti manāpo ca garu ca bhāvanīyo ca vattā ca vacanakkhamaṃ ca gambhīrañca kathaṃ kattā hoti, no ca aṭṭhāne [na ca aṭṭhāne (sī. ka.) passa a. ni. 7.37] niyojeti. Imehi kho, bhikkhave, sattahi...pe... na vijahitabbaṃ. Idamavoca bhagavā, idam vatvāna sugato. Athāparaṃ etadavoca satthā –

“Piyo garu bhāvanīyo, vattā ca vacanakkhamaṃ;
Gambhīrañca kathaṃ kattā, na caṭṭhāne niyojako;
Taṃ mittaṃ mittakāmena, yāvajīvampi seviya”nti.

Idam sattādhiṭṭhānaṃ.

Tattha katamaṃ dhammādhiṭṭhānaṃ?

“Yañca kāmasukhaṃ loke, yañcidam diviyam sukhaṃ;

Taṇhakkhayasukhassete [taṇhakkhayā sukhassete (sī.) passa udā. 12], kamaṃ nāgghanti soḷasi’’nti.

Idaṃ dhammādhīṭṭhānaṃ.

‘‘Susukhaṃ [passa theragā. 227] vata nibbānaṃ, sammāsambuddhadesitaṃ; Asokaṃ virajaṃ khemaṃ, yattha dukkhaṃ nirujjhatī’’ti.

Idaṃ dhammādhīṭṭhānaṃ.

Tattha katamaṃ sattādhīṭṭhānaṃca dhammādhīṭṭhānaṃca

‘‘Mātaraṃ pitaraṃ hantvā, rājāno dve ca khattiye;
Raṭṭhaṃ sānucaraṃ hantvā’’ti idaṃ dhammādhīṭṭhānaṃ.

‘‘Anīgho yāti brāhmaṇo’’ti; Idaṃ sattādhīṭṭhānaṃ;
Idaṃ sattādhīṭṭhānaṃca dhammādhīṭṭhānaṃca.

‘‘Cattārome, bhikkhave, iddhipādā [passa iddhipādasamyutte]. Katame cattāro?
Chandasamādhīpadhānaṃsaṅkhārasamannāgato iddhipādo, vīriya...pe... citta.
Vīmaṃsāsamādhīpadhānaṃsaṅkhārasamannāgato iddhipādo’’ti. Idaṃ dhammādhīṭṭhānaṃ.

So kāyepi cittaṃ samodahati, cittepi kāyaṃ samodahati, kāye sukhasaññaṃca lahusaññaṃca okkamitvā upasampajja viharati. Idaṃ sattādhīṭṭhānaṃ, idaṃ sattādhīṭṭhānaṃca dhammādhīṭṭhānaṃca.

114. Tattha katamaṃ ñāṇaṃ?

‘‘Yaṃ taṃ lokuttaraṃ ñāṇaṃ, sabbaññū yena vuccati;
Na tassa parihānatthi, sabbakāle pavattatī’’ti.

Idaṃ ñāṇaṃ.

‘‘Paññā hi seṭṭhā lokasmiṃ, yāyaṃ nibbānagāminī [nibbedhagāminī (itivu. 41)];
Yāya sammā pajānāti, jātīmaraṇasaṅkhaya’’nti.

Idaṃ ñāṇaṃ.

Tattha katamaṃ ñeyyaṃ?

‘‘Kittayissāmi te [vo (sī. ka.) passa su. ni. 1072] santiṃ, [dhotakāti bhagavā],
Diṭṭhe dhamme anītihaṃ;
Yaṃ viditvā sato caraṃ, tare loke visattikaṃ.

‘‘Tañcāhaṃ abhinandāmi, mahesi santimuttamaṃ;
Yaṃ viditvā sato caraṃ, tare loke visattikaṃ.

‘‘Yaṃ kiñci sampajānāsi, [dhotakāti bhagavā]
Uddhaṃ adho tiriyañcāpi majjhe;
Etaṃ viditvā saṅgoti loke,
Bhavābhavāya mākāsi taṇha’’nti.

Idaṃ ñeyyaṃ.

“Catunnaṃ, bhikkhave, ariyasaccānaṃ ananubodhā appaṭivedhā evamidaṃ dīghamaddhānaṃ sandhāvitaṃ saṃsaritaṃ mamañceva tumhākañca...pe... tayidaṃ, bhikkhave, dukkhaṃ ariyasaccaṃ anubuddhaṃ paṭividdhaṃ, dukkhasamudayaṃ [dukkhasamudayo (sī. ka.) passa dī. ni. 2.155] ariyasaccaṃ anubuddhaṃ paṭividdhaṃ, dukkhanirodhaṃ [dukkhanirodho (sī. ka.)] ariyasaccaṃ anubuddhaṃ paṭividdhaṃ, dukkhanirodhagāminī paṭipadā ariyasaccaṃ anubuddhaṃ paṭividdhaṃ. Ucchinnā bhavataṅhā, khīṇā bhavanetti, natthi dāni punabbhavo”ti. Idamavoca bhagavā, idaṃ vatvāna sugato, athāparaṃ etadavoca satthā –

“Catunnaṃ ariyasaccānaṃ, yathābhūtaṃ adassanā;
Saṃsitaṃ [saṃsaritaṃ (sī.)] dīghamaddhānaṃ, tāsu tāsveva jātisu.

“Tāni etāni diṭṭhāni, bhavanetti samūhatā;
Ucchinnaṃ mūlaṃ dukkhassa, natthi dāni punabbhavo”ti.

Idaṃ ñeyyaṃ.

Tattha katamaṃ ñāṇaṃ ñeyyaṃ? Rūpaṃ aniccaṃ, vedanā aniccā, saññā aniccā, saṅkhārā aniccā, viññāṇaṃ aniccanti. Idaṃ ñeyyaṃ.

Evaṃ jānaṃ evaṃ passaṃ ariyasāvako “rūpaṃ anicca”nti passati, “vedanā aniccā”ti passati, “saññaṃ...pe... saṅkhāre...pe... viññāṇaṃ anicca”nti passatīti. Idaṃ ñāṇaṃ.

So parimuccati rūpena, parimuccati vedanāya, parimuccati saññāya, parimuccati saṅkhārehi, parimuccati viññāṇamhā, parimuccati dukkhasmāti vadāmīti. Idaṃ ñāṇaṃ ñeyyaṃ.

“Sabbe saṅkhārā aniccā”ti idaṃ ñeyyaṃ. “Yadā paññāya passatī”ti idaṃ ñāṇaṃ. “Atha nibbindati dukkhe esa maggo visuddhiyā”ti idaṃ ñāṇaṃ ñeyyaṃ.

“Sabbe saṅkhārā dukkhā”ti idaṃ ñeyyaṃ. “Yadā paññāya passatī”ti idaṃ ñāṇaṃ. “Atha nibbindati dukkhe esa maggo visuddhiyā”ti idaṃ ñāṇaṃ ñeyyaṃ.

“Sabbe dhammā anattā”ti idaṃ ñeyyaṃ. “Yadā paññāya passatī”ti idaṃ ñāṇaṃ. “Atha nibbindati dukkhe esa maggo visuddhiyā”ti idaṃ ñāṇaṃ ñeyyaṃ.

“Ye hi keci, soṇa [passa saṃ. ni. 3.49], samaṇā vā brāhmaṇā vā aniccena rūpena dukkhena vipariṇāmadhammena ‘seyyohamasmī’ti vā samanupassanti, ‘sadiśohamasmī’ti vā samanupassanti, ‘hīnohamasmī’ti vā samanupassanti. Kimaññatra yathābhūtaṃ adassanā. Aniccāya vedanāya...pe... aniccāya saññāya...pe... aniccehi saṅkhārehi...pe... aniccena viññāṇena dukkhena vipariṇāmadhammena ‘seyyohamasmī’ti vā samanupassanti, ‘sadiśohamasmī’ti vā samanupassanti, ‘hīnohamasmī’ti vā samanupassanti, kimaññatra yathābhūtaṃ adassanā”ti. Idaṃ ñeyyaṃ.

“Ye ca kho keci, soṇa, samaṇā vā brāhmaṇā vā aniccena rūpena dukkhena vipariṇāmadhammena ‘seyyohamasmī’tipi na samanupassanti, ‘sadiśohamasmī’tipi na samanupassanti, ‘hīnohamasmī’tipi na samanupassanti, kimaññatra yathābhūtaṃ adassanā. Aniccāya vedanāya...pe... aniccāya saññāya...pe... aniccehi saṅkhārehi...pe... aniccena viññāṇena dukkhena vipariṇāmadhammena ‘seyyohamasmī’tipi na samanupassanti, ‘sadiśohamasmī’tipi na samanupassanti, ‘hīnohamasmī’tipi na samanupassanti, kimaññatra yathābhūtaṃ adassanāti. Idaṃ ñāṇaṃ.

Idaṃ ñāṇaṃ ñeyyaṃ.

Tattha katamaṃ dassanaṃ?

115. “Ye ariyasaccāni vibhāvayanti, gambhīrapañña sudesitāni;
Kiñcāpi te honti bhusaṃ pamattā [bhusappamattā (sī.) passa khu. pā. 609], na te bhavaṃ
aṭṭhamamādiyanti”ti.

Idaṃ dassanaṃ.

“Yathindakhīlo pathavissito siyā, catubbhi vātehi asampakampiyo;
Tathūpamaṃ sappurisaṃ vadāmi, yo ariyasaccāni avecca passatī”ti.

Idaṃ dassanaṃ.

“Catūhi, bhikkhave, sotāpattiyaṅgehi samannāgato ariyasāvako ākaṅkhamāno attanāva attānaṃ byākareyya ‘khīṇanirayomhi, khīṇatiracchāyoni, khīṇapettivisaṃ, khīṇāpāyaduggativinipāto, sotāpannohamasmi avinipātadhammo niyato sambodhiparāyaṇo, sattakkhattuparamaṃ [sattakkhattuparamo (sī.)] deve ca manusse ca sandhāvitvā saṃsaritvā dukkhassantaṃ karissāmī”ti. Katamehi catūhi? Idha, bhikkhave, ariyasāvakassa tathāgate saddhā nivīṭṭhā patīṭṭhitā virūḷhā mūlajāta asaṃhāriyā samaṇena vā brāhmaṇena vā devena vā mārena vā brahmunā vā kenaci vā lokasmiṃ saha dhammena, dhamme kho pana niṭṭhaṃ gato hoti, svākkhāto bhagavatā dhammo sandiṭṭhiko akāliko ehipassiko opaneyyiko paccattaṃ veditabbo viññūhi, yadidaṃ madanimmadano...pe... nirodho nibbānaṃ, saha dhammiyā kho panassa honti iṭṭhā kantā piyā manāpā gihī ceva pabbajitā ca. Ariyakantehi kho pana sīlehi samannāgato hoti akhaṇḍehi acchiddehi asabalehi akammāsehi bhujissehi viññūppasaṭṭhehi aparāmaṭṭhehi samādhisaṃvattanikehi. Imehi kho, bhikkhave, catūhi sotāpattiyaṅgehi samannāgato ariyasāvako ākaṅkhamāno attanāva attānaṃ byākareyya ‘khīṇanirayomhi, khīṇatiracchāyoni, khīṇapettivisaṃ, khīṇāpāyaduggativinipāto, sotāpannohamasmi avinipātadhammo niyato sambodhiparāyaṇo, sattakkhattuparamaṃ deve ca manusse ca sandhāvitvā saṃsaritvā dukkhassantaṃ karissāmī”ti.

Idaṃ dassanaṃ.

Tattha katamā bhāvanā?

“Yassindriyāni bhāvitāni [subhāvitāni (sī. ka.) passa su. ni. 512], ajjhattaṃ bahiddhā ca sabbaloke;
Nibbijjha imaṃ parañca lokaṃ, kālaṃ kaṅkhati bhāvito sadanto”ti.

Ayaṃ bhāvanā.

“Cattārimāni, bhikkhave, dhammapadāni [passa a. ni. 4.29]. Katamāni cattāri? Anabhijjhā dhammapadaṃ, abyāpādo dhammapadaṃ, sammāsati dhammapadaṃ, sammāsamādhi dhammapadaṃ, imāni kho, bhikkhave, cattāri dhammapadāni”ti. Ayaṃ bhāvanā.

Tattha katamaṃ dassanañca bhāvanā ca? “Pañca chinde pañca jahe”ti idaṃ dassanaṃ. “Pañca cuttari bhāvaye. Pañca saṅgātigo bhikkhu, oghatiṇṇoti vuccatī”ti ayaṃ bhāvanā. Idaṃ dassanañca bhāvanā ca.

“Tīṇimāni, bhikkhave, indriyāni [passa saṃ. ni. 5.493]. Katamāni tīṇi, anaññātaññassāmītindriyaṃ aññindriyaṃ aññātāvindriyaṃ. Katamañca, bhikkhave, anaññātaññassāmītindriyaṃ? Idha, bhikkhave, bhikkhu anabhisametassa dukkhassa ariyasaccassa abhisamayāya chandaṃ janeti vāyamati vīriyaṃ ārabhati cittaṃ paggaṇhāti padahati, anabhisametassa dukkhasamudayassa ariyasaccassa...pe...

dukkhanirodhassa...pe... dukkhanirodhagāminiyā paṭipadāya ariyasaccassa abhisamayāya chandaṃ janeti vāyamati vīriyaṃ ārabhati cittaṃ paggaṇhāti padahati. Idaṃ, bhikkhave, anaññātāññassāmītindriya”nti. Idaṃ dassanaṃ.

“Katamañca, bhikkhave, aññindriyaṃ? Idha, bhikkhave, bhikkhu ‘idaṃ dukkha’nti yathābhūtaṃ pajānāti, ‘ayaṃ dukkhasamudayo’ti yathābhūtaṃ pajānāti, ‘ayaṃ dukkhanirodho’ti...pe... ‘ayaṃ dukkhanirodhagāminī paṭipadā’ti yathābhūtaṃ pajānāti. Idaṃ, bhikkhave, aññindriyaṃ.

“Katamañca, bhikkhave, aññātāvindriyaṃ? Idha, bhikkhave, bhikkhu āsavānaṃ khayā anāsavaṃ cetovimuttiṃ paññāvimuttiṃ diṭṭheva dhamme sayamañ abhiññā sacchikatvā upasampajja viharati, khīṇā jāti, vusitaṃ brahmacariyaṃ, kataṃ karaṇiyaṃ nāparaṃ itthattāyāti pajānāti. Idaṃ, bhikkhave, aññātāvindriya”nti. Ayaṃ bhāvanā.

Idaṃ dassanañca bhāvanā ca.

116. Tattha katamaṃ sakavacanaṃ?

“Sabbapāpassa akaraṇaṃ, kusalassa upasampadā;
Sacittapariyodāpanaṃ, etaṃ buddhāna sāsana”nti.

Idaṃ sakavacanaṃ.

“Tṇimāni, bhikkhave, bālassa bālalakkhaṇāni bālanimittāni bālāpadānāni, yehi bālaṃ bāloti pare sañjānanti. Katamāni tṇi? Bālo, bhikkhave, duccintitacintī ca hoti, dubbhāsitaḥāsī ca hoti, dukkaṭakammaḥārī [dukkatakammaḥārī (sī.) ma. ni. 3.246; a. ni. 3.3 passitabbaṃ] ca hoti. Imāni kho, bhikkhave, tṇi bālassa bālalakkhaṇāni bālanimittāni bālāpadānāni.

“Tṇimāni, bhikkhave, paṇḍitassa paṇḍitalakkhaṇāni paṇḍitanimittāni paṇḍitāpadānāni, yehi paṇḍitaṃ paṇḍitoti pare sañjānanti. Katamāni tṇi? Paṇḍito, bhikkhave, sucintitacintī ca hoti, subhāsitaḥāsī ca hoti, sukatakammaḥārī ca hoti. Imāni kho, bhikkhave, tṇi paṇḍitassa paṇḍitalakkhaṇāni paṇḍitanimittāni paṇḍitāpadānāni”ti.

Idaṃ sakavacanaṃ.

Tattha katamaṃ paravacanaṃ?

“Pathavīsamo natthi vitthato, ninno pātālasamo na vijjati;
Merusamo natthi unnato, cakkavattisadiso natthi poriso”ti.

Idaṃ paravacanaṃ.

“Hotu, devānaminda, subhāsitena jayoti. Hotu, vepacitti subhāsitena jayoti. Bhaṇa, vepacitti, gātha”nti. Atha kho, bhikkhave, vepacitti asurindo imaṃ gāthaṃ abhāsi –

“Bhiyyo bālā pabhijjeyyumaṃ [pakujjheyymaṃ (sī. ka.) passa saṃ. ni. 1.251], no cassa paṭisedhako;
Tasmā bhusena daṇḍena, dhīro bālaṃ nisedhaye”ti.

“Bhāsītāya kho pana, bhikkhave, vepacittinā asurindena gāthāya asurā anumodimsu, devā tuṇhī ahesuma. Atha kho, bhikkhave, vepacitti asurindo sakkamaṃ devānamindaṃ etadavoca ‘bhaṇa,

devānaminda, gātha’nti. Evaṃ vutte, bhikkhave, sakko devānamindo imaṃ gāthaṃ abhāsi –

“Etadeva ahaṃ maññe, bālassa paṭisedhanaṃ;
Paraṃ saṅkupitaṃ ñatvā, yo sato upasammatī’”ti.

“Bhāsītāya kho pana, bhikkhave, sakkena devānamindena gāthāya devā anumodimsu, asurā tuṅhī ahesuṃ. Atha kho, bhikkhave, sakko devānamindo vepacittiṃ asurindaṃ etadavoca ‘bhaṇa, vepacitti, gātha’nti. Evaṃ vutte, bhikkhave, vepacitti asurindo imaṃ gāthaṃ abhāsi –

“Etadeva titikkhāya, vajjaṃ passāmi vāsava;
Yadā naṃ maññati [maññatī (sī.) passa saṃ. ni. 1.251] bālo, bhayā myāyaṃ titikkhati;
Ajjhāruhati dummedho, gova bhiyyo palāyina’”nti.

“Bhāsītāya kho pana, bhikkhave, vepacittinā asurindena gāthāya asurā anumodimsu, devā tuṅhī ahesuṃ. Atha kho vepacitti asurindo sakkaṃ devānamindaṃ etadavoca ‘bhaṇa, devānaminda, gātha’nti. Evaṃ vutte, bhikkhave, sakko devānamindo imā gāthāyo abhāsi –

“Kāmaṃ maññatu vā mā vā, bhayā myāyaṃ titikkhati;
Sadatthaparamā atthā, khantā bhiyyo na vijjati.

“Yo have balavā santo, dubbalassa titikkhati;
Tamāhu paramaṃ khantiṃ, niccaṃ khamati dubbalo.

“Abalaṃ taṃ balaṃ āhu, yassa bālabaḷaṃ balaṃ;
Balassa dhammaguttassa, paṭivattā na vijjati.

“Tasseva tena pāpiyo, yo kuddhaṃ paṭikujjhati;
Kuddhaṃ appaṭikujjhanto, saṅgāmaṃ jeti dujjayaṃ.

“Ubhinnaṃ matthaṃ carati, attano ca parassa ca;
Paraṃ saṅkupitaṃ ñatvā, yo sato upasammati.

“Ubhinnaṃ tikicchantaṃ, attano ca parassa ca;
Janā maññanti bāloti, ye dhammassa akovidā’”ti.

“Bhāsītāsu kho pana, bhikkhave, sakkena devānamindena gāthāsu devā anumodimsu, asurā tuṅhī ahesu’”nti. Idaṃ paravacanaṃ.

117. Tattha katamaṃ sakavacanañca paravacanañca?

Yañca pattaṃ yañca pattaḃbaṃ ubhayametaṃ rajānukiṇṇaṃ āturassānusikkhato. Ye ca sikkhāsārā sīlaṃ vataṃ jīvitaṃ brahmacariyaṃ upaṭṭhānasārā, ayameko anto. Ye ca evaṃvādino evaṃdiṭṭhino “natthi kāmesu doso’”ti, ayaṃ dutiyo anto. Iccete ubho antā kaṭasivaḍḍhanā kaṭasiyo diṭṭhiṃ vaḍḍhenti. Ete ubho ante anabhiññāya olīyanti eke atidhāvanti eketi. Idaṃ paravacanaṃ.

Ye ca kho te ubho ante abhiññāya tatra ca na ahesuṃ, tena ca amaññimsu, vaṭṭaṃ tesam natthi paññāpanāyāti. Idaṃ sakavacanaṃ. Ayaṃ udāno sakavacanañca paravacanañca.

Rājā pasenadi [passenadi (ka.) passa saṃ. ni. 1.113] kosalo bhagavantaṃ etadavoca – idha mayhaṃ, bhante, rahogatassa paṭisallīnassa evaṃ cetaso parivitaḃko udapādi “kesaṃ nu kho piyo attā,

kesaṃ appiyo attā’ ti. Tassa mayhaṃ, bhante, etadahosi “ye ca kho keci kāyena duccharitaṃ caranti, vācāya duccharitaṃ caranti, manasā duccharitaṃ caranti, tesam appiyo attā. Kiñcāpi te evaṃ vadeyyuṃ ‘piyo no attā’ ti, atha kho tesam appiyo attā. Taṃ kissa hetu? Yaṃ hi appiyo appiyassa kareyya, taṃ te attanāva attano karonti, tasmā tesam appiyo attā. Ye ca kho keci kāyena sucaritaṃ caranti, vācāya sucaritaṃ caranti, manasā sucaritaṃ caranti, tesam piyo attā. Kiñcāpi te evaṃ vadeyyuṃ ‘appiyo no attā’ ti, atha kho tesam piyo attā. Taṃ kissa hetu? Yaṃ hi piyo piyassa kareyya. Taṃ te attanāva attano karonti. Tasmā tesam piyo attā’ ti.

“Evametaṃ, mahārāja, evametaṃ, mahārāja, ye hi keci, mahārāja, kāyena duccharitaṃ caranti, vācāya duccharitaṃ caranti, manasā duccharitaṃ caranti tasmā tesam appiyo attā. Kiñcāpi te evaṃ vadeyyuṃ ‘piyo no attā’ ti, atha kho tesam appiyo attā. Taṃ kissa hetu? Yaṃ hi, mahārāja, appiyo appiyassa kareyya, taṃ te attanāva attano karonti, tasmā tesam appiyo attā. Ye ca kho keci mahārāja kāyena sucaritaṃ caranti, vācāya sucaritaṃ caranti, manasā sucaritaṃ caranti, tesam piyo attā. Kiñcāpi te evaṃ vadeyyuṃ ‘appiyo no attā’ ti, atha kho tesam piyo attā. Taṃ kissa hetu? Yaṃ hi, mahārāja, piyo piyassa kareyya, taṃ te attanāva attano karonti, tasmā tesam piyo attāti. Idamavoca bhagavā...pe... satthā –

“Attānañce piyaṃ jaññā, na naṃ pāpena saṃyuje;
Na hi taṃ sulabhaṃ hoti, sukhaṃ dukkaṭakārinā.

“Antakenādhipannassa [maraṇenābhībhūtaṃ (ka.) passa saṃ. ni. 1.115], jahato mānuṣaṃ bhavaṃ;
Kiṃ hi tassa sakaṃ hoti, kiñca ādāya gacchati;
Kiñcassa anugaṃ hoti, chāyāva anapāyinī.

“Ubho puññañca pāpañca, yaṃ macco kurute idha;
Tañhi tassa sakaṃ hoti, taṃva ādāya gacchati;
Taṃvassa anugaṃ hoti, chāyāva anapāyinī.

“Tasmā kareyya kalyāṇaṃ, nicayaṃ samparāyikaṃ;
Puññaṇi paralokasmiṃ, patiṭṭhā honti pāṇina’ nti.

Idaṃ suttaṃ paravacanaṃ. Anugīti sakavacanaṃ. Idaṃ sakavacanañca paravacanañca.

118. Tattha katamaṃ visajjanīyaṃ?

Pañhe pucchite idaṃ abhiññeyyaṃ, idaṃ pariññeyyaṃ, idaṃ pahātabbaṃ, idaṃ bhāvetabbaṃ, idaṃ sacchikātabbaṃ, ime dhammā evaṃgahitā idaṃ phalaṃ nibbattayanti. Tesam evaṃgahitānaṃ ayamatto iti idaṃ visajjanīyaṃ. “Uḷāro buddho bhagavā’ ti buddhauḷāraṭaṃ dhammasvākkhātataṃ saṅghasuppaṭipattiñca ekaṃseneva niddise. “Sabbe saṅkhārā aniccā’ ti “sabbe saṅkhārā dukkhā’ ti “sabbe dhammā anattā’ ti ekaṃseneva niddise. Yaṃ vā panaññampi evaṃ jātiyaṃ. Idaṃ visajjanīyaṃ.

Tattha katamaṃ avisajjanīyaṃ?

“Ākaṅkhato te naradammasārathi [naradammasārathī (sī.)], devā manussā manasā vicintitaṃ;
Sabbe na jaññā kasiṇāpi pāṇino, santaṃ samādhiṃ araṇaṃ nisevato;
Kintaṃ bhagavā ākaṅkhatī’ ti.

Idaṃ avisajjanīyaṃ.

Ettako bhagavā sīlakkhandhe samādhiikkhandhe paññākkhandhe vimuttikkhandhe

vimuttiñāṇadassanakkhandhe iriyāyaṃ pabhāve hitesitāyaṃ karuṇāyaṃ iddhiyanti. Idam avisajjanīyaṃ.

“Tathāgatassa, bhikkhave, arahato sammāsambuddhassa loke uppādā tiṇṇaṃ ratanānaṃ uppādo buddharatanassa dhammaratanassa saṅgharatanassa”. Kiṃ pamāṇāni tīṇi ratanānīti? Idam avisajjanīyaṃ.

Buddhavisayo avisajjanīyo. Puggalaparoparaññutā avisajjanīyā. “Pubbā, bhikkhave, koṭi na paññāyati avijjānīvaraṇānaṃ sattānaṃ taṇhāsamojjanānaṃ sakimṃ nirayaṃ sakimṃ tiracchāyoniṃ sakimṃ pettivisayaṃ sakimṃ asurayoniṃ sakimṃ deve sakimṃ manusse sandhāvitaṃ saṃsaritaṃ”. Katamā pubbā koṭīti avisajjanīyaṃ. Na paññāyatīti sāvakanāṃ ñāṇavekallena. Duvidhā buddhānaṃ bhagavantānaṃ desanā attūpanāyikā ca parūpanāyikā ca. Na paññāyatīti parūpanāyikā. Natthi buddhānaṃ bhagavantānaṃ avijānanāti [appajānanāti (sī.)] attūpanāyikā. Yathā bhagavā kokālikaṃ bhikkhuṃ ārabba aññataraṃ bhikkhuṃ evamāha –

“Seyyathāpi, bhikkhu, vīsatickhāriko kosalako tilavāho...pe... na tveva eko abbudo nirayo. Seyyathāpi bhikkhu, vīsati abbudā nirayā, evameko nirabbudo nirayo [nirabbudanirayo (saṃ. ni. 1.181)]. Seyyathāpi, bhikkhu, vīsati nirabbudā nirayā, evameko ababo nirayo. Seyyathāpi, bhikkhu, vīsati ababā nirayā, evameko aṭaṭo nirayo. Seyyathāpi, bhikkhu, vīsati aṭaṭā nirayā, evameko ahaho nirayo. Seyyathāpi, bhikkhu, vīsati ahahā nirayā, evameko kumudo nirayo. Seyyathāpi, bhikkhu, vīsati kumudā nirayā, evameko sogandhiko nirayo. Seyyathāpi, bhikkhu, vīsati sogandhikā nirayā, evameko uppalako nirayo [uppalanirayo (saṃ. ni. 1.181)]. Seyyathāpi, bhikkhu, vīsati uppalakā nirayā, evameko puṇḍarīko nirayo. Seyyathāpi, bhikkhu, vīsati puṇḍarīkā nirayā, evameko padumo nirayo. Padume pana, bhikkhu, niraye kokālikaṃ bhikkhu upapanno sārīputtamoggallānesu cittaṃ āghātetvā”ti. Yaṃ vā pana kiñci bhagavā āha “ayaṃ appameyyo asaṅkhyeyo”ti. Sabbam taṃ avisajjanīyaṃ. Idam avisajjanīyaṃ.

119. Tattha katamaṃ visajjanīyañca avisajjanīyañca, yadā so upako ājīvako bhagavantaṃ āha “kuhiṃ, āvuso gotama, gamissasi”ti. Bhagavā āha –

“Bārāṇasiṃ gamissāmi, ahaṃ taṃ amatadundubhiṃ;
Dhammacakkaṃ pavattetuṃ, loke appaṭivattiya”nti.

Upako ājīvako āha “‘jino’ti kho āvuso, bho gotama, paṭijānāsī”ti. Bhagavā āha –

“Mādisā ve jinā [jinā ve mādisā (sī. ka.) passa ma. ni. 2.341] honti, ye pattā āsavakkhayaṃ;
Jitā me pāpakā dhammā, tasmāhaṃ upakā jino”ti.

Kathaṃ jino kena jinoti visajjanīyaṃ. Katamo jinoti avisajjanīyaṃ. Katamo āsavakkhayaṃ, rāgakkhayaṃ dosakkhayaṃ mohakkhayaṃ visajjanīyaṃ. Kittako āsavakkhayaṃ visajjanīyaṃ. Idam visajjanīyañca avisajjanīyañca.

Atthi tathāgatoti visajjanīyaṃ. Atthi rūpanti visajjanīyaṃ. Rūpaṃ tathāgatoti avisajjanīyaṃ. Rūpavā tathāgatoti avisajjanīyaṃ. Rūpe tathāgatoti avisajjanīyaṃ. Tathāgate rūpanti avisajjanīyaṃ. Evaṃ atthi vedanā...pe... saññā...pe... saṅkhārā...pe... atthi viññānanti visajjanīyaṃ. Viññānaṃ tathāgatoti avisajjanīyaṃ. Viññānavā tathāgatoti avisajjanīyaṃ. Viññāne tathāgatoti avisajjanīyaṃ. Tathāgate viññānanti avisajjanīyaṃ. Aññatra rūpena tathāgatoti avisajjanīyaṃ. Aññatra vedanāya...pe... saññāya...pe... saṅkhārehi...pe... viññānena tathāgatoti avisajjanīyaṃ. Ayaṃ so tathāgato arūpako...pe... avedanako...pe... asaññako...pe... asaṅkhārako...pe... aviññānakoti avisajjanīyaṃ. Idam visajjanīyañca avisajjanīyañca.

Passati bhagavā dibbena cakkhunā visuddhena atikkantamānusakena satte cavamāne upapajjamāne

evaṃ sabbam...pe... yathākammūpage satte pajānātīti visajjanīyaṃ. Katame sattā, katamo tathāgatoti avisajjanīyaṃ. Idaṃ visajjanīyañca avisajjanīyañca.

Atthi tathāgatoti visajjanīyaṃ. Atthi tathāgato paraṃ maraṇāti avisajjanīyaṃ. Idaṃ visajjanīyañca avisajjanīyañca.

120. Tattha katamaṃ kammaṃ?

“Antakenādhīpannessa, jahato mānusaṃ bhavaṃ;
Kiṃ hi tassa sakaṃ hoti, kiñca ādāya gacchati;
Kiñcassa anugaṃ hoti, chāyāva anapāyiniṃ.

“Ubho puññañca pāpañca, yaṃ macco kurute idha;
Tañhi tassa sakaṃ hoti, taṃva [tañca (sī. ka.) passa saṃ. ni. 1.115] ādāya gacchati;
Taṃvassa anugaṃ hoti, chāyāva anapāyiniṃ”ti.

Idaṃ kammaṃ.

“Puna caparaṃ, bhikkhave, bālaṃ pīṭhasamārūḷhaṃ vā mañcasamārūḷhaṃ vā chamāyaṃ [chamāya (sī. ka.) passa ma. ni. 3.248] vā semānaṃ yānissa pubbe pāpakāni kammāni katāni kāyena duccharitāni vācāya duccharitāni manasā duccharitāni, tānissa tamhi samaye olambanti ajjholambanti abhippalambanti. Seyyathāpi, bhikkhave, mahataṃ pabbatakūṭānaṃ chāyā sāyanhasamayāṃ pathaviyaṃ olambanti ajjholambanti abhippalambanti. Evameva kho, bhikkhave, bālaṃ pīṭhasamārūḷhaṃ vā mañcasamārūḷhaṃ vā chamāyaṃ vā semānaṃ yānissa pubbe pāpakāni kammāni katāni kāyena duccharitāni vācāya duccharitāni manasā duccharitāni, tānissa tamhi samaye olambanti ajjholambanti abhippalambanti. Tatra, bhikkhave, bālassa evaṃ hoti ‘akataṃ vata me kalyāṇaṃ, akataṃ kusalaṃ, akataṃ bhīruttānaṃ. Kataṃ pāpaṃ, kataṃ luddaṃ, kataṃ kibbisaṃ, yāvatā bho akatakalyāṇānaṃ akatakusalānaṃ akatabhīruttānaṃ katapāpānaṃ kataluddānaṃ katakibbisānaṃ gati, taṃ gatiṃ pecca gacchāmi”ti, so socati kilamati paridevati urattāḷiṃ kandati sammohaṃ āpajjati”ti.

“Puna caparaṃ, bhikkhave, paṇḍitaṃ pīṭhasamārūḷhaṃ vā mañcasamārūḷhaṃ vā chamāyaṃ vā semānaṃ yānissa pubbe kalyāṇāni kammāni katāni kāyena succharitāni vācāya succharitāni manasā succharitāni, tānissa tamhi samaye olambanti ajjholambanti abhippalambanti. Seyyathāpi, bhikkhave, mahataṃ pabbatakūṭānaṃ chāyā sāyanhasamayāṃ pathaviyaṃ olambanti ajjholambanti abhippalambanti. Evameva kho, bhikkhave, paṇḍitaṃ pīṭhasamārūḷhaṃ vā mañcasamārūḷhaṃ vā chamāyaṃ vā semānaṃ yānissa pubbe kalyāṇāni kammāni katāni kāyena succharitāni vācāya succharitāni manasā succharitāni, tānissa tamhi samaye olambanti ajjholambanti abhippalambanti. Tatra, bhikkhave, paṇḍitassa ‘evaṃ hoti akataṃ vata me pāpaṃ, akataṃ luddaṃ, akataṃ kibbisaṃ. Kataṃ kalyāṇaṃ, kataṃ kusalaṃ, kataṃ bhīruttānaṃ, yāvatā bho akatapāpānaṃ akataluddānaṃ akatakibbisānaṃ katakalyāṇānaṃ katakusalānaṃ katabhīruttānaṃ gati, taṃ gatiṃ pecca gacchāmi”ti, so na socati na kilamati na paridevati na urattāḷiṃ kandati na sammohaṃ āpajjati, ‘kataṃ me puññaṃ, akataṃ pāpaṃ, yā bhavissati gati akatapāpassa akataluddassa akatakibbisassa katapuññaṃ katakusalassa katabhīruttānaṃ, taṃ pecca bhava gatiṃ paccanubhavissāmi”ti vippaṭṭisāro na jāyati. Avippaṭṭisāro kho, bhikkhave, itthiyā vā purisassa vā gihino vā pabbajitassa vā bhaddakaṃ maraṇaṃ bhaddikā kālāṅkiriyāti vadāmi”ti. Idaṃ kammaṃ.

“Tīṇimāni, bhikkhave, duccharitāni. Katamāni tīṇi, kāyaduccharitaṃ vacīduccaritaṃ manoduccharitaṃ. Imāni kho, bhikkhave, tīṇi duccharitāni. Tīṇimāni, bhikkhave, succharitāni. Katamāni tīṇi? Kāyasuccharitaṃ vacīsuccharitaṃ manosuccharitaṃ. Imāni kho, bhikkhave, tīṇi succharitāni. Idaṃ kammaṃ.

Tattha katamo vipāko?

“Lābhā vo, bhikkhave, suladdhaṃ vo, bhikkhave, khaṇo vo, bhikkhave, paṭiladdho brahmacariyavāsāya. Diṭṭhā mayā, bhikkhave, cha phassāyatanikā nāma nirayā. Tattha yaṃ kiñci cakkhunā rūpaṃ passati aniṭṭharūpaṃ passati, no iṭṭharūpaṃ. Akantarūpaṃ passati, no kantarūpaṃ. Amanāparūpaṃ passati, no manāparūpaṃ.

Yaṃ kiñci sotena saddaṃ suṇāti...pe... ghānena...pe... jivhāya...pe... kāyena...pe... yaṃ kiñci manasā dhammaṃ vijānāti aniṭṭhadhammaṃ passati, no iṭṭhadhammaṃ. Akantadhammaṃ passati, no kantadhammaṃ. Amanāpadhammaṃ passati, no manāpadhammaṃ. Lābhā vo, bhikkhave, suladdhaṃ vo, bhikkhave, khaṇo vo, bhikkhave, paṭiladdho brahmacariyavāsāya.

“Diṭṭhā mayā, bhikkhave, cha phassāyatanikā nāma saggā. Tattha yaṃ kiñci cakkhunā rūpaṃ passati iṭṭharūpaṃ passati, no aniṭṭharūpaṃ. Kantarūpaṃ passati, no akantarūpaṃ. Manāparūpaṃ passati, no amanāparūpaṃ. Yaṃ kiñci sotena saddaṃ suṇāti...pe... ghānena ...pe... jivhāya...pe... kāyena...pe... manasā dhammaṃ vijānāti iṭṭhadhammaṃ passati, no aniṭṭhadhammaṃ. Kantadhammaṃ passati, no akantadhammaṃ. Manāpadhammaṃ passati, no amanāpadhammaṃ. Lābhā vo, bhikkhave, suladdhaṃ vo, bhikkhave, khaṇo vo, bhikkhave, paṭiladdho brahmacariyavāsāya”ti. Ayaṃ vipāko.

“Saṭṭhivassasahassāni, paripuṇṇāni sabbaso;
Niraye paccamānaṃ [[paccamānassa \(ka.\) passa pe. va. 802](#)], kadā anto bhavissati.

“Natthi anto kuto anto, na anto paṭidissati [[patidissati \(sī.\) jā. 1.4.55](#)];
Tadā hi pakataṃ pāpaṃ, tuyhaṃ mayhañca mārisā”ti.

Ayaṃ vipāko.

121. Tattha katamaṃ kammañca vipāko ca?

“Adhammacārī hi naro pamatto, yaḥiṃ yaḥiṃ gacchati duggatiṃ yo;
So naṃ adhammo carito hanāti, sayaṃ gahīto yathā kaṇhasappo.

“Na hi [[passa theragā. 304](#)] dhammo adhammo ca, ubho samavipākino;
Adhammo nirayaṃ neti, dhammo pāpeti suggati”nti.

Idaṃ kammañca vipāko ca.

“Mā, bhikkhave, puññānaṃ bhāyittha, sukhassetaṃ, bhikkhave, adhivacanaṃ iṭṭhassa kantassa piyassa manāpassa yadidaṃ puññāni. Abhijānāmi kho panāhaṃ, bhikkhave, dīgharattaṃ katānaṃ puññānaṃ iṭṭhaṃ [[dīgharattaṃ iṭṭhaṃ \(sī. ka.\) passa itivu. 22](#)] kantaṃ piyaṃ manāpaṃ vipākaṃ paccanubhūtaṃ, satta vassāni mettacittaṃ bhāvetvā satta saṃvaṭṭavivaṭṭakappe na imaṃ [[na yimaṃ \(itivu. 22\)](#)] lokaṃ punarāgamāsiṃ. Saṃvaṭṭamāne sudāhaṃ, bhikkhave, kappe ābhassarūpago homi. Vivaṭṭamāne kappe suññaṃ brahmavimānaṃ upapajjāmi. Tatra sudāhaṃ [[sudam \(itivu. 22\)](#)], bhikkhave, brahmā homi mahābrahmā abhibhū anabhibhūto aññadatthudaso vasavattī. Chattimsakkhattuṃ kho panāhaṃ, bhikkhave, sakko ahoṣiṃ devānamindo, anekasatakkhattuṃ rājā ahoṣiṃ cakkavattī [[cakkavatti \(ka.\)](#)] dhammiko dhammarājā caturanto vijitāvī janapadatthāvariyaṃ sattaratanasamānāgato, ko pana vādo padesarajjassa? Tassa mayhaṃ, bhikkhave, etadahosi ‘kissa nu kho me idaṃ kamma phalaṃ, kissa kamma vipāko, yenāhaṃ etarahi evaṃmahiddhiko evaṃmahānubhāvo’ti. Tassa mayhaṃ, bhikkhave, etadahosi ‘tiṇṇaṃ kho me idaṃ kamma phalaṃ, tiṇṇaṃ kamma vipāko. Yenāhaṃ etarahi evaṃmahiddhiko evaṃmahānubhāvo’ti. Seyyathidaṃ, dānassa damassa

saṃyamassā’’ti. Tattha yañca dānaṃ yo ca damo yo ca saṃyamo, idaṃ kammaṃ. Yo tappaccayā vipāko paccanubhūto, ayaṃ vipāko. Tathā cūlakammavibhaṅgo vattabbo.

Yaṃ subhassa māṇavassa todeyyaputtassa desitaṃ. Tattha ye dhammā appāyukadīghāyukatāya saṃvattanti bahvābādhaappābādhatāya appesakkhamahesakkhatāya dubbannaṣuvaṇṇatāya nīcakulikauccakulikatāya appabhogamahābhogātāya duppaññaṇṇavantaṭāya ca saṃvattanti, idaṃ kammaṃ. Yā tattha appāyukadīghāyukatā...pe... duppaññaṇṇavantaṭā, ayaṃ vipāko. Idaṃ kammañca vipāko ca.

122. Tattha katamaṃ kusalaṃ?

‘‘Vācānurakkhī manasā susaṃvuto, kāyena ca nākusalaṃ kayirā [[akusalaṃ na kayirā \(sī.\) passa dha. pa. 281](#)];

Ete tayo kammapathe visodhaye, ārādhaye maggamisippavedita’’nti.

Idaṃ kusalaṃ.

‘‘Yassa kāyena vācāya, manasā natthi dukkaṭaṃ;
Saṃvutaṃ tīhi ṭhānehi, tamahaṃ brūmi brāhmaṇa’’nti.

Idaṃ kusalaṃ.

‘‘Tīṇimāni, bhikkhave, kusalamūlāni. Katamāni tīṇi? Alobho kusalamūlaṃ, adoso kusalamūlaṃ, amoho kusalamūlaṃ. Imāni kho, bhikkhave, tīṇi kusalamūlāni. Idaṃ kusalaṃ. ‘‘Vijjā, bhikkhave [[vijjā ca kho bhikkhave \(saṃyuttanikāye\)](#)], pubbaṅgamā kusalānaṃ dhammānaṃ samāpattiyā anudeva [[anvadeva \(sī. ka.\), syādikaṇḍe \(moggallāne\) 11 suttaṃ passitabbaṃ](#)] hirī ottappañcā’’ti. Idaṃ kusalaṃ.

Tattha katamaṃ akusalaṃ?

‘‘Yassa accanta dussīlyaṃ, māluvā sālamivotthataṃ;
Karoti so tathattānaṃ, yathā naṃ icchatī diso’’ti.

Idaṃ akusalaṃ.

‘‘Attanā hi kataṃ pāpaṃ, attajaṃ attasambhavaṃ;
Abhimatthati [[abhimanthati \(sī.\) passa dha. pa. 161](#)] dummedhaṃ, vajiraṃvasmamayaṃ maṇi’’nti.

Idaṃ akusalaṃ.

‘‘Dasa kammapathe niseviya, akusalākusalehi vivajjitā;
Garahā ca bhavanti devate, bālamatī nirayesu paccare’’ti.

Idaṃ akusalaṃ.

‘‘Tīṇimāni, bhikkhave, akusalamūlāni [[passa a. ni. 3.70](#)], katamāni tīṇi? Lobho akusalamūlaṃ, doso akusalamūlaṃ, moho akusalamūlaṃ. Imāni kho, bhikkhave, tīṇi akusalamūlāni’’. Idaṃ akusalaṃ.

Tattha katamaṃ kusalañca akusalañca?

“Yādisaṃ [saṃ. ni. 1.256] vapate bījaṃ, tādisaṃ harate phalaṃ;
Kalyāṇakārī kalyāṇaṃ, pāpakārī ca pāpaka’’nti.

Tattha yaṃ āha “kalyāṇakārī kalyāṇa’’nti, idaṃ kusalaṃ. Yaṃ āha “pāpakārī ca pāpaka’’nti, idaṃ akusalaṃ. Idaṃ kusalaṇca akusalaṇca.

“Subhena kammaena vajanti suggatiṃ, apāyabhūmiṃ asubhena kammunā;
Khayā ca kammaessa vimuttacetaso, nibbanti te jotirivindhanakkhayā’’.

Tattha yaṃ āha “subhena kammaena vajanti suggati’’nti, idaṃ kusalaṃ. Yaṃ āha “apāyabhūmiṃ asubhena kammunā’’ti, idaṃ akusalaṃ. Idaṃ kusalaṇca akusalaṇca.

123. Tattha katamaṃ anuññātaṃ?

“Yathāpi bhamaro pupphaṃ, vaṇṇagandhamahetṭhayaṃ [vaṇṇagandhaṃ ahetṭhayaṃ (sī.) passa dha. pa. 49];
Paleti [paḷeti (ka.)] rasamādāya, evaṃ gāme munī care’’ti.

Idaṃ anuññātaṃ.

“Tīṇimāni, bhikkhave, bhikkhūnaṃ karaṇīyāni. Katamāni tīṇi, idha, bhikkhave, bhikkhu pātīmokkhasaṃvarasaṃvuto viharati ācāragocarasampanno aṇumattesu vajjesu bhayadassāvī, samādāya sikkhati sikkhāpadesu, kāyakammavacīkammaena samannāgato kusalena parisuddhājīvo. Āraddhavīriyo kho pana hoti thāmaṃvā dalhaparakkamo anikkhattadhuro akusalānaṃ dhammānaṃ pahānāya kusalānaṃ dhammānaṃ bhāvanāya sacchikiriyāya. Paññavā kho pana hoti udayatthagāminiyā paññāya samannāgato ariyāya nibbedhikāya sammā dukkhakkhayagāminiyā. Imāni kho, bhikkhave, bhikkhūnaṃ tīṇi karaṇīyāni’’ti. Idaṃ anuññātaṃ.

“Dasayime [dasa ime (sī. ka.) passa a. ni. 10.48], bhikkhave, dhammā pabbajitena abhiṇhaṃ paccavekkhitabbā. Katame dasa? ‘Vevaṇṇiyamhi ajjhupagato’’ti pabbajitena abhiṇhaṃ paccavekkhitabbā...pe... ime kho bhikkhave dasa dhammā pabbajitena abhiṇhaṃ paccavekkhitabbā’’ti. Idaṃ anuññātaṃ.

“Tīṇimāni, bhikkhave, karaṇīyāni. Katamāni tīṇi? Kāyasucaritaṃ vacīsucaritaṃ manosucaritanti. Imāni kho, bhikkhave, tīṇi karaṇīyāni’’ti. Idaṃ anuññātaṃ.

Tattha katamaṃ paṭikkhitaṃ?

“Natthi puttasaṃpemaṃ, natthi gosamitaṃ [goṇasaṃpemaṃ (ka.) passa saṃ. ni. 1.13]
dhanam;
Natthi sūriyasamā [suriyasamā (sī.)] ābhā, samuddaparamā sarā’’ti.

Bhagavā āha –

“Natthi attasaṃpemaṃ, natthi dhaññasamaṃ dhanam;
Natthi paññāsamaṃ ābhā, vuṭṭhiveparamā sarā’’ti.

Ettha yaṃ purimakam, idaṃ paṭikkhitaṃ.

“Tīṇimāni, bhikkhave 𑀅 akaraṇīyāni. Katamāni tīṇi? Kāyaduccaritaṃ vacīduccaritaṃ

manoduccaritanti. Imāni kho, bhikkhave, tīni akaraṇīyāni”ti. Idam paṭikkhittam.

124. Tattha katamaṃ anuññātaṃ paṭikkhitaṃ?

“Kimsūdhā bhītā janatā anekā, maggo canekāyatano pavutto [[canekāyatanappavuttā \(sam. ni. 1.75\)](#)];

Pucchāmi taṃ gotama bhūripaṇṇa, kismiṃ ṭhito paralokaṃ na bhāyeti.

“Vācam manaṃca paṇidhāya sammā, kāyena pāpāni akubbamāno;
Bahvannapānaṃ gharamāvasanto, saddho mudū saṃvibhāgī vadaññū;
Etesu dhammesu ṭhito catūsu, dhamme ṭhito paralokaṃ na bhāye”ti.

Tattha yaṃ āha “vācam manaṃca paṇidhāya sammā”ti, idam anuññātam. “Kāyena pāpāni akubbamāno”ti, idam paṭikkhittam. “Bahvannapānaṃ gharamāvasanto, saddho mudū saṃvibhāgī vadaññū. Etesu dhammesu ṭhito catūsu, dhamme ṭhito paralokaṃ na bhāye”ti, idam anuññātam. Idam anuññātaṃ paṭikkhitaṃ.

“Sabbapāpassa akaraṇam, kusalassa upasampadā;
Sacittapariyodāpanam, etaṃ buddhānasāsanam”.

Tattha yaṃ āha “sabbapāpassa akaraṇa”nti, idam paṭikkhittam, yaṃ āha “kusalassa upasampadā”ti, idam anuññātam. Idam anuññātaṃ paṭikkhitaṃ.

“Kāyasamācāraṃpāhaṃ, devānaminda, duvidhena vadāmi sevitabbampi asevitabbampi.
Vacīsamācāraṃpāhaṃ, devānaminda, duvidhena vadāmi sevitabbampi asevitabbampi.
Manosamācāraṃpāhaṃ devānaminda, duvidhena vadāmi...pe... pariyesanampāhaṃ, devānaminda,
duvidhena vadāmi sevitabbampi asevitabbampi”.

“Kāyasamācāraṃpāhaṃ, devānaminda, duvidhena vadāmi sevitabbampi asevitabbampī”ti iti kho panetaṃ vuttaṃ, kiñcetaṃ paṭicca vuttaṃ. Yathārūpaṃca kho kāyasamācāraṃ sevato akusalā dhammā abhivaḍḍhanti, kusalā dhammā parihāyanti, evarūpo kāyasamācāro na sevitabbo. Tattha yaṃ jañña kāyasamācāraṃ “[imaṃ \[idam \(ka.\) passa dī. ni. 2.364\]](#)”kho me kāyasamācāraṃ sevato akusalā dhammā parihāyanti, kusalā dhammā abhivaḍḍhanti”ti, evarūpo kāyasamācāro sevitabbo.

“Kāyasamācāraṃpāhaṃ devānaminda, duvidhena vadāmi sevitabbampi asevitabbampī”ti iti yaṃ taṃ vuttaṃ, idametaṃ paṭicca vuttaṃ. “Vacīsamācāraṃ...pe... “pariyesanampāhaṃ, devānaminda, duvidhena vadāmi sevitabbampi asevitabbampī”ti iti kho panetaṃ vuttaṃ, kiñcetaṃ paṭicca vuttaṃ. Yathārūpaṃca kho pariyesanaṃ sevato akusalā dhammā abhivaḍḍhanti, kusalā dhammā parihāyanti, evarūpā pariyesanā na sevitabbā. Tattha yaṃ jañña pariyesanaṃ “[imaṃ](#)”kho me pariyesanaṃ sevato akusalā dhammā parihāyanti, kusalā dhammā abhivaḍḍhanti”ti, evarūpā pariyesanā sevitabbā. “Pariyesanampāhaṃ, devānaminda, duvidhena vadāmi sevitabbampi asevitabbampī”ti iti yaṃ taṃ vuttaṃ, idametaṃ paṭicca vuttaṃ.

Tattha yaṃ āha “sevitabbampī”ti, idam anuññātam. Yaṃ āha “na sevitabbampī”ti, idam paṭikkhittam. Idam anuññātaṃ paṭikkhitaṃ.

170. Tattha katamo thavo?

“Maggaṇaṭṭhaṅgiko [[passa dha. pa. 273](#)] seṭṭho, saccānaṃ caturo padā;
Virāgo seṭṭho dhammaṇaṃ, dvipadānaṃca cakkhumā”ti.

Ayaṃ thavo.

“Tīṇimāni, bhikkhave, aggāni. Katamāni tīṇi? Yāvata, bhikkhave, sattā apadā vā dvipadā vā catuppadā vā bahuppadā vā rūpino vā arūpino vā saññino vā asaññino vā nevasaññīnāsaññino vā, tathāgato tesam aggamakkhāyati seṭṭhamakkhāyati pavaramakkhāyati, yadidaṃ araham sammāsambuddho. Yāvata, bhikkhave, dhammānaṃ [a. ni. 4.34; itivu. 81 passitabbaṃ] paṇṇattisaṅkhatānaṃ vā asaṅkhatānaṃ vā, virāgo tesam dhammānaṃ aggamakkhāyati seṭṭhamakkhāyati pavaramakkhāyati, yadidaṃ madanimmadano...pe... nirodho nibbānaṃ. Yāvata, bhikkhave, saṅghānaṃ paṇṇatti gaṇānaṃ paṇṇatti mahājanasannipātānaṃ paṇṇatti, tathāgatasāvakaśaṅgho tesam aggamakkhāyati seṭṭhamakkhāyati pavaramakkhāyati, yadidaṃ cattāri purisayugāni aṭṭha purisapuggalā...pe... puññakkhettaṃ lokassāti.

“Sabbalokuttaro satthā, dhammo ca kusalakkhato [kusalamakkhato (ka.)];
Gaṇo ca naraśiḥassa, tāni tīṇi vississare.

“Samaṇapadumasañcayo gaṇo, dhammavaro ca vidūnaṃ sakkato;
Naravaradamako ca cakkhumā, tāni tīṇi lokassa uttari.

“Satthā ca appaṭisamo, dhammo ca sabbo nirupadāho;
Ariyo ca gaṇavaro, tāni khalu vississare tīṇi.

“Saccanāmo jino khemo sabbābhībhū, saccadhammo natthañño tassa uttari;
Ariyaśaṅgho niccaṃ viññūnaṃ pūjito, tāni tīṇi lokassa uttari.

“Ekāyanaṃ jātikhayantadassī, maggaṃ pajānāti hitānukampī;
Etena maggena tariṃsu pubbe, tarissanti ye ca [ye cāpi (sī. ka.) passa saṃ. ni. 5.384] taranti oghaṃ.

“Taṃ tādisaṃ devamanussaseṭṭhaṃ;
Sattā namassanti visuddhipekkaḥ”ti.

Ayaṃ thavoti.

Tattha lokiyaṃ suttaṃ dvīhi suttehi niddisitabbaṃ saṃkilesabhāgiyena ca vāsanābhāgiyena ca. Lokuttaraṃpi suttaṃ tīhi suttehi niddisitabbaṃ dassanabhāgiyena ca bhāvanābhāgiyena ca asekkhabhāgiyena ca. Lokiyañca lokuttarañca. Yasmiṃ sutte yaṃ yaṃ padaṃ dissati saṃkilesabhāgiyaṃ vā vāsanābhāgiyaṃ vā, tena tena lokiyanti niddisitabbaṃ, dassanabhāgiyaṃ vā bhāvanābhāgiyaṃ vā asekkhabhāgiyaṃ vā yaṃ yaṃ padaṃ dissati tena tena lokuttaranti niddisitabbaṃ.

Vāsanābhāgiyaṃ suttaṃ saṃkilesabhāgiyassa suttassa nigghātāya, dassanabhāgiyaṃ suttaṃ vāsanābhāgiyassa suttassa nigghātāya, bhāvanābhāgiyaṃ suttaṃ dassanabhāgiyassa suttassa paṭinissaggāya, asekkhabhāgiyaṃ suttaṃ bhāvanābhāgiyassa suttassa paṭinissaggāya, asekkhabhāgiyaṃ suttaṃ diṭṭhadhammasukhavihāratthaṃ.

Lokuttaraṃ suttaṃ sattādhiṭṭhānaṃ chabbīsatiyā puggalehi niddisitabbaṃ, te tīhi suttehi samanvesitabbā dassanabhāgiyena bhāvanābhāgiyena asekkhabhāgiyena cāti.

Tattha dassanabhāgiyaṃ suttaṃ pañcahi puggalehi niddisitabbaṃ ekabjīnā kolaṃkolena sattakkhattuparamena saddhānusārinā dhammānusārinā cāti, dassanabhāgiyaṃ suttaṃ imehi pañcahi puggalehi niddisitabbaṃ. Bhāvanābhāgiyaṃ suttaṃ dvādasahi puggalehi niddisitabbaṃ sakadāgāmiḥphalasaṅkīriyāya paṭipannena, sakadāgāminā, anāgāmiḥphalasaṅkīriyāya paṭipannena, anāgāminā, antarā parinibbāyinā, upahacca parinibbāyinā, asaṅkhāraparinibbāyinā, sasāṅkhāraparinibbāyinā, uddhamṣotena akaniṭṭhagāminā, saddhāvimuttana, diṭṭhippattena,

kāyasakkhinā cāti, bhāvanābhāgiyaṃ suttaṃ imehi dvādasahi puggalehi niddisitabbaṃ. Asekkhabhāgiyaṃ suttaṃ navahi puggalehi niddisitabbaṃ saddhāvimuttana, paññāvimuttana, suññatavimuttana, animittavimuttana, appaṇihitavimuttana, ubhatobhāgavimuttana samasīsinā paccekabuddhasammāsambuddhehi cāti, asekkhabhāgiyaṃ suttaṃ imehi navahi puggalehi niddisitabbaṃ. Evaṃ lokuttaraṃ suttaṃ sattādhiṭṭhānaṃ imehi chabbīsatiyā puggalehi niddisitabbaṃ.

Lokiyaṃ suttaṃ sattādhiṭṭhānaṃ ekūnavīsatiyā puggalehi niddisitabbaṃ. Te caritehi niddiṭṭhā samanvesitabbā keci rāgacaritā, keci dosacaritā, keci mohacaritā, keci rāgacaritā ca dosacaritā ca, keci rāgacaritā ca mohacaritā ca, keci dosacaritā ca mohacaritā ca, keci rāgacaritā ca dosacaritā ca mohacaritā ca, rāgamukhe ṭhito rāgacarito, rāgamukhe ṭhito dosacarito, rāgamukhe ṭhito mohacarito, rāgamukhe ṭhito rāgacarito ca dosacarito ca mohacarito ca, dosamukhe ṭhito dosacarito, dosamukhe ṭhito mohacarito, dosamukhe ṭhito rāgacarito, dosamukhe ṭhito rāgacarito ca dosacarito ca mohacarito ca, mohamukhe ṭhito mohacarito, mohamukhe ṭhito rāgacarito mohamukhe ṭhito dosacarito, mohamukhe ṭhito rāgacarito ca dosacarito ca mohacarito cāti, lokiyaṃ suttaṃ sattādhiṭṭhānaṃ imehi ekūnavīsatiyā puggalehi niddisitabbaṃ.

Vāsanābhāgiyaṃ suttaṃ sīlavantehi niddisitabbaṃ, te sīlavanto pañca puggalā pakatisīlaṃ samādānasīlaṃ cittappasādo samatho vipassanā cāti, vāsanābhāgiyaṃ suttaṃ imehi pañcahi puggalehi niddisitabbaṃ.

Lokuttaraṃ suttaṃ dhammādhiṭṭhānaṃ tīhi suttehi niddisitabbaṃ dassanabhāgiyena bhāvanābhāgiyena asekkhabhāgiyena ca.

Lokiyañca lokuttarañca sattādhiṭṭhānañca dhammādhiṭṭhānañca ubhayena niddisitabbaṃ, ñāṇaṃ paññāya niddisitabbaṃ paññindriyena paññābalena adhipaññāsikkhāya dhammavicayasambojjhaṅgena sammādiṭṭhiyā tīraṇāya santīraṇāya dhamme ñāṇena anvaye ñāṇena khaye ñāṇena anuppāde ñāṇena anaññātaññassāmītindriyena aññindriyena aññātāvindriyena cakkhunā vijjāya buddhiyā bhūriyā medhāya, yaṃ yaṃ vā pana labbhati, tena tena paññādhivacanena niddisitabbaṃ.

Ñeyyaṃ atītānāgatapaccuppannehi ajjhattikabāhirehi hīnappaṇṭehi dūrasantikehi saṅkhatāsaṅkhathehi kusalākusalābyākatehi saṅkhepato vā chahi ārammaṇehi niddisitabbaṃ. Ñāṇaṃ ñeyyañca tadubhayena niddisitabbaṃ, paññāpi ārammaṇabhūtā ñeyyaṃ, yaṃ kiñci ārammaṇabhūtaṃ ajjhattikaṃ vā bāhiraṃ vā, sabbaṃ taṃ saṅkhatena asaṅkhatena ca niddisitabbaṃ.

Dassanaṃ bhāvanā [dassanā bhāvanā (sī.)] sakavacanaṃ paravacanaṃ visajjanīyaṃ avisajjanīyaṃ kammaṃ vipākoti sabbattha tadubhayaṃ sutte yathā niddiṭṭhaṃ, tathā upadhārayitvā labbhamānato niddisitabbaṃ, yaṃ vā pana kiñci bhagavā aññataravacanaṃ bhāsati, sabbaṃ taṃ yathāniddiṭṭhaṃ dhārayitabbaṃ.

Duvidho hetu yañca kammaṃ ye ca kilesā, samudayo kilesā. Tattha kilesā saṃkilesabhāgiyena suttana niddisitabbā. Samudayo saṃkilesabhāgiyena ca vāsanābhāgiyena ca suttana niddisitabbo. Tattha kusalaṃ catūhi suttehi niddisitabbaṃ vāsanābhāgiyena dassanabhāgiyena bhāvanābhāgiyena asekkhabhāgiyena ca. Akusalaṃ saṃkilesabhāgiyena suttana niddisitabbaṃ. Kusalañca akusalañca tadubhayena [tadubhayehi (sī.)] niddisitabbaṃ. Anuññātaṃ bhagavato anuññātāya niddisitabbaṃ, taṃ pañcavidhaṃ saṃvaro pahānaṃ bhāvanā sacchikiriyaṃ kappiyānulomoti, yaṃ dissati tāsū tāsū bhūmīsū, taṃ kappiyānulomena niddisitabbaṃ. Paṭikkhittaṃ bhagavatā paṭikkhittakāraṇena niddisitabbaṃ. Anuññātañca paṭikkhittañca tadubhayena niddisitabbaṃ. Thavo pasamsāya niddisitabbo. So pañcavidhena veditabbo bhagavato dhammassa ariyasāṅghassa ariyadhammaṃ sikkhāya lokiyaguṇasampattiyaṃ. Evaṃ thavo pañcavidhena niddisitabbo.

Indriyabhūmi navahi padehi niddisitabbā, kilesabhūmi navahi padehi niddisitabbā, evametāni

aṭṭhārasa padāni honti nava padāni kusalāni nava padāni akusalānīti, tathāhi vuttaṃ ‘‘aṭṭhārasa mūlapadā kuhiṃ daṭṭhabbā, sāsanaṭṭhāne’’ti. Tenāha āyasmā mahākaccāyano –

‘‘Navahi ca padehi kusalā, navahi ca yujjanti akusalappakkhā;
Ete khalu mūlapadā, bhavanti aṭṭhārasa padāni’’ti.

Niyuttaṃ sāsanaṭṭhānaṃ.

Ettāvatā samattā netti yā āyasmatā mahākaccāyanena bhāsītā bhagavatā anumoditā mūlasaṅgītiyaṃ saṅgītāti.

Nettipakaraṇaṃ niṭṭhitaṃ.